

63012/B



Charles M. Dingley #

The Library of the
Wellcome Institute for
the History of Medicine

MEDICAL SOCIETY
OF
LONDON
DEPOSIT

Accession Number

Press Mark

PITCAIRNE, A.
Opera omnia. 1722
Vol. 2 (imperfect)

Jan 15

$\frac{g}{a.7}$

w5

L. 9. 17

ARCHIBALDI PITCARNII,
SCOTO-BRITANNI,
DISSERTATIONES
MEDICAE.

Quibus subjunguntur
EPISTOLA ARCHIMEDIS,
ET
POEMATATA SELECTA,
Ejusdem Auctoris.

EDITIO QUARTA,

Ad exemplar Edinburgense recognita.

SOCIETY OF LONDON MEDICAL



HAGAE COMITUM,
Apud HENRICUM SCHEURLEER.
M D C C XXII.

ARCHIBALD PATERN

SCOTO-BRITANNI

DISSERTATIONES

MEDICAE.

DISPOSITIO

EPISTOLA ARCHIMEDIS


ET

POEMATA SELECTA

AVTHORIS

EDITIO QUARTA

ADUSCULUM



HABET COMITUM

ABUS HENRICUM SCHNEIDER

MDCCLXII



LECTOR.

Habes Dissertationes meas, quarum aliquot nunc primum eduntur.

Subjuncta est epistola insignis & Mathematici, & Amici THOMAE BOERI, Scoti, in Academia nobili Abredonensi Matheseos Professoris, & Medicinae Doctoris; in qua respondetur ASTRUCIO, Franco. Judicium de hac re infero JACOBI GREGORII, Matheseos in Academia Edinburgensi Professoris optimi: quod sic accipe.

Scribit ad me GREGORIUS:

Videtur mihi ASTRUCIUS argumento uti, quali in scholis Metaphysicorum, sive Sophistarum celebrem se jamdudum fecerat.

Si serio scribit, quod temere non crediderim, multa alia de contractione & compressione sentit, quam viri cordati sentiunt. Nam, agnoscit fibra circulari contracta partes ejus omnes ad centrum accedere: negat tamen, fibram ullam ea premere, quae ipsam inter atque centrum sita occurrunt. Nobis patet, quod si fibra circularis contrahatur in partem dimidiam suae longitudinis, comprimere debet quicquid inter se centrumque occurrit; comprimere, inquam, in spatii quadrantem. Postquam ASTRUCIUS comprimentes vires sustulerat, contrahentes etiam debebat abigere, suoque argumento evincere, fibrae circulari contractionem nullam posse contingere. Hoc negotium sic exsequetur ASTRUCIUS.

L E C T O R I.

Nullum est in circularis fibrae circumferentia punctum, quod non aequali vi attrahatur ad utrumque latus; [secundum circumferentiae directionem,] sed, nec a centro, nec ad centrum attrahitur; quia arcus vicinissimi & infinite parvi, qui punctum illud attrahunt, attrahunt per angulos ad diametrum rectos. Quapropter, nullum est punctum in circumferentia circularis fibrae, quod possit moveri; hoc est, illam fibram non posse contrahi. Q. E. D.

Assumit ASTRUCIUS circumferentiae circularis particulam a rectula non diversam, quamque contractam evadere jubet in rectulam minorem, neque ad centrum descendere, neque ab eo recedere conantem. At, Geometrae polygonum ordinatum assumunt, cujus latera rectulae sint, quas contractas mutari oportet in polygonum simile minus, cujus latera proinde fient centro propiora in ratione contractionum.

Haec meus GREGORIUS.

Ego Libellum ASTRUCII non vocem annales Volusi, sive cacatam chartam; quia mihi videtur, ASTRUCIUS nunquam cacasse; alioquin sensisset, musculos abdominis & se contrahere, & alia exprimere posse.

Sive faveant hisce meis ROBERTUS GRAIUS & JOANNES ARBUTHNOTUS, Scoti illi AEscupulapii; atque HECQUETUS, ille Parisiensis opifer, aliorum Judicia non morabor; BELLINIUS enim ad Deos abiit.

Nonnulla dissertationibus hisce barbara irrepsere vocabula, CELSOQUE non nota, quae consuetudo, Latinique sermonis egestas Medicis jamdudum familiaria reddidit atque propemodum necessaria.

Dabam Edinburgi, 10 Junii

CIO IO CCXI II.

ARCHI-



ARCHIBALDI PITCARNII ORATIO,

*qua ostenditur Medicinam ab omni
Philosophorum Secta esse liberam.*



Eminem existimo aegre laturum si ego ad Medicinam docendam ab Illustrissimis hujus Academiae Curatoribus evocatus, posthabita omni gratia & odio, Auditores meos libere monuerim, quibus potissimum artibus effectum sit, ut Medicina tot eruditorum conatus & studia tamdiu eluserit, quibusque viribus oporteat eniti, ut illa in optatum fastigium educi, vitaque mortalium, qua quidem hominibus & per homines licet, in tuto possit collocari.

Hanc enim libertatem officii mei ratio postulat, consuetudo mea mihi gratissimam & fere necessariam reddit, & inclyta haec libertatisque servantissima Respublica periculo vacuam esse jubet.

§. 2. Ut itaque libere eloquar quae sentio, videtur mihi medendi peritia studio philosophico esse haud paullo antiquior: quippe, cum homines pro se quisque corporis aut animi gratia & mederi & philosophari coeperint, medendi tamen perpetuae, philosophandi tantum fortuitae fuere causae. Nam frugibus primo, dein pecore prisca gens mortalium vitam in agris inopem, coelique injuriis opportunam tolerabant, aestusque & frigoris incommoda senserant, hoc est, aegrotaverant, priusquam vestimenta & domicilia sibi prospexissent. Illa primordia morborum, haec prima fuere remedia. Sed & pecora brevis aevi, morbisque non olim minus quam nunc obnoxia medendi necessitatem adferebant, quique iis sublevandis operam dabant, hominibus opem ferre dicebantur; Civem enim servasse videtur, qui vel fame pereundi necessitatem depulit.

Verum, ad philosophandum tum demum homines accessere, cum vires remediorum experti, possint jam securi, & per otium, facultates rerum expendere, caeterisque mortalibus animi virtute se praestare.

§. 3. At, quoniam ab antiquissimis Medicis morbos ad iram Deorum referri solitos, & a vetustissimis Philosophis astrorum scientiam omnium primam fuisse excultam accepimus, iisdemque temporibus Deorum appellationes astris delatas; verisimile est, priscos illos Medicos de morbis tempestatum mutationes plerumque comitantibus initio differuisse. Unde sequitur, antiquissimorum & Medicorum & Philosophorum judicio, ratiocinationes Medicas inniti debere iis principiis, quae Astronomicis inserviunt: cumque illis temporibus Philosophi omnes unius sectae fue-

fuerint, & Medicina ante omnem Philosophiam nata, fuisse nascentem Medicinam nulli Philosophorum sectae illigatam. Sed lubet rem istam paullo diligentius explicare.

§. 4. In Medicina facienda vel docenda non decet pro vero affirmare, de quo usque adeo sumus incerti, ut nemo de bonis suis tam incertus esse velit: non enim vitae minor quam pecuniae habendae debet esse cura. Hinc sequitur non licere id in Medicina tradenda vel facienda pro principio adhibere, de quo disputant viri & Mathematice docti, & minimis praëjudiciis irretiti: nemo quippe lubens res suas in eam sortem deduci patitur, ut ad eas redimendas ancipiti disputatione opus sit: rerum autem vita est carissima.

Ex hisce deduco, causarum physicarum investigationem, qualem instituere solent Philosophi, Medicis neque utilem, neque necessariam: hae enim sunt, de quibus sectarum patroni fere ab orbe condito in haec usque tempora nequicquam litigarunt.

§. 5. Neque hoc mirum videri debet; cum enim sectarum patroni rerum naturas absolutas, causasque intimas statim a principio, neglecta proprietatum investigatione, fuerint aggressi, adeoque Postulatis multis, & Datis paucis uterentur, fieri non potuit, ut non in diversas sententias discederent. Cuivis profecto in Mathematicis versato, vel in Medicina facienda paullo magis occupato, manifestum est, nos nihil aliud in rebus cognoscere, quam earum ad alias relationem, legesque & proprietates virium, quibus eas mutare, vel ab iis mutari solent. Loquor de rebus corporeis. Vires autem illae, viriumque leges, actionibus mutuis & utrinque redditis deteguntur. Nam, ac-

tiones & earum eventa sunt Data illa, quorum ope leges virium invenimus; Causa vero physica, & tantopere a Philosophis quaesita rerum natura, est illud in rebus ignotum, a quo vires emanare volunt. Illud autem cum sciri non posset, nisi prius agnitis viribus, harumque legibus inventis, neque quidquam praestet nisi per vires; sequitur, viribus ignotis, notitiam illius esse nullam, notis vero esse inutilem: adeoque Medicis incumbit solum, ut vires medicamentorum & morborum, quae per operationes possunt inveniri, expendant, & ad leges revocent; non autem, ut causis physicis eruendis insudent, quae non nisi ex prius inventis virium legibus possunt deduci, iisque inventis Medico non sunt profuturæ.

§. 6. Nihil itaque majoribus nostris profuit Medicos sectae sese adjunxisse, artemque suo ingenio a vulgi studiis abhorrentem, incertis & saepe falsis opinionibus imbuisse. Eo errore factum est, ut ars Medica perfectionis optatae culmen haud attigerit; sed, jamdudum conjecturis foeta illis visa fuerit, qui non meminerant errores non artis esse, sed artificum. Nam, cum pertaesi forent multi disputationum, quae vulgarem Philosophiam post tanta temporum spatia etiam nunc exagitant, neque tamen illi rei ullum adferri remedium, exitum ullum conspicerent; sed latius gliscere malum, Medicosque cum vulgo facere, & ad sectam transisse; facile crediderunt non esse magnopere iis fidendum, quae tam repugnantibus incertisque sententiis innitantur. Hoc illud est, quod artem Medicam per tot secula reddidit incultam, quodque nobis est averruncandum, si Medici esse volumus & liberi, neque aut Romae aliquando servisse, aut nunc olimve servire mereri.

§. 7. Equidem non oportet artem illam, quae mortalibus una sanitatem promittit, disputantium conjecturis & somniis involvi; non enim prudentis est illi vitam credere, cujus rationes plerisque falsae, paucissimis probabiles videntur: sed, Medicos oportet Astronomorum institutum sibi imitandum proponere. Hi non vulgo gratas, aut ab oratoribus acceptas opiniones in artem suam adsciscere, neque motibus siderum expediendis advocare, quantumvis populo placituram de mundo fabulam; sed, observationes longa temporum locorumque intercapedine diffidentes, motuumque coelestium phaenomena methodo sibi familiari & omnibus utili conferendo, vires illas definire, quibus corpora mota ad alia, sive mota sive immota, contendunt. Hoc eorum saluberrimum consilium amplectamur, si de civitate Medica, hoc est, de genere humano bene merendi sit animus. Observationes quae institutae sunt, & ubique instituuntur, circa morbos morborumque auxilia, conferre, & nulla habita ratione opinionum, quae sensu perceptis certitudine cedunt, ex eo quod fieri solet, quid futurum sit ac faciendum colligere oportet.

§. 8 Nemo nunc, ut opinor, in Astronomicis versatus quidquam praesidii in iis esse sentit, quae hodie quoque inani disceptatione vexantur, neque in demonstrandis motuum coelestium affectionibus & symptomatis, ullum a formis substantialibus, materia subtili, aut fortuito atomorum congressu emolumentum elicit: sed Astronomi paucis contenti Postulatis facile ostendant nihil sibi officere sectarum opiniones, neque demonstrationes suas turbari, sive existent formae substantiales, sive non existent,

& five exstet materia subtilis, five non exstet. Et nos adhuc dubitamus iisdem artibus Medicinam extendere? Neque fas sit existimare corpora minora, quae Medici contemplantur, iis legibus esse subjecta, quas Astronomi in majoribus illis deprehendunt. Est profecto corporum omnium similis natura, potestque corpus omne in alterius cujuscunque generis corpus transmutari, adeoque communibus motuum, seu mutationum eventis omnia corpora, cujuscunque molis aut moleculae, sunt obnoxia. Unde sequitur definiri quoque posse fluidorum & canalium corporis humani leges & affectiones, postquam aut plures observationes instituerimus, aut rite contulerimus institutas.

§. 9. Qui haëtenus dicta aequo animo accipiet, is non diffitebitur in Medicina tractanda nihil esse adhibendum pro principio, quod non tam certum sit ac ea quae in sensus incurrunt: aequum enim non est ut vitae humanae quam curiositati minus consulatur. Idcirco nos eorum quaedam paucis perstringemus, quae majores nostri, nimio sectae studio abrepti, sensus testimonio destituta temere admitterunt; ut alii ea possint evitare peccata, quae tantos viros transversos egerunt; quaeque ad hoc unicum fere omnia reduci possunt, nempe ea pro certis adsumsisse, de quibus inter viros doctos minimisque praejudiciis immerfos disputatur, five quae sensu perceptis certitudine se non exaequant.

§. 10. Majores nostri metum vacui, qualitates occultas, & vim trahendi nullis legibus castigatam, a secta mutuati, in artem Medicam transtulere, operamque dedere ut se aliosque hoc deciperent effato, *ibi incipere Medicum ubi desie-*

desierit Physicus; quod a patrono sectae prolatum semper est falsum. Miserabilis videri possit illis temporibus Reipublicae nostrae facies, quae vocum simul & rerum sensibus horreret. Cogebantur viri ingenui, animo, hoc est, domi servitutem superbissimam pati, partamque ingentibus studiis humanarum rerum peritiam per nugas corrumpendam ducibus sectarum dedere; iique Heroës nomen suum cum Sophistis delendum tradere, qui ob cives servatos aeternum gloria vivere debuissent.

§. 11. Sed, quantumlibet miserabilis iis temporibus visa sit medentium fors? non est tamen ea seculi nostri felicitas, qua supra suos majores supraque modum efferre se debeant Medici. Post tantam Botanicis & Anatomicis illatam lucem, novamque tot artibus inductam faciem, veterem tamen ubique agnoscimus Medicinam. Nostriis majoribus vitio dabatur introducta in artem rerum sensibus ignotarum, solaque conjectura constantium farrago, &, ut verbo dicam, nimius sectae amor: Nos, qui tam gravem veterum videbamus excussisse, an in arte exornanda multo fuimus feliciores? Haudquaquam. Sed postquam incredibili felicitate profligata fuisset pestis illa, quam ad litteras perdendas advexerant Barbari, resque Medicae excellenti quorundam hominum virtute in melius relatae, & nihil non a detecto sanguinis circuitu speraretur, prohibuit nihilominus amor sectae, ne debita illi invento felicitate potiremur, laetitiamque post homines natos fummae proximam nostrae invidit aetati.

§. 12. Non semel sum miratus potuisse viros tot eruditos & solertes delicta majorum aliis vitanda monstrare, monstrata vitare non potuisse. Proscripserint sane expulerintque

rintque qualitates occultas, pedibus subjecerint inanes vacui metus, formarumque substantialium strepitus: at occulta fermenta porosque dicto audientes intulerunt, artemque optando potius, quam studiis honestis excolendo, jamdudum effecerunt ut Medicinam in ipsa Medicina quaeramus. Quo enim, quaeso, discrimine figuras ignotas & occultas qualitates habebimus? materiae subtili quid distat astrorum influxus? Utrum inhonestius vasis liquores quosdam attrahendi vim concedere, an nobis ipsis potestatem facere fluida vasorum orificiis apta, cum negotium aliter expediri nequit, coelitus in scenam protrahendi? Cujus demum sectae hominibus vacui metum plus facessere negotii existimabimus; ejusne, quae cuivis corpori, ne locus fiat vacuus, accurrendi licentiam tribuit; an illius, quae orbem corpore subtili replevit, cui uni ea provincia est data, quodque mole alia omnia longissime superat? Quis, antipathia & sympathia veterum rejectis, homines de pugna & amicitia duplicis aetheris intra canales corporum occurrentis differere paratos ferat? Quis calido innato & adventitio aetherem consuetum & peregrinum paria facere, mutatisque solum verbis eandem narrari fabulam non animadvertat? Sed piget de re tam manifesta tamdiu verba facere. Hoc solum addere non pigebit, ostendere me posse nullum in glandulis humani corporis inesse fermentum, omnesque poros & orificia omnia vasorum similes sortiri figuras, adeoque diversitatem figurarum fermentorumque, a Medicis sectae servientibus inventam, nullam in Medicina facienda aut docenda adferre utilitatem.

§. 13. Superest ergo ut Medicinam colamus, non hisce
figmen-

figmentis impositam, sed usu probatam; neque nos incauto sectae studio tantillum dimoveri a veritate, Medicamve dignitatem vulgi arbitrio subjici patiamur: verum, nosmet in libertatem tandem vindicemus, notamque incertitudinis ex amore sectae nimio manantem ab arte nostra amoliamur.

Sed, quia causarum physicarum investigationem Medicis non esse necessariam dixi, idque Philosophis dictu durius & insolentius videri potest, juvat exemplo extra disceptationis aleam posito rem omnem confirmatam dare & illustratam.

§. 14. Qui ante nos scripsere Medici de iis oculorum morbis, in quibus simulacra visum turbantia obversantur, non dubitarunt asserere ejus rei causam physicam suppeditare corpuscula aqueo humori innatantia, quae, dum in omnes partes incerta divagantur, muscarum aliarumque rerum veluti oculis temere oberrantium imagines retinae inferunt. Verum, dum ab ultima origine causas mechanicas, repostasque harum affectionum naturas repetunt, neque causas quaesitas reperere, neque sua cuique morbo tribuere symptomata.

§. 15. Ut hoc manifestum fiat, affirmo nulla aqueo humori innatantia, aut intra oculum conclusa corpuscula sui in retina imaginem effingere posse: quod ex iis, quae apud Opticos scriptores demonstrata prostant, elicitur. Nam, qui sedulo reputaverit, quantulae debeant assumi ocularium humorum diametri, quaeque refractionum leges, ille promte comperiet imagines rerum in oculo ante retinam sitarum prorsus extra oculum projici, nunquamque in retina depingi, ideoque nullatenus visum movere.

B.

Ve.

Verum, ut spectra haec abigamus, pateatque corpuscula aqueo permista aut vitreo, sive quovis intra oculum loco ante retinam posita, partes rerum objectarum occultando, radiosque ab iis emissos intercipiendo, species hasce nunquam producere, memores simus effati optici: nempe,

Nullum esse visibilis objecti punctum, a quo radii lucis ad omnia corneae puncta non pertingant; adeoque, licet admodum multae corneae partes obvelentur, omnes tamen objecti partes oculo observatum iri.

Verum, si istud retinae punctum, in quo concurrere debuerant emissi a visibili quopiam puncto radii, quavis ratione ita contegatur comprimaturque, ut imagini depingendae non subjiciatur, tum nullus objecti sensus excitabitur. Et, si idem aliquam multis retinae punctis evenerit, eadem omnia contingent quae Medicis tamdiu in aqueo humore transigi videbantur. Quo autem modo, quia fingi potest non unus, ista semper eveniant, paucis expediam.

§. 16. Nulli ignotum est retinam dici rete quoddam ex plurimis optici nervi filamentis contextum, quae vasis sanguiferis stipata oculi fundum perreptant, eamque maxime hujus partem, quae circa optici ingressum consistit, istis vasis esse oneratam. Idcirco, si oculus eo fuerit situ, ut necesse sit radios in eam retinae partem impingere, deficiet objecti illius imago, imaginisve sensus. Hujus quoque rei veritatem experiemur, si duo quaevis corpora videnda exponantur in eadem linea horizonti parallela,
pla-

planoque per oculos transeunte paullo altiore, quaeque a se mutuo sesquipedali intervallo secernantur: & oculo, puta, sinistro occluso, dextroque in objectum ad sinistras positum converso, nos ad exposita lento gradu vel accedamus, vel ab iisdem recedamus, prout oculorum postulat natura. Principio quidem advertemus, nos utrumque objectum distincte conspiciere; tandem tamen in eum devenisse locum, in quo, visum effugiente objecto ad partes dextras sito: res tamen circumfusas clare intuemur. Hoc vero contingit in illa ab objectis expositis distantia, eoque oculi situ, impingentibus radiis in istam fundi ocularis partem, quae nervum opticum cum vasis sanguiferis accipiens, adeo occultatur & opprimitur, ut nullum imagini sincerum locum concedat. Et alia quidem in morbis praedictis simili ratione eveniunt. Id ut affirmem audacter, faciunt theoremata quaedam explicando sanguinis circuitui conducentia; ex quibus sequens selegi huic negotio aptum.

Si idem phaenomenon possit oriri, vel a liquoribus intra canales fluentibus, vel extra eos effusis, semper debet adscribi fluentibus, nunquam vero solis effusis. Assumo autem vim externam abesse.

§ 17. Atque ita exemplum attuli morborum causam physicam non agnoscentium, ut pateat Medicos & loci affecti conditionem, & curandi rationem, ignotis causis istis, assequi potuisse. Nos equidem eorum tantum proprietatem quandam phaenomenis expediendis inservituram illustrasse contenti, causam physicam ne quidem ha-

riolamur, satis gnari neminem ejus esse compote: mutationis enim, quae menti propria est, dum objecta motum per nervos propagant, excitandae, causam physicam, seu mechanicam originem nemo aggredietur.

At, licet ego causas harum affectionum physicas, ultimasque naturas, Medicorum diligentiam fefellisse, neque nesciam neque mirer, non tamen existimo me non explicasse causas illarum, seu Mathematicas, seu Medicas; nempe, eas quarum cognitio Medicis est utilissima.

Utinam mihi liceat eadem facilitate & evidentia alias omnes nostri corporis affectiones explicare, curandasque tradere! Id si possim, non desperem de gratia referenda Illustrissimis & eruditissimis Proceribus, qui arti Medicae docendae in illa me Republica admoverunt, quae servitutem omnium acerbissimam, hoc est, sectae dominationem civibus suis excussit.

T H E O R I A

Morborum Oculi.

NOtum est Geometriam, quae de visu tractat, intelligenti, radiorum parallelorum, ex humore aqueo in sphaeram vitream incidentium, focum, post refractionem ad convexam sphaerae superficiem factam, distare novem sphaerae semidiametros a vertice incidentiae: & eorundem radiorum, post emersionem ex sphaera, focum

cum distare a sphaera tres semidiametros cum semisse. Quare radii in aqueo paralleli, post refractionem, ad integram sphaeram vitream aqueo inclusam convergunt ad punctum tres sphaerae semidiametros cum semisse distans ab opposita sphaerae superficie; sive, quod idem est, puncti corporisve radiantis, & tres semidiametros cum semisse a sphaera vitrea aqueo humori inclusa distantis, radii post sphaeram paralleli evadunt; ejusque adeo puncti corpusculive imago a sphaera distabit prorsus infinito intervallo; & idcirco non pingetur in retina, ejusque puncti nullus excitabitur visus.

Quapropter, admissis observationibus opticis, quibus evincitur humorem crystallinum eadem refractione gaudere qua vitrum imbuitur, evidens est, corporis radiantis, & a crystallino humore tres semidiametros cum semisse distantis, nullam pictum iri in retina imaginem. Atqui, ut notum, nullius oculi cornea distat a crystallino tres crystallini semidiametros cum semisse. Ergo, nullo- rum in cornea, nedum in aqueo sitorum corporum contingit visus, sive corpora illic posita, aut natantia, non percipiuntur ab oculo.

Ex hac autem demonstratione sequitur, (1.) In suffusione oculi nulla observari corpusculorum simulacra, qualia Medici scriptores suffusioni adscribunt, qui gravi peccato morbis oculorum aliena tribuere symptomata. At, si cum visus obscuritate spectra ista ingruant, suffusioni comitem fore Amaurosin, vulgo *Guttam serenam* dictam.

2. Quippe, si nullis Ophthalmiae externae signis instantibus, muscae, araneae, similiave nunquam non ob-

volitare videantur, oriri Amaurosin, cujus quae fit ratio, quique generandae modus, a me declaratum est prolixius.

3. Si Ophthalmiae externae adjungantur ista spectra, inesse etiam Ophthalmiam internam, & quidem in retina sitam. Et hoc quidem jam olim animadverti; nam, cum rationes opticae mihi persuasissent simulacra ista oriri vitio partium retinae a vasis sanguiferis nimium tensis infarctisve contactarum, facile perspiciebam similia eos infestatura, qui Inflammatione ad retinam porrecta laborarent.

4. Et universaliter, spectra haec speciesque Amauroseos oriri vitio retinae, imagini suscipiendae imparis parte sui alia infarcta, alia compressa contactave. Et quia infarctus in retinae vasis contingere potest cujusvis generis & conditionis, nullus erit tumor alii cuivis parti aliquando inhaerens, qui non etiam retinae possit innasci. Patere autem arbitror intelligenti, illum, qui haec non ignorat, arte, non casu mederi. Atque ita paucis verbis Theoriam morborum oculi demonstratam dedi, & eadem opera exemplum utilitatis quam Mathesis Medicinae praestat; ex hac enim Theoria methodus medendi innotescit facile, patetque quantum & se & aegros ludificent, qui hic collyriis rem gerunt.

DISSERTATIO

De Circulatione Sanguinis per Vasa minima.

DOcuit nos, prorsus novo & divinitus invento systemate, HARVAEUS, sanguinem e corde per arterias excurrere, perque venas ad cor redire: unicumque hoc dogma *fidei Medicorum* commendare contentus, caetera in obscuro reliquit. At, cum compertum esset hoc usibus Medicis non sufficere, coeperunt homines disputare, an sanguis ex arteriis effunderetur in partes corporis aliquas, per quas arteriae & venae hiantibus osculis dispergantur; an vero arteriae minimae non sanguinem crassum ad partes nutriendas, sed tenuiorem veherent & non rediturum, sanguisque omnis reliquus per arterias majores exiret in venas anastomosi junctas. Patet attendenti utrumvis horum dogmatum circulationi sanguinis adversari. Primum enim magnam partem sanguinis crassi (id est, qualis in majoribus vasis continetur) emittit in partes corporis, aut potius interstitia partium. Secundum vero emittit partem sanguinis tenuiorem (id est, partem inclusi arteriis minoribus) dicatam partibus nutriendis; hoc est, docet magnam partem sanguinis non circulari, sed in visceribus, ut loquuntur, partiumque poris stagnare & haerere. Atqui, cum sanguis omnis in gyrum agatur a cordis & arteriarum impetu, ita ut hoc vigente non possit quiescere sanguis, patet stagnare eum in vasis minimis non posse, quin semper accedente sanguine haec disrumpantur, aut praetermodum sanguine

guine non redituro per venas intumescant, quod in animali sano non fit: patetque in poris haerere non posse, ob incrementum quod sequeretur perpetuum eadem ratione: quo plus enim ejus in poros effunderetur, eo minus facile rediret ob occlusionem venae a circumfluo fluido, ut postea ostendetur.

§. 2. Ut Medici rerum novarum videntur esse avidi, ita vocum plerumque novitate capiuntur: inventi ergo tandem sunt, qui, cum observassent speciem quandam carnis glandulosa in multis visceribus esse coacervatam, vasisque omnifariis stipatam, non dubitarunt affirmare omnibus partibus inesse glandulas, quae sanguinem ab arteriis accipiunt, & in venarum ostia, etiam intra corpus glandulosum hiantia, non mutatum transfundunt, dum partem ejus divortio opportunam per vas secernens dimittunt. Haec autem sententia nihil novi praeter vocem in Medicinam intulit, aut vocis usum. Hinc enim solum fit ut glandula vocetur medium illud, quod priores aliquando partes & substantiam corporis, aliquando anastomoses appellabant, quodque nec arteriae, nec venae nomine volebant gaudere. Eodem etiam, ut par erat, incommodo premitur; nam, cum hucusque per eam statuatur arteriae & venae in cavitatem glandulae hiare, pars solum sanguinis a vena resorberi poterit, reliqua partim excernetur, & partim stagnabit ad molem & nutritionem partium sustinendam, quod circulationi sanguinis prorsus adversatur, & eodem modo falsum esse ostenditur, quo in praecedente paragra-
pho sumus ratiocinati.

§. 3. Atqui, cum manifestum sit, eam esse debere hominum sententiam, quae ab iis ad usum vitae transfertur,
non.

non quae disputantibus allubescit; idcirco, quid Medici de circulatione senserint, ex libris, quos de arte Medica scripsere, potissimum elucescit. In iis plerique ostendunt, se credere sanguinem ex venarum haemorrhoidum, mesentericarum, aliarumque ostiolis effundi saepissime; quod credere non poterant, qui sanguinem sciebant ab extremis venis semper ad cor contendere. Omnes vero Medici, qui methodum ullam, quamvis circulationi, ut credi volunt, convenientem tradiderunt, uno ore docent, sanguinem, aut in partibus, aut glandulis haerere; & quia sanguis, sive crassior, sive subtilior, in partium interstitiis detentus, eadem omnia symptomata & inferre & pati potest, quae veterum sanguis circulandi nescius. Idcirco, eadem medendi methodus a recentioribus est ubique fere adhibita, quae antiquis placuit, quamvis plerumque experientiae & legibus circulationis contraria. Unde non est mirandum non majorem factam esse mutationem in arte Medica, cum morbi plerique oriantur vitio circulationis in vasis minimis, quam multi recentiorum non melius Hippocrate & Galeno intelligere se demonstrant.

§. 4. Quamvis autem multa divellantur a sanguine fluida, quae ei rursus non redduntur, adeoque circulari non sunt dicenda; tamen eorum aliquis motus est necessario cum circulatione sanguinis conjunctus; ita ut, si ille cesset prorsus, haec etiam aut subito aut paulatim extinguatur. Quapropter omnia fluida, quae expelluntur e sanguine, motum aliquem constantem, licet aliquando lentissimum, conservant versus easdem partes, utpote pressa a sanguine, versus easdem etiam partes ac prius fluente. Unde sequitur eos, qui nullos, aut in quasvis partes pro lubitu, motus

C

attri-

attribuunt fluidis e sanguine secretis, circulationem sanguinis aut non admittere, aut non intelligere. Neque mirum erit, tales Medicos cum veteribus facere, artemque nostram ab iis, licet circulationem crepantibus, non esse digne excultam: est enim vitae conservandae non necessaria magis circulatio sanguinis, quam plurimum fluidorum ex ejus penu secretio, & in diversas partes eliminatio; in cujus secretionis auctae vel imminutae vitio morborum maxima pars quaerenda; adeo ut qui in negotio secretionis eadem sentit quae veteres, eodem ritu debeat Medicinam facere, ob ignoratum omnem circulationis effectum. Infinitus est eorum numerus apud quos Harvaeana demonstratio fidem non invenit, inter quos eminet THOMAS WILLISIUS. Hujus viri propositum fuisse videri possit, eruditionis suae fama & Philosophiae laude, artis Medicae fundamenta evertere; nam, ejus libri nihil aliud ferunt quam vetera novis vocibus involuta, omnique qua se jactat ars, innititur incerta divagatione sanguinis in omnem partem, & praesertim liquoris nervei per quascunque vias spontaneo itu redituque. Inspiciatur ab eo edita *cerebri Pathologia*, liber *de morbis convulsivis*, & *Pharmaceutica rationalis*, in quibus spiritus animales ad vertiginem, epilepsiam, & motus convulsivos edendos, per poros & interstitia quaevis prorsum retrorsumque, & in circulo (aliisque multis in curvis, si quarum nomina cognovisset, eos propulsurus) moveri jubet, structurae cerebri nervorumque & legum circulationis aut oblitus, aut contemtor. In aliis autem morbis spiritus animales torpidos, & in somnum proclives fingit; aliquando perceptionem iis tribuit; alias vim aquae Stygiae aemulam, omni-

omniaque a liquoribus in animali circulantibus alienissima.

§. 5. Sed, errores hosce evitasse visi sunt nasutiores Medici, qui sanguinem omnem glandulis percolari voluerunt, partemque ejus in venas redire, reliquas extra glandulas in vas fecernens amandari. Et, ut aliqui saltem intuitam semitam inciderent, quasi communicato inter se consilio, in diversas abiere. Qui Chymica artificia magnificiunt, ii cuique glandulae liquorem quendam insitum attribuunt fermenti nomine insignitum, id est, partes quasdam fluidas e sanguine primo nascente secedentes in loca suae texturae congruentia, in quae scilicet insita vi, id est, vi suae congruentiae feruntur. Hujus fermenti ea vis, jubentibus illis, est, ut sanguis sanguinisve pars arrepta confestim immutetur in alterius animi fluidum, quale ex illa glandula similive congerie glandularum prodire observatur. Sic, *exempli gratia*, partem Sanguinis ad glandulas hepatis delatam, vi hepatici glandulisque hepatis innati indigenaeque fermenti docent mutari statim in meram bilem. Haec opinio prorsus cogit liquores fermentantes partibus quibuscumque inhaerere, adeoque fermentorum circulationem nullam potest concedere: cum tamen circulationi sanguinis, vitae hominis & rerum naturae adversetur, liquida posse consistere, quamvis incitata, sprete circulatione fluidis circulantibus immota misceri.

§. 6. Mirari tamen subit, fuisse qui sola ope fermentorum secretionis negotium transigi posse crediderint: nam, quamvis ista opinio circulationi sanguinis (qua liquida omnia in animali comprehensa, aut in gyrum, aut in mo-

tum aliquem rectum aguntur, nullique fluido quies aut stagnatio naturaliter conceditur) non foret contraria; tamen, praeter vim fermenti, alia adhibentur ad secretionem instituendam, id est, ad circulationem sanguinis conservandam: alia, inquam, quae tamen agnita inutilitatem & impossibilitatem fermentorum prorsus demonstrant, ut statim ostendetur. Verum, qui hanc sententiam sunt amplexi, licet circulationem sanguinis verbis profiteantur, re tamen ipsa sustulerunt. Quid enim aliud sentiunt, qui sanguinem in omnibus glandulis, donec ab infuso fermento mutetur, morari, quam veteres, qui sanguinem alias aliis in locis induere naturas, & calida partium indole temperie quapiam subigi perhibent? aut quae illis quam his felicior medendi methodus potuit obtingere? Quicquid id sit, quo prae veteribus se jactant, ad unum omnes circulationem, aut circulationis effectum usumque pulcherrimum ignorant. *Et sane, cum fermenta non sint vasorum partes solidae, sed fluida e sanguine secreta, oportet secretionem absque iis praeviis esse semel factam, & semper idcirco fieri posse, nulla iis habita gratia.*

Eodem modo refelluntur, qui bilem in acinis hepatis fecerni statuunt, quod ea bili acinis indigenae sese agglomeret; at, urinae renum glandulis insitae adjungere se non possit; exemplo fidentes chartae, quae oleo imbuta aquae transitum negat, quamque, si aqua prius maderfeceris, oleum non penetrat. Quippe, ex demonstratis manifestum est bilem istam indigenam pro fermento indigena esse habendam, adeoque vi circuitus expelli omnem debere, eluique succedentibus cujusvis generis fluidis. Accedit, quod bilis nulli non fluido in sanguine comprehenso possit

possit adjungi; quippe, quae fluidis sanguinem conflantibus universis prius fuerit adjuncta, adeoque nullius respuere possit consortium: hic enim de viribus attractricibus non est differendi propositum.

§. 7. Quibus ergo Chymica ista fermenta non arridebant, sed Mechanica magis, Philosophiae nuper receptae conformior explicandi ratio, ii secernendum liquorem consortio sanguinis hac arte expediunt. Quippe, cum concedatur ab omnibus sanguinem animale conflari ex multis fluidis commistis, & unumquodque horum fluidorum contexi particulis (si homogeneous sit) similibus, & diversae figurae vel molis a particulis aliud fluidum componentibus; aut (si heterogeneous sit) massis diversae figurae vel molis particulas includentibus, & alia figura vel mole praeditis, quam sint aliorum fluidorum massae; assumerunt glandulas intus esse corpora cribri-formia, ad quae arteriae sanguinem important, qui cum ibi adlabatur foraminibus ejus figurae, quae propria est massis alicujus secum vecti fluidi, hujus partem impellit in ista foramina, impulsam deductura ad vasa secernentia, redeuntibus fluidis caeteris per venas: adeo ut glandularum pori diversae sint figurae in diversis corporis locis, pro diversitate figurae partium cujusque fluidi in sanguine comprehensi. Totum hoc negotium illustratur exemplo cribri, uni granorum generi transitum praebentis, alteri non majori, sed aliter figurato negantis, & etiam exemplo coli, quod quibusdam fluidis pervium est, dum alia tenuiora visa arcentur. Et fuere qui hanc priori opinioni de fermentis indigenis adjungerent, quorum consilium debuissent omnes amplecti.

§. 8. Nam, quaecunque ponamus in singulis glandulis fermenta, quae sanguinis impulsu formas in nova corpora immutent, immutatae tamen eam figuram debent induisse, quae vasis secernentis glandulae proprii orificio respondet, quodque ita debet esse effectum, ut corpora aliter figurata non admittat; alioquin, quaevis corpora satis subtilia, nulla fermento habita gratia; id ipsum possent penetrare: quod ne contingeret, haec omnis de fermentis fabula in scenam producta est, omnisque etiam de diversitate figurarum in poris ratiocinatio majori plausu excepta. Quare oportet ut primae sententiae de fermentis definitis auctores confugiant ad secundam de definitis poris: nam, cum collocarent varia variis in glandulis fermenta, quae videntur necessario deponere multis modis excavata cribra, aut loculos huic fermento habiliores quam alii, nulla erat ratio cur sententiam secundam non amplecterentur, nisi quod eam non intelligerent. Sed, quantumvis inexcusabiles videantur qui primam amplexi sunt, rejecta secunda; nil tamen bonae frugis ex secunda in Medicinam pullulavit. Quoniam figurae partium fluidi & pororum hisce convenientium pro lubitu fingi possunt, neque tamen fingentes refelli ob parvitatem cujusvis oculi ingenium fallentem: adeoque facile fuit viris sectae servientibus poros & ratiocinia aptare arti Galenicorum, quantumvis infidae.

§. 9. Duo videntur secundae sententiae auctores impulisse, ut diversi generis figuris acceptum referrent varietatem secretionum, quae quotidie in sanis animalibus observatur.

I. Quod exemplo cribri putarent transitum concedi posse unis, negari vero alteris, licet non majoribus, modo figurae adsit diversitas.

11. Quod, nisi res ita se habeat, non perciperent cur fudor, tenuioresque, si qui sint, liquores non effluerent per orificia crassioribus fecernendis & avehendis destinata ingenti vitae discrimine.

Causa hujus metus, qui inanior est metu vacui, in fine dissertationis amovebitur. Exemplum vero cribri nunc est excutiendum, exemploque sit cribrum foraminulis circularibus pervium. Hisce si applices solida sphaerica, diametro gaudentia non majore quam est diameter foraminuli, transibunt atque permeabunt. At, si hordei aliusve corpusculi grana foraminulis offerantur ipsa diametris majore minoreque gaudentia; quarum maxima major est diametro foraminuli, minima non est major; non transibunt neque permeabunt, si maxima diameter accedat parallela diametro foraminuli: qui casus est unicus. Applicari quippe possunt, ita ut diameter minor sit diametro foraminuli parallela, vel in quovis angulo inclinata; angulique hi infinito numero prodeunt, casusque infinitos progenerant. Atque adeo, nulla figurae ratione habita, res illa cribri tantopere jactata facile transigitur: quapropter, ut rem omnem in plenissima luce colloce-

mus, significet *A* conditiones admittentes, *E* conditiones excludentes, *q* vices admissionis, *p* vices exclusionis. erit quantitas expectationi respondens $\frac{Aq \times Ep}{q \times p}$, ut licet colligere ex iis, quae demonstravit magnus HUGENIUS. Et, quoniam (uti ostendi) quantitas *p* est finita, *q* vero infinita; idcirco evanescit *p*, eritque valor spem metiens $\frac{Aq}{q}$ hoc est, *A*: adeoque semper obtinget admissio.

§. 10. Qui serio perpendet quam magna portio sanguinis nostri sit aqueae subtilitatis, fluorisve potius aquei, ne dicam vere aquea, quamque aqua, aut quicquid est aquei fluoris gravitatisque, facile possit modico calore tandem rarefieri, & in quamvis minutas portiones dispesci; aut, si quis in naturam fluidi inspiciet, is non temere inficiabitur, sanguinem per vasa nostra fluentem, vi motus à corde impressi, solvi posse in portiones orificiis quibus occurrit multo minores; quarum tamen quaevis sit fluida, & ex aliis forte heterogeneis fluidis conflata: cense-ri enim debet omne fluidum tanquam infinita partium parvitate pollens, quae tamen in alio atque alio fluido, aliam vim ad se penitus divellendas postulant: adeo ut in vasis & glandulis non secernantur minima fluidorum solida, (non enim existimandum est tantam esse vim motus à corde & arteriis derivati, ut partes minimas minimum fluidum componentes possit ab omni caeterarum commercio segregare, alias pro sanguine salia volatilissima per arterias majores libere vagantia colligeremus,) sed ipsa fluida, parva licet aliquando portione. Atqui, perspicuum est fluida non deponere figuram ullam propriam & constantem, cum ea se cuivis figurae accommodent, & in quodcunque orificium penetrent, modo vires impellentes eae sint quae cohaesionem partium fluentium ad occursum orificii superent. Undè sequitur, si fluida a sanguine animali in statu fluido secernantur, non opus esse peculiari figura orificii excipientis, sed quamlibet sufficere, modo satis amplam, neque figuras minimarum fluidi fecer-nendi partium ullum afferre momentum ad secretionem per-agendam.

§. 11. At, non sint fluida quae secernuntur in glandulis e fluido sanguine, sed minima solida, quae rursus agglomerata, & ex pluribus vasis secernentibus minimis in majus delata fluidum constituunt; videamus quae adesse oporteat, ut ista possint procedere. Nempe, assumitur, datae figurae & magnitudinis orificium recipere tantum, & admittere datae figurae & magnitudinis corpusculum, alio omni excluso, quod est manifeste falsum. Nam, si corpus recipiendum sit orificio minus, & intra illud possit accommodari, adeo ut omnes sectiones per plana orificio parallela sint minores orificio dato; tum non hoc solum corpus, sed infinita alia cujusvis figurae, orificium illud poterunt subire. Et, quamvis maximam corporis sectionem similem ponamus, & aequalem figurae orificii dati, quia tamen diversissima corpora eandem secta nanciscuntur figuram: per idem orificium diversissima poterunt transire corpora, sive per idem vas secernens diversissimae derivari secretiones. Et haec de necessitate & utilitate pororum figurae sententia concidet. Sic per idem orificium circulare transit non tantum sphaera, cujus sectiones omnes similes sunt & aequales circulo orificii, sed & conus & cylindrus super aequali basi; & per idem orificium triangulare transit, & pyramis, & prisma, & conus; quorum sectiones maximae per plana orificio parallela sunt triangula aequalia & similia triangulo datum orificium comprehendenti.

§. 12. Praeterea, ad corpus in orificium datae figurae & magnitudinis intromittendum, quamvis non obstarent magnitudo & similitudo, obstare posset solus situs. Nam ad conum intrudendum in orificium triangulare datum,

D

quam-

quamvis triangulum per axem assumti conï non excederet orificium datum, sed esset ei & simile & aequale, vel etiam eo non multo minus. Requiritur porro, ut ista conï sectio situm obtineat orificio parallelum, & similiter positum, dum corpus ad illud perducitur, secus ingredi non poterit. Atqui infinitis modis aequè facilibus fieri potest, tum ut aliter sita accedat eadem Sectio, tum ut diversae figurae sectiones orificio offerantur: quippe, praeter triangulum, infinitae sunt numero, figura diversae, quae omnes poterunt esse sectiones conï dati, per planum plano orificiï parallelum, cum triangulum tantum una ejus sectio sit. Adeoque unicus tantum est casus, quo conus assumtus pertransire potest orificium datum, & duplex infinitas casuum aequè faciliū & credibilium, quorum nullo poterit pertransire. Eodem modo, si orificio quadrato occurrat cubus, exempli gratia, salis, & faciem quamvis orificio similem & aequalem non obvertat etiam parallelam similiterque positam, adeo ut latus lateri, & angulus angulo congruat, non secernetur per datum orificium; infinitis autem modis ei potest ita occurrere, ut vel angulus lateri impingat, (quamvis facies orificio sit tum parallela) quorum nullo poterit intrare, vel ut facies orificio non sit parallela, (quamvis caetera congruant) quorum nullo poterit pertransire. Eadem dici possunt de quovis solido, excepta sphaera; hujus enim omnes sectiones cum planis per centrum transeuntibus, & cuivis plano parallelis sunt figurae aequales & similes, similiterque positae; nempe, aequales circuli. Adeoque sphaera sola est inter figuras solidas, quae datum orificium pertransit quolibet situ ad illud delata: sicut circulus solus est

est inter figuras planas, qui admittit cujuscunque figurae corpus quomodocunque situm, modo corporis maxima diametrus non major sit diametro circuli.

§. 13. Ex quibus deduco, si in secretionem pororum & partium congruentia requiritur, secretiones nullas unquam celebratum iri: at, cum videamus multo plurimas & longe maximas in omni animali quotidie & necessario celebrari, fatendum erit illam pororum & secretorum in figuris congruentiam non inveniri; quippe, quae prorsus obstaret secretionis negotio. Et hujus ratiocinii vis in eo sita est, quod si unica tantum sit causa, quae efficere possit, ut secretio aliqua celebretur, & infinitae sint causae quae eam possint impedire, & quarum quaevis sit aequae potens ac illa unica, statuendum sit eam secretionem nunquam celebrari: nec hujus argumenti evidentia necessitasve alia est, quam qua credimus eum in aleae ludo esse absolute victorem qui plerumque vincit.

Atque, ut hanc rem absolvamus; eadem arte, qua paragrapho 9 usi sumus, significet A conditiones admit- tentes; E vero conditiones excludentes; q vices admis- sionis, p vices exclusionis: eritque quantitas expecta- tioni respondens, $\frac{Aq \times Ep}{q \times p}$, ut colligere licet ex iis quae demonstravit magnus HUGENIUS. Et, quoniam quan- titas q est finita; p vero infinita, uti ostendimus paragra- pho 12.; idcirco, evanescit q, eritque valor spem me- tiens, siue haec valebit, $\frac{Ep}{p}$, hoc est, E; atque adeo semper obtinget exclusio. Q. E. D.

§. 14. Praeterea, obstat secretioni per diversae figurae poros aliud non amovendum: potest enim cylindrus,

Verbi gratia, ingredi, ac implere orificium parallelogrammum, si parallelogrammum generans cylindrum sit orificio aequale & simile similiterque positum. At, talis cylindrus ingreditur implebitque orificium circulare, si basis cylindri sit orificio aequalis similiterque posita. Quapropter, si concedamus corpora in fluido natantia advehit plerumque orificiis similiter positas sectiones maximas obvertentia, (quo concessio, infinita largitione adversarios obruimus,) secerni poterunt eadem corpora per diversae figurae orificia, & eadem quidem: facilitate rursus idem conus pro diverso situ intrabit implebitque porum orificiumve figurae triangulae, parabolicae, hyperbolicae, circularis, ellipticaeque, diversitate infinita. Igitur, iisdem positis, ut prius, eadem secretio per diversa loca & diversas glandulas naturaliter & aequali facilitate prodibit. Quod contradicit observatis, iisque qui commenti sunt illam pororum diversitatem penitus adversatur.

§. 15: Videtur ergo longe manifestissimum, orificia vasorum & poros glandularum partiumque corporis nostri non differre inter se figuris, sed figurae amplitudine. Hic ergo repetere ex superioribus liceat, circulum esse omnium figurarum super eadem diametro figuram maximam & capacissimam, eumque omnis figurae plana admittere, quovis modo sita, diametro non majori praedita. Quapropter, cum infinitis modis verisimilius sit, corpora diversarum figurarum ad orificium aliquod non circulare delata illi non esse responsura, evidens quoque est ea nisu suo & impetu mutatura figuram orificii oblatis in talem quae sibi, quocunque modo positis & figuratis, transitum praebere possit, hoc est, in circularem. Idem autem

autem eo citius & certius eveniet, si fluida sint quae in orificium illabuntur & fecernuntur: nam, licet orificium non foret circulus; tamen, cum partes centro proximae, id est, latera magis premantur & extrudantur ab influente liquido, quam magis remotae, id est, anguli, & latera orificii sint flexilia & facillime cedentia; sequitur, orificii omnes partes necessario extrudi debere per aequalia spatia, & aequaliter à centro remota, adeoque orificium tandem in circulum abibit.

Sed, juvat hanc rem lectori non nimis iniquo adprobare. Si fluidum magna vi, *hoc est*, fluidi gravitatem multum superante, in cavitatem tubi adigatur, manifesta ratione evincitur, & multiplici experientia confirmatur, motui tubi in longitudinem conjungi semper impetum in tubi latera perpendicularem, qui ipsa ab axe motus undique nititur extrorsum propellere, idque vi aequali: quia nulla fingi potest ratio, quare major esset versus unas axis partes, minor versus alias, nisi quae a partium fluidi gravitate peteretur, quam nullius momenti assumimus, prae magnitudine alterius vis fluidum impellentis. Et hic quidem impetus eluditur, eoque non obstante servat figuram suam tubus, si latera sint rigida & minime elastica; nisi eo momento urgeat quod superet vim cohaesionis partium; quo casu rumpuntur dissiliuntque tubi latera. At, si latera sint flexilia, elastica, & facile cedentia, tum fieri non potest, quin effectum suum consequatur impetus, expellatque latera ad aequalia undique à dato axis puncto intervalla, eaque tantae longitudinis, ut diductorum laterum tensio & elasticitas sustinendo impetus momento jam pares evaserint. Quo casu,

quamcunque primitus induisset figuram tubus, ea postmodum in aliam mutabitur, cujus sectiones omnes ad axem perpendiculares necessario erunt circuli, majoris minorisve diametri, pro majore vel minore fluidi impetu, laterumque majore vel minore flexilitate in diversis tubi locis. Tales vero flexiles tubi sunt vasa corporis animalis universa, per quae cordis machina fluida omnia propellit ea vi, quae propulsorum gravitatem longe superat.

§. 16. Nulla igitur inter figuras pororum vasorumque orientium in animalis corpore erit diversitas, cum sint omnes circulares, nisi ratione majoris minorisve diametri, quae diversitas fuisset necessario admittenda, sive fermentorum operam, sive pororum varie effectorum mechanice advocassemus. Et haec ipsa simplicitas paucitasque postulorum, quae in nostra sententia elucet, argumentum est proprium veritatis, quam ei affigere voluit Geometra optimus maximus. Nunquam enim peritus Geometra construere docet problema per vias perplexas, quod constitui potest per simplices. Et, quandoquidem de Geometris sermo incidit, non possum non gratulari huic seculo, & arti nostrae, quod Geometria in tantum fastigium sit evecta a pluribus quidem peritissimis artificibus, praecipue tamen ab ISAACO NEWTONO; ut sperandum sit, ope principiorum, quae a magno illo Viro sunt ostensa, inventum iri certius faciliusque vires & proprietates corporum Medico usui & hominum solatio inservituras. Neque diffiteor non alio magis nomine arridere mihi Artem Medicam, quam quod methodo Geometricae possit morem gerere, uti eae omnes artes, quae corporum vires explo-

explorant, adeo ut eorum me misereat, qui corporum naturas ignobilitatis accusant, quorum & infinitas & pulcherrimas proprietates methodo evidentissima demonstrant Geometrae.

§. 17. Ut illuc redeam unde abii, cum omnia omnium vasorum corporis nostri orificia sint ejusdem figurae, nempe circuli, omnes etiam glandularum pori sint circulares, (poros hic appellamus cribri glandulosi, aut glandulae foramina secernentia,) adeoque nulla fermentis peculiaris supersunt promptuaria, fermentaque ipsa in animali nulla. Et sane, cum ostenderimus orificia vasorum omnium esse similia, ad secretionem jam nihil aliud conferre poterunt fermenta, quam ut comminuant sanguinem in partes fatis parvas. Atqui, evidens est, hoc obtineri posse à sola pulmonis actione, & cordis impetu, arteriarumque minimarum compressione. Nam, si fermenta ista non admisceantur sanguini, nullam in eo particularum divulsionem, hoc est, nullam secretionem inducent; at, si admisceantur, fluent vi circuitus HARVÆANI per omnes canales corporis, fermentumque quodvis quovis loco secretionem instituet, secretioni natalibus locis provenienti similem; nisi fingas; obstare figurarum diversitatem (sicuti supra, paragrapho octavo, dicendum esse Fermentatoribus istis monuimus) quam nos exactam eliminatamque dedimus,

§. 18. Ex his etiam deduco, inter arteriam evanescentem & nascentem venam, nullum intercedere spatium corpulse, quod possit aut pro partium poris interstitiisque, aut pro glandula haberi; nempe, intra quod oscula arteriae venaeve seorsum hiantia propendeant. Nam, in
illud

illud spatium corpusve effusus sanguis multo facilius undique comprimeret, & ad contactum adigeret latera membranarum venae osculum efformantium, quam posset in osculum illud ingredi: adeoque non rediret sanguis ad cor per venas: redit autem & per has quidem, quarum idcirco ostiola necessario sint arteriarum ostiolis conjuncta atque continentia: neque enim interjacet glandula illa Poristarum, media inter venam arteriamque, orificiis porisque, pro loci diversitate figura differentibus, aut fermentis instructa; sed, glandula illa secretionibus inserviense est pars ejus canalis, qui venam arteriamque efformat; & venae nihil aliud sunt, quam arteriae flexu contrario versus cor replicatae. Unde etiam sequitur, praeter arterias & vasa secernentia nullas esse corporis humani partes, quae reparari debeant, & quarum gratia sanguis, sive per oscula vasorum patentia, sive per tunicarum poros, debeat e regnis HARVAEI orbitis exsilire.

§. 19. Sed, quamvis nullae Poristarum sint glandulae, locus tamen curvaturae arteriosae, e qua prima radix vasis secernentis prodit, nobis glandula dicetur, ut concinnius disputare valeamus. Quapropter, ad difficultatem illam amovendam procedimus, quae secundo loco memorata videtur plurimos impulisse ad amplectendum sententiam de varia pororum figura. Quoniam hiant in arterias diversas diversae amplitudinis secernentia; arteriae vero sunt fluido plenae, venaeque non minus; & sanguis antecedens in venis resistit subsequuturo per arterias, magis quam fluidum in secernentia delapsum delapsuro, cum huic tantum resistat facillime cessurus aer (loquor nunc praecipue de secernentibus quae extra animal fluida sua elimi-

minant;) idcirco, eodem tempore ex omnibus arteriis secedent fluida, quaecunque secernentibus satis amplis occurrent: adeo ut, dum ex una arteria vel arteriae sectione effluunt liquida tenuia per secernentes venas, quae crassiori liquido eodem tempore transitum negant, in alia sive arteria, sive ejusdem sectione, secedant per venas secernentes ampliores liquida crassiora, id est, tenuia minus tenuibus immista. De fluidis, quae per vasa lymphatica & nervos ablegantur, non differo; cum sufficere possit circa ista adnotasse, eas esse copias fluidorum in sanguine illis vasis occupandis aptorum, ut non possint simul universae alio derivari. Sed redeo ad secernentia, quae dicuntur ex usu vulgari talia, quia liquorem extra corpus exportandum ferunt; ea vero dicuntur, vel ex glandulis conglomeratis, quales sunt ren & hepar, vel ex conglobatis, quales mihi sunt cuticulares, originem trahere. Haec mihi videntur fluida tenuia, illa vero crassa exportare; priorumque majora constat esse orificia quam posteriorum, uti posteriorum major est quam priorum numerus: oportet enim vasorum majoris orificii numerum, & molem eam rationem habere ad numerum & molem vasorum minoris; ut impossibile sit universa fluida tenuiora per vias crassiorum capaces simul evadere. Hic vero adverti velim, me faeces quae per alvum excernuntur, & ingressu in lacteas venas non potiuntur, excretis, de quibus hic sermo est, non adscribere, cum differatur hic tantum de iis secretionibus quae proveniunt in ipso animali, & à penu sanguinis circulantis oriuntur; eae autem quae sunt tantum in ventriculo & intestinis extra animal contingant. Memores denique simus, raro obtineri sinceras

secretiones, sed plerumque alteram alterius tantillo fucari, diluique crassiorē tenuiori simul effusa.

§. 20. Jamque ad hanc rem illustrandam profuerit adnotasse, quod,

I.

Si in duobus locis, & aequaliter a corde distantibus, vasa sint numero aequalia, quantitas excretorum in primo loco debeat esse ad quantitatem excretorum in secundo, ut summa orificiorum in primo ad summam orificiorum in secundo, cum nihil praeterea sit a quo diversitas debeat induci.

II.

Deinde, si orificia sint aequalia, quantitas excreta in primo debeat esse ad excretam in secundo, ut numerus vasorum secernentium in primo ad numerum in secundo; quia praeterea nihil est quod diversitatem progignat.

Et hinc (nam, celeritatem negligimus; quia aequalem esse credimus ex circulatione sanguinis) nemo est, qui non possit per vulgata elementa, comparare quantitates excretorum quorumvis cum aliis diversi floris, id est, per vasa majora vel minora fluentibus. Evidens est ex demonstratis, quod, in quocunque animali orificia vasorum secretioni minus tenuium destinatorum simul sumpta, magis superant orificia vasorum destinatorum secretioni magis tenuium, quam horum vasorum numerus superat numerum illorum; in isto animali plura prodeant per evacuationem sensibilem quam insensibilem. At, cum hoc in humano

mano corpore, dum sanum est, non contingat, oportet in eo rationem orificiorum non superare rationem inversam numerorum. Adeo ut possimus tuto inferre, si venae tenuia secernentes sint multitudine ad secernentes crassa, ut 4 ad 1; & media quantitas orificii vasorum pro crassis ad eam pro tenuibus sit, ut 9 ad 4; fore quantitatem liquidi tenuis circiter duplam crassi eodem tempore excreti. Quod experientiae S A N C T O R I I convenit. Si jam, non mutata ratione numerorum, ponas mediam diametrum secernentium crassa, ad mediam diametrum tenuia secernentium esse, ut 100 ad 99; erit crassiorum excretorum ad tenuiora ratio eadem quae 1 ad 4. Et hic videtur esse casus eorum qui sudore nimio diffuunt, aucta nempe amplitudine vasorum tenuibus secernendis dicatorum. Sed si, manente etiamnum ratione numerorum, fiat quapiam ex causa diametrus crassa secernentium, ad diametrum secernentium tenuia; ut 5 ad 2, erit quantitas excretionis crassae tertia circiter parte major tenui; qui est casus eorum qui diarrhoea, diabete, vel ptyalismo laborant, aucta amplitudine vasorum ex conglomeratis exeuntium. Unde non erit cur miremur, aucta quantitate unius evacuationis diminui aliquando aliam.

§. 21. Sed, juvat potius inquirere quid emolumenti Medicinae studiosis ex hac dissertatione possit emergere. Primum quidem, non erit posthac opus in nauseosam illam de fermentis cuique parti propriis doctrinam incumbere, quae artem Medicam, suo ingenio obscuram, reddebat prorsus ineluctabilem. Deinde, non magis opus erit assuescere comminiscendis figuris, & inanibus figmentis animum pascere; faciliusque poterimus dijudicare posthac,

E 2

cujus

cujus generis medicamenta secretioni laesae debeant aptari, postquam noverimus vires medicamentorum optatas pendere a paucioribus, quam hucusque putatum est, proprietatibus; praesertim cum hic, §. 4. ostensum sit, morbos, ad quos depellendos illa expetuntur, a paucissimis & simplicissimis causis oriri. Neque etiam nihil erit artis longae cultori ingenuo, non amplius damnari ad tot perpetuos compilatores & vanissimos nugatores, qui, circulationem non intelligendo, effecerunt, ut inventum nobilissimum generis humani spes & vota nimis diu & acerbè fefellerit. Huic dissertationi finem faciam, postquam monero, posse quemvis ex hisce facile assequi methodum, qua viscerum multorum non satis intellecta symptomata & usus explicentur, & problemata plurima solvantur, quae tot mortalium curiosam diligentiam effugerunt.

C O R O L L A R I U M.

Ex principiis hic positis sequitur, aerem inspiratum non admisceri sanguini in pulmonibus, respirationis administrandae causa.

DISSERTATIO

*De Causis diversae Molis, qua fluit Sanguis
per Pulmonem, natis & non natis.*

NUnquam tentanda est problematis solutio per postulata multa & subsidio Theorematum non evidentium, quae facile potest exhiberi per postulata pauca & subsidio Theorematis evidenter: neque quidquam fieri credendum est, per poros non agnitos & non concessos trahendo corpora non data nec agnita: denique nunquam in usum vocanda est corporum vis aut facultas, de qua licet dubitare, multique dubitant; cum praesto est parque operi vis aut potestas adeo conspicua, ut de ea nemo dubitet, eam nemo non agnoscat & sentiat. Quapropter, mihi non arridet eorum ratio, qui, ut explicent actionem Mercurii, prae caeteris fere corporibus validam, in vasa animalium ad fluida difficulter mobilia expellenda traducti, non dubitarunt confugere ad vim quandam salis e cinere plantarum elicitam, naturae aemulam, quamque Mercurio inesse volunt, salia inde & fluida acida eruere, unaque secum e vasis educere potenti. Hi enim duo habent pro concessis admodum incerta, si non manifeste falsa; nempe, morbos omnes, quibus amovendis adhibetur Mercurius, ab acido nimio oriri, & Mercurium esse naturae ejusdem cum salibus e lixivio paratis. Eodem etiam modo philosophari videntur, qui, ut ostendant cur lignum

Guaja-

E 3

Guajacinum plus caeteris lignis (quae adhibent vulgo Medici in similibus morbis) valeat, Guajaco naturam ascribunt salium, quae volatilia, ob levitatem, dicuntur; quippe, praeter caetera incerta, pro concesso & certo habent actionem ventriculi viscerumque animalis mutare assumpta omnia in easdem formas, quas beneficio validi, & variis modis adhibiti ignis ex iis elicimus; quod nimis magnum est postulatum, ut alia Dissertatione ostendam. Ego, ne postulatis nimis magnis aut multis, & Theorematibus incertis, aut forte falsis, uti cogar, gravitatem in Mercurio majorem esse, quam in caeteris mineralibus quae a Medicis in eundem finem solent adsumi, adverto; adeoque eum celeritate non minori instructum, (quae ubique celeritati sanguinis aequalis sit) plus momenti suscipere, impetumque majorem exserere; neque aliam hic facultatem desiderari, quam nemo est qui in Mercurio, aliisque in similes usus optatis remediis, non agnoscat. Mercurius autem an sit naturae cum sale tartari, *verbi gratia*, communis, incertum credo, nisi ostendatur aurum esse naturae acidis proximae, aliaque multa explicentur nondum intellecta: nam, quod Guajacum attinet, liquor ille acidus, quem igne adhibito distillat, uti gravitatem ligni testatur, ita facultatem inficiatur acidis, prout aliqui volunt, adversam.

Unde sequitur, Mercurium vulgi, a leviori omni corpore liberatum, esse caeteris paribus efficacius medicamentum, quam salibus similibusque adjunctum; & auri, in liquorem aut formam sanguini permiscendam redacti, vires fore ponderi proportionales, aurumque tale alia medicamenta omnia tanto superaturum virtute, quanto ipsa pondere superaverit.

Et,

Et horum quidem memores esse decebat, qui respirationis explicandae difficultatem ingressi sunt. Quippe, hic ideo solum peccatum est a Medicis; quod philosophari voluerint, assumtis pluribus minus notis potestatibus ad id illustrandum quod unica omnibus nota corporis cujusdam vulgo noti facultate peragitur. Sed, ut hoc manifestum fiat, enumerare prius oportet simpliciora quaedam symptomata respirationis, & vulgata phaenomena.

§. 2. Phaenomenon est

1. *Animalis*, verbi gratia, *canis vivi*, aperto thorace pulmones statim flacceſcere & collabi, & circulationem sanguinis, motumque cordis brevi cessare; quod non fit in aliis, in quibus sanguis non totus transit per pulmonem.
2. *Canem*, ore & naribus rite obturatis, ut inspiratus aer emitti nequeat, brevi mori; quod aliis animalibus non similiter contingit.
3. *Canem*, loco aere pleno, sed rite clauso, immisſum, brevi mori; quod aliis animalibus non similiter contingit.
4. *Foetum humanum* in utero vivere absque ope respirati aeris, & in pulmones per tracheam deducti.
5. *Foetum humanum* in lucem editum, sed membranis integris involutum, aliquamdiu posse intra aquas sine suffocationis periculo vivere; qui tamen, secundis exutus, postquam aerem semel inspiraverit, non potest eo non inspirato postea superesse.
6. *Ducto*, per transfusionis methodum, sanguine e cane libere respirante, vel catulo primum respirante, in alium os naresque obturatum (& cui tantum ab una parte dematur quantum ab alia sanguinis accepit, si videbitur opus,)

opus,) moritur brevi canis catulusve, cui os naresque obturantur. Idem fit, si lac immittatur.

7. Canem machinae Guerikianae, vulgo Boylianae dictae, aere expulso, inclusum statim mori; catulum vero diutius vivere, aliaque animalia, quibus minor pars sanguinis pulmonem pervadit.

8. Aerem, cui inclusus canis extinguitur, esse paulo post mortem animalis ejusdem gravitatis & elasticitatis ac fuerat cum animal includeretur.

§. 3. Haec sunt praecipua respirationis, qualem homines exercent, symptomata; & quia ea omnia quandam relationem vel necessitatem exhibent, quae circulationem sanguinis (in qua vita hominum sita est) inter & vim naturamque aeris intercedit; idcirco, ante omnia statuendum est, quid per aeris appellationem velimus denotari. Manifestum est, ut puto, ex phaenomenis, pro aere hic adsumi debere *Corpus fluidum*, quod in pulmones ultimos per *Tracheam Tracheaeque ramos exilissimos irruere potest*, at, poros tunicae pulmonem vestientes penetrare non potest, uti nec potest vitri poros. Et, quoniam idem fluidum quod aperto ore inspiramus, nulla re nobis aequè notum est, ac gravitate sua & vi elastica, suffecerit hic aerem appellasse fluidum elasticum, cujus densitas est compressioni proportionalis, cum nullum aliud fluidum nobis innotescat, praeter aerem, quod comprimi possit in spatia ponderibus comprimantibus reciproce proportionalia.

§. 4, Dicendum nunc est quid quaeratur. Id vero neque debet, neque sane potest dici aliis verbis quam
G U-

GULIELMI HARVAEI, qui (tractatu de Partu, in libro de generatione animalium) disquirendum viris doctis proposuit, „Quomodo Embryo post septimum mensem „in utero matris perseveret, non inspirans scilicet aerem „per tracheam, ut postea ostendam; cum tamen eo „tempore exclusus statim respiret; imo vero sine respi- „ratione ne horulam quidem superesse possit: in utero „autem manens ultra nonum mensem absque respirationis „adminiculo vivus & sanus degat? Vel, qui fiat, ut „foetus in lucem editus, ac membranis integris opertus, „& etiamnum in aqua sua manens, per aliquot horas, „citra suffocationis periculum superstes sit; idem tamen „secundis exutus, si semel aerem intra pulmones attraxe- „rit, postea ne momentum temporis absque eo durare „possit, sed confestim moriatur? similiter, cum in *sectione* „*Caesarea* foetus horis complusculis post matris obitum „eximitur, vitalis tamen reperitur, & intra secundas „sepultus aeris nihil indigus superest: simulac autem eo „semel gavissus fuerit, si rursus intra easdem secundas „reponatur, illico ob hujus carentiam suffocatur. Haec ille: cujus quaestioni solvendae quid alii ante nos aptius vel verisimilius protulerint, quibusque rationibus inventa sua confirmaverint, & quam saepe a regula initio memorata aberrarint, hinc explicare incipiam.

§. 5, Qui phaenomena a nobis memorata perpendet, is facile agnoscet deceptum fuisse JOANNEM ALPHON- SUM BORELLIUM (at quantum virum!) *Propos. 113 & seq.* partis secundae, libri de motu animalium, scriben- tem, se ostendisse vi respirationis aeras particulas san- guini commisceri. „Quia enim inquit, in pulmonum

„vesiculis semper reperitur succus aqueus & serosus,
 „talisque aquea serositas ab aeris inspirati vento con-
 „quassata in spumam facessit, quae idcirco impraegnatur
 „particulis aeris; eademque aqua per poros venarum
 „penetrare potest facile: fieri non potest, quin ea secum
 „deferat admisceatque sanguini particulas aeris illigatas;
 „atqui particulae aeris admistae sanguini, cum sint elasti-
 „cae, & nunquam per duo minuta eadem vi premantur;
 „idcirco, se semper restituunt liberantque à compressione,
 „adeoque motum oscillatorium (in quo, juxta BORELLIUM, sita est vita animalium,) „incertum, & in mo-
 „menta mutabilem propagant.

Verum, haec inania esse ex antedictis patet: haec enim problematis *Harvaeani* solutionem non continent. Quaeret adhuc quispiam pro *HARVAEO*, quonam ergo pacto fiet, ut foetus in lucem editus, ac membranis integris opertus, per aliquot horas citra suffocationis periculum superstes sit; idem tamen secundis exutus, si semel aerem intra pulmones attraxerit, postea ne momentum temporis absque eo durare possit, sed confestim moriatur? Nam, si ad vitam celebrandam necesse sit aeris aliquam partem admiscuisse sanguini per pulmones excurrenti, admiscebitur eadem necessitate sanguini foetus intra secundinas (ab utero avulsas) delitescentis: at, in iis vitam agitat foetus nulla respiratione gaudentem, & aere crasso vulgarique privatam; quo ipso tamen, secundis statim a partu evolutus, in pulmones irruente destitui amplius non potest. Deinde, phaenomenon primo loco a nobis memoratum inspicienti, evidens est, aut nullam esse partem aeris quae subeat pulmonum vasa, aut nullarum esse virium, mini-

mumque ad respirationem obeundam conferre. Quippe, in ranis, crocodilo, testudine marina, similibusque, & in foetu humano similive, secundis post partum integris involuto, longe maxima pars sanguinis, non salutato pulmone, per cor defluit, nullumque ab aere auxilium deposcit: atque hinc est, quod ista animalia ad tam longum tempus ab aperto thorace vitam protrahant. At, quibus omnis per pulmonem devolvitur sanguis (ut in homine jam respirante fit) ea animalia aperto thorace statim concidunt, quia ab irruente aeris pondere, pulmonis vasa non permeantis, sed comprimantis, excluditur non pars illa subtilior, sed aeris crassioris moles e vesiculis pulmonaribus; aeris, inquam, crassioris ea moles, quae pulmonares vesiculas inflet explicetque.

Denique videor mihi jure ex BORELLIO quaerere, si utilitatem respirantibus & commoditatem adfert pars aeris ulla sanguini in pulmonibus immista, qui fiat ut catulus (cui nondum occlusae sunt veteres privataeque sanguinis semitae) diutius in machina *Boyliana*, unde omnis expulsus aer, vitam protrahat, quam canis, multo licet robustior? Nam, si quid praestet aer, aerisve pars sanguini se immiscens, paria hic imminent vitae discrimina.

§. 6. Verum, sententia BORELLII manifestius refellitur, ope phaenomeni secundi & tertii, item sexti & octavi: nam, necessarius sit, & sufficiat si vitae conservandae motus oscillatorius in sanguine a parte aeris admista productus, non poterit deesse motus illi animali, cui os & nares quidem obstruuntur; at, pulmones aere turgent, vel ei quod vasi aeris pleno, sed non patulo includitur.

Hic enim aer elasticus non deest; neque, si BORELLIO fides habenda, deesse potest spiritus & vita, quamdiu pars ulla aeris elastica superest: superesse autem, & eadem mole qua extabat cum animal includeretur vasi, ex phaenomenis liquet. At, si perpendatur phaenomenon sexto loco memoratum, evidenter patebit, oscillatorium hunc sanguini impressum ab aere admisto motum vitae usui nec esse necessarium, nec sufficere. Quippe, non facilius derivabitur aer ope sanguinis materni ad foetum, quam ope transfusionis memoratae ex cane respirante in canem non respirantem, qui tamen non diutius vivet quam si nihil sanguinis aere imbuti acciperet: adeo est fallax & fugitiva vita, quae ab aere sanguini immisto speratur.

§. 7. Non opus est inquirere in sententiam GEORGII WOLFGANGI WEDELII, qui *Physiologiae reformatae* pag. 127 & *sequentibus* docet, vitam animalium pendere a quadam reciprocatione aeris cujuspiam innati & vitalis, cum externo aere in ipsam intimam sanguinis massam irruente: ex quibus verbis patet, eum voluisse sententiam BORELLII tradere, & vocem *reciprocationis* substituisse tantum isti *Motus oscillatorii*; sed, auxisse numerum opinionum incertarum, quibus hypothesis *Borelliana* nititur, invehendo aerem quendam vitalem; & sic duo aeris genera ei negotio applicuisse, quod BORELLIUS uno eoque noto expediebat. Suffecerit adnotare hanc reciprocationem eadem ratione inutilem, & rerum naturae pugnantem ostendi, qua motum oscillatorium BORELLII, & admistionem aeris cum sanguine in pulmonibus, & motus oscillatorii & reciprocationis *Wedelianae* fundamentum causamque eliminavimus.

Neque

Neque etiam opus esse videtur prolixè excutere sententiam JOANNIS BOHNII, pag. 78. & sequentibus, *Circuli Anatomico-Physiologici* docentis respiratione sanguini inferri tantum partem aeris, at subtiliorem; non tamen elasticam, licet ipsa sit causa elasticitatis aeris, ratione motus perpetui figurae sphaericae proprii. Figuram enim sphaericam subtiliori aeri libere concedit BOHNIIUS, motumque perpetuum sphaericae figurae, quo vitalitas nostra, ut ille loqui amat, conservetur promanans ab exagitatione sanguinis parti istius aeris adscribenda. Haec est sententia *Borelliana*; adeo ut mirandum non sit, si non magis quam illa satisfaciat problemati *Harvaeano*, aut respondeat phaenomenis.

§. 8. Sed perpendenda est illorum sententia, qui putant argumentis multis evinci aliquam saltem aeris portionem intra vasa pulmonum recipi ad respirationem celebrandam: quod tamen esse falsum, & jam ostendimus, & postea ostendemus.

Argumentum primum sit illud, a RICHARDI LOWERI observatione depromptum. Observavit ille sanguinem in arteriam pulmonis impelli atrum; at, ex vena pulmonis prodire floridum & rubicundum: deinde, obturata trachea, sanguinem ex arteria cervicali incisa fluere rursus atrum; denique mortuo jam animali sanguinem venae cavae adhuc fluidum, si per cor & pulmones folle simul inflandos adigatur: aequè rutilum e pulmonibus prorumpere, ac vivo prorumperet. Verum, non probavit, quod tamen probandum fuit; mutationem illam coloris non posse oriri ab alia re quam aeris permissione: potest enim, non obstante hac observatione, pendere ab alterna

compressione vasorum pulmonis, & hinc nata partium fluidi transcurrentis solutione, ab elastico & gravi aere irruente, sed non permisto sanguini, producta. Et observatio LOWERI aequè probat, hanc abfuisse pressionem & illam missionem. Et nemo non facile agnoscet tantum aeris illi parti sanguinis, quae vena secta prima prodit, imumque vas nigra tandem occupat, admistum fuisse, dum per aera decedit, quantum sanguini in illo brevi per pulmonem trajectu potest admisceri: ex adverso autem agitationem & solutionem partium sanguinis multo majorem inesse intra pulmonis vasa, quam in fundo vasis immoto. Denique, ut observationem observationi opponam, ostendant hujus sententiae fautores, quâ fiat, ut sanguis, qui, dum mittitur, ruber satisque floridus conspicitur, paulo post, quantumvis aeri expositus, saepe rubedinem amittat? Et annon haec observatio pressioni pulmonum & cordis unice acceptum referat sanguinis istius rubedinem? Sane, hic non aer, sed motus & solutio partium a corde & pulmonibus impressa deficiunt. Sed de hac re plura sub finem dissertationis. Vide tamen longe doctissimi Medici, MART. LISTERI, *Exercitationem Anatomicam primam de Cochleis*, pag. 101.

Secundum argumentum sit illud, quod depromitur a miasmatis effluviisque, quae cum aere in pulmonem ducta subito perimunt, adeoque in pulmonibus sanguini admiscentur; quod fieri non posset, nisi aer ea deferens sanguineis vasis pulmonum inferretur. Verum, ostendi debuit respirationem vi istorum miasmatum tolli non posse, nisi ipsa sanguini admisceantur; ejus enim rei probationem nos nullam videmus, ut neque rationem qua sanguini

guini permista necem adferant. Novimus autem ea miasmata conjuncta esse cum majore vel minore aeris gravitate, majorem vel minorem naturali pulmonum inflationem producente, a qua sola respirationis vitium hoc oritur.

Tertium argumentum ab experimento JOANNIS MAJOW defumitur, ostendentis, sanguinem jampridem emissum, & aere in antlia pneumatica *Guerikiana* orbatum, non adeo se expandere ac arteriosum recentem antlia vexatum, nec proinde tantum aeris complecti. Sed, ex hoc experimento nihil poterit certo statui, nisi prius probatum fuerit hanc propositionem esse falsam: scilicet,

Expositis duabus ejusdem liquidi portionibus aequalibus, & aequali aeris per minima permisti mole gaudentibus, major aeris portio elici potest ex portione liquoris per minima soluta, quam ex non soluta eodem tempore, si eadem vis utrobique adhibeatur.

Cujus propositionis veritas ex se patet; nam, evidens est, caeteris paribus, minus solutum liquorem non adeo cito, sive non eadem vi cogi posse ad aerem suum dimittendum, ac eum qui solutus est magis: ostendemusque postea sanguinem arteriosum magis, & venosum minus esse solutum.

Ultimum ejus argumentum pendet ab auctoritate FRANCISCI SYLVII & THRUSTONII, affirmantium, immissum fuisse per tracheam vasis pulmonum sanguiferis aerem & liquorem atrum.

His respondebit pro nobis MARCELLUS MALPIGHIUS, qui, *Epistola I de Pulmonibus*, de talibus argumentis

mentis differens, haec addit: *Unde ex his omnibus, sicut naturalis via non habetur, quia immixtus liquor plures sibi parat vias, quae in sanitatis statu insuetae sunt; ita edocemur ex levi quocunque conatu, & humorum mutatione, regias istas vias frangi, &c.* Et profecto, manifestum est rem istam perite aggredienti, vi illa, qua immitti putatur aer & liquor ater, non posse non dirumpi vesiculas & pulmonis vasa longe tenerrima.

Hae eadem & solae sunt rationes, & quae opinioni JOANNIS MAJOW, non minus quam BORELLII & ETTMULLERI favent.

§. 9. Quippe, statuit ille, cum WILLISIO aliisque plurimis, ab aere suppeditari sanguini pulmonum particulas nitro-aerias, ut loquitur; quae particulae, aliis salino-sulphureis a sanguine suggestis occurrentes, eam excitent effervescentiam, a qua muscularis contractio pendet; quaeque idcirco spirituum animalium pars magna sunt. Quare, suppressa respiratione animalia ideo mori, quod deficiente sale isto aeris fatiscat cordis motus, dein sanguinis fluxus ad cerebrum, interrumpatur, & proinde cesset spirituum animalium distributio, in qua vitae ratio sita est. Sed, hisce refellendis non diutius immorabor, postquam monuero, sententias jam memoratas, quae suis auctoribus aliisque novae sunt creditae, deberi pro una & eadem haberi aliis atque aliis verbis exposita: adeo ut qui unam refutaverit, ille omnes refutaverit.

§. 10, Nam, idem dixeris; sive, cum ETTMULLERO, volueris partem aeris in pulmone sanguini admisceri ad diapnoen fovendam; sive, cum BORELLIO, ad motum sanguinis oscillatorium conservandum; sive, cum WED-
LIO,

L I O, ad fovendam reciprocationem quandam inter duas aeris formas, sive, cum B O H N I O, ad sanguinem imbuendum particulis aeriis sphaericis; aut cum M A J O W particulis nitrosis, utrisque, ut illi aiunt, facultatis elasticae, quam non possident, causis. Quippe, semper aeris aliqua pars statuitur in sanguinem ope respirationis necessario introduci. Rationes autem, a phaenomenis desumptae, generales sunt, ostenduntque nullam aeris partem, quocunque nomine ea censeatur, ingredi vasa pulmonum respirationis administrandae causa: nunquam enim explicabit ex sua hypothese horum quispiam, qui fiat, ut foetus in utero non respirans vivat; non vivat autem animal extra uterum non respirans; licet ei sanguis ab animali respirante suppeditetur, imbutus parte sive elastica, sive perspirabili, sive reciprocante, sive sphaerica, sive nitrosa aeris. *Vide phaenomenon 6.* Sed, peccarunt insignes hi viri contra regulam, initio dissertationis hujus allatam. Immerito quippe confugere ad proprietates aeris non satis intellectas, nedum demonstratas, cum ultro se omnibus offerret atque ingereret aeris gravitas, & vis elastica, quas potius vexare, & negotio aptare conveniebat, quam in difficultates inexplicabiles se induere.

§. II. Repetendum igitur est ex superioribus, aerem, cui inclusum animal interiit, nec vim elasticam, nec gravitatem amisisse; & idcirco, aerem ibi omnem, qui ab initio fuerat, superesse; ac proinde, ob notam aeris proprietatem, nihil aeris aut Nitro-aerii respiratione duci in sanguinem pulmonis.

Praeterea, ex phaenomeno primo manifestum est, aerem, aut quodcunque illud est corporis in pulmones pro vitae
G tutela

tutela ducendi, penetrare non posse tunicam pulmonum: alioquin, aperto thorace vivere posset animal diutissime, nec pulmo flaccesceret; & non aperto, aer, in cavitatem thoracis e tracheae ramulis vesiculisque appensis evadendo, pulmonis inflationem respirationemque semper prohiberet, cum aer sit fluidum, quoquoeversum premens. Deinde, evidens est, aerem, qui vasorum latera in pulmonibus perrumpat, perrupturum quoque latera vesicularum, tunicamque pulmonis, quibus intertexta illa sunt, quaeque quasi rete quoddam efformant: atqui, respiratio & vesicularum inflatio tum expediri non poterit. Ne quis vero putet effundi in vesicularum cavitates sanguinem aeri opportunum, memores simus alibi ostendere nos conatos, arteriarum venarumque ductus esse continuos: & fane, nisi in pulmone continui forent, una cum aere sanguinem semper ejiceremus. Sed, non erit forsan inutile ad hanc rem confirmandam, quandoquidem alii non credunt, quia non viderunt, adducere MALPIGHIUM, dicentem, *Epistola secunda de pulmonibus*, sanguinem (ut sensui patuit) per tortuosa vasa excurrere, nec in spatia effundi; sed, per tubulos semper agi.

§. 12. Non tamen decet esse tam prolixos in re facili demonstranda; suffecerint phaenomena, §. 6 memorata: nam, si, ad vitam conservandam, satis esset aerem quovis modo sanguini immiscuisse, tum sanguis ex animali respirante, vel etiam lac in vas aliquod non respirantis immissum, eodem ritu vitam ei animali esset facturum, quo sanguis maternus foetui facere dicitur, cum lac aequalem aeris portionem, aequali aut majori mole datum, ferat,

ferat, neque moreretur animal, contra phaenomenon 6. Speciatim vero non subingredi sanguinem aera per vasa pulmonaria, probant phaenomena secundum & tertium; ex quibus patet non deesse aerem, qui vasa subeat, si vasa subire posset. Et profecto, non subire, perspicuum est ex octavo; cum eadem, post mortem animalis os non obturati, mole inveniatur, in vase cui cum animali simul est inclusus, qua prius fuerat inspiratus aut inclusus. Cujus phaenomeni causa hic breviter est explicanda. Videmus aerem non ingredi per poros pleurae, aut nervosi circuli diaphragmatis; quoniam facilius admittitur per os & tracheae latum ductum, ubi minorem reperit resistantiam. Eodem ritu, aer in pulmones admissus patentiores minusque resistentes exitus per oscula vesicularum ad tracheam ducentia offendit, quam per vasorum latera, fluido aqueo & satis calido tenuique asservando apta, adeoque minori vi versus fauces adigitur quam in oscula venarum; hoc est, aer eadem vi, quae ei ad os faucesque repellendo sufficit, non poterit adigi in poros venarum; qui neque tam patuli ac fauces sunt, neque fluido tam parum resistente repleti. Visque hujus ratiocinii in eo sita est, quod aer sit fluidum elasticum, & in omnes partes expansile; adeoque citius & facilius adigatur per foramina majora, & in quibus minor vis caloris expandentis viget, quam in multo minora, & in quibus viget multo major calor, ambitum partium aeriarum nimis magnum efficiens, diametrumve augens. Et hoc adeo evidens est, ut, postquam aer semel fuerit per tracheam in pulmonem ductus, & partim pondere, partim vi elastica, adactus in vesiculas; nunquam postea totus reddatur; sed, vesti-

culis pulmonis, praesertim ultimis, partem aliquam relinquat, a vasis praeterlabentibus non absorbendam; pulmonesque postea semper inflatiores & leviores, quam fuerant in foetu, demonstrant, nec tantillo aeri in vasa pulmonum sanguifera patere effugium.

§. 13. Supereſt ut explicemus, quae fit illa mutatio in lapsu aeris in pulmones facta, quae editis in lucem & semel respirantibus necessaria, foetui ignota & inutilis habetur. In foetu, totus fere sanguis circuit e vena cava & arteria pulmonis, in pulmonis venam & arteriam magnam, pulmone neglecto. Pulmo enim non inflatus parum sanguinis admittit. Quippe, cum pulmonis vesiculae inflatione fiant sphaericae, erunt deficiente inflatione sphaeroides, & oblongae factae flaccescent: tum vero poterunt & debebunt ipsae a circumſitis vesiculis per totum fere ambitum contingi, vasaque sanguifera ipsas intertextentia comprimi & occludi. Accedit, quod rami tracheae appendantur ad angulos cum inferiore trachea acutos, cum superiore autem obtusos; unde fit, ut ipsi (semota inflatione) ipsisque appensae vesiculae, valide comprimant ramos vesiculaeque inferiores & interiores; & circulatio sanguinis per pulmonem non inflatum vix ulla celebretur. Quare, cum vesiculae compressae resistent sanguini, e ventriculo cordis dextro erumpenti, magis quam resistit canalis ille patens & non compressus, qui ducit ab arteria pulmonis oriente in arteriam orientem aortam; oportet eum sanguinem, qui anastomoseos venosae orificium praeterlabitur, totum fere ingredi anastomosin alteram, sive arteriosam, quae ejus facile capax est. Quamvis autem, ex eo quod parum sanguinis in foetu traducatur per pulmonem,

nem,

nem, sequatur etiam foetus non respirare, aere alternis ducto & reddito per tracheam; tamen, id ipsum manifestius patebit respicienti ad alia phaenomena: neque enim aer secundas penetrat; &, quamvis inclusum a primordiis aerem illae ferrent, tamen ejus ope respiratio non constaret, ut manifestum facit animal vasi aeri impervio inclusum.

§. 14. Pulmones ergo foetus perstant non inflati solius aeris defectu, aeris nempe qualem in auras educti libere hauriunt: nam, cum pulmones costis plerisque non adhaereant; &, quibus adhaerent, iis quidem lobi forte distrahantur, non vero lobuli vesiculaeque; idcirco, se non explicent, quantumvis intercapedo pectoris in foetu augeatur, nisi fluidum ipsis explicandis sufficiens adsit, & integrum recensque succedat, uti postulat natura respirationis phaenomenis patefacta. Horum vero neutrum in utero potest obtineri. At, quamprimum in auras evasit animal, aeremque hausit, explicantur continuo pulmones pulmonumque vesiculae, & necessitate quadem, statim declaranda, circulatio per ductus illos foetui proprios aboletur, sanguisque omnis in alias vias avertitur. Neque impediri ista canalium privatorum occlusio potuisset, si foetus in utero aerem in pulmones accepisset, ut statim ostendemus. Nascenti ergo in os asperamque arteriam irrumpit aer, pondere suo & vi elastica coactus, veluti in loca minime resistantia. Et tum demum dilatari poterit, & elevari pectus, postquam nempe aer in tracheam illapsus coeperit pectus suffulcire, & impetu aeris circumprimentis constrictum aequali impetu extrorsum agere.

§. 15. Irrumpet, inquam, aer, vi elateris & gravitatis; non autem dilatati prius pectoris, compulsus. Sed, recepto in tracheam aere, virium externo aequalium, non solum statim poterit dilatari, verum & statim dilatatur thorax; cum moveatur in dilatatione per musculum antagonista destitutum, ut sequenti paragrapho explicabitur. Aer vero receptus, cum sit gravis & elasticus, aequaliter premet ea quae a latere, ac quae subjecta sunt, adeoque irrumpet necessario in laterales tracheae ramos: &, quoniam hi constituti sunt ad angulos acutos cum trunco inferiore, ad obtusos vero cum superiore; idcirco, si subiens aer sit earum virium quae ramos vesiculasque satis inflare possint, non poterit non, aucta ramulorum & vesicularum amplitudine, simul diminui eorum longitudo; hoc est, non poterunt non tracheae ramuli sursum extrorsumque protrudi, atque ad angulos cum inferiori trunco minus acutos cogi. Praeterea, si potest irruens aer, ramos appensasque vesiculas elastica sui vi distendere, premet quoque ramos tracheae ab interna superficie quoquoeversum: &, quoniam versus truncum mediumque thoracem, partesque adeo minoris anguli, major est resistentia (cum illic resistent omnes, & rami, & vesiculae interiores inferioresque ex eodem mediastini latere, omnesque tam exteriores quam interiores lateris oppositi) minor autem versus costas jam cedentes, & ramulos vesiculasque exteriores, quarum nullae, praeter eas ejusdem lateris, resistere possunt, quaeque (de exterioribus loquor) a mediis omnibus utrinque extruduntur; ideo, dum ramuli & vesiculae aere implentur, una etiam expelluntur ad partes anguli majoris, unde pectoris aucti augustique cavi-

cavitas turgescet, ramis tracheae divulsis, & vesicularum pulmonis inflationi spatium concedentibus.

§. 16. Inflatīs pulmonum vesiculis, facile poterit sanguis universus per vasa iis intertexta & intercurrentia circulari. Nam, cum inflatione evadant sphaericae, non poterunt inflatae, nisi in paucissimis & minimis aliquot partibus, a vicinis similiter inflatis, premi: quare tota fere vasorum farrago erit pressioni expers & immunis, ruetque facilius, & majori copia sanguis e dextro cordis ventriculo in arteriae pulmonis eam partem, quae ultra canalis arteriosi obliquum & paullo minus capacem exortum protensa, ducit recta in pulmonem; cum ibi minor jam sit resistentia, amoto pondere vesicularum flaccidarum, & vasorum quae prius super seipsa replicabantur. Ideoque, sanguis liberior se per pulmones in venam pulmonum trajiciens, facile occludet anastomosis venosam, arietando semper in valvulam sanguini in cavam redituro oppositam; valvulaque illa, aequali utrinque impetu petita, statim immota, transitumque omnem negatura, constituetur.

Semel autem aer inspiratus postea alternis exspirari & inspirari per omnem vitam necessitate quadem facili debet. Quoniam enim thorax instructus est musculis attolentibus & dilatantibus, qui prae oppositis tantarum sint virium, ut hi fere pro nullis haberi merito possint; idcirco, debet thoracem dilatans musculus musculorumve series dici antagonista musculo carere. Quare, postquam costae suo pondere & structura concidentēs aerem rursus e thorace expulerint, statim contrahentur muscoli thoracem dilatantes, cum in musculos antagonistas destitutos alter-

alternis effluant, nec frustra, spiritus animales contractionem molientes; sicuti effluunt etiam alternis in omnes musculos ob alternam cerebri pressionem, ab arteriarum illic pulsantium dilatatione ortam, sed, sine effectu, ubi opponuntur muscoli aequales, & aequaliter ob easdem causas contracti.

§. 17. Dum aer inspiratus inflat pulmones, permittitque facilem ad eos universo sanguini aditum, si quapiam ratione mutatus (vel aucta nimium gravitate sua, vel accedente corporum, quae vehit, majori pondere, vel aucta vi elastica) pulmonum vesiculas nimis distendat, hoc est, eo usque, ut vasa sanguifera tunicis vesicularum intertexta in maximas angustias redigantur, tum occludentur vasa, & impediatur sanguinis per pulmonem excursus. Quapropter, inspiratione peragitur dilatatio pectoris, & explicatio pulmonis, oriturque libertas circuitus sanguini e dextro cordis ventriculo percurrenti in pulmonem. Atqui, costis, pondere suo, &, ut loquitur magnus *BELLINIUS*, figurae, positionis, atque articulationis beneficio, rursus depressis, vesiculae pulmonum necessario comprimuntur, & introrsum aguntur, ramique tracheae ad angulos acutos impelluntur: quod dum fit, aer vesiculis inclusus ad tracheae vias faucesque expellitur. Expelli autem aer non potest, quin circumposita omnia premat, elasticus cum sit; unde fit, ut sanguis vesicularum tunicas perreptans ad sinistram cordis ventriculum validius praecipitetur. Et, quoniam ille per infinitam fere vesicularum seriem, aeris vi, inter innumeras moleculas, vi costarum corruentium compressas, urgetur in vasis exilissimis; idcirco, comminuitur atteriturque

turque quaelibet sanguinis ultimo coeuntis particula, unaque ab alia omni solvitur, aut in tam nullam cohaesionem deducitur, ut non sit difficile earum cuivis in vas secretorium moli suae respondens secedere, ubicunque minus resistantiae occurrit, quam intra canalem sanguiferum: unde patet, respiratione rite procedente, animali fermento secretiones moliente opus non esse. At, postquam aer e vesiculis est ejectus, non amplius ab ejus elastica vi, concurrente cum impetu costarum se restituentium, comminuitur sanguis, reliquaque exspiratio impenditur in exclusionem aeris.

§. 18. Vix opus est nunc explicare, cur aer levior, ita ut non sufficiat promte inflandis pulmonum vesiculis, & tracheae simul ramis ad obtusos angulos reclinandis, non respondeat respirantium necessitati: neque cur in vase clauso & aeris pleno, ubi levior tantum est expansio a calore, (nam, ubi calor est magnus, & locus non clausus, respiratio impeditur, eadem fere ratione qua in vacuo, ut statim dicetur,) augeatur tamen necessario aeris elater, & inflatio ramulorum tracheae vesicularumque, ut in sic mortuis & apertis animalibus videre est, & sic prohibeatur respiratio una cum circulatione. Adde, tum aerem densiorem fieri & graviorem, quia impraegnatur praeter modum particulis perspirationis e pulmone & cute prodeuntibus: neque, cur animalia in vacuo sita brevi moriantur, cessante respiratione; cum desit aer, qui pulmones inflet quamvis juniora & nuper nata, tardius quam adulta; quia junioribus nondum penitus occluduntur privatae sanguinis viae: uti, non dissimili ratione, quae amphibia dicuntur animalia, quibus *scilicet* non omnis san-

H

guis

guis transit per pulmonem, non adeo cito moriantur defectu respirationis, ac illa, quibus omnis per pulmonem transit; cum utrisque *scilicet* pectus apertum fuerit.

Juvat potius ostendere rationem, qua fit, ut catulus, apertis licet veteribus canalibus, si semel aerem inspiraverit, atque tum statim occludatur trachea, oclusaque perfestet, moriatur serius quamvis adulto. Eadem nempe utrinque ratione, occlusa trachea, post inspirationem portio aeris includitur, quae eo usque expanditur vi caloris, ut jam nihil sanguinis transire possit per pulmonum vasa ab aere nimis compressa: hic ergo, ut vita trahatur, oportet omnem sanguinem circuire per veteres illos canales, quod fieri jam nequit, neque antea unquam est factum; unde necesse est utroque casu emori animal; sed, serius catulum, cui etiamnum patent privatae viae, aliquali circulationi locum facientes. At, nisi ea sit aeris portio inclusae expansique, quae omnem aditum sanguini in pulmonem neget, diutius vivet animal.

Si vero foetus, sive membranis inclusus, sive exclusus, ita tamen tractetur, ut respirandi nulla fiat potestas, quamvis adulto tardius tamen morietur, dum & canales sunt aperti veteres, & pulmonis vesiculae nullo aere turgentes; sed, non prius quam vel defectu alimenti, vel vi frigoris, extinguatur animalculum, nec inediae nec frigoris patiens.

Liceat hic inquirere, quaenam illa sit in fulmine vis, qua respiratio tam subito extinguitur. Cum fulminis afflatu extincti juvenis thorax *Edimburgi*, ante duos fere annos, me astante, aperiretur, ut dignosceremus, an recte conjecturam instituissem, qui pulmones mortui, veluti
eorum,

eorum, quos vacuum *Guerikianum*, vulgo antlia pneumatica BOYLIi aere exhausta, interimit, flaccidos fore affirmaveram: nihil praeter morem, aut morte dignum quod esset, reperiri potuit, excepto miro illo pulmonum collapsu: capilli & vestes ambustionis vestigia ferebant. Quapropter, aer subito & vehementer expansus, qui hominem circumfluitabat, non valuit tracheae ramulos inflare, gravitate diminuta, nec subingredi vesiculas, ob auctum partium volumen. Neque mortis istius phaenomena me cgebant ad alias, aut aeris proprietates fingendas confugere, aut ad aliorum, nec mihi, nec aliis notorum, corporum auxilium invocandum

§. 19. Patet ergo ex jam dictis, foetum posse vivere sine respiratione in utero, cum pateant viae, quibus (pulmo, licet non inflatus, suas anguste recludat) sanguis e vena cava in aortam circuire possit, in quo circuitu vita animalis est sita. Statim vero respirat vel ante septimum natus, nec sine respiratione paullulum vivere potest; quia, nisi os naresque ei obturentur, aer sua vi irruet ei in pectus, quod postea per omnem vitam alternis dilatari & constringi debet, tumque inflantur pulmones, libereque per eos fluit sanguis, & occludit anastomosin venosam, eo modo quem declaravimus; & simili etiam ratione, majori mole fluens per ventriculum sinistrum, occludit necessario canalem arteriosum sanguini ex eo in aortam fluxuro se opponens. Atque idcirco, postquam animal respiraverit, cessarintque motus sanguinei anomaliae, non poterit sine respiratione paullulum vivere; quia tum demum, occlusis anastomosibus toties memoratis, nequibit sanguis circuire, nisi celebretur inflato pulmone respiratio. Hic vero ad-

verti velim, quod, dum in foetu sanguis omnis per pulmones non traduceretur, necessitate manifesta major debuerit diffundi per caetera viscera sanguinis moles, perque vasa cutim intertextentia; quare illa omnia magis sanguine distenta, cutisque rubicundior, & cerebrum in foetu majus: quae anomalia paullatim cessat in natis & respirantibus, explicato scilicet pulmone, & viis vitae cumulatissime auctis.

§. 20. Antequam pulmonis quas praestat in natis ulteriores utilitates persequar, (foetui enim pulmo datus est usui futurus, si qua fata aspera rumpat,) oportet iis respondere quae proponuntur adversus id quod hucusque assumimus, vitam nempe in circulatione sanguinis, a motu cordis & arteriarum producta, esse sitam, atque ideo respirationem natis esse necessariam, quia sine hac circulatio in iis non possit absolvi. Nempe, non uni JOANNI NICOLAO PECHLINO creditur motus sanguinis intestinus, & quem multi censent in fluidis & aequaliter undique compressis vigere, vitae animalium esse necessario conjunctus. Hunc PECHLINUS conservari vult ab aere meatus omnium partium exilissimos subeunte. Et, quamvis interea cesset circulatio sanguinis penitus, ipsorumque spirituum animalium, vitam tamen censet superesse, *Cap. 3. Libri, de Aeris & Alimenti Defectu.* Atqui, nemo est, qui nesciat, abolitum fluidi motum in longitudinem, nullo partium fluidi, aut aliarum aequaliter undique in fluidum irrumpentium circum axes proprios, motu (hunc enim vel similem volunt hi auctores: vide PECHLIN. *Cap. 1. Libri memorati, pag. mihi 18.*) posse unquam instaurari & redintegrari: adeoque frustra con-

contendere PECHLINUM, dum animalia, quae hieme mortuis similia visa, vere demum vivere deprehendimus, amisisse dicit motum sanguinis ex arteriis in venas circularem, quem ope motus intestini & aeris benignioris appulsu ver reddat. Idem quoque alii student frustra evincere, exemplis petitis a morbis quibusdam, quibus respiratio pulsusque viventibus aboleri existimantur.

§. 21. Utrisque satisfaciet haec observatio. Assumatur pectus tanquam sphaerois, cujus diametrus minor sit digitorum quindecim, major vero digitorum viginti. Ostensum est ab aliis, dilatato pectore axem minorem augeri, majori interim non diminuta, adeoque cavitatem amplitudinemque pectoris majorem evadere. Sit augmentum diametri a spina dorsi ad sternum pertingentis decima pars digiti, eritque augmentum cavitatis pectoris digitorum cubicorum 31, tantumque aeris accipere potest accipietque pectus eo usque dilatatum, ut ejus diametrus minor aucta fuerit decima digiti unius. Similiter, si diametri minoris augmentum sit digiti quinta, haurientur aeris digiti cubici 62. At, si augmentum diametri sit quinquagesima pars digiti, erit augmentum cavitatis thoracicae digitorum sex; &, si fiat augmentum tantum centesima pars digiti, cavitas augebitur digitis tribus: tantumque aeris ad explicandos pulmones haurietur, adeoque tantillum explicari poterunt. Unde patet, posse aliquam respirationem institui, licet augmentum diametri pectoris sit admodum exile, motusque vix visibilis. Verum, si eodem tempore diametrus major pectoris in abdomen protensa augeatur exilissima sui parte (ut semper contingit in omni inspiratione, propter motum quem dia-

phragma versus partes abdominis concipit) poterit satis magna moles aeris in thoracem irruere, nullo pectoris motu observato. Ex hisce similibusque disci potest, motum pectoris tam parvum, ut observari oculis nequeat, non prohibere respirationem circuitumque sanguinis, vitae nostrae comitem indivulsum.

§. 22. Liceat nunc animum rursus advertere divisioni isti & solutioni partium sanguinis, quae in caeteris visceribus obtineri nequit, uti nec in pulmonibus non inflatis, sed inflatis demum debetur, discrimenque maximum facit agilitatis viriumque omnium foetum inter & in lucem editum, usumque vitae amplissimum praestat.

Dum aer exspiratur, patet sectionum vasorum sanguiferorum pulmonis latera opposita, subito ad contactus fere perducitur; unde fieri nequit, quin partes sanguinis sejungantur, ita ut duae quaeque non cohaereant, nec gravior leviori: & quoniam, ad secretionem rite celebrandam, solum poscitur, ut partes secernendae non sint osculis secretoriis majores, vel, licet minores, non tamen nimis multae, aut arcte cohaereant, sequitur partium sanguinis comminutione, quae in pulmone inflato & exspirante contingit, obtineri debere id commodi, ut, absque auxilio illo non intellecto fermentorum, sanguis secretionum omnium munera impleat, eaque idcirco omnia praestet quibus vita molitionesve animalium opus habent.

§. 23. Poterit horum ope reddi ratio *Loweriana* melior varietatis colorum quae sanguini contingit. Partes sanguinis rubrae necessario in pulmonibus inflatis, cum sint aliis leviores, a caeteris magis solvuntur; unde color floridus delabentis in ventriculum sinistrum, & partis per venae
sectio-

sectionem emissi supremae, innatantibus summo sanguini rubris prae levitate, vel etiam qua minor occurrit resistentia enitentibus, prae elasticitate, si quam habeant. Sed & hinc ostenditur facile, cur sanguis, qui effusus in vas altum saepe decolor est, quamvis aeri expositus, tamen in latum effusus videatur floridus: nam, si quae sint adhuc extricabiles rubrae, eae per paucas superficies facilius emergent quam per innumeras gravioresque. Denique haec ostendunt causam, qua fit, ut sanguis viscidus, & implicitas rubras gerens, quantumvis aeri expositus, non sit plerumque ruber & floridus (licet ruber exierit e venis) postquam motum solutionis amisit, quem in vasis suis conceperat.

§. 24. Addam solum, constrictione canalium sanguiferorum in pulmone partes sanguinis majores & ultimae compositionis dividi, & à se mutuo solvi, atque necessario eadem opera compagem minimarum solutarumque duriores fieri, difficiliusque in prima elementa redigi posse. Neque nunc fore operae pretium inquirere anxie in sententiam optimi MALPIGHI, statuentis novam hic mistionem, novasque nasci figuras poris partium congruas. Quippe, confusio haec & mistio ex antedictis in pulmone exerceri nequit, verum partium segregatio; nisi cohaesionem partium minimarum majorem, & duritiem, de qua sumus locuti, intellexerit: necessitas vero aut utilitas novarum figurarum nobis nulla apparet.

§. 25. Atque haec eo fine conscripsi, ut ostenderem Medicinae studiosis utilitatem regulae initio dissertationis hujus memoratae, quamque multa possint paucis & notis corporum facultatibus expediri: Medicosque monerem
ne

ne semper existiment se rite defunctos problemate, postquam ad ejus solutionem invocarint omnifarias figuras, aetheremque subtilissimum, salium hostile genus, & corpora ne quidem nomine tenus nota, motusque intestinos, & caetera gloriosae ignorantiae nomina.

D I S S E R T A T I O

De motu, quo cibi in ventriculo rediguntur ad formam sanguini reficiendo idoneam.

EXperimur omnes, inedia & cibi abstinencia, corpora animalium formas amittere, marcescere vasa, liquoresque deficere circulationi alendae pares; uno verbo, animalia interire. Experimentis etiam constat, sanissimis animalibus motu distrahi, abigique & deteri partes fibrarum, liquorum, vasorumque corporis animati speciem ostendantium; & vi naturalis sanguinis circulantis, hoc est, conditione atque sorte vitae nostrae mortem ipsam reddi necessariam, perpetuamque illam per vasa sudorifera porosve cutis perspirationem evenire: cum secretio omnis fiat per solum impetum sanguini impressum a corde, cogente fluida exitum moliri per ea loca, in quibus minor est resistendi facultas, sicuti alia dissertatione explicuimus. Quare, si vel ad solam illam perpetuam perspirationem respiciamus, patebit tantundem debere vasis inanitis affundi, & marcescentibus addi, quantum, vel ponderatione instituta didicerimus esse amissum, uti monuit
opti-

optime meritis S A N C T O R I U S, vel temporis observata intercapedine, uti fames vulgo persuasit. Ex quibus sequitur, conditiones corporis jacturam illam refarcientis esse fluorem sanguinis aemulum, & partium compagem compagi amissae similem, nimirum si animal sibi simile perstare volumus.

§. 2. Respicienti vero ad ea, quae corporum Anatomicae administrationes & actiones animalium ostendunt, manifestum est, cibos in ventriculo & intestinis eam labendi facilitatem acquirere, quae ipsis sanguini admisceri permittit. Adeoque, si poterimus invenire qualis cujusve generis sit illa ventriculi actio, vel quam similitudinem rationemve ferat habeatque cum causis aliis, quae magis notae sunt aut habentur, causa illa fluorem cibo in intestinis inducens, quaestionem hanc solvisse nos fatebimur: in qua quaestione solvenda, videntur mihi Medici plerique errasse; quoniam non satis scirent quidnam quaereretur. Non enim quaeritur causa valens omnia corpora mutare in fluidum sanguini commiscibile, constansque partibus similibus iis quae sunt amissae, (similitudo haec est aequalitas magnitudinis, gravitatis, & numeri) sed solum causa valens corpora quaedam, quibus homines vesci solent & ali, in humorem circulationi aptum convertere. Quippe, cum viderent homines aliqua animalia esse, quae metalla & mineralia durissima stomacho offerant atque devorent, statim crediderunt inveniendam sibi esse causam, quae ingesta quaelibet in ventriculo colliquescere cogat. Unde videas eos, aut potentes quosdam daemones & archaeos, aut fermenta & alia vario nomine fluida, corporum quorumvis dissolutioni paria, in ventriculum contulisse.

tulisse. Sed, si meminissent quidnam quaereretur, & causam solum optari, cognitionemve causae, qua corpora quaedam solida (quibus vesci & ali solent homines) possint mutari in liquores nobis alendis aptos, hoc est, in humores qui possint cum sanguine circulari, & suppeditare partes ejusdem fere gravitatis, magnitudinis, & numeri, cum partibus vi motuum aut perspirationis extra circulationis aream sanguinisque orbitam depulsis: deinde, si etiam observassent animalia durissimis illis devoratis non ali, tum profecto facile perspexissent, solum quaerivim partes aliorum animalium, quae nos alere possunt ingestae, solidas dissolventem; sive, quomodo tales partes in ventriculo nostro satis fluidae possint evadere. Quod absque daemonis aut liquoris stygii auxilio poterit, ni fallor, explicari.

§. 2. Evidens enim est, ad facillimam & simplicissimam solutionem hujus quaestionis requiri, ut inveniantur solida, pro alimentis in ventriculum ingerenda, quae minima mutatione sibi inducta animali alendo sufficiant; oportet autem ut mutatio illa habeat fluendi facilitatem adjunctam, ut patet ex natura data vivi animalis, cui circulatio ejus quod alit est pro vita. Jam, cum partes aliorum animalium quibus vescimur solidae, in statum fluidum sive liquorem redactae, minima mutatione inducta, nutriendo animali sint pares, quoniam partes ferunt amissis similes, & ex hypothese factae sunt circulationi congruae: idcirco, manifestum est partes animalium aptorum solidas, esse corpora quae quaeruntur; ideoque nunc solum quaeri causam idoneam, seu quanam sit simplicissima vis, quae partes illas in fluida circulari apta intra ventriculum commutet.

Et,

Et, ut quam minimum peccemus in hujus causae investigatione, adnotari volo, eam debere esse talem, quae neque animalis alendi ventriculum & carnes possit dissolvere, aut aliorum partes solidas vi ignis Chymici, ut sic loquar, aut aquae stygiae promte liquefacere; hoc enim vita animalis non fert: neque tam tarde procedat, ac ea causa qua partes animalium solidae, nullo artificio adhibito, & sibi relictæ, putrescunt. Haec omnia videor jure postulare; quod tamen statim clarius patebit.

§. 4. Videor profecto jure postulare, ut causa adferatur partibus aliorum animalium in nostro ventriculo dissolvendis par, quae non possit dissolvere partes ventriculi nostri ea actione, qua aliorum solidas in fluidas mutat; quoniam hic non quaeritur causa mortis subitæ, sed vitae paullisper fovendæ adminiculum ferens. Unde patet, nullum esse, nec pro causa quaesita haberi posse, liquidum ventriculo inhaerens, aut quavis ratione in ventriculum illabens, quodque possit, conditionibus necessariis servatis, & postulato praesertim hujus paragraphi, partes aliorum animalium ventriculo ingestas in humorem alibilem convertere sive dissolvere. Quippe, ex iis, quae paragrapho priori diximus, patet causam requiri, quae partes animalium solidas ingestas dissolvat rursus in particulas illas quam proxime, aut iis similes, ex quibus a fluido reliquo separatis partes illae fuerant in aliis animalibus prius formatae. Quapropter, cum fluidum fermento foetum, aut quovis modo dissolvens ingestas animalium aliorum partes solidas, non possit non eadem opera dissolvere partes vasorum animalis, & ventriculi, cui inhaeret, aut in quem derivatur, facile sequitur, in iis animalibus, quae

I 2

ingestis

ingestis ali ventriculo illaeso videmus, eorumque ventriculis nullum esse fermentum, aut liquidum alimenta solida dissolvens, coquens, & in chylum convertens; neque tale liquidum quaestionis difficultatem amoliri; cum semper explicandum supersit, qui fiat, ut liquor quispiam rem objectam dissolvat in partes optatas, & in eas, ex quibus ultimo fuerat composita; non possit autem in easdem partes dissolvere rem aliam, similiter & saepius objectam, sive actioni suae semper, & eodem modo, expositam; licet ex iisdem partibus eodem modo, & non arctius unitis, neque pluribus conflata. Et profecto miraculi loco habendum foret, si liquidum ventriculi solvens coquensque cibos, non etiam coqueret solveretque ea quae non sunt solidiora cibis illis, & quae, si ex simili animali alio emanantur, ventriculoque ingerantur, statim coquantur in eo. Adeo ut mirari liceat, quales illi fuerint problematum Medicorum solutores, qui putarint se methodum coquendi cibos in ventriculo rite explicuisse, cum non explicuissent, neque etiam explicare tentassent, rationem, qua fit, ut cibis in ventriculo coctis, qui non sunt coctu faciliores ipso, ipse tamen ille ventriculus non coquatur: quae tamen quaestio eadem est cum illa, quam viri illi clarissimi suo more solverant.

§. 5. Ergo liquet, neque liquorem, sive acido, sive volatili corpore foetum, neque falsum aut acrem quemvis, aut ex hisce compositum, aliisve ullius naturae partibus, ciborum dissolutioni, sive coctioni in animalium ventriculis inservire: multo minus archaeos HELMONTII, WEDELIIQUE, & lemures DOLAEI, opus hoc feliciter absolvere.

Hinc

Hinc quoque concludimus, coctionem, quae ventriculi dicitur, non fieri ope liquoris, sive menstrui digestorii, (ut loquitur & censet JOANNES BOHNIUS, in *Circulo suo Anatomico-Physiologico*) elicit ex glandulis ventriculi & salivalibus illis, non quidem acidi, sed dilute falsi, quodque motu partium suarum intestino & vitali (vide paginam iltius *Circuli* 149.) substantiam assumtarum, lactescentem & mucilaginosam suaeque naturae congruam, alendo autem corpori adaequatam, imbibit, sibi que adaptat, atque ita extractum quoddam constituit. Certe, vir hic multis modis peccat: sed, satis fuerit nobis adnotasse, liquorem illum, sive solvens vitale BOHNI, WEDELI, aliorumque plurium, posse & debere eodem ritu sibi associare & imbibere naturam diffluentem ventriculi, in quo haeret, sibi congruam, & alibilem: quod cum non fiat, concludimus, neque illud fieri quod optant cum suis, & non probant, BOHNIUS & WEDELIUS. Frustra nunc objecerit mihi quisquam, stomachi villosam superficiem viscosamve pituitae naturam fermenti, liquidive rodentis aut solventis, arcendis injuriis parem. Quaeritur enim, qui fiat, ut fermentum aliquod carnes dissolvat, fibrillas carnibus multo minus cohaerentes non dissolvat. Pituita vero ista viscosa, irretiendo fermentum subtile, sive aerem humoremque septicum e tunicis ventriculi perpetuo demissum, aequae cibis coquendis ac stomacho defendit injuras, coctionemque omnem sufflaminat ac eludit.

§. 6. Et haecenus declaratae fuerint opiniones eorum, qui quaestionem non satis feliciter, aut qui quaestionem, ad nostram nihil pertinentem, pro legitima habentes, solutione sunt dignati.

Repetendum nunc & inculcandum est, quaecunque homines, pro vita, sive circulatione conservanda, & alendo corpore, assumunt inferuntque ventriculo, esse animalia, vel vegetabilia, id est, animalia vel superioris, vel inferioris subsellii: cum utraque circulatione liquorum gaudeant, tubulisque consent, & fluidis tubulos nutrientibus. Unde manifestum fit, ea quae homines assument, naturaque duce assumere debent, esse partibus iis praedita & instructa, quae tubulorum fluidorumque in tubulos abire aptorum naturam exhibere possint atque speciem. Nam, quaecunque fuit illa actio, qua primum partes fluidi, vas aliquod carnemve quampiam nutrientes, mutatae sunt in magnitudinem aut figuram, aliasve proprietates apti alimenti & vasi isti apponendi, tamen reparando vasi partes aliquae fluidi nutrientis solo subsequenti fluidi impulsu appositae sunt & adjunctae: omnesque fatentur, nutritionem absolvi adjunctione & insinuatione partium e fluido secretarum in loca vacua facta, discedentibus aliis similis figurae molisve. Atque ideo patet, partes animalium solidas simplicissimo more resolutas, (id est, eo ordine, ut quae ultimo coierunt primae discerpantur, & exteriores ab extrinsecus accedente causa prius attingantur) necessario abituras in fluidum partibus nutritioni animalis (id est, rei ex tubulis, & liquoribus in tubulos abituris, conflandae) idoneis foetum.

§. 7. Deinde, notari hic dignum est, ea, quae neque animalium, neque vegetabilium corpora conflabant, animal non posse alere, quantumvis immutentur ventriculi actione; adeoque non apponi vasis reparandis, cum non sint mutata actione ventriculi in fluidum partibus animalium refarciendis aptum.

Ex

Ex quibus concludo, nihil aliud coctionem solutionemque ciborum in ventriculo peragendam requiri, quam ut massarum molecularumve aliquot partes eae a se mutuo segregentur, quae prius actione nutritionem peragente in unum fuerant congregatae; neque aliud negotii nostro ventriculo datum esse, quam ut particulae in speciem vaporum fibrarumque conjunctae recedere cogantur in antiquum chaos, vel eum statum quam proxime, quem apponendae partibus nutriendis habeant; & idcirco non alia vis ventriculi est necessaria: nam, si alia foret, visque ejus corpora in novas prorsus figuras, aut quasvis magnitudines mutare posset, tum alia praeter animalia cujusvis generis alere nos deberent.

Nunc autem, cum solis animalium omnis ordinis & subsellii alamur partibus, jamque ostenderimus nullum esse in ventriculo liquidum, cujus opera ad nutriendos nos cibi praeparentur, sequitur solum esse motum ventriculi atterentis & comminuentis assumptos, qui coctionem absolvat, separando eas partes quae ultimo coierant in tubulos fibrasve formae in animali spectandae.

§. 8. Quippe, non licet dubitare, quin ea vis, vel illi similis & aequalis, qua partes ex animali fluido secretae fuerant in poros partium pro nutritione obeunda, prius secretis impactae, sufficere debeat iis rursus distribuendis & redigendis in figuras magnitudinis non multum diversae, nec multum dissimiles prioribus. Patet autem particulas alibiles, & partibus apponendas apponi solo impetu cordis & arteriarum sanguinem propellente, & secretiones omnes moliente, ut alibi est ostensum; atque idcirco simili impetu tunicarum ventriculi, auxilio diaphragmatis & muscu-

musculorum abdominis freti, posse massas ita compactas rursus in partes ultimae compositionis resolvi quam proxime; nec aliquid esse quod hanc comminutionem frustretur, nisi quod non adeo saepe facileque contactus ventriculi & assumptorum fiant in partibus parvulis, ac contactus illi partium fluidi: unde fiet, ut chylus non constet temere partibus adeo minutis ac sanguis; ille praesertim, qui novam coctionem, sive comminutionem subiit in pulmonibus. Unumque est, quod hic notari optem: nempe, sicuti in vasis majoribus & prope cor sitis, impetus sanguinis est major, ita partes talium vasorum nutritioni fovendae impetu illo impactas adeo valide cohaerere, ut impetus ventriculi minus facile possit eam cohaesionem superare, qui rursus facilius dissolvit eas partes quae in vasis minoribus & longius distantibus a corde accrescunt: est enim, caeteris paribus, languidior impetus in vasis arteriosis minoribus, quoniam sunt partes coni basi propiores: nam, quamvis arteriarum truncus ramulos singulos magnitudine superet, tamen omnibus simul sumtis longe minor deprehenditur, & considerata est omnis arteriarum compages tanquam conus, cujus vertex cor spectat, basis vero corporis extrema: atque hinc est, quod in arteriis exterioribus, sive a corde remotioribus tardatur sensim sanguinis motus ex viis angustioribus in latiores effusi; tardiozem vero motum languidior comitatur impetus. Et manifestum est, esse hanc facillimam & simplicissimam rationem solvendi quaestionem propositam; quoniam hac fit, ut solida assumpta liquecant facile in ventriculo absque opera illabentis liquidi, & tamen praeter fluorem minima cibo (ab animali quippe desumpto)

sumto) mutatio inducatur, qua nutritioni celebrandae fiat idoneus.

§. 9. Proximum est, ut ostendamus causam coctionis solutionisque ciborum, ab animalibus defumtorum, a nobis allatam, non posse dissolvere ventriculi (in quem cibi ingeruntur) tunicas, neque comminuere. Raro enim tunicae ventriculi ad mutuos contactus perveniunt; & contactus, qui fiunt inter cibos atterendos & ventriculi tunicas, exercentur semper ab iisdem ciborum partibus, sed ab aliis atque aliis tunicarum ventriculi. Potissima tamen haec est rem conficiendi ratio. Dispendium partium ex contactu vel attritu tunicarum ventriculi absumtarum facillime refarcitur a materia nutritionis, ex penu sanguinis circulantis ad nutriendas partes perpetuo dimissa; cum nihil sit unde reficiantur ciborum partes ventriculi actione abrasae. Atque partim hinc est quod vermes aliaque animalcula vitam in ventriculo non incommodam agant, partim quod motibus suis ab ictibus ventriculi se viva subducant, quos mortua mortuorumve partes non possunt evadere. Et, quod non levis in hoc negotio est momenti, si datum corpus data vi impingens se membranae, eam perforare possit, potest augeri numerus membranarum, eo usque ut, iisdem positis, anterior illa membrana non perforetur. Quippe, potest ille eo usque augeri, ut impetus pars data (quae nempe anteriori soli & aliis non suffultae membranae perforandae par haud sit) in anteriorem exeratur, reliquo impetu in reliquas infumto. Et, cum abrasio sit perforatio membranae, sive superficiei anticae, quae (cum loquamur de ventriculo) fulcitur membranis plurimis, patet propositio. Et profecto,

K

fecto, evidens est ictu digiti mei non rumpi trabis superficiem, quo rumperetur tamen diminuta trabis altitudine, hoc est, imminuto numero superficierum. At, altitudo corporis non avertit vim fluidi rodentis, superficiesque anticae aequales corporum non aequae altorum eadem liquoris rodentis vi, eodemque tempore dissolvuntur, si caetera sint paria.

§. 10. Atque hic emergit phaenomenon, quod fermenti digerentive liquidi patroni concoquere non possunt: *scilicet*, observatur ubique hieme frigidoque sub Jove melius absolvi coctionem in ventriculo quam aestate; quae res non aliunde potest oriri quam ab aucta musculari vi (uti eo etiam tempore majus est omnium musculorum robur) & impetu ventriculi abdominisque comprimentis. At, augetur musculorum vis hieme frigidaque tempestate; quia tum breviores fiunt fibrae contractiles (unde eadem vi ad majorem brevitatem & inflationem perducere possunt) ab iisdem causis, a quibus ferri partem, aliquot pedes longam, apud nos hieme brevior fieri quam aestate comperimus; catenamve ferream refrigerantem brevior evadere seipsa candente, ut appensi ponderis elevatione patet. Accedit tamen huic rei perficiendae varia moles perspirationis: docuit enim nos ille optime meritus SANCATORIUS, §. 29, & 41. *Staticae suae sectionis secundae*, animalia circiter libram perspirationis hieme retinere quam aestate emittunt, idque quotidie. Unde manifestum evadit, majorem esse molem liquidorum in musculos hieme influentium quam aestate; adeoque hoc pacto ea omnia facile praestari, quae frustra quis speret ab acidis liquoribus, aliisque in animal sanum non cadentibus, & a
tem-

tempestate illa alienis: nam, aestate major est acidi proventus, faciliusque acescunt liquores. Hic autem moneo, majorem salivae proventum hiemi proprium ad perspirationem nimis imminutam pertinere, abseaeque pendere. Hac ego de re monitos esse volo illos, qui, methodo ad veritatem in scientiis inveniendam destituti, phaenomeni hujus illustrandi gratia hibernas forsitan pituitae copias producent.

§. II. Evicimus enim, salivam, & quodcunque hoc est fluidi in ventriculum immissi, non cibos potius, quam ventriculi superficiem, fibrasque illas villosas, carne omni ingesta, & quantumvis dentes perpeffa, nimium tene-riores, apta esse atque parata dissolvere.

Verum, de salivae facultate non opus est anxie differere vili & nulli non dicta, quam idcirco lectoribus hic apponere non fuit animus: dentium quoque actionem omnibus notam memorare visum non est, aliaque etiam quae chyli opificium comitantur, quaeque omnium felicissime executus est doctissimus & candidissimus rei Medicae promotor, Dominus MARTINUS LISTER, relicta aliis sola compilandi gloria. At, quoniam vir ille magnus nimium videtur tribuere perspirationi, quam ventriculo majorem hieme enasci quam aestate suspicatur, nos aequum est in eam rem diligentius inquirere. Est aer flumen, quod non minus in ventriculum quam in pulmonem se dimittit, & qua data porta ruit, sive frigus, sive aestus fatiget: quapropter, si quid aer hiberna facultate praestet in perspiratione minuenda, ejus effectum ventriculi superficies perferet, haud aliter ac cutis extima. Obstet ergo perspirationi cutis aer hibernus, faveat aestivus, cum uterque & circumfundatur cuti & in stomachum decurrat,

K 2

erit

erit semper hiberna stomachi perspiratio ad ejusdem aestivam, ut est hiberna cutis extimae ad aestivam ejusdem; quae fane hiberna est haud paullo major, ut ostendit
S A N C T O R I U S

Caeterum, dogma hoc invexit auctoritas summi viri H I P P O C R A T I S, qui scripsit *ventres hieme esse calidiores*. Observabat enim hieme ventriculum esse valentio-rem; assumebat autem ex secta philosophica coctionem calore peragi: ex his colligebat calorem stomacho majorem hieme erumpere.

§. 12. Hinc sequitur, eos, quibus ventriculus quovis liquore, quamvis fluidissimo, nimis tamen copioso aut viscido scatet, cibos non bene concoquere, neque tum sanos esse; quorum tamen contraria omnia evenirent, si coctio liquidi dissolventis opera celebraretur. Verum, ejus rei alia longe ratio est, quam fermentorum patroni possint confingere: evidens enim ex antedictis esse existimo, liquorem quemvis tam copiosum in ventriculo, ut non sit ibi locus, in quem facile satis & promte cedat, vel tam viscidum & resistentem, parumque cedentem, ut non statim, & vi minima, expellatur e loco intimam ventriculi superficiem extimamque cibi ingesti dirimente, necessario impedire & morari coctionem ciborum; necesse enim est interposito fluido quovis, aut nimis copioso, aut ullatenus viscido, eludi impetum musculorum ventriculi-que, a quo solo, cum nullum sit fermentum liquidumve coquens, pendere coctionem oportet.

Et, ut aliquid utilitatis ex horum adnotatione possit percipi, erit forsan operae pretium ulterius adnotare, quod, quo gravius fuerit interpositum in ventriculo fluidum, eo
magis

magis possit resistere motui ventriculi, vimque motus contactumque frustrari, & sic coctionem abolere; si ea sit ejus fluidi copia, ut necessario mole quadam ubique reperiatur cibo circumfusus; uti requiritur in fluido coquente & solvente. Unde sequitur, acidos liquores, cum graviores sint, & etiam falsos, impedituros coctionem; neque gravitatem hanc minime esse causam, cur tam aegre & invita prodeant ejicianturque acida ex ventriculo.

§. 13. Ex iis, quae §. 9. demonstravimus, evidens est, vasa tenuia, non satis multis membranis suffulta, qualibus fulcitur ventriculus, quo saepius opposita latera ad contactum adduxerint, eo etiam saepius atteri, atque dirumpi citius debere. Nam, si vasa fere concidant tunicis oppositis impetu quodam coeuntibus, ita ut expulso fere omni fluido intercurrente nihil intercedat, tum fiet attritio tunicarum. Et, quoniam hic est casus pulmonis ejusque vasorum, ut alibi ostendimus, non erit posthac mirandum, saepius & facilius contingere in pulmone erosionem erosionisque symptomata quam in aliis visceribus. Praecipue vero haec iis contingent, qui in aere graviore fumisque carbonum fossilium metallicis, & ideo gravioribus, vasaque pulmonum validius compressuris foeto versantur.

Ex hisce manifesta potest exhiberi solutio ejus, quod sibi solvendum proposuit THOMAS WILLISIUS; qui fiat nempe, ut Phthisicis plerisque facilius sit spirare in aere rustico, quibusdam tamen facilius sit uti aere urbis *Londini*. Loquitur de civibus suis WILLISIUS. Evidens est, eadem manente aeris hausti gravitate & vi elastica, idem animal aequali facilitate respiraturum, sive ejusdem ani-

malis sanguinem aequali facilitate transitorium per vasa pulmonis: & si, eadem vi aeris constante, non eadem facilitate transeat sanguis, oportere aut ita mutatam esse vasorum flexilitatem, aut sanguinis in fluendo facilitatem, ut resistantia facta sit ex parte pulmonum major. Quapropter, non erit mirum, eos, qui aere feliciter gaudent rustico, & virium datarum, non possint eadem felicitate pati aerem graviores & *Londinensem*, non solum in pulmones admissum, in quibus jugiter haerent metalla illa minutula fumorum, verum etiam corpori toti circumfusus: neque etiam incredibile debet videri, si ii, quibus aut natura, aut morbo, hoc est, aut nascentibus, aut arte vitaeque genere mutatis, vasa sanguisque in pulmone facta sint magis resistantia, aut quavis ratione illa minus flexilia, hic minus fluidus evaserit, melius ferant aerem *Londinensem* & graviores, quam leviores & rusticum.

Ex quibus patet, quam parum apposite loquutus sit de hac re WILLISIIUS, *Part. 2. Sect. 1. Cap. 6. De Medicamentorum Operationibus*, dum eorum qui *Londini* feliciter spirant vasa teneriora causatur, & fumo sulphuris similiumque verborum quaestionem involvit, non solvit, negligens proprietatem notam majoris gravitatis in isto carbonum quam cespitum corpore, quod in fenum abit, & cum aere hauritur.

§. 14. Atqui, haec attritionis ratio in aliis vasis, inter quae ventriculum repono, aeri quidem saepe expositis, sed suffultis, ut ostensum est §. 9. locum non habet: vasa quippe pulmonis vesiculaeque adeo non suffulciuntur musculis superstratis membranisque confertis, ut potius ab interna costarum superficie inter spirandum quo-

quovis momento per omnem vitam premantur & atterantur.

Unde sequitur evidenter, W E D E L I U M frustra in *Physiologiae suae reformatae* Cap. 6. multis verbis affirmasse, sensu & autopsia demonstrari in ventriculo fermentum salino-sulphureum, quodque progeniem lymphae vitalis esse astruit. Haec enim si vera sint, omnia vasa sanguifera eadem ratione coquantur & solventur, ab intercurrente hac lymphæ, (quæ sanguinis est pars maxima) qua ratione carnes, aliaque vasis istis haud multo duriora, solvuntur ab ipsa in ventriculum effusa. Et ex hisce paucis videre est, quam inepta sit hypothesis acidi fermentive, quæ phaenomena hæc explicet, quamque facile nobis fuerit per proprietates notiores, & de quibus certiores sumus, difficultatem quaestionis hujus amoliri.

§. 15. Neminem, cui hæc arrideant, dubitaturum post-hac arbitror, an melius absolvatur coctio, caeteris paribus, si accedat lenis & placida aut deambulatio, aut corporis recreatio non laboriosa post cibum assumptum. Nam, quamdiu motus ita auget & adjuvat comminutionem, ope *scilicet* diaphragmatis, aliorumque muscutorum, ut tamen non nimis cito, hoc est, antequam partes factæ sint satis parvae, cogatur chylus ventriculum deferere, & lactea subire, (quo casu cruditas oritur, quæ idcirco sita est in comminutione ciborum in nimis magnas partes, quarum tamen aliquæ possunt lactea subingredi) tamdiu concoctio aequè bona peragitur citius, & aequali tempore melius, sive in partes fluidiores, & nutritioni aptiores fit ciborum divisio. Quare, neque dormientibus aequè laudata contingit ac vigilantibus concoctio. Et hæc poterunt
sufficere

ſufficere explicandae more Medico primae, ut loquuntur noſtri, coctioni, quae praevia eſt, & eodem fere ritu celebratur, quem attribuimus alibi coctioni ſecundae in pulmonibus natorum adminiſtratae. Antea autem explicueramus coctionem illam, cujus tertia vulgo dicta pars quaedam eſt; nempe, ſecretionem, quae in glandulis atque viſceribus exercetur, cujus ſpecies eſt nutritio pro tertia coctione a Medicis celebrata.

§: 16. Non opus eſt ut multis verbis oſtendam, peracta ventriculi & pulmonis coctione, ſanguinem aptum reddi, ut ipſo alatur animal, licet per fermentum figuraſque proprias locorum non immutato, cum haec adminicula nulla ſint, aut nullius uſus: ſuper eſt ergo, ut negotium hoc abſolvatur, coctionibus quas dixi praeviis, impetu ſolo cordis & arteriarum; quo fit, ut particula quaevis ſanguinis in eum locum ſecedat, in quem ab aliis expellitur, modo is ejus ſit capax: adeoque, cum non omnes in ſecernentia poſſint expelli, (de eſt enim horum numerus & amplitudo ſufficiens, aut, ubi ſufficiens a deſt, nulla ſit nutritio) ſive vaſa quae vulgo pro talibus habentur, neceſſe eſt aliquas ſecedere in ſpatia fibrarum vaſa componentium vacua; ſed, tam arcta, ut ingreſſa & à tergo ulterius compulſa particula ad plurium quieſcentium contactus undique perveniat; quae, ſi locum ſe multo minorem vacuum in canalis ſuperficie offendiſſet, per eum forte expulſa contactus illos evaſiſſet, & ideo canalem iſtam nullo alimento reparaiſſet. Nutritio ergo ſita eſt in plenitudine omnium vaſorum reſtituta, quae facit ut in membranam cujuſque canalis ſecedat pars liquidi ipſius in locum ejus quod e fibris fuit dimiſſum. Sequitur hinc eviden-

§. 17. Verum, priusquam negotium hoc dimitto, decet difficultatem amoliri, quae minus cautis posset imponere. Nempe, experimur in aliqua vasa injici posse facile satis liquores quosdam, si Poristis credendum, dum in eadem immitti eadem facilitate non possunt alii quidam liquores prioribus illis subtiliores, & partium minorum vi pollentes, aut hucusque pollere crediti. Hoc ergo, cum diversae moli nequeat ascribi, ascribendum erit diversae figurae, qua corpus majus minori excluso penetrabile fiat. Ego autem longe alia ex hisce consequi censeo: nam, cum naturae lumine notum sit, quod duorum corporum inaequalium, quorum unius maxima diametrus sit minimae orificii oblatae diametro aequalis, alterius vero aliqua, pro situ quo orificio admoveatur, sit ea major, prius illud,

L
cujus

cujus diametrus est aequalis, poterit ingredi & transire per illud orificium, excluso necessario posteriori, cujus diametrus aliqua est major diametro illa orificii quam orificium corpori applicat: adeoque, ex eo quod liquor hic non transeat orificium, quod ille, iisdem manentibus, transit, manifesto sequitur illum liquorem quam hunc partibus minorum diametrorum, sive absolute minoribus constare; quamvis harum partium partes plures sint, magisque unitae & graviores, aut etiam magis conspicuae, aliasve proprietates habeant, quibus vulgus crassitiem liquorum metitur. Unde patet methodus explorandi qualium liquorum partes ultimae compositionis sint minimae, id est, minimis diametris praeditae.

§. 18. Liceat ex hisce inferre, nihil neque in ventriculo & intestinis, neque in pulmone, multoque minus in corde, denique nihil in ulla secretionem ipsave nutritione contingere, quod alimenta mutare valeat in spiritus chymicos aut salia volatilia, &c. Nam, cum cibi in ventriculo comminuuntur & coquuntur, semper prius & facilius tollitur & separatur earum partium cohaesio quae minus arcte cohaerent. Atqui, partes, ex quibus ultimo conflati sunt canales, vel quarum adjunctione sunt aucti, minus cohaerent, quam istarum partium partes, cum istae a reliquis, non hae a se mutuo per impetum cordis sanguinisque divisae & secretae fuerint. Postquam vero istae ita fuerint in ventriculo separatae, rursus ut fluere unae supra alias possint facile, tum motu ventriculi expelluntur in lactea. Unde sequitur, nihil fieri in ventriculo, unde quis possit pro certo statuere, ciborum coctione elici sulphur saliaque, & alia corpora pro elementis venditata:

ditata: neque ferendos esse, qui tam precario philosophari etiam in Medicina tradenda volunt, quos nec pudet scribere, fieri in ventriculo resolutionem sulphuris alibilis, & chylicationem esse actionem archaei segregantem & immutantem (beneficio caloris & fermenti in ventriculo) ex alimentis sulphur alibile oleoso-aquosum; & fieri in ventriculo analysin acidi & alcali pro sulphurei vinculi laxatione: sulphur enim esse interpretem amicitiae inter alia, sibi alias contraria, ut lectoribus suis persuadere studet gravis auctor WOLFGANGUS WEDELIUS, *Cap. 9. Physiologiae reformatae.*

§. 19. Aliam oportet inire rationem atque methodum, si theoriam Medicam pro rei dignitate condere, artemque, & per se nobilem, & mortalibus necessariam, ab abjectis conjecturis foedaque incertitudine vindicare volumus. Cujus methodi exemplum nos hic dedimus in re quidem non difficili; sed, futurum tanto utilius, quanto rei difficultas fere nulla minus est ablatura methodi ipsius conspectum. Quippe, ad hanc quaestionem solvendam methodo Medica, manifestum est nihil requiri, praeterquam ut inveniantur solida ingerenda, quae facillime possint reparare jacturam partium, e canalium tunicis & liquorum penu evolantium: & vires illas simplicissimas ventriculi vel in ventriculo applicandas definiamus, quae possint ingesta solida reducere ad ea fluida, ex quorum partibus ingesta illa fuerant ultimo conflata atque compacta. Patet autem ex dictis, primo quaesito respondere partes vegetabilium, sive omnis generis animalium: alteri vero quaesito & desiderato satisfacere motum ventriculi & abdominis, musculorumque adjacentium, aliis

auxiliis frustra advocatis; sed, quod hic ante alia obser-
 vandum est, non opus fuisse ad haec definienda ulla philo-
 sophica cognitione naturae ciborum, sive magnitudinis,
 figuraeve partium aut pororum in ipsis, motuumve fluidi
 poros earum pervadentis; neque hic esse utile scivisse, an
 ullum sit fluidum pervadens; an partes ciborum sint
 omnes ejusdem, an diversae figurae: verum sufficere, si
 noverimus, solidum, quod ex conjunctione prius fluen-
 tium coaluit, redigi posse in simile fluidum, si partes illae
 detrudantur in contrarias vias; deinde in ventriculo co-
 natum exeri, quo partes solidorum ita detrudantur, &
 deinde fluidum naturae suae priori sive sibi redditum,
 eodem modo in canales evasurum, quo prius in similes
 evaserat. Et nimis evidens est, haec convenire corpori-
 bus quavis figura aut motu praeditis, nullamque naturae
 rerum intimae, aut philosophiae causas physicas & subti-
 lissimas rimantis cognitionem deponere. Quae dixi osten-
 dere mihi videntur, non posse alimenta coqui absque
 auxilio ventriculi & muscutorum abdominis commolen-
 tium. Superest ut ostendam, vires diaphragmatis & mus-
 cutorum abdominis tantas esse, ut officio onerique a
 nobis imposito pares esse facile possint. Vires illae, sive
 investigentur ope *propositionis* 121, &c. *primae partis*
operis Borelliani, sive auxilio principii *Newtoniani*, ex
Borellianis etiam eliciendi, prodibunt sane ingentes. Qui
 examen rite instituet, is statim inveniet potentias muscu-
 lorum se habere in ratione composita ex ratione longi-
 tudinum, latitudinum & profunditatum; hoc est, in ra-
 tione solidorum homogeneorum, sive ponderum. Atqui,
 medium pondus musculi tertium pollicis manus articu-
 lum

lum flectentis, aequat grana 122. musculorum abdominis rectorum grana 3720. pyramidalium 126. oblique ascendentium 2640. transverforum 2640. oblique descendentium 2040. pondus diaphragmatis aequat grana 3960. Quapropter, summa ponderum musculorum abdominis, huic negotio aptorum, aequat grana 15126.

Jam per *propositionem 126 primae, De motu animalium, BORELLII*, potentia flexoris pollicis aequat libras 3720; adeoque, ut se habent grana 122 ad libras 3720, ita se habent grana 15126 ad libras 461219. Ex hisce patet, vires horum musculorum non cedere viribus lapidis cujusvis molaris: eumque, *qui novit naturae rerum Auctorem neque frustra quidquam moliri, neque rem unam multis modis, sed multas res uno modo perficere*, facile agniturum actionem ventriculi muscularem, actionesque musculorum ventriculum comprimentium eas esse, quae cibos in ventriculum ingestos redigunt in liquorem animali alendo & sanguini reparando idoneum. Sed, etsi nullae adhiberentur in hoc negotio vires musculorum abdominis, sufficerent tamen vel stomachi vires rei pro votis gerendae. Pondus medium stomachi humani est unciae octo; adeoque, calculum instituendo similem illi superius exposito, invenietur potentia muscoli stomachi aequalis ponderi librarum 117088; quae fere quadragecupla est potentiae naturalis cordis, per *propositionem 67 secundae partis operis Borelliani, De motu animalium*, qui ostendit hanc esse circiter librarum 3000.

SOLUTIO PROBLEMATIS

DE

INVENTORIBUS.

A Nimadverti jam a multis annis, nihil unquam ulli civitati funestius fuisse quam civium credulitatem, & quod eam comitatur, perpetuum novandi studium. Quoties enim callidi & versuti homines adeo placere coepissent, ut iis populus brutam fidem haberet, continuo mores civitatis everti cerneret, leges & instituta majorum refigi, jura divina & humana violari, quod ea novandi studio consiliisque plebem fallentium obstarent.

Atqui, ego apud imperitam plebem plus valere callidorum hominum artes, quam doctissimorum rationes, non miror; miror potius, excellentissima & pene coelestia ingenia vulgi saepe exemplum secuta, eorumque esse auctoritate seducta, quos omni genere virtutis honestarumque artium clarissime superarent.

Quapropter, operae pretium videor facturum, si viris honesti rectique studiosis viam monstravero, qua se a turpi servitio vindicare queant, & illi nebulae mentes suas eripere, quam auctoritas paucorum hominum veritati offudit: nam, populum velle in viam reducere, dementis est molitio. Ut vero peritis gratum faciam, & altiorum disciplinarum studio accensis, brevi oratione hic ostendam, quibus in rebus, quorumque hominum auctoritas
nos

nos debeat movere, sive cui potius hominum generi, cujusque generis res narranti sit credendum, simulque solvam nobile, nullique prius tentatum, de inventoribus problema. Id agens, auctoris, inventoris, observatoris, & historici appellationes pro una eademque usurpabo, advertique volo problematis hujus duos esse casus: vel enim auctoritas inventoris ingreditur problematis conditiones, vel eas non ingreditur. Priorem casum sequentia expediunt.

§. 2. Cautè decet observare discrimen inter ea quae ob suam, vel aliorum evidentiam demonstrata sunt; quorum nempe talis est evidentia, ut, postquam ipsorum probationes intelleximus, ea aliter concipere nequeamus; & ea, quae neque ex seipsis, neque ex aliis sunt demonstrata. Prioris generis est hoc, *totum est parte majus*: posterioris est hoc, *PYTHAGORAS invenit 47. primi EUCLIDIS*. Per demonstrata igitur ea intelligo, quorum probationes conficiunt impossibile esse ut ipsa se aliter habeant; unde sequitur, ea semper eodem modo se habere: at, per non demonstrata intelligo ea, quorum probationes non conficiunt ipsa aliter esse non posse, unde concludi nequit ea semper eodem modo se habere. Argumenta priori generi convenientia vocantur demonstrationes; posteriori vero, probabilitates. Hinc patet, nullum numerum finitum probabilitatum demonstrationi aequipollere; deinde nos haudquaquam esse tam certos, cum assensum non demonstratis praebemus, quam cum eundem demonstratis imperitumur; adeoque non esse tam pertinaciter adhaerendum opinioni non demonstratis suffultae, quam alii per demonstrata invecdae.

§. 3. Porro, adnotandum est, illos qui observationum auctori aut scriptori fidem haberi volunt; hoc est, qui inventorem proponunt, cujus auctoritas ingreditur condiciones quaestionis, necessario assumere haec effata.

- I. *Sensibus habendam semper esse fidem: quod probatione non eget.*
- II. *Observationis expositae inventores semper eadem aliis narrasse, quae ipsi sensuum ope invenerant: quod inter demonstrata non reperitur.*
- III. *Eos, per quos observatio nobis per manus est tradita, tam probos omni aevo fuisse, ut non alia nepotibus tradiderint, quam quae a patribus acceperant suis: quod demonstratum non est.*
- IV. *Si observatio vetus & non scripta tradatur, tum hoc effatum assumere pro vero oportet; nempe eos, qui eam per manus nobis tradidere, nunquam fuisse ejus ulliusve ejus particulae oblitos: quod minime est demonstratum.*

Ex quibus sequitur, 1. certiores nos esse de demonstratis, quam de ulla re ab historiae (observationes complectentis) fide desumpta. Deinde, 2. certiores nos esse de iis quae per sensus, quam quae ope talis historiae cognovimus; adeoque argumentum ab ejus historiae fide petatum non valere adversus demonstrata vel sensu percepta.

§. 4. Quin etiam sequitur, nos non tam certos esse de veritate observationis; quam fuerant ejus auctores: hi enim solum primum effatum pro certo atque demonstrato usurpant; nos hisce fidem habentes etiam secundum effatum

tum pro demonstrato adhibemus: eodemque modo non esse nos tam certos de veritate observationis veteris, aut quae olim peracta rursus institui non potest, quam non veteris, ejusve quae pro lubitu potest institui: quia, dum non veteri historiae credimus, solummodo primum & secundum effatum assumimus; at, dum veteri, tum etiam tertium pro concessio adhibemus. Denique, non esse nos tam certos de veritate historiae (observationes completentis) non scriptae, quam de veritate scriptae; quoniam ad fidem scriptae rite conciliandam solummodo tria priora effata pro demonstratis habere oportet: at, cum non scriptae credendum est, etiam quartum effatum pro demonstrato, licet non prorsus demonstratum, oportet adhibere: adeoque in uno quam in altero casu plura non demonstrata pro demonstratis, hoc est, plura incerti nota laborantia pro certis fovemus.

§. 5. Facile est ex hisce perspicere, nulla inventoris, cujus auctoritas conditiones problematis ingreditur, quales sunt apud Peripateticos ARISTOTELES, Medicosque quosdam HIPPOCRATES, & apud alios alii, dicta deberi ita explicari, ut contraria sint ulli demonstrato, aut per sensus percepto, aut etiam ulli opinioni, quam ideis a sensu subministratis evidentia exaequat: neque, ut adversentur ulli effato, quamvis non demonstrato, a quo fides omnis historiae dependet: aut denique ulli opinioni, quae fundamentis fulcitur non minus probabilibus, quam sunt axiomata illa, quibus historiae auctoritas innititur. Memoresque semper esse decet, licentiam, qua utendum est in explicandis historiis, tanto minorem esse, quanto major est historici inventorisve auctoritas, sive

M

quanto

quanto minor est numerus non demonstratorum, quibus
ceu demonstratis historia imponitur.

§. 6. Verum, ad secundum problematis casum accedamus; cum nempe inventoris auctoritas non ingreditur
quaestionis conditiones. Ejus difficultas sequentibus
Theorematis exhauriri poterit.

THEOREMA PRIMUM.

Auctor inventi publicus censeri debet qui primus ea tradidit, ex quibus id ipsum facilius deduci potest, quam ulla primi EUCLIDIS propositio ex ejusdem axiomatis, definitionibus, & postulatis: dumque ea traderet, non fuit occupatus in iis corollariis deducendis, quae millies minoris momenti & utilitatis sunt, quam illud est de quo quaeritur. At, si neque ea tradidit primus, ex quibus ea facilitate inventum colligitur, neque inventum ipsum diserte explicuit, sed prolixè & diserte infinita alia minimi momenti protulerit, tanquam ex datis emanantia, ille non est inventi, de quo quaeritur, censendus auctor.

Haec propositio ex eo demonstratur, quod nulli Philosopho aut Medico omnia nota sint, quae ex notis deduci possunt.

THEOREMA SECUNDUM.

Qui primus de invento, de quo quaeritur, publice locutus sit, & eodem modo quo postea de eo locuti sunt alii, quibus nemo est qui non fateatur inventum illud esse notum, neque simul, & quidem aequè vel magis diserte, alia

alia tradidit invento proposito contraria, is hujus auctor est habendus. At, si non aliter de eo sit locutus, quam loqui solent ii, quos nemo non fatetur inventi esse ignaros, aliaque plurima saepius disertiusque tradidit invento illi adversantia, is auctor inventi non debet censeri.

Haec propositio huic innititur assumpto, quod si quis decies scriptum reliquerit numerum stellarum esse imparrem, semelque tantum scripserit & eodem modo, esse parem, credibile sit eum censuisse earum numerum esse imparrem. Quare, si quis Medicorum de circulatione admodum obscure loquatur, & saepissime non solum quibusdam circulationis effectibus, id est, ab ea pendentibus corollariis, contraria, sed aperte circuitui adversantia, hoc est, omnibus elementorum Medicinae propositionibus manifeste contradicentia disertissime tradiderit; non est existimandum ei sanguinis circuitum fuisse cognitum.

§. 7. Ut haec prorsus evidentissima evadant, scire oportet, quod aliquid ingredi quaestionis condiciones tum dicitur, cum, isto aliter se habente, quaestio mutatur. Adeoque eas non ingredi dicitur id, quo aliter vel utcunque se habente non mutatur problema. Ut ergo hoc applicemus primo casui, in quo auctoritas inventoris quantumvis magna potest assumi, evidens est nihil falsi in talis Historici scriptis reperiri: quia vero fatemur nos credere merito multis viris, haec ejus esse Historici scripta testantibus: idcirco eadem opera assumimus pro certis effata omnia, paragrapho tertio proposita; unde sequitur manifeste, nihil in ejus Historici scriptis contineri, quod sensibus, illisve effatis, aut aliis aequae certis repugnet; &

si aliquid ejus naturae in ullo scripto contineatur, id non esse talis Historici scriptum; unde constant paragraphi 4 & 5.

§. 8. Deinde, si auctoritas inventoris non ingrediatur conditiones problematis, tum ea potest spectari tanquam nulla; nihil enim confert ad problematis solutionem, adeoque nihili est habenda. Atqui, cum auctoritas inventoris mensuretur ab ejus veracitate, sive peritia & perpetua voluntate dicendi ea, quae peritia illa nituntur, patet in secundo quaestionis hujus casu, ubi auctoritas pro nulla habetur, etiam & scientiam, & scientiae congrua dicendi voluntatem, pro nullis censi; nempe, haec prorsus non considerari. Unde sequitur, in hoc casu verba Historici, seu inventoris posse, & saepe debere ita explicari, ut sint sensu perceptis contraria, aperte falsa, & demonstratis repugnantia; nempe, eodem modo quandoque homines nullius auctoritatis loquentes explicari debent, qui quidem saepe non negant & se & colloquentes aperte falsa & absurda proferre, & in eum sensum sua mutuo dicta interpretantur.

Ex quibus concludo, ubi quaeritur an HIPPOCRATI cognitus fuerit sanguinis circuitus, (in qua quaestione auctoritas HIPPOCRATIS spectatur tanquam nulla nulliusve utilitatis, cum nemo circuitum ei notum dicat; ideo, quia fuerit infinitae vir peritiae) licere ejus dicta, non minus quam imperiti cujusvis, ita explicare, ut falsa & absurda sint, neque in hac quaestione auctoritatem ejus debere adduci, ut quae absurda & circuitui sanguinis adversantia protulit, molliori interpretatione diluantur. Hic etiam infero, in secundo casu, nempe, cum auctoritas inventoris non ingreditur conditiones problematis, theore-

mata

mata duo, paragrapho sexto proposita, esse necessario vera: nam, quoniam eo in casu auctoritas illa est nulla, non debet assumi inventor, sive Philosophus, sive Medicus, ejus esse ingenii, ut plura intellexerit quam quae disertissimis verbis tradidit; unde fuit primum theorema: neque ejus peritiae, ut non & falsa atque absurda potuerit proponere, & saepe proposuerit; unde fuit theorema secundum.

Ut quae jam dicta sunt, facilius intelligantur, adverti velim quo pacto ea ad quaestionem de inventore circuitus sanguinis solvendam applicari possint. Quaestio in eo versatur, ut inveniamus, an HIPPOCRATI cognitus fuerit sanguinis circuitus. Vocem autem circuitus eodem modo ab HIPPOCRATE usurpatam, quo ab aliis multo recentioribus, liquido debet constare, ita ut invenienda sit in HIPPOCRATE descriptio hujus circuitus, satis clara & distincta.

Ego vero affirmo, circuitum sanguinis nunquam diserte ab HIPPOCRATE describi, nihilque in ejus scriptis contineri, quod suadeat motum illum ei cognitum fuisse; sed tantum, cognosci ab eo potuisse: nam, quamvis nusquam circuitus sanguinis perpetui meminerit, ea tamen saepissime commemorat, ex quibus deduci potest iste circuitus, quem quidem nunquam exinde colligit, licet inventum sit longe majoris momenti, quam sunt ea omnia, quae ex sibi notis intulit & prolixè inculcavit HIPPOCRATES. Nota nempe fuit HIPPOCRATI venae sectio: ex ea celebrata colligi potest sanguinis circuitus perpetuus: ex ea tamen non hunc circuitum, sed plurima alia, partim futilia, partim falsa & circuitum sanguinis destruentia; eaque omnia momenti prorsus minimi fastidiosa loquacitate ostentat.

Qui ejus viri nimia trahuntur admiratione, legant libros *De locis in homine*, *de morbo sacro*, *de victus ratione*, quo facto facile intelligent quantum sese efferat, dum à se inventa memorat, quae cum circuitu sanguinis perpetuo conferri neutiquam possunt. Sane, non est credibile, HIPPOCRATEM, Graium hominem, quique tam trita toties lectori suo apponit, non fuisse verbosa & ad pompam composita oratione profecuturum sanguinis circuitum, si eum cognovisset, cum is omnia HIPPOCRATIS, omniumque ab ÆSCULAPIO genus ducentium inventa utilitatis gloria longissime anteiret. Cognitus fuit HIPPOCRATI arteriarum pulsus: ex eo sanguinis circuitum perpetuum debuisset colligere; at, nihil tale colligit: sed, cum causa pulsus ei foret describenda, rem circuitui prorsus adversam proposuit; quod non fecisset, si veram pulsus causam, nempe sanguinis circuitum ullatenus perspectum habuisset. Et quam, quaeso, pulsationis inter aures & tempora perpetuae causam putas divinum istum senem divinasse? Non loquor de pulsatione aucta per febrim, & capitis dolorem, quae perpetua non est, & de qua HIPPOCRATES libro *De flatibus*: nam, causa pulsus perpetui redditur ob eo in libro *De locis in homine*, quae ita se habet. „ In omnibus corporis venis sanguis continetur, „ qui eas irrigat, si venas exceperis, quae inter aures & „ tempora semper pulsant; in his enim nullus est sanguis: „ quia, qui iis est vicinus; cupit ab iis discedere, & in vias „ contrarias averfus occurrit adverso sanguini, cum quo „ confligit: ex horum lucta oritur pulsus.

Deinde advertatur, HIPPOCRATEM de motu sanguinis nunquam aliter loqui, quam locuti sunt postea alii, quos

quos manifestum est, circuitum perpetuum non agnovisse, quorumque aliqui etiam ab HARVAEO declaratum & demonstratum negarunt. Legat qui volet scriptores Medicos HARVAEO aetate superiores, & aliquos etiam aequales, comperiet profecto verissimum esse quod assero; piget quippe eorum sententias exscribere. Haec cum ita se habeant, licebit concludere, circuitum sanguinis verum fuisse HIPPOCRATI ignotum.

Cognita fuerunt HIPPOCRATI cordis fabrica & motus, deque eo librum conscripsit: de illo etiam libros conscripserunt HARVAEUS, aliique recentiores. Quam vellem, ut, qui circuitum priori notum esse affirmant, horum quoque de corde scripta sedato animo inspicerent: in libro HIPPOCRATIS *De corde* nulla de circuitu sanguinis perpetuo verba; sed plurima, circuitui sanguinis adversantia. Postquam multa de liquore pericardii, de causa cur aqua in laryngem defluens tussim excitet, more suo perorasset, operose probat, auriculas cordis non esse auditus organa; *Quia, inquit, non habent aurium foramina, nec audiunt clamantem.* Erat profecto HIPPOCRATES verborum non parcus; itaque putandum non est, eum, qui tot verbis res tam nullius pretii explicare fuerit dignatus, non fuisse circuitum sanguinis, pro rei maiestate, declaraturum, nisi hic ei non fuisset cognitus. At vero, cum oblata foret hunc circuitum plene & diserte describendi pulcherrima occasio, solummodo nos docuit mentem hominis esse sinistro cordis ventriculo insitam; ubique autem docet, sanguinem ab anima in motum agi, per venas nostro seculo dictas, versus extimas corporis partes, perque easdem retro agi ab ejusdem animae redeun-
tis

tis incerto pulsu, eaque quiescente tranquillum esse. Illud enim notatu dignum arbitror, HIPPOCRATEM saepissime ea prolixè proponere, quae circuitui sanguinis adeo manifeste sunt contraria, ut ea scribentem oportuerit circuitus fuisse ignarum. Fieri quidem potest, ut elementorum Geometriae non ignarus propositionem edat per multas ambages deductam, quae cum aliqua forte illorum particula pugnare deprehendetur; sed, impossibile est, ut, elementorum istorum gnarus, ea saepissime scribat, quae omnibus eorum propositionibus aperte repugnent. Quare, cum HIPPOCRATES saepissime, non solum circuitui sanguinis obscure contraria, aut quibusdam tantum ab eo pendentibus corollariis; sed, aperte adversantia; hoc est, omnibus elementorum Medicinae propositionibus manifeste contradicentia, disertissime tradiderit, non existimandum est, eum sanguinis circuitum agnovisse. Eos, qui tam studiose HIPPOCRATEM rimantur, ut inveniant aliquid quod circuitum sanguinis indicare videatur, rogo, ut ea ejus viri dicta exscribant aut adnotent, quae contrarium aperte significant: eorum enim numerum immanem invenient; opusque hoc, quam illud cui incumbunt, minus arduum, neque tamen minus utile est futurum.

§. 9. Addendum his igitur est, non simpliciter hic quaeri, an HIPPOCRATI nota fuerit sanguinis circulatio genuina; sed etiam, an motus ille sanguinis ita sit ab eo descriptus & comprobatus, ut alii rationibus ejus, & non solum auctoritate moti, (cui apud Medicos nullus debet esse locus) veram circulationem potuerint facile debuerintque agnoscere, imo vero agnoverint, & agnoscere se sint professi. Quippe, quaeritur, an HIPPOCRATES fuerit

fuerit auctor dogmatis de circuitu, id est, alios permoverit ad ejus fidem suscipiendam. Notum est, Geometras, qui theorema quodvis demonstraverint, ab EŪCLIDE, aliove ante se Geometra, non diserte demonstratum, licet facillime ex aliorum demonstratis theorematis fluens, auctores ejus theorematis semper esse habitos, ipsosque tanto majori esse in gloria, quanto major foret facilitas, qua usi sint in theoremate suo ex aliis ante notis & demonstratis deducendo. Notumque etiam est, apud Geometras non quaeri, an tale theorema alii fuerit notum, sive pro vero habitum; (id enim Geometriam, addo ego Medicinam, non promovet, ubi ratione & demonstratione, non auctoritate res geritur;) sed quaeri, an ideo ab alio fuerit demonstratum. Nemo est, qui Geometram theorematis, quod non demonstraverit, inventorem agnoscat, minusve propterea gratiae illi, qui primus id demonstret, habendum esse putet, quod alius veritatem Geometricè demonstrandam conjectura & fide aliqua sit prosecutus. Eodem modo, non debuisset a viris doctis quaeri nimis sollicitè, an HIPPOCRATES quaedam dixerit, quae circulationem sanguinis nobis ipsam ab aliis edoctis redolere possint; quamvis ne hoc quidem verum sit: sed, an aliquod ejus rei argumentum sit ab HIPPOCRATE allatum, quo alii ad suscipiendam circulationis prius ignoratae fidem permotos esse se profiteantur; id vero nemo est mortalium qui unquam fuerit professus. Nam, quod aliqui hodie, re tota nempe per alios demonstrata, dicunt HIPPOCRATEM clare tradidisse valvularum cordis artificium atque usum, nihil juvat: quam enim multi fuere, qui earum artificium atque usum, ab HIPPOCRATE tradi-

N

tum,

tum, melius ipso tradiderint? Omnes profecto post HIPPOCRATEM Anatomici & Medici; quibus tamen adeo erat ignota circulatio sanguinis vera, ut eorum aliqui, quibus noti fuerant COLUMBUS, CAESALPINUS, SERVETUS, aliique, lectique ipsorum libri, adversus illud eorum dogma libros conscripserint. Concludo denique, usum valvularum cordis verum HIPPOCRATI fuisse ignotum. Patet hoc ex ejus libello *De corde*, ubi haec habet de dextro ventriculo ejusque vase: *Aperitur quidem in pulmones, ut iis sanguinem ad alimentum praebeat: in cor autem clauditur, non confertim tamen: quo aer quidem ingrediatur, neque tamen admodum multus.* Unde patet, usum valvularum HIPPOCRATI eum fuisse, ut tantum sanguinis non redituri posset egredi, quantum pulmoni alendo sufficeret, dum per easdem vias ingrederetur ex pulmone aer, quae a circulatione sanguinis vera, & a vera ratione respirationis sunt alienissima nimisque abhorrentia.

§. 10. Non est nunc operae pretium ea omnia adnotare quae ostendunt, HIPPOCRATEM fovisse sententiam circuitui sanguinis per recentiores declarato contrariam. Ex multis pauca feligemus. HIPPOCRATES maniae inducendae modum suo more explicans, *Lib. De morbo sacro*, sub finem, haec habet:

Quod si terrores & metus adsint, ex cerebri transmutatione contingit, quod fit, dum a bile cerebrum incalescit, ubi per venas sanguinem deferentes in cerebrum ex corpore impetu delata fuerit. Metus autem circumstat, donec rursus in venas & corpus redierit, deinde sedatur. Intempestive autem tristatur & angitur, dum cerebrum perfrigescit, & praeter consue-

consuetudinem cogitur. Id vero & ex pituita contingit, ex eaque affectione obliuiosus evadit. At, ubi cerebrum repente percalescit, nocte clamat & vociferatur; idque biliosis contingit, minime vero pituitosis; cum hi non percalescant postquam copiosus sanguis cerebrum invaserit, inque eo ebullierit. Is autem multis subit per venas praedictas. Cum forte contingit, ut quis horrendum insomnium videat, & in metu sit, non secus certe ac si vigilaret; tunc magis facies ardescit cum rubore, & oculi rubescunt, cum timuerit, mensque aliquod malum perpetrare cogitat, sic quoque ei per somnum contingit. Ac, ubi experrectus fuerit, & ad se redierit, sanguisque rursus in venas praedictas dispersus fuerit, cessat.

Ex quo loco patere arbitror, HIPPOCRATEM credidisse, sanguinem per easdem venas redire ex cerebro, per quas in id deferatur, eumque in iisdem vasis prorsum retrorsumque fluctuare, qui motus cum crederetur illi in hominibus iisdem statim temporis intervallo fieri, oscillationes illas periodos dixit.

§. II. Et ex his manifestum fit, quam invalidum sit pro HIPPOCRATE argumentum, quod desumitur ex ejus libro *De insomniis*, ubi haec habet: *Flumina non pro more existentia sanguinis periodum denotant, & plus justo quidem fluentia exuberantiam, minus vero defectum; hunc autem per victus rationem augere, illum vero imminuere oportet.*

Nemo unquam fuit Medicorum, quamvis circulationi verae adversantium, qui non aliquem motum sanguini tribuerit; sed, per eadem semper vasa, Euripi in morem; quare hi idem dicere & possunt & solent, quod hic ab HIPPOCRATE dicitur. Hujus enim verba motum sanguini

concedunt; at, nullo modo circularem, cum flumina non redeant in orbem ad fontes suos, veluti sanguis hodie redire statuitur per alveos continuos atque continentes: mirumque est, tot eruditos viros, ubicunque vident HIPPOCRATEM motui sanguinis ascribere periodum, credidisse ex eo patere, HIPPOCRATI notum, & ea voce declaratum fuisse sanguinis verum circuitum; cum ea vox illi (ut & Geometris Philosophisque saepius) denotet solam in iisdem vasis, per statuta tempora (ut hic locus testatur) in partes, nunc has, nunc hisce contrarias, fluctuationem, quae tamen aliquando majori sanguinis copia & celerius, aliquando minori & tardius absolvitur. Sed, hoc ex alio scriptorum ejus loco fiet manifestum.

§. 12. Ille igitur libro *De alimento*, paullo ultra medium, haec ait: *Venarum radix hepar est: arteriarum radix est cor. Ex his per omnia sanguis & spiritus pervagatur, calorque per ea permeat.* Qui locus si conferatur cum illo libri ejus *De corde*, ubi ait, de cordis ventriculis loquens, *Hi sunt humanae naturae fontes; hinc flumina excurrunt, quibus corporis alveus irrigatur*, evidens fiet, HIPPOCRATEM eodem modo ex hepate, quo ex corde, credidisse motum celebrari fluidi versus extimas partes corporis per eadem vasa redeuntis. Hoc autem voluisse HIPPOCRATEM, evidense est ex ejus libro *De locis in homine*, non procul ab initio, ubi haec habet: *aliae duae venae juxta tempora feruntur, inter tempora & aures, quae oculos premunt, semperque pulsant. Ex venis enim hae solae minime rigantur; sed, avertitur ab ipsis sanguis. Qui vero avertitur ei qui influit, motum habet contrarium; & qui quidem avertitur, cum discedere cupiat: qui autem ex superiori-*

rioribus partibus influit, infra procedere, hic mutuo inter se propulsa, & in orbem agitata, venulis pulsum praebeant. Quibus verbis nihil aliud significat, quam pulsum oriri ex motu sanguinis per eundem canalem ab utraque canalıs extremitate celebrato. Et haec quidem est ratio pulsus, five circuitus sanguinis *Hippocratica* in homine sano; nam, in febricitante aliam esse causam non minus absurdam, & vero circuitui adversam, profert libro *De flatibus*, aerem & sanguinem per idem vas contrarias in partes simul traducens: quod ei homini, qui nullibi nulloque argumento circuitus veri fidem est professus, ignoratam esse motus illius rationem satis superque ostendit.

§. 13. Quamvis taedeat me tam multa de hac re scripsisse, non debeo tamen non respondere clarissimo cuidam viro, qui ex libro HIPPOCRATIS *De ratione victus in morbis acutis*, paullo ultra medium haec profert: *Angina fit, cum ex capite fluor multus & glutinosus, tempore hierno aut verno, in jugulares venas influxerit, eaeque fluorem copiosorem propter amplitudinem attraxerint.* Primum enim, haec omnia sunt falsa, & circuitui vero adversa. Deinde, ipse recte agnoscit, hic aequę denotari posse arterias, ac nostri seculi venas. Verum, sint eae quas nunc jugulares appellant; sequitur tantum, aliquando moveri magis in suis vasis sanguinem, aliquando minus: at, nihil hic de motu ejus vero & circulari. Sed, occupat doctus ille vir in scripto quodam hisce verbis: *Si moveri sanguinem concedis mihi, evincam facile etiam circumire.* Atqui, non quaeritur, an circumeat sanguis; solum quaeritur, an id HIPPOCRATI fuerit compertum: neque ex eo, quod per ea, quae HIPPOCRATI nota fuere, possit inveniri

N 3

detegi-

detegique circulatio, inferri debet, eam ab HIPPOCRATE fuisse detectam; cum nulli non barbitonfori nota fuerit ligaturae in venae sectione necessitas, quae tamen nec perspicacissimis ante pauca secula Medicis detegendae circulationis occasionem praebuit, licet exinde circulatio omnium facillime potuerit detegi, & multo sane facilius quam ex dictis HIPPOCRATICIS, etiam iis quae eam manifestissime complecti censentur.

§. 14. Caeterum, expendendus est locus HIPPOCRATIS, in libro *De morbo sacro*, ubi haec ait: *Venae multae & tenues ex universo corpore ad ipsum* (loquitur de cerebro) *feruntur; duae vero crassae: una quidem a jecore, altera autem a liene. Et, quae ex jecore ducitur, ad hunc se habet modum; una quidem venae pars ad dextram, juxta ipsum renem & lumbum, ad internam femoris partem deorsum fertur, & ad pedem pertingit, vocaturque vena cava. Altera vero per venas dextras & pulmonem sursum tendit, & in cor & brachium discinditur. Reliqua autem parte per jugulum ad dextram cervicis partem sursum tendit in ipsam cutim, quo conspicua fiat. Juxta aurem autem conditur, ibique scinditur, & crassissima, maxima & amplissima sui parte in cerebrum desinit: altera vero parte, quae vena tenuis est, ad aurem dextram fertur, altera ad oculum dextrum, altera ad nasum. Atque hoc modo venae ab jecore se habent. A liene autem vena etiam ad sinistram deorsum & sursum contendit, non secus quam ab hepate; tenuior tamen & imbecillior. Per has vero venas plurimum spiritum adducimus. Haec enim corporis nostri sunt spiracula, cum aerem ad se trahant, & in reliquum corpus deducant, ac per venulas refrigerent, rursusque emittant.*

Ex quibus patet, venas nostro seculo appellatas, ex sententia HIPPOCRATIS, adducere emittereque aerem, per eadem scilicet spiracula emittere, quae eum adduxerant. Unde sequitur, eum qui non disertissima demonstratione usus fuerit ad fidem circulationi sanguinis faciendam, debere censeretur eam ignorasse, si ista protulerit, quae proferentem audivimus hic HIPPOCRATEM; cum ea sint circulationi nostrae prorsus evidentissime repugnantia.

Eodem libro, paullo post, haec habet notatu nobis digna: *In partem autem dextram magis quam in sinistram defluxio fit, quia venae ampliores sunt, & plures sunt quam in sinistris; cum de jecore & liene tendant.* Unde evidens fit, HIPPOCRATEM credidisse & docuisse, sanguinem & pituitam (de quibus fluentibus in omnes partes loquitur) fluere per venas a jecore & liene in omnes corporis partes; quod circulationi nostrae prorsus adversatur, ipsumque hujus testatur fuisse ignarum.

§. 15. Verum, quaenam fuerit HIPPOCRATIS hic sententia, clarissime elucescit ex libro quarto *De morbis*. In initio ejus libri haec ait: *Ventriculus, ubi plenus existit omnium in corpore fons est; vacuus vero ex corpore tabescente haurit. Sunt autem etiam quatuor alii fontes, ex quibus horum quisque in corpus procedit; (horum, scilicet Bilis, sanguinis, aquae, & pituitae, de quibus loquebatur.) Postquam igitur hi fontes ex ventriculo acceperint, ipsique vacuati fuerint, ex corpore hauriunt. Sanguinis quidem certe fons est cor; pituitae caput, aquae lien, bilis locus in jecore.* Deinde in eodem libro haec addit: *Quos vero appellavi fontes, ii, cum pleni fuerint, semper in corpus transmittunt; cum vero vacui, ab ipso undique obsidentur.*
Sic

Sic etiam & ventriculus facit. Habet enim se res ad hunc modum, veluti si quis affusa in tria vel plura vasa aenea aqua, ea quam planissimo loco statuat, & quam optime coaptata disponat, conjunctis ad foramina fistulis; sensimque in unum vas aquam, donec omnia impleta fuerint, affundat: ex uno enim in reliqua vasa defluet, quoad caetera etiam impleta fuerint. Plenis vero vasis, si quis ex uno aquam exhauriat, vicissim contra refluet aqua (vides, refluxuram per eandem fistulam, per quam influxerat,) in vas aeneum, (ex quo scilicet exhauritur aqua.) Et rursus aqua ex vasis vacuabitur, quemadmodum eam exceperunt. Ita sane & in corpore se res habet.

Jamque putem nimis esse evidens, HIPPOCRATI longe ignotam fuisse circulationem veram; cum vel ex hoc unice loco satis superque perspicere liceat, sanguinem liquoresque corpus irrigantes, volente HIPPOCRATE, prorsum retrorsumque per eosdem canales fluctuare, aquae ritu ex uno vase in aliud, & ex illo in primum per eandem fistulam reciproce fluentis. Hisce tamen addemus ARISTOTELIS auctoritatem, si quemquam ea movere possit. Ille cap. 4. libri 3. *De partibus animalium*; Sanguis, ait, ex corde ad venas quoque derivatur. At vero, ad cor non aliunde advenit: id enim origo prima & fons est sanguinis, & conceptaculum primum. Evidens est, ARISTOTELEM hic arguere contra eos, qui sanguinem per eundem canalem retro ad cor rediisse crederent. Adeo ut, si ARISTOTELEM respicimus, sententia HIPPOCRATIS, sanguis per idem vas fluere atque reflueret, uti aqua intra canalem undique clausum & obturatum mota, debuerit: quod, Judice ARISTOTELE, qui cor pro fonte

fonte sanguinis cum HIPPOCRATE agnoscit, fieri non potest; quia flumina non relabuntur in suos fontes. Ne vero putes, ARISTOTELEM credidisse, sanguinem, qui versus cor eadem via, qua exierat, non redit, magis quam flumina eadem via redire possunt in fontes, redire ad cor per alias vias; nempe, ex arteriis in venas exeundo; legito quae idem *Lib. 3 De partibus animalium, Cap. 5.* his verbis habet: *Procedunt Venae in minores subinde ex amplioribus, quo usque arctiores reddantur quam ut sanguinem transmittere possint.* Profecto, si ARISTOTELI tam ignota fuerit sanguinis circulatio, quam patet fuisse ex his ejus dictis, non est credibile, eam HIPPOCRATI innotuisse, ullave ejus vestigia in hujus scriptis ARISTOTELI apparuisse.

DISSERTATIO

De Circulatione sanguinis in Animalibus genitis

& non genitis.

POST alios manifestum dedit atque demonstravit circuitum sanguinis GULIELMUS HARVAEUS, quem Medici genitis animalibus peculiarem esse crediderunt. Multa ex illa demonstratione in rem Medicam emolumenta fluere, nullus inficiabitur, qui paullum modo versatus hac in arte fuerit: nihil tamen in vita utilius, aut animo, rerum ultimam, hoc est, uni JOVI & rerum omnium Auctori cognitam, originem scrutanti gratius

O

inve-

inveniri posse confido, quam invenisse & agnovisse nostram animantium originem ab ipso JovE repeti debere. Quippe, notum nunc est ex lege circuitus, sanguinem in cor animalis accipi, & ex eo pelli alternis; quare, neque calor aut fermentum ullum, neque liquor spiritibus salubusve quantumvis foetus, aut vis ulla alia perpetuo & non alternis impressa, sanguinem humoremve alibilem e corde, aut loco cordis expellit: alioquin, expulsus ad cor non rediret, obstante vi ista perpetuo, & non alternis impressa. Atqui, vis illa in cor alternis conferenda non procedit ab utero materno; quod enim ab utero ad cor embryonis procedit, illabitur in ventriculorum ejus cavitatem; non vero, in fibrarum ductus, per quos fit contractio: praeterquam quod embryonis ab utero liberi adhuc contrahatur cor, & circuletur sanguis. Est ergo vis illa ab embryonis aliqua parte repetenda. Ostendit autem lex circulationis, nihil ab ulla parte animalis remitti ad cor, quod non prius cum sanguine ex corde parti isti fuerat immissum; & ostendimus ipsi, secretionem liquorum in animali (sive ad cor redeuntium, sive non redeuntium,) peragi necessitate circulationis molem liquidi fecernendi magnitudini pari orificii secretorii objicientis, neque aliam ullam esse mechanicam fecernendi liquida animalis rationem: & idcirco, non solum existare vasa secretoria aliaque, ante quamlibet assignatam secretionem; verum etiam, secretionem virium ad cor contrahendum refusarum, peragi ante quamlibet assignatam cordis constrictionem, sive circulationem inchoatam & circulationem sanguinis, sive contractionem cordis sanguinem ad partem corpus viresve cordi contrahendo fecer-

secernentem expellentis, celebrari ante quamlibet secretionem, sive refusionem & communicationem virium contractricium. Deinde, docet nos circulatio, medullam sive cerebri, sive spinae, esse illam partem, unde vis cordi imprimitur alternis sanguinem expellens: neque enim per vicissitudines & metamorphoses quibusdam animalium generibus familiares, mutantur vires, viriumque relationes, quibus eorum vita atque in iis circulatio constat; nexusque adeo, qui cor inter & medullam spinae intercedit, non mutatur. Unde sequitur, cor & corpora medullaria iisdem viribus & eodem modo operantibus ad se mutuo semper referri, & relata fuisse eodem modo in prima cordis contractione, quo in quavis subsequente referuntur. Quapropter, vires cordis corporisque medullaris simul sunt ortae, simulque vigent; animalque proinde nullum unquam mechanice producit. Et ex hisce deduco, liquorem a mare deciduum utero ovoque femineo animal inferre circulatione sanguinis, atque vitae munere jam ante potitum. Atque nescio, an qui se Theologos vocant J O V I S Q U E interpretes, quidquam protulerint aut J O V E dignius, aut humano generi gloriosius.

§. I. Verum, ad alia progrediamur, motusque circularis sanguini proprii, & ab H A R V A E O post alios demonstrati, affectiones aliquas explicemus. Eas autem ex sequentibus colligere licebit.

Si liquidum, cui innatant corpuscula solida, fluat per canales, quorum latera vel ad partes motus, quo cietur ipsum, convergant, vel ab iis divergant, vel sint parallela lineae motus, caeteris paribus facilius & saepius impeditur liquidi motus in canali laterum ad partes motus

convergentium, quam in vase laterum parallelorum; & facilius impeditur idem motus in canali latera habente parallela, quam in canali laterum a partibus motus divergentium. Et insuper, quo major fuerit angulus verticis trianguli per axem canalis laterum convergentium, eo facilius saepiusque motus versus verticem conceptus impeditur: quo vero minor fuerit praedictus angulus, eo facilius saepiusque impeditur liquidi motus ad partes a vertice averfas excitatus.

§. 2. Patet, quod si motus sit a basi versus verticem, *verbi gratia*, conii truncati, fieri facile posse, (si liquido innatent corpuscula solida,) ut a liquido deferatur solidum, quod obturare valeat angustius conii truncati orificium, motumque liquidi impedire: sed, & per situm solidorum liquido innatantium, & lateribus canalibus occurrentium perpetuo mutatum, fieri vix potest, quin corporum istorum aliquot tandem in satis angustam vasis sectionem delata, in se mutuo impingant, & sustentata a lateribus concurrentibus cum linea motus fornicem constituent iter inficiantem. Patetque, obicem hunc eo firmiorem fore, quo majori nisu urgetur a succedente liquido. Denique, evidens est, haec tanto saepius faciliusque, caeteris paribus, contingere, quo magis convergunt latera conii; id est, quo major est angulus verticis trianguli per axem canalis conici.

§. 3. Si latera canalibus parallela sint, ipseque adeo cylindricus aut prismaticus, &c. liquet primam obstructionis causam evanescere; cum nullum sit corpus quod talem subire possit canalem, quod non eundem etiam totum eadem facilitate percurrere queat: altera vero causa, orta

ex-

ex solidis ad sectiones semper minores versus partes motus forte impactis, rarius contingit, neque obstructionem dabit, cujus robur debeat augeri impetu liquidi subsequenti. Hoc etiam ex praedictis sequitur, cum cylindrus sit conus, cujus trianguli per axem angulus verticis est omnium minimus.

§. 4. At, cum motus fit in canali, *verbi gratia*, conico, a vertice versus basin, sive per canalem laterum a partibus motus divergentium, nulla harum rationum obstruendi motumque impediendi natura locum habet; cum solidum corpusculum, quod angustius verticis orificium subit, facillime sectiones canalisi ampliores pervadere debeat, & corpuscula in se mutuo ab occurrentibus laterum resistentiis non adeo facile cogantur impingere; &, si ea fornicem forte constituerint, is a lateribus canalisi minime sustentatus, facillime impetu sequenti liquidi abripiatur.

§. 5. Ex quibus sequitur, in minimis & nascentibus venis, (in quibus *scilicet* ob differentiam distantiae a corde minimam, aequalis est sanguinis velocitas ac in arteriis proximis,) minus facile rariusque multo contingere obstructiones quam in evanescentibus arteriis; & facilius impediri motum liquidi in arteriis quam in nervis. Nam, differentia velocitatum in arteriis & venis potest diminui eo usque, ut fiat qualibet data quantitate minor; adeoque aequalis est velocitas in evanescente arteria & nascente vena. Verum, resistentiarum differentia & impedimentorum intra arterias venasque occurrentium non mutatur, quantumvis vicinae vertici communi sectiones sumantur; cum idem semper

& ubique perstet angulus, latus inter axemque coni comprehensus.

Inde sequitur, quod in omni morbo, cujus phaenomena aequae possunt oriri a motu liquidi in arteriis impedito, ac a motu liquidi per nervos venasque sublato, semper putandum sit potius peccari intra arterias, quam intra nervos aut venas.

§. 6. Sed, nos hic in exemplum adducemus soporiferas cerebri affectiones, scilicet, apoplexiam perfectam, carum, coma, lethargum, & paralyfin; quae, licet cerebri non sit affectio, est tamen apoplexiae affinis. Qui de hisce morbis scripsere, non dubitarunt, causam harum affectionum, intra vasa sitam, conferre in nervos, sive, ut loquitur WILLISIUS, in poros cerebri: cum tamen ea semper sita sit, & agat intra arterias, juxta ea quae hic ostendimus. CL. SYLVIVS, lib. 2. praxeos Medicae, de apoplexia differens, haec habet: *Immobiles & torpidos reddi posse spiritus animales, ut apoplexia sequatur omnino sum persuasus; cum experientia constet, ex assumtis nimia quantitate narcoticis, vino ejusve spiritu homines in somnum & apoplexiam incidisse. Idem de paralyfi ait, fit ea vitio spirituum animalium, quoties hi torpidi immobilesque sunt per narcosin aut stuporem. Et de caro comateque somnolento, harum affectionum, inquit, causa est vis narcotica spiritibus animalibus inducta, quae eos immobiles reddit Denique, idem, post verbosam indaginem naturae opiatorum. concludit ejusdem libri cap. 26, Vim opii narcoticam esse adjunctam parti ejus sulphureae; id est, oleagi-*

oleaginosae, spiritus animales segniores, minus agiles & ad motum ineptiores reddenti.

Eodem redeunt, quae de iis affectionibus & opii natura tradit WILLISIIUS. Eas enim oriri scribit a corpore venenato poros cerebri subeunte, & spiritus vel extinguente, vel interius adigente. Sic ait, *cap. de lethargo: opiata spirituum manipulos extimos perimunt; proinde, ut reliqui minores facti introrsum fugati plane succumbant.* Et, quia morbi hujus natura explicari nequit, non declarata somni ratione, audire juvat, quae de hac profert, *cap. 16. partis Physiologicae libri de anima brutorum: Somni, inquit, subjectum sunt spiritus animales cerebri, non cerebelli; alioquin pulsus & respiratio in somno cessarent: cum ad cor & pectus movendum nervi, juxta WILLISIUM, procedant a cerebello. Spiritus ergo animales cerebri extimi, indigenae, aut sponte sua (huc refert vim adfuetudinis, & defatigationis post exercitia, musicae, in quibus ait spiritus animales se in minus spatium contrahere) aut propter alieni incursum (huc refert opiata spiritus extinguentia) a cerebri exterioris poris, in quibus exspatiari solent, decedentes in penitiora ejus meditullia se recipiunt, ubi tanquam otiosi decumbentes, spiritus ibi consitos in parem desidiâ allectant, aliosque inde in genus nervosum emanantes ab effluxu revocant, ac ad otium sollicitant.*

§. 7. Ostendunt ista, & SYLVIIUM & WILLISIUM credidisse, naturam harum affectionum & vires opii, somnique modum non posse explicari aliter, quam introducto in nervos corpore obstruente, liquorisque per eos fluentis motum prohibente. Nos vero hic ostendimus, ista non

non constare; adeoque, causam Medicis usibus convenientem repeti deberi a corpore per ultimas arteriolas cerebri disperso.

§. 8. Mirum est, viris hisce lucem non esse obortam ex lectione libri *de apoplexia*; a doctissimo viro J O A N N E J A C O B O W E P F E R O editi. Ille enim (pag. 252, 257, & 258, aliisque multis in locis, editionis quae facta est Schaffhusii, Anno 1675.) haec scribit: *Ab opio sumto caput aggravatur, manifesto indicio, ab insigni fermentandi, seu in halitus vertendi opii vi (qua serum in halitus vertit) plurimum halituum se spirituum animalium viis, sive nervis se insinuasse, ac eas aliqua ex parte opilasse; operatur enim opium meatus nervorum ita infarciendo, ut spiritibus animalibus transitus denegetur: quod credibilius quam excogitata quorundam spirituum animalium fixatio ab opio calido & sudorifero.* Haec ille de vera Medicina optime meritus.

Evidens est, errasse W E P F E R U M, dum actionem opii statuit intra nervos celebrari, & non potius in arteriis exferi. In his enim sanguis mobilior & calidior facilius in halitum vertetur. Versus autem in halitum necessario arterias distendet, & nervorum canales circumpremet, sibi que in eos aditum reddet difficilem. Sed, haec patent ex iis quae supra demonstravimus.

§. 9. Debuerat ad *Wepferiana* animum attendisse diligens & doctus ille Medicus MICHAEL E T T M U L L E R U S, qui disputatione *de opii vi diaphoretica*, Anno 1679 edita, docet, opium spiritibus animalibus certam quasi seignitiem & torporem inducere, indeque languorem in movendis partium organicarum fibris: refrenat enim impetum elasticum spirituum, si Philosophiae *Ettmullerianae* fidendum.

Postea,

Postea, adfirmat, nullam mutationem sanguini ab opio induci; cum grana duo opii non videantur sufficere mutandis sanguinis viginti libris, tantaeque massae exagitandae, ita ut in sudorem solvatur animal. Concedit quidem, grana viginti salis volatilis exhibita sudorem elicere; at, monet, viginti grana videri respondere moli viginti librarum melius duobus illis opii granis.

§. 10. Facile est perspicere, haec nos commenta refutasse paragraphis hujus scripti 2, 3, 4, & 5. Sed, cum multos videam minus cautos, ab ETTMULLERO quotidie in errores abripi; non erit forsitan ingratum, ejus doctrinam paullo diligentius excutere. Modum enim, quo opium vires suas exferit, nosse eum oportet, qui affectiones cerebri soporiferas est explicaturus.

Patet ex his ETTMULLERI locis, quam difficile sit exuere se praejudiciis: nam, dum negat mutationem ullam sanguini ab opio adferri, quod mutatio, qua in sudorem vertitur animal, deposcat minimum viginti grana salis e cornu cervi volatilis; opii vero grana duo (plura enim vix tuto exhiberi docet,) ab illa mole multum absint, non animadvertit, viginti illa grana salis volatilis multo longius abesse ab uncia vini, si modo uncia vini sudorem moveat, vel saltem ab ea mole vini, quae sudorem plerisque inducit. Satis est, si vis opii se habeat ad vim salis sudorifici, ut 20 ad 2, & ad vim vini, ut 480 ad 2, si grana vini 480 sudores eliciunt.

§. 11. Caeterum, nullo modo explicat quales opio sint vires: neque aliud nos docet, quam torporem induci spiritibus animalibus ab opio assumpto, secutus SYLVII WILLISIIQUE verba, (quos WEPFERUS clarissime
P confu-

confutaverat,) opiumque non intra arterias, sed nervos demum consistens, torporis istius esse auctorem praedicans; quod theoremate nostro refellitur.

Haec igitur missa faciam, postquam monuero peccasse clarissimum E T T M U L L E R U M, ubi sudores nocturnos hecticis, opio exhibito, depelli affirmat. Hic ipse se fefellit; tussi enim sedandae aptum est opium, agitatione corporis immodica sudores augenti: &, si pulveri antihectico P O T E R I I, sali *saturni*, &, uti Medicis excellentibus mos est, pulveri corticis *Peruviani* (*Quinaquina*) appellati, adjungatur opium, tussim, & ab ea excitatos sudores, imminuit; at, si opium incommittatum hecticis tussi vacuis inferatur, sudores semper excitat. Hoc ego volebam ne nescirent tirones.

§. 12. Ostendunt ea, quae quinto loco deduxi, causam affectionum, soporis speciem excitantium, in arteriis vim suam exserere. Loquor de ea, quae affectiones istas intra vasa consistens progenerat. Neque tamen hic differo de causis sanguinem coagulantibus, a quibus affectiones quandoque repetimus; hac quippe conferri debent in arterias, ut res ipsa clamat, & nos admonuimus.

Quicquid enim spiritus animales coagulare valet, id prius sanguinem coagulabit, adeoque nervos non ingreditur; quippe differimus de causa affectionum caro similia in vasis fluente vel consistente.

His ergo declaratis, licebit tandem accedere ad explicandas vires illas narcoticas, quibus induci soporiferas cerebri affectiones tot Medici voluerunt.

§. 13. Evincunt phaenomena, assumpto opio calorem sudoremque excitari, rarefcente sanguine & arterias solito
plus

plus distendente, uti pulsus docet; quapropter, si ea moles assumatur opii, quae possit eo usque sanguinem in cerebro rarefacere, ut arteriolae nervis interjectae eos plus solito coarctent, liquidoque nervorum incolae transitum inficientur, dormire censebitur animal, eaque omnia obvenient, quae soporiferas affectiones a causa per vasa cerebri fluente prognatas comitantur. Atqui, cor contrahetur, musculique inspirationi inservientes alternis, cum muscoli sint & hi & cor antagonists destituti; adeoque minor copia iis contrahendis sufficiat: verum, si augeatur ubique vis compressionis, aucta mole assumti opii, etiam nervi ad cor comprimuntur nimium, pulsusque fiet parvus & rarus, tandemque nullus. Quae res a WILLISIO non animadversa, effecit, ut absurde, contraque & circulationis & Anatomici sensus fidem, assereret, nervos motui involuntario, *scilicet*, motui cordis & thoracis inservientes, non infestari a corpore, quod nervorum cerebri incolas ait perimere, quamvis per arterias advecto, quae cerebellum cerebrumque eodem sanguine proluunt. Jam, si haec vera sint, debet opii assumti pars reliqua per arterias omnes non ad cerebrum tendentes abripi, & omnia vasa secernentia sanguiferis interjecta comprimere, dilatatis rarefactione liquidi transcurrentis arteriolaris. Quare, comprimuntur secernentia fellea & pancreatica, adeoque sufflaminabitur, si qua forte per ea exercetur diarrhoea: comprimuntur canaliculi renales, neque mejere poterit animal. Sola per cutim membranasque perspiratio vigeat, viresque acquirat, cum pori sudoriferi in extimis vasis & cute collocati, nullis sint arteriolaris vasivae aliis dilatatis, & vi majori comprimuntibus, implici.

citi. Visque hujus ratiocinii in eo sita est, quod perspiratio, quantumvis aucta, non deponat vasa secernentia, sed e vasorum quorumvis poris, etiam secernentium, sese ejiciat.

§. 14. Unde non erit difficile, vim opii soporiferam, anodynam & adstringentem, melius exequi, quam ex SYLVII, WILLISIIVE Philosophia; ipsumque & vinum, atque omnes liquores vi caloris aliave subito multumve rarefcere promptos facilesque, sufficere inducendis affectionibus soporiferis.

Immo etiam, sufficere inducendis liquores quosvis, quamvis non nimis aptos rarefcere, modo satis magna mole assumantur, & ea copia deferantur in cerebrum, quae dilationem conciliet arteriis optatam, atque adeo constrictionem nervis inferendam: quare, non mirabimur quosdam aquae potu somnolentos evadere vel ebrios, neque qua ratione id fiat amplius poterit latere. Quippe, caeteris paribus, liquorum diversa mole soporem aequaliter inducentium vis rarefaciens est moli reciproce proportionalis. Soporem ergo faciet sal volatile quodvis: neque enim fas est, hoc remedii genus in vasa injicere apoplexiae depellendae causa, nisi forte viscidus id postulet sanguis: neque etiam acidi extinguendi gratia; nam, viscidum sanguinem attenuat sal succini volatile & acidum; extrinsecus vero ad motum stimuli vice fungitur sal volatile quodvis, non aliter quam ex aceto fumus.

Nemo nunc est, qui non possit facile intelligere, quod si duorum animalium, caetera similia, & nervos amplitudine aequales aequaliterque a se mutuo distantes habentium, arteriae cerebri sint amplitudine inaequales, animal,

mal, cui majores sunt arteriae, citius fiet ebrium; id vero, cui minores, citius dolore capitis affligetur. Nam, major moles requiritur ad majoris arteriae latera ad datam tensionem extrudenda, quam minoris; quippe, debet moles esse ut quadratum diametri.

§. 15. Addere his possem ea, quae de vertigine tradiderunt omnium seculorum Medici: duos tantum producam. Alter erit CASSIUS ille, qui problemata edidit ante Annos MCCCC. Ille igitur quaerenti, cur motus circulares pariant vertiginem, respondet his verbis: *Motus circulares non sinunt fieri transpirationem, aere vehementius ingruente, ac ipsam prohibente; similiter autem, ut corporis motus fit, ita materiae in nobis circulariter moventur. Cum igitur una cum corpore agitentur & transpirare nequeant, etiam ubi jam cessavit motionis ipsarum causa, in circulum moveri pergunt. Atque hujusmodi humorum motus causa est, ut sensus quippiam imaginetur praeter naturam.* Haec ille, vertente GESNERO.

An putatis WILLISIUM aptius aliquid & convenientius allaturum? Eum audiamus, cap. 7. Exercitationis secundae *De anima brutorum*, haec efferentem: *spiritus intra cerebrum scatentes, non secus habent, ac aqua phialae inclusa, quae una cum vase continente circumagitur, & facto semel vortice, etiam vase quiescente motum istum aliquamdiu conservat: pari etiam modo, quando hominis caput circumgiratur, spiritus cerebri incolae in motus tornatiles & velut spirales aguntur, eorumque manipuli quidam obscurantur, huc illuc in vortices, & non raro in transversum rapiuntur.*

§. 16. Praetereo quae hac de re sub ETTMULLERI nomine prodierunt; evidens enim est, virum illum do-

ctissimum sua emendatiora fuisse editurum, si per fata aspera licuisset: omniaque illa, quae titulum *Praxeos Ettmullerianae* nunc ferunt, in lucem esse protrusa ab hominibus inhonesto quaestui inhiantibus. Quod ideo commemoro, ne quis mea esse credat, quae Bibliopolae, tanquam discipulis meis dictata, me incio, forsitan emittant.

Redeo ad CASSIUM & WILLISIUM. Si scivissent, obstructions in arteriis potius quam in nervis aut venis oriri, distensionemque vasorum similes edere effectus iis, qui tumori materiaeve vasa illa obstruenti (ubi nulla habetur ratio qualitatis materiae) ascribuntur, non docuissent vertiginem enasci liquido nervorum in vortices abeunte: sed, affectionis hujus rationem in arteriis quaesissent. Obstat enim nervorum cerebrique ab excellentissimo MALPIGHIO detecta compages, iisque clarissime contradicit quae CASSIUS & WILLISIUS attulerunt.

§. 17. Sed, quamvis possent excitari, influente per nervos liquore; non tamen illis acceptum ferre fas est motum, qui circumscitis attribuitur in orbem visis circuire. Quippe, ex opticis est manifestum, rem nullam censerì loco dimotam, quamdiu ejus imago eundem eodemque modo circumscriptum in retina locum non deserit: atqui, circularis liquidi intra nervos & retinae filamenta motus imaginis sedem non mutat. Quod ergo vertigo hominibus in orbem se agentibus obveniat, non est liquorum vorticibus ascribendum. Quapropter, si causae vertiginem inferentes quaerantur, inspiciendus est & evolvendus LAURENTII BELLINII liber *De morbis capitis*, in quo magnus ille Medicus & Philosophus demonstrat, vertiginem

ginem non excitari a motu circulari spirituum animalium; sed, ubi in morbum evasit, a dimotione retinae aut nervo per distensionem arteriarum oculi illata. Unde patet, eum theoremata nostris similia adhibuisse.

§. 18. Haëtenus fuerit disputatum de Theoria morbis quibusdam conveniente; superest, ad utilitatem Theoriae nostrae declarandam, ut explicemus, quaenam ex ea commoditates in morborum curatione possint emergere. Nempe, in morbis soporiferis, ritu hic exposito generatis, ante omnia secandae sunt arteriae venaeve; stimulantia omnia usurpanda; verum, salia, vulgo volatilia dicta, spiritusque e cornu cervi, urina similibusque elicitos ingerere nefas, ut & cephalica quae vocant. Non sum nescius, quantum in me vulgus hic concitem; sed, cum rem omnem accurate demonstraverim, multitudinis opinionem non moror. Deinde moneo, in vertigine a salibus istis volatilibus esse cavendum, eaque exhibenda quae rarefcenti sanguini ponunt obicem: loquor de curatione, quae post evacuationes necessarias instituitur. Evidens enim est, in vertigine idiopathica, non minus quam in apoplexia, arterias & venas esse secandas; at, in alia omni oportet vomitum ciere, & multis quidem de causis. Primum enim, vomitu fordes ventriculi eluuntur, liberiorque datur exitus perspirationi, quae suppressa sanguinis molem eo usque auxerat, ut invaderet vertigo, ratione a BELLINIO explicata. Deinde, everritur liquor, qui paullo post sanguini commistus, aut molem aut rarefcentiam nimiam, & vertigini producendae parem, intulisset. Neque defunt alia vomitum suadentia, ubi morbus ab inquinato ventriculo repetit natales.

§. 19. Sed, videamus quaenam curandi methodus Theoriae *Willisianae* conveniat. Nempe, docent experimenta, venam utilissime secari apoplēticis; (memineris hic differi de apoplexia causam intra vasa sitam agnoscente;) id vero auxilium vim narcoticam, qualem nos dedimus, manifesta ratione depellit. Jam, si spiritus in apoplexia reddantur immobiles aut torpidi, accepto intra nervos corpore soporifero, uti credidit SYLVIVS; vel, si eo corpore adeo infarciantur nervi, ut spiritibus per eos denegetur transitus, uti voluit WEPFERUS; vel denique, si corpora apoplexiam facientia spirituum manipulos extimos, sive portarum vigiles trucidant, doctore WILLISIO, posthabita venae sectione, confugiendum erit ad novum, nondumque cognitum, remedii genus. Non enim, credo, manipulos spirituum interfectorum in vitam revocabit vena incisa, neque immobiles torpidosque excitabit, neque etiam materiam nervos infarcientem educet, imminuetve: at, salia volatilia quae vocant, spiritusque elicitos ex animalibus igne Chymico vexatis, ingerent viri clarissimi, pessimo tamen eventu. Supra enim monui, rursusque moneo, salia ista spiritusque somnolentum efficere animal, sensum omnem, opii ritu, iterque nervorum illis incolis inficiari. Noli tamen existimare, granum opii cum grano salis volatilis esse conferendum: opii quippe granum saepe sexaginta & amplius granorum salis illius instar est.

§. 20. Cum multis de causis suspicatus essem, naturam opii similem indoli salium ex cornu cervi prodeuntium elici deberi, persuasi ALEXANDRO MONTEITHO, viro optimo, & insigni Chirurgo, atque in arte Chymica
versa.

versatissimo, ut opium chymice tractaret. Ille, re saepius tentata, exhibuit mihi ex opii libra elicitas spiritus (ut vocant) volatilis, & qui eadem omnia, quae spiritus cornu cervi, edebat phaenomena, uncias quinque cum drachmis quinque, olei foetidi unciam & drachmam & sesquidrachmam; denique, capitis mortui spiritum cornu cervi spirantis uncias septem, cum drachmis sex. Adeo ut mirandum non sit, eadem effici omnia exhibito sale volatili, spirituve cornu cervi, quae opio assumpto efficiuntur, modo quantitas apta, & usu probata, in ventriculum conferatur.

Nescio nunc, an operae pretium sit adnotare, verissimum esse quod expertum se scribit S A N C T O R I U S, *Aphorismo XVIII, Sect. 4. Staticae* suae; dormientem scilicet perspirare plus vigilante: ex his enim ejus rei causa neminem poterit latere; praesertim, si somnus inducatur per rarefactionem, sudoresque evocare idonea. Et vis hujus in eo sita est, quod opiata sudores moveant, nec possit obstruere nervos, quod arterias minimas obstruere non potuit.

D I S S E R T A T I O

De Curatione februm, quae per Evacuationes instituitur.

E Xistimant Medici, febres continuas oriri vitio cujuscumque liquoris corporisve, phaenomena, quae nemo nescit febribus esse propria, excitantis; cui proinde corpori

Q

pori liquorive appellationem materiae morbificae attribuant. Hanc materiam aliqui volunt esse humorem, fecerni sanis consuetum; sed aegrotantibus adeo immutatum, ut, & febrium symptomata progignat, & sponte sua, hoc est, impetu naturali sanguinis, abnuat fecerni: alii vero ipsam docent foris advenire, (Miasma vocant,) & liquori naturaliter fecernendo adjunctam accendere febres. Parum refert utri veriora dixerint: quippe, eadem omnia evenient, sive forinsecus invadat materia morbifica, sive intus mutetur humor in materiae morbificae naturam.

§. 2. In has opiniones descenderunt Medici, postquam observassent febres invadere, plerumque suppressa transpiratione cuticulari, aliave quavis evacuatione, cui assueverat animal, cohibita sive diminuta. Sed, res visa est tantum non manifestissima observantibus quo ritu solverentur & disinerent febres. Unas quippe videbant solvi per ortum sudorem, alias per diuresin multam, quasdam vero per diarrhoeam; crisinque provenire, secretionem provocata, per quasvis glandulas humorem extra animal ducentes. Quapropter, sibi persuaserunt, esse aliquam materiam, morbi altricem, quam ex corpore aegroti deberent expellere; postquam ipsam deduxissent in apti floris formam, vel ita immutassent, (coctionis & pepasmi molitionem vocant,) ut e corpore posset eliminari.

Nos de coctione illa, tantopere celebrata: non disputamus; sed, solum inquirimus, quaenam evacuatio vel secretio deberet eligi in curandis febribus, si ulla foret eligenda. In hac investigatione, prorsus filebimus de curatione, quae instituitur per sanguines missionem; quoniam

niam decrevimus, eas tantum evacuationes inspicere, quae per vias naturaliter patulas, in animali sano emergunt, quasque Medici moliuntur post celebratam venae sectionem, ubi hanc putant esse celebrandam, vomituque pectus purgatum, si opus est; opus autem est saepissime.

§. 3. Sed, quoniam celebratur hodie sententia scribentium, febres oriri vitio fermentorum, quae cuivis parti propria statuunt, sive etiam vitio partium sanguinis fermentescentium; sciolisque haec sententia arridet, quod instructos trium vocum suppellectile statim Philosophos & Medicos faciat: juvat hanc rem proponere verbis ingeniosissimi NICOLAI STENONIS, ex prodromo dissertationis, *De solido intra solidum naturaliter contento*, desumptis. Verba ejus haec sunt.

Praeter fluidum subtile omnia permeans, ad minimum tria genera fluidorum in animalibus observamus, quorum primum est externum, alterum internum & commune, tertium internum, singulis partibus proprium.

Fluidi externi voce illud in animalibus intelligo, quod non solum expositam oculis nostris superficiem; atmosphaerae instar, ambit; sed etiam illud, quod contingit corporis superficies reliquas dictae superficiei per majora foramina continuas, ut sunt tota superficies asperae arteriae, tota superficies viae alimenti, &c. Deinde, inquit, fluidum internum illud appello, quod cum fluido externo non communicat, nisi per intermedia capillarium vasorum cribra. Fluidum internum commune est quod continetur venis, arteriis, lymphaticis, et nervis forte.

Fluidum internum proprium illud est, quod fluidi communis capillaribus vasis circumfunditur, & pro diversitate locorum diversum est, &c.

Deinde , subdit rationem , cur in diversis locis ex eodem sanguine diversa excernantur , dependere ab ipsis locis ; Quorum , inquit , consideratio his tribus absolvitur.

I. Consideratione capillarium vasorum fluidi interni communis , in qua sola occupantur , qui cribrationi per diversos poros omnia ascribunt ; ex quorum numero & ego aliquamdiu extiti.

II. Consideratione fluidi interni proporii , circa quam solam versantur , qui cuilibet parti peculiare fermentum attribuunt ; quorum opinio ex parte vera esse poterit , licet fermenti nomen comparationi innitatur desumptae a re nimis peculiari.

III. Consideratione solidi singularum partium , circa quam praecipue haerere videntur , qui suam cuilibet parti formam attribuendo , indicant se agnoscere aliquid parti proprium , nobis autem incognitum , quod secundum illam materiae cognitionem , quam haecenus habemus , aliud esse nequit quam porosa istius solidi superficies , & fluidum subtile , illos poros permeans. Extra , inquit , oleas nimium evagarer , si praedicta applicarem illis explicandis , quae in corpore nostro indies contingunt , nec aliter explicari poterunt : suffecerit hic innuisse , quod ab externo fluido variis modis secedentes particulae in fluidum internum commune , intercedente cribratione , feruntur ; unde itidem variis modis secretae , & in fluida interna propria per novam cribrationem transmissae , partibus solidis apponuntur , vel fibrarum , vel parenchymatum modo , prout determinatae fuerint ab incognita nobis partis cujuslibet proprietate , in trium praedictarum rerum consideratione inclusa.

§. 4. Nos autem, dissertatione *De circuitu sanguinis per vasa minima*, quamvis fermenta haec in corpore animalis ostenderimus non inveniri; tamen, ut eorum captui confu-
latur, qui demonstrationem non capiunt, lubet rem om-
nem vel tironibus intelligendam dare. Ex iis, quae ver-
bis *Stenonianis* hic descripta sunt, liquet quaeri, qua ratione
ex eodem sanguine tam diversi liquores fecernantur? Et,
cur in hepate bilis, in renibus urina, in aliis partibus
alia secedant? veteres negotium hoc varia attractione
transigi volebant, quorum sententiam aptius illustrare,
quam ipsi poterant, facile illi fuerit, qui *Newtoniana* in-
telligit. Nuper, expulsa voce attractionis, negotium
hoc fermentis demandarunt Medici non pauci, quae varia
in variis glandulis, sive diversae naturae cribris consti-
tuunt. At, nos ostendimus, nullas esse quas pro cribris
diversa ratione perforatis habeant glandulas. Ostendimus
quoque, orificia omnium vasorum esse similia, & qui-
dem circularia: unde sequitur, nullum esse locum confi-
derationi primae & tertiae *Stenoniana*e. Sed & hinc sequi-
tur, (seposita attractione, quam hi homines rejiciunt,
quaque admissa, nullis fermentis opus esset,) defectu
glandularum instructarum variae figurae osculis, fer-
menta, sive fluida ista interna, & propria cuivis parti,
elui omnia & abripi oportere, vi sanguinis arterias perla-
bentis. Et, si qua haereant, ea ubivis, nullo facto loco-
rum discrimine (quod nullum est) haesura; adeoque quam-
vis secretionem per quaevis loca semper prodituram, nulla
fermentis habita gratia.

§. 5. Saepius sum miratus, tam multos pati & velle
verba sibi dari, dum rerum naturas sibi innotuisse glo-
riantur.

riantur. Veterum Philisophorum Medicorumque plurimi, qualitates, sive temperamentum ex qualitatibus conflatum, cuius parti corporis assignarunt, cuius ope secretiones actionesque regerentur. Nostri fermentorum auctores, qualitates & temperamenta illa pro ignorantiae asylo jure habuerunt: quippe, quod sine fundamento, nullisque phaenomenis adjuvantibus confingerentur, neque ulli nisi nomine tenus nota prostarent. Dixerunt ergo cuius parti & secretioni praeesse fermentum peculiare. At, natura nullius horum fermentorum magis nota est magnis hisce Medicinae instauratoribus, quam notum veteribus quaenam temperamentorum peculiare forent naturae. Neque ulli nostrorum hominum fermenti ullius parti proprii ulla proprietas est nota, magis quam natura occultarum qualitatium homini Peripatetico. Unde nimis patet, ex hac sententia nihil novi inventum esse in Medicinam, praeter vocem, aut vocis usum, uti jamdudum monui, dissertatione illa *De circulatione sanguinis per vasa minima*, de glandulis loquens.

§. 6. Ad alia progrediamur. Observatum esse diximus, solvi febres aucta secretionem cuticulari; aliquando vero, aucta secretionem per glandulas renales, vel inducta diarrhoea per hepatis, pancreatis, aut intestinorum glandulas. De aliis criseos generibus non opus est loqui, nisi forte quis icterum, febris aliquando supervenientem, superioribus velit adjungere.

Deinde, observamus, nulla esse vasa fecernentia, nullasque in corpore nostro secretioni inservientes glandulas, quae non possint augeri in tantam amplitudinem, ut pares sint accipiendo fecernendoque cuius humori, etiam in aliis
gland-

glandulis fecerni naturaliter apto. Quippe, animadvertimus in ictero, liquorem illum crassum, qui naturaliter fecernitur in glandulis hepatis, fecerni in cuticularibus, & nimium salivae per suas glandulas proventum cohiberi, sudore evocato, & liquore salivali eliminato per glandulas cuticulares: videmus, diarrhoeam sedari averso humore in vias transpirationis sudorifica vi apertas, & ptyalismum excitato otari alvum; excitata vero rursus diarrhoea, cessare ptyalismum, qui etiam, veluti aliae secretiones, tollitur, urinae accedente profluvio,

§. 7. In febribus praesertim observare licuit, quam saepe quivis liquor per quasvis vias ducatur, artis aut naturae vi dilatatas, quamque nulla sit febris, cui similis soluta non fuerit, oborta secretionem per glandulas, vel poros potius sudoriferos, saepius quam ulla alia secretionem: adeoque, nullum esse genus materiae febrificae, quod non possit duci per glandulas transpirationi dicatas. Quamvis enim possit (sive vitio cohibitae secretionis cujuspiam, & impediti motus humorum, sive vitio introducti per vasa chyliifera fluidi,) pars sanguinis, humorve quivis in quamvis naturam cogi mutarive: de eo tamen non quaeritur; sed, quaeritur solum, in qualem quantamve vitii conditionem, dum febres excitat, agi atque perverti soleat.

In qua quaestione solvenda experimenta usui erunt, quibus ostenditur, materiae febrificae hanc esse proprietatem, ut per quaevis vasa possit soleatque exire. Sed, res haec fiet manifestior ex sequentibus, in quibus investigare lubet, quam habeant rationem secretiones naturaliter provenientes, & quid ex ea ratione perspecta elici queat huic instituto conveniens.

§. 8. Nempe, ex *Aphorismo* 59. *Sectionis* primae S A N-
CTORII, excretiones dato tempore factae, hanc plerum-
que fervant rationem, ut sit.

Excretio per *Alvum*, 4.

per *Vesicam*, 16.

per *Cutim*, 40, & amplius.

Patet hinc, perspirationem esse secretionum aliarum
summae duplam, (assumimus hic mediam quantitatem
perspirationis;) & excretionis per alvum duodecuplam.
Verum, hic moneo, excretionem per os respiratione
excitatam, (quam S A N C T O R I U S, *aphorismo* 5. *Sect.* I.
ait unica die ad selibram circiter ascendere,) debere per-
spirationi ascribi; sunt enim vesiculae pulmonis aeri non
minus quam summa cutis expositae: neque impediri natu-
raliter erumpens e pulmonum vasis vesiculisque potest
transpiratio, magis quam illa ex vasis extimae cutis ex-
furgens. Quippe, perspiratio ducitur per vasorum aeri
expositorum poros. Adeo, nulla sunt vasa sudorifera,
instar canalium, elongata, (quamvis ea appellatione cum
vulgo utamur) in cute magis quam in pulmone, in quo
canales sudoriferi sunt nulli. Si ergo, ut redeam, excre-
tio illa per os facta adjiciatur perspirationi, erit excretio
cuticularis aliarum summae tripla, & exeuntis per alvum
quatuordecupla. Quapropter, erit perspiratio secretionis
postremo memoratae apud nos minimum decupla, Nam,
perspiratio ex pulmone nascens, est aequalis excessui,
quem quis posset ascribere perspirationi *Patavinae* supra
Britannicam.

§. 9. Quoniam febres (aliique morbi plurimi) oriuntur, cum a suppressa secretione cuticulari, tum a suppressa quavis alia, estque illa aliarum omnium dupla, vel etiam tripla; idcirco, suppressio dimidia vel tertiae partis feri perspirabilis, febrem generabit aequalem ei, quam generaret aliarum simul omnium suppressio. Et, quia cuticularis est minimum decupla ventralis; idcirco, diminutio decimae partis feri perspirabilis febrem excitabit, ei aequalem, quam pareret alvi suppressio. Ob similes causas, auxilium dimidia vel tertiae partis perspirationis tantum in pellenda febre valebit, quantum valeret aliarum simul omnium auxilium; & auxilium decimae partis perspirationis tanti erit, quanti alvi excretio integra; tanti vero integra perspiratio, quanti alvi excretiones decem.

§. 10. Res ipsa profecto clamat, quod, cum materia cujuscvis secretionis per quamvis auctam duci possit, & cum quaevis possit in quavis ratione augeri, exhibito utili medicamento; & denique, cum secretiones ita possint augeri, ut eam servant rationem, quam naturaliter habent; idcirco, major moles materiae morbificae, dato tempore, duci potest per secretionem cuticularem, quam per aliam quamcunque, in ratione quantitatis secretionis cuticularis naturaliter se habentis ad quantitatem, sive pondus alterius secretionis cujuscunque naturaliter se habentis. Quapropter, citius tolletur morbus evacuatione facta per poros cutis, quam alia quacunque secretionem, & in ratione quidem exposita: praesertim, ubi pori cutis satis aperti fuerint, iis modis qui in fine §. 2. declarati sunt, & in §. 12. repetentur.

R

Ex

Ex hisce sequitur, non posse aequè cito depelli morbum, factò incremento secretionis ventralis, ac potest factò incremento cuticularis, nisi incrementum illius fuerit ad incrementum hujus in ratione inversa secretionum, sive, ut est moles hujus ad molem illius in conditione naturali. Quare, debet secretio per alvum esse centuplo major naturali, ut possit spatio diei tantum evacuare, quantum pari tempore evacuat perspiratio decuplo tantum major naturali; sive, debet centies alvum dejicere, qui sanus eo tempore semel consueverat dejicere: & ducenties vel trecenties, qui bis aut ter. At, qui diei spatio decies solebat dejicere sanus, illum aegrotantem (sicacando cupiet esse salvus,) millies eo tempore dejicere oportet.

§. 11. Deinde, ex praemissis sequitur, exposita febris qualibet (idem obtinet in morbo quovis intra animal oborto) decuplo esse probabilius, eam depulsum iri sudando quam cacando. Nam, cum secretioni ventrali aequalis sit, & aequè facile contingens decima pars perspirationis, sive perspiratio per decimam cuticulae partem facta; idcirco, probabilitas sanationis per aliquam perspirationem futurae, est decuplo major probabilitate sanationis, quam quis ab alvi dejectione speraverit. Patet nempe, unico solum casu haberi dejectionem hanc, decem vero casus esse quibus ea non obtingit, tot scilicet quot sunt quantitates perspirationis ipsi aequales. Atque ideo, expectatio dejectionis est, ut 1. ad 11. & expectatio perspirationis est, ut 10. ad 11. (inspiciatur clarissimi HUGENII libellus *De ratiociniis in ludo aleae*;) estque adeo expectatio perspirationis decupla expectationis, quam de ventrali fovemus: sive valor spei primae est decuplus valoris spei secundae.

secundae. Prudentis autem Medici est, ea moliri, quae spem molientis minime fallunt.

Dixi, febres plerumque depelli oborto sudore, sive perspiratione aucta, inque sensibilem conversa. Astipulatur SANCTORIUS, *Aphorismo* 9. *Sect.* 1. 2. docens, frigus aestate superveniens prohibere circiter tertiam partem perspirationis, eamque, nisi fiat sensibilis, putredinem aut cachexiam inducere. Haec ille. Sudorem vero, sive perspirationem auctam ego hic volo eam, quae coctis humoribus supervenit.

§. 12. Haftenus differuimus de secretionibus quae augentur, medicamento intra animal viasque circuitus sanguinei assumto. Quapropter, quae dicta sunt de secretionem per alvum, spectant ad illam, quae peragitur in glandulis hepatis, pancreatis, & intestinorum, cujus secretionis incrementum per pharmaca proprie cathartica, sive ultra primas vias in animal irrumpentia inducitur.

Nam, quod attinet ad excretionem illam, quae fit ope lenientium, sive primas vias a sordibus illic haerentibus liberantium, illa non magis ad catharsin, sive secretionem alvi auctam debet referri, quam debet ad eandem referri lotio cutis extimae. Haec enim lenientia solum promovent perspirationem intestinorum cuticulari similem atque ascribendam; poris quippe intestinorum apertis major erumpit perspirationis moles, quam ex aequali portione superficiei extimae corporis. Aperiantur autem hi pori per medicamenta sordes eluentia, & potissimum per emetica idonea.

Non igitur est mirandum, si primis viis inquinatis nimiaque sorde obductis, medicamento leniente, intestinaque

tantum everrente exhibito, manifesta quandoque coctionis indicia faciant humores, erumpatque sudor quanto opus est, facientibus erumpendi potestatem intestinis oneri sordium beneficio abstergentis medicamenti subductis.

Opportunum fuerit hic admonere, rationem secretionum, a S A N C T O R I O traditam, obtinere in corporibus sanis, in quibus omnia per alvum prodeuntia, conflata ex iis, quae lactea subierant: & quae non subierant, ad examen revocaverit optime meritis ille Medicus. At, nos praecipue differimus de excrementis e massa sanguinea dimissis per ductus hepaticos & pancreaticos, atque etiam intestinalium glandularum vias. Nam, in corporibus sanis, & pharmaco non utentibus, excretio haec per ductus liquorem e massa sanguinis derivantes est molis admodum exiguae, & in iis qui sicciore sunt alvo vix notabilis. Quapropter, ratio secretionis cuticularis ad ventralem erit multo major quam ratio decem ad unum, vel etiam major quam ratio centum ad unum. Quatenus hinc possint deduci quivis potest videre.

§. 13. Sint duo canales elastici, habentes orificia superinaequalibus diametris similia: accipiant hi quovis pulsu liquorum similium moles orificiis proportionales; ex iis quae docent elementa manifestum est,

I. Si numerus pulsuum in canali minori sit major numero pulsuum in majori, in ratione orificiorum inversa aequales fore liquidi moles, quae dato tempore fluunt per inaequales canales; velocitatem autem liquidi fluentis per minorem fore majorem velocitate fluentis per majorem in ratione pulsuum.

II. Si numerus ictuum pulsuumve in majori sit major, (hoc est, si vices, quibus accipit liquorem suum canalis major, sint pluresquam vices, quibus suam accipit minor,) quantitatem liquidi dato tempore per majorem fluentis fore altera majorem, in ratione composita ex ratione numeri pulsuum majoris ad numerum pulsuum minoris, & ratione orificii majoris ad orificium minoris; velocitatem vero fluentis per majorem fore velocitate per minorem fluentis in exposita pulsuum ratione majorem.

Ex quibus sequitur, ubi pulsus est naturali frequentior, hoc est, ubi ictuum pulsuumve numerus est major in ratione, primo exposita, (uti fit in febribus,) fore velocitatem liquidi percurrentis arterias naturali majorem, licet pulsus sit naturali minor, hoc est, canalis fiat minor minusve dilatetur. Deinde, si numerus pulsuum in canali majori sit major, hoc est, si pulsus sit & frequentior naturali & naturali major, multo tum naturali majorem fore quantitatem sanguinis dato tempore transcurrentis, scilicet in ratione illa composita secundo loco declarata, (casus hic saepe obtinet in febribus,) & velocitatem sanguinis fore in ratione pulsuum, sive frequentiae. Videant quorum interest, quo pacto haec pulsuum phaenomena possint explicari per circuitum sanguinis naturali semper tardiozem, & febribus a Medicaastro non uno ascriptum.

Atque haec de curatione febrium per evacuationes instituta visum est commentari. Moneo autem, eum absurde facturum, qui febres quandoque, nulla quamvis accedente vi evacuante, debellari occlamaverit. Non enim hic suscepimus de isto genere Medicinae verba facere; animus solum fuit, eorum coarguere inscitiam, qui febres conti-

nuas medicamento purgante, quam perspirationem augente, saepius depelli, nuper apud nos scripserunt.

§. 14. Liceat nunc mihi, toties de perspiratione locuto, theorema *Bellinianum* explicare, atque demonstrare: ejus enim, quamvis pulcherrimi, demonstrationem nemo, quod sciam, exhibuit. Theorema ipsum tale est.

Universa quantitas perspirationis ex villo, cujus pondus est scrupulus singulis minutis primus erumpens, est millesima ducentesima scrupuli pars. Hoc ego sequenti methodo ostendam.

Declaravit S A N C T O R I U S, spatio 24 horarum prodire perspirationem 50 uncias pendentem; quae unciae valent scrupulis 1200, hoc est, 1200 scrupulis, sive $50 \times 24 \text{ } \mathfrak{D}$. Ergo, spatio horae perspiramus 50 scrupula, & quovis horae momento $\frac{50 \text{ } \mathfrak{D}}{60}$, sive quinque pondera, quallium sex conficiunt scrupulum. Cumque corporis humani pondus medium sit librarum 160, quae scrupula minimum 60000 aequant, sive $50 \times 1200 \text{ } \mathfrak{D}$, exspirabitur singulis horis ex toto corpore ea moles, quae parte totius millesima ducentesima non sit minor. Et idcirco, eodem tempore pars quaevis emittet partem sui millesimam ducentessimam, sive spatio cujusvis horae quodvis scrupulum exspirabit $\frac{1}{1200}$ scrupuli.

In eo jam homine, cui summa villorum, per quos agitur perspiratio, est corporis sexagesima, sive trium circiter librarum, erit eadem summa minimum 1000 \mathfrak{D} . Oportet autem per haec 1000 \mathfrak{D} exsudari quavis hora 50 \mathfrak{D} perspirationis, sive per 1 \mathfrak{D} quavis hora deduci $\frac{50}{1000} \text{ } \mathfrak{D}$ vel $\frac{1}{20} \text{ } \mathfrak{D}$. Quapropter, spatio momenti, vel $\frac{1}{60}$ horae pro-

prodibit (ex 1 ϑ) $\frac{1}{60 \times 20}$ vel $\frac{1}{1200}$ scrupuli, uti invenit summus vir LAURENTIUS BELLINIUS.

§. 15. Et, quoniam pondus perspirationis, caeteris paribus, respondet ponderi corporis perspirantis; idcirco, in corpore libras 120, sive scrupula 45000 pendente, perspiratio 24 horarum aequabit 900 ϑ , & perspiratio cujusvis horae $37 \frac{1}{2} \vartheta$. Quavis igitur hora prodibit perspiratio; quae sit totius corporis (cujusque adeo partis & scrupuli) pars millesima ducentesima; quia 45000 ϑ aequant $1200 \times 37 \frac{1}{2} \vartheta$.

Denique, in eo corpore, cui cuticula extima cum cuticula uteri, pulmonis, & intestinorum conficiebant circiter libras duas, erat summa villorum, per quos ultimo transiit perspiratio, non minor scrupulis 750, sive sexagesima corporis. Erat enim corpus librarum 120, sive scrupulorum 45000. Jam per 750 ϑ oportebat quavis hora prodire $37 \frac{1}{2} \vartheta$, sive per 1 ϑ , effluere $\frac{37 \frac{1}{2}}{750} \vartheta$, quae aequant $\frac{1}{20} \vartheta$. Quippe, $20 \times 37 \frac{1}{2}$ aequant 750. Ergo, quovis momento, sive quavis sexagesima horae, exhibat (per villum unius scrupuli) $\frac{1}{60 \times 20}$ scrupuli, sive pars scrupuli millesima ducentesima. Quod erat ostendendum.

D I S S E R T A T I O B R E V I S

*De Opera, quam praestant Corpora acida
vel alcalica, in Curatione Morborum.*

Scriptores rei Medicae, quos seculum vidit elapsum, fere omnes, aut ii plerumque, qui & hodie sunt in honore, tradiderunt, morbos plerosque ab acido corpore intus fluente in sanguine nostro progigni. Nuper exorti sunt, qui affirmant, morbos omnes a nimio corporis alcalici humorisve proventu pullulare. Hae sectae ab ignorantia & desidia hominum sunt enatae. Accessit spes lucri non vana, famaeque. Facile enim fuit, vulgaria atque trita de corporibus acidis alcalicisve inculcare, & ab imperita plebe plausum aucupio duarum vocum captare. Juvat hanc rem breviter excutere.

§. 2. Qui morbos omnes ab acido, vel alcali, deducunt, ii vocibus his certam significationem debent addere: nam, si dicas, corpus acidum esse, si quod morbum tollat, ab alcalico sale (ut creditur) inductum, & teipsum fallis, & litem de voce moves; ostendisque, nescire te, quid sit acidum aut alcali. Eodem jure disputari posset, morbos omnes, & eorum curationes, oriri a materia terrestri & coelesti: appellando terrestrem, quae corrigitur a coelesti, & coelestem, quae moderamen accipit a terrestri. Evidens autem est, nisi certa significatio vocibus his alligetur, inutilem esse Medicis omnem de acido & alcali disputationem,

nem, non minus quam illam de materia terrestri & coelesti: nam, cum certa vocibus his significatio nulla subsit, possintque infinita esse genera materiae terrestris coelestisque, subtilitate partium, & puritate, mixtionisque simplicitate differentia; uti infinita sunt genera acidorum, volatilitate, fixitate, & puritate differentium, ipsumque acidum aliud ab alio perimatur: hinc sequitur, exposito morbo acidi cujusdam alumno, non magis sciri ex Theoria hac Chymica, quale medicamentum debeat adhiberi, quam si non deberet, aut non putaretur morbus acido ulli ortum natalem debere. Neque enim ex Theoria hac sciri posse, cujus generis alcali debeat aptari; cum non sciatur, cujus generis acidum fecerit morbum; nec etiam sciri, an alcali potius quam acidum debeat accipi, & morbo opponi: & si acido opus est, nesciri tamen, quale illud esse debeat. Immo, gratias Deo habendas esse, si Medicus hac Theoria instructus, non etiam ipsum acidi genus definiat per somnium, opponatque sive acidum, sive alcali, uti ipse Theoria fretus auguratur; aptum, re ipsa tamen perniciosum. Debent profecto aegroti putare bene secum agi, si incidant in hujus sectae Medicum, qui nihil Theoriae suae tribuat, sed usui omnia.

§. 3, Superest ergo, resque ipsa clamat, solo usu & experimento disci, quod medicamentum dato morbo conveniat: ad quod medicamentum inveniendum Theoria haec nihil confert; quippe, quae paucis observationibus, iisque perplexis, innixa, nulli, nisi incauto, imponere potest, neque ulli placere, nisi desidiofo, & ad animi labores insolito. Ea autem, quae de Theoria hac dissero, ante differui de quavis alia, observationibus non sat multis,

S

neque

neque Astronomico more institutis, superstructa; hoc est, de omnibus hypothesebus, quae rem per observationes, & satis multas & satis fidas, non eo usque deduxerunt, ut Geometrice possit tractari. Exemplum dedi in morbis oculorum, (vide *Orationem Inauguralem*, § 14, 15, 16, 17.) quos ulterius, si Deus dederit, illustratos dabo in editione *problematum CASSII FELICIS*, dicti vulgo *Iatroso-phistae*. Exemplum dedit *BELLINIUS*, de *sanguinis missione*.

§. 4. Verum, ut in arenam descendamus: observatum est, nullam esse evacuandi viam, quae non in eodem homine & iisdem conditionibus peragi queat, non minus per corpora alcalica quam per acida: nam, sudores movet sal succini acidum; sal istud acidum & volatile, quod ex argento & stanno eliciunt *Galli*. Vide *Acta Regia Societatis Gallicae*, anni 1692. Sudores pariter movent ossa piscium, animalium omnium, alcalica illa, sanguis quivis, hirci in primis, sal cornu cervi, aliaque multa alcalica. Idem obtinet in diuresi. At, saliva & per hydrargyrum, acidi expertem, & corrosivum per acida factum, aut corrosivum per alcalica praecipitatum, potest provocari: potest etiam per vim frigoris poros perspirationi dicatos occludentem, aut obstructis per calculum urinae viis. Quare, vitia omnia, quae repeti possunt ab evacuationibus, sive imminutis, sive nimium auctis, neque ortum suum, neque sanationem soli acido, aut soli alcalico corpori debebunt.

§. 5. Praecipue vero morbos aliunde quam ab acido alcalive, & ortum & curam recipere, ostendit venae sectio, quae & plurimos morbos tollit, & nonnullos facit: osten-

ostendit menstruus fluxus foeminarum, cujus defectus multas parit aegritudines, qualitati vel crassi sanguinis vitiatae, sive ab acida causa, sive alcalica, vulgo adscriptas: nempe, dolores capitis, ulcera omnigena, inflammationes, motus convulsivos, febres, &c. Et ejus fluxus superventu haec omnia tolluntur. Imo vero, nullum fere est morbi genus, quod non oriri possit & soleat ab aucto vel diminuto mensium fluxu, eoque ipso legitime celebrato sanari. Hic quoque adverti debet, si acidit copia morbum omnem faciat, aut alcali, nullum esse venae sectioni locum, nec prodesse fluxum menstruum: nam, cum ea per sanguinem aequaliter diffeminentur, emittuntur extra corpus pro ratione emissi sanguinis, & retinentur pro ratione retenti; sanguinisque adeo vitium, sive morbus manet. Atqui, experientia multifaria contrarium demonstrat; nempe, misso sanguine morbos plurimos tolli. Perfecto, semper risi istos homines, qui hypothesein experientiae praeferentes, argumento hoc uterentur adversus sanguinis missionem, cum debuissent ipso uti adversus hypothesein illam de acidi & alcali viribus ad morbos omnes gignendos & tollendos; pariterque eo uti potuissent ad cohibendum etiam legitimum mensium fluxum. Chymistarum fuit omnis doctrinae expertum istud argumentum, qui nesciebant viscidam plerumque materiam morbigenicam, & neque acida, neque alcalica vi laedentem missione sanguinis solvi, & circuitui alendoque animali aptum reddi, atque obstructions plurimas tolli, praesertim inflammatorias, uti demonstravit BELLINIUS, in tractatu de *sanguinis missione*. At, si salibus ullis libere per vasa divagantibus, praesertim alcalicis, morbus

ortum deberet, inanis esset venae sectio, inutilis menstruus fluxus.

§. 6. *Cortex Peruvianus* ostendit, nec acido, nec alcalico corpori curationem febrium deberi; nam, sive acidum, sive alcalicum dicas corticem, plurimos videas ei similes, id est, acidos liquores alcalicosve, saliaque acida, vel alcalica prodentes, qui tamen febres non tollunt *Peruviani* ritu. Nam, si solius acidi alcalicive viribus curationem adscribis, cuivis cortici easdem vires habenti eandem curandi potestatem adscribere oportet. Et, si dicas differre acidorum genera, & alcalicorum non minus, eorumque alia aliis citius colorem optatum inducere, frustra fies. Primum enim, omnia ista febres depellent, alia quidem citius aliis, parva quoque temporis intercapedine, quod non fit: deinde, non jam acido alcalicove corpori curationem adscribis; sed, corpori cuidam, quod praeter alcalica vel acida, alia quoque corpuscula, viribus diversa, fovere, experimentis constat: atque, hisce viribus corpusculisve debetur febrium curatio. Nam, si ejusdem generis vires sint, gradu tantum different, id est, quantitate; & sic quaevis corpora acida vel alcalica idem praestabunt, quod praestat *cortex Peruvianus*, modo quantitas major aut minor (usu monstrante) adhibeatur. Scimus enim, non quamvis quantitatem corticis *Peruviani* febrim depellere. Experimentis credo, corticem *Peruvianum*, *Quina-Quina* dictum, ex aqua decoctum, rubro colore inficere succum *Heliotropii*, aquae mistum, quod acida faciunt. Atqui, decoctum corticis ligni *Sassafras* ex aqua *Heliotropium* rubicundius efficit; adeoque, est cortex ligni *Sassafras* acidior cortice *Peruviano*: hic tamen illo

illo potentius medetur febribus, intermissiones agnoscen-
tibus. Deinde, operam dedi, ut cortex *Peruvianus* Chy-
mice tractaretur. Ex ejus libris duabus eliciebantur spi-
ritus acidus, & solutionem *Heliotropii* rubro tingentis un-
ciae quinque cum dimidia; similem elicui ex multis aliis
corticibus spiritum, quorum corticum nullus febrim
intermittentem profligabat. Accedit, quod hic ipse acidus
Peruviani spiritus feбри intermittenti nullum adfert auxi-
lium: quapropter nihil opis hic ab acido, neque etiam
ab ullo acidus gradu differentiave poterit sperari. Prae-
terea, si dicas, differre acidum ab acido, alcalicumque
corpus ab alcalico, esseque proprietates quasdam salium
istorum privatas rebus ipsis, jam abiisti ab acidus alcalici-
que jactata potentia, recidisque turpiter in occultas quali-
tates & puerorum nugas.

§. 7. Quandoquidem de viribus acidus in curatione fe-
brium differui, lubet adnotare, flores *Chamaemeli* ex
aqua decoctos syrupum violarum viridi colore infecisse,
solutionem *Heliotropii* ex aqua factam colore rubro, &
solutionem salis Saturni, colore albo. Habemus hic sal
marinum, sal acidum, & sal alcalicum; flores tamen illi
febrem intermittentem non minus feliciter tollunt, quam
tollit ipse *Peruvianus*, longe licet diversis viribus instru-
ctus, si sal acidum respicias. Sed, priusquam ad alia trans-
eam, oportet meminisse istorum hominum, qui ante an-
nos aliquot mihi *Leydae* docenti objiciebant, pulverem cor-
ticis *Peruviani* necessitate quadam in ventriculo haerere,
nec posse prae gravitate sanguini innatare, atque immif-
ceri illum pulverem, qui & aquae innatat, & oleo, spi-
ritui cornu cervi, & vini rectificato: ut mirari subeat,

quantum detrimenti rebus Medicis adferat obscura quorundam hominum diligentia.

§. 8. Adjiciamus nunc pauca, in eorum gratiam, qui morbos omnes ab acido deducunt, & nullo negotio per alcalica curaturos se spondent. Ostendit jamdudum nobilissimus B O Y L E, nihil acidi inesse in corpore humano: & tamen, quotusquisque est, qui non clamitet, ulcera pulmonum ab acido nasci, sputumque illud acre, H I P P O C R A T I notatum, ad acidum, corrodens non referat; verum, uti saepe sum expertus, nihil in hoc sputo acidi, sed, multum salis corporisve salis cornu cervi similis: hoc enim sputum colorem Heliotropii in rubrum non mutat; at, syrupum violarum viridem efficit, limpidam mercurii corrosivi sublimati ex aqua solutionem colore tingit albo. Eadem est natura aquae, ex ventribus hydropicorum & viventium eductae, uti non semel sum expertus: ut longe falli eos, mihi jam constet, qui hydropem asciten ab acido vasa lymphatica exedentē induci nimis diu impune docuerunt.

§. 9. Sed, ne alcalici nostri Medici nimium sibi plaudant, omnesque morbos per acida debere tolli, nostris observationibus putent confirmari, velim hic eos admonitos esse, multis in febribus, doloribus, deliriis, ulceribus, vesicae praesertim, penis & uteri, quae inveteraverint, magno usui saepe fuisse corpora cantharidum & cuti extimae imposita, & per os in ventriculum demissa. Atqui, cantharides, Chymice tractatae, exhibuerunt mihi spiritus ipso spiritu cornu cervi magis alcalici drachmas tredecim, cum dimidia, & salis sale cornu cervi magis alcalici drachmas duodecim, olei nigri & foetentis drachmas octo cum dimidia,

dia, capitis mortui spiritum cornu cervi olentis tres uncias: haec exhibuerunt cantharidum unciae octo: quae, cuti hominum impositae, remedia a solis acidis petentium eos delirio isto possent explicare. At, si finito delirio motus spasmodici, & tristitia, & de rebus suis desperatio affligant, auxilium petere decet a radice Casmunar, zedoaria, radice valerianae sylvestris, quae ex aqua decoctae syrupo violarum viridem adferunt colorem, & Heliotropio rubrum, quaeque remedio iis esse poterunt, qui non nisi alcalica producant auxilia. Utriusque vero sectae Patronos sanabunt radix Ipeca-coannae, vel serpentariae Virginianae, si aut dysenteria vexaverit, aut alexipharmaco fuerit opus: hae quippe radices, ex aqua decoctae, colorem rubrum Heliotropio, viridem syrupo violaceo inducunt. Sed, vereor ut hi homines velint se sanari; dulce etenim est atque utile, duobus verbis fieri & Medicum & Philosophum. Atque, hic & Medicus & Philosophus frustra in me refellendo confugiet ad auxilium hellebori albi vel nigri; hae quippe radices Heliotropium rubro, syrupum violaceum viridi inficiunt colore; adeoque, nec soli acido, nec soli alcalico corpori gratiam habebunt.

§. 10. Juvat nunc, ex inventis nobilissimi viri ROBERTI BOYLE, duo Theoremata facile demonstrare.

Primum est, *nullas esse sanguinis in humano corpore fermentationes*; cum vir ille ostenderit, nullum esse in eo corpore acidum.

Deinde, *plantas per os assumptas, quantumvis acido foetas, actione tamen ventriculi & pulmonis & cordis circuitum*

tum fluidi nostri efficientis mutari cito in corpora alcalica: adeoque tantum abesse, ut acida morbos aut tollant, aut faciant, perimendo salia sanguinis alcalica, ut potius acida in sanguinem accepta humorem alcalicum progignant.

Sal marinum, aut marino simile, exigua mole sanguini inesse, nemo dubitat; &, ostendit id ipsum clare ROBERTUS BOYLE: at, acidum inesse sanguini, nuper contendit RAYMUNDUS VIEUSSENS, qui ulterius quam ille progredi conatus est, uti ipse loquitur. Hic RAYMUNDUS ex libris quinquaginta sanguinis semunciam elicuit spiritus acidi, postquam unciam circiter admiscuisset salis e sanguine calcinato prodeuntis tribus unciiis boli, five terrae ope ignis reverberatorii: sic loquitur. Media quantitas sanguinis in corpore humano fluentis vix excedit viginti libras; atque adeo, si vera sunt, quae adfert RAYMUNDUS, moles liquoris illius acidi ex toto meo sanguine eliciendi non excederet grana centum, in quo liquore multum aquae inesse oportet: adeo, ut sal istud pro nullo debeat haberi. At, RAYMUNDUM fugit, spiritum illum acidum a bolo provenire: boli enim tres unciae in vasis vitreis circiter drachmam, cum dimidia, spiritus acidi facile reddidere. Ego quotidie salis marini scrupulos quinque prandens assumo: salis huic similis spiritum inscius elicuit RAYMUNDUS, aut spiritum vel phlegma acidum boli. Ex his ergo patet, sal marinum salia omnia acida cito mutare in salia, salis cornu cervi aemula, vi circuitus humorum in animalis corpore fluentium; & vegrandem librum RAYMUNDI VIEUSSENS *de principiis*, esse penitus & ab omni parte ridiculum,

Sed,

Sed, ut ad rem redeam: experimentis cognovi, longe plurima ferocissimorum morborum remedia nihil, neque corporis alcalici, neque acidi, neque etiam corporis ex utrisque conflati, sinu suo fovere: atque adeo, falli eos, qui causam, aut curationem morborum omnium, solis acidis, aut solis alcalicis adscribunt.

OBSERVATIONES QUÆDAM

D E

FLUXU MENS TRUO.

1. **S**I tantum excernerent juniora animalia, quantum assumserant, non crescerent; adeoque, in animali sano & crescente major moles sanguinis quotidie accumulatur quam deperdita fuit, aut deperdetur. Quantitas hujus accumulati sanguinis cognoscitur ex augmento magnitudinis & ponderis, quod animali crescenti accessit.

Hinc patet, quod accumulatur in animali, crescendi finem adepto, sanguis ea mole quae prius amissa sit major.

2. Quippe, dum crescunt animalia, ventriculus aut cor augetur; ita ut augmentum contingat in ratione molis ipsorum, si ventriculum & cor conferamus cum aliis musculis & membranis: atqui, vires ventriculi cordisque augentur in ratione molis: estque augmentum vi-

T

rium

rium proportionale molis augmento. Patet hoc in corde aliisque musculis, adeoque in ventriculo, si vires musculi tantum ipsi competunt: nam, e majori ventriculo, pluribusque glandulis referto, effluviisque calidis magis scatente, major moles elicietur fermenti, majorque vis caloris orietur, sive ex ventriculo, sive ex adfatis visceribus una auctis: & ob eandem rationem major omnigenorum effluviorum moles, quae, ut placet nonnullis, exspirat ventriculus ad cibos in chylum permutandos.

3. Quoniam in animali crescente cordis ventriculi majorem molem sanguinis subministrabant pellebantque quam quae moli amissae foret aequalis, hoc est, quam nutritio veterisque corporis tantum reparatio deposceret; idcirco patet, cessante corporis augmento, in animali sano majorem etiam sanguinis molem procreari, quam quae nutriendo corpori, sive amissae reparationi sufficiat: cum ventriculus & cor increverint pro ratione viscerum similium, viresque viscerum similium augeantur in ratione molis ipsarum. Inquirendum est ergo, in qua ratione animalibus jam non crescentibus, nec patientibus ullum magnitudinis augmentum, sanguis accumuletur supra illam molem, quae nutritioni, sive amisso sanguini reparando inserviat.

4. Hujus rei effectum videamus in quibusdam animalibus. In foeminis humani generis observamus, crescendi metam fere assecutis haemorrhagiam quovis mense per uteri vasa exerceri, fluereque iis sanguinem, & extra corpus ferri periodo nulli ignota. Si quantitas sanguinis eo tempore expulsi dividatur per numerum dierum horarumve,

rumve, quae duas quasdam haemorrhagias interjacent, proveniet quantitas sanguinis, quae supra amissum in horas & in dies congeritur, simulque invenietur quantum sanguinis adesse oporteat, ut per uteri vias, sive vasa, quovis mense exitum parare sibi possit.

5. Evidens est, in animalibus rectis sanguinem minori momento per aortam ascendentem quam per descendentem; adeoque, majori momento ferri per aortam descendentem in rectis quam per aortae partem ascendentem in animalibus pronis. Deinde, patet, sanguinem majori mole fluere per aortam descendentem in iis animalibus rectis, quibus descendens aut pluribus aut minus resistentibus instruitur ramis, quam quibus instruitur paucioribus aut magis resistentibus.

6. Atqui, foeminis rectis plures prodeunt rami ex aorta descendente, amplioresque quam in viris; nempe, arteriae per uteri regnum florentes; (pro aorta descendente habetur apud me quivis ramus ex ea pullulans;) deinde, foeminis ex descendente orientes rami minoris sunt resistentiae, quam qui viris ex ea oriuntur. Nam, in uteris vagantes arteriae nullis fulcimentis innixae libero & minime resistenti aeri fere opponuntur. Et ideo foeminae (loquor de animalibus rectis,) potius quam viris haemorrhagia illa menstrua est familiaris; eademque illis per uterum debuit celebrari.

Hinc manifestum erit, animalibus pronis non celebrari periodicum illum fluxum uteri, neque maribus rectis periodicus sanguinis fluxus conveniet, nisi peculiarem privatamque ob causam. Quippe, non statuimus pro causa fluxus menstrui plethoram, quae quaelibet vasa per-

rumpat, &c. Observationes enim ostendunt, solum ejus naturae vasa isti fluxui inservire.

Denique, non mirabimur posthac, differentiam aliquam esse observatam inter actiones, quae pendent a cerebris marium & foeminarum, cum ex praedictis pateat, majorem copiam spirituum animalium dato tempore in illis, quam in hisce, secerni. At, si de alio quovis fluxu loquamur, lucem praebebit *Aphorismus SANC TORII 65, & 66. Sect. I.* ubi haec habet: *Corpora virorum sana, & moderatissimo victu utentia, singulis mensibus fiunt ponderosiora solito, unius scilicet duarumve librarum pondere, & redeunt circa finem mensis ad consuetum pondus, ad instar mulierum; sed, facta crisi per urinam paulo copiosiore, vel turbidior.*

Et aphorismo sequenti: *Ante dictam crisin menstrualem a somno factam, vel gravitas capitis, vel corporis lassitudo persentitur, & deinde paulo copiosiori urina evacuata, omnia sedantur.* Nota, Nos non statuere pro causa fluxus menstrui plethoram ad vasa, (omnia) sive eam, quae quovis loco fit, aut quomodolibet minuta vasa perrumpat; sed, plethoram ad vasa uteri, sive in infimo loco aeri exposita, &c.

De Augmento quantitatis sanguineae in statu naturali, & augmenti hujus ratione.

1. **S**I tantum excerneremus quotidie, quantum assumimus, nunquam cresceremus, augmentumque corporis foret in junioribus nullum.

2. Augetur ergo in junioribus quantitas sanguinis: quaeritur, in qua ratione augeatur?

3. Pa-

3. Patet ex augmento ponderis, cognosci quantum quis creverit: sed, quia augmentum hoc quovis die est adeo parvum, ut SANC TORIO non exactissime ponderanti habitum sit pro nullo, debet ponderatio institui, non quovis die, sed, quovis, *verbi gratia*, semestri vel anno; & hoc augmentum ponderis sic inventum, & per numerum horarum vel dierum divisum, dabit augmentum sanguinis nutrientis in horas & in dies.

4. Sed, hoc augmento cognosci quidem potest, quantum sanguinis, partim fluidi, partim fibris appositi, & durescentis solidique sit augmentum, sive summa utriusque augmenti: sanguis enim gravitat fluidus pariter ac durescens; &, qui accumulatur, non statim nutrit durescitque: non tamen ex ponderatione potest cognosci, quantum sanguinis abierat in nutritionem augmentumque corporis, & seorsum quantus sit excessus sanguinis in vasis fluidi fluentisque supra illam molem, quae pridie fuerat.

5. Observavit SANC TORIUS, singulis mensibus viris excretionem per sudores, alvum, urinas, aut haemorrhagiam, solito majorem semel contingere; sed, saepius per multa loca eam fieri; adeo ut, quae per singula loca sit evacuatio, sit nimis parva quam quae possit facile & rudi observatione notari; praeterquam quod aliquae harum excretionum tales sint, ut adscribi possint accumulationi factae extra animal, ex qua quantitas sanguinis aestimari non debet.

6 Ergo, quantitas augmenti sanguinis fluentis, & nondum durescentis, debet inveniri seorsum ab illa quantitate sanguinis, quae abiit in nutritionem illam auctam

juniorum adolescentium & crescentium; debet, inquam, inveniri ex evacuatione aliqua, confertim & notabili mole facta, ex ipsis vasis sanguineis, sub ipsa sanguinis forma; nam, quae fit per urinas evacuatio, fit ex locis extra animal, in quibus poterit excrementum accumulari, non aucto interea sanguine.

§. 7. Debet ergo quantitas augmenti sanguinis seorsum a sanguine nutritio aestimari, ex evacuatione sanguinis facta confertim, & parvo tempore notabili; non tamen facta per aliquod fermentum parti excernenti proprium: sic enim quantitas sanguinis non posset aestimari auctu; praeterquam quod ostensum sit, nulla esse in animali talia fermenta partium, nullamque esse pororum in partibus differentiam, cui illa evacuatio possit adscribi.

8. Hic etiam non considerabimus, ullas vires, five sanguinis, five vasorum, five corporum aliorum attrahentes; solumque videbimus quantum in hac quaestione solvenda possit vis gravitatis, spectata diversitate vasorum in quibusdam animalibus.

9. Quoniam nullam sanguinis aucti vim, (nulla enim alia adhuc est vulgo nota;) praeter illam gravitatis speculamur & consideramus, evidens erit, evacuationem illam fieri debere ex parte corporis infima, ubi latera vasorum sint Horizonti parallela, adeoque, vis gravitatis major.

10. At, quia in animalibus etiam maximis intervallum partis summae & infimae est exiguum; adeoque, excessus gravitatis fluidi in infima parte admodum parvus; idcirco, debet illa optata excretio sanguinis fieri in ea parte infima, vel partis infimae parte, quae intertextitur vasis pluri-

plurimis minimae resistentiae, hoc est, soli aeri expositis.

11. Unde sequitur, eam excretionem vix observabilem esse in iis animalibus, quae natura finxit prona, partesque infimas vasis aeri non expositis intertextas; aut, quibus latera vasorum partis infimae aeri exposita non deorsum vergunt: adeoque, in nullis brutis (si forte simias saepius erectas excipimus,) talem excretionem esse observabilem.

12. Deinde, ex hisce sequitur, foeminas potius quam viros debere huic excretioni esse obnoxias; quia uterum habent foeminae in inferiori loco positum, vasis aeri expositis & Horizonti parallelis, & lateribus nudis deorsum spectantibus, & nulla re suffultis, utilissime referunt; adeoque, oportere, excretionem illam foeminis per uterum celebrari.

13. Sequitur etiam, easdem ob causas, eos viros, quibus vasa haemorrhoidalia quavis ratione praeter modum augmentur & ampliantur, excretioni simili esse opportunos.

14. Et, priusquam incipiat fluere in utrisque sanguis, debere dolores tensionesque vasorum, omniaque tensionem comitantia invadere.

15. Quantitas autem sanguinis, singulis mensibus sic excreti, divisa per numerum horarum dierumque, dabit quantitatem, quae singulis horis diebusque increverat supra eam, quae in nutritionem eo die eave hora abierat. Adeoque, non mirabimur, si omnes eae horariae, aut quotidianae quantitates simul additae, eam molem faciant, quae gravitate sua vasa uteri perrumpat, & fluxum periodicum quovis fere mense inducat.

16. Qua.

16. Quare, pondus corporis auctum quovis die exploratum, detracto pondere tantae partis sanguinis menstrui, erit verum pondus sanguinis durescentis, sive in nutritionem quavis hora dieque abeuntis.

17. Dicendum est, sanguinem menstruum foeminarum exsudare per villos arteriarum uteri evanescentium, seu venarum ejusdem primo nascentium, vel earum limites: sive, quoniam arteriae & venae sunt continuae, & ad occursum referunt parabolicam lineam, & occursum iste vertex videtur ductus parabolici, idcirco, dicimus, sanguinem menstruum effluere per vertices vasorum sanguiferorum.

18. Effluit autem sanguis per vertices vasorum in foeminis potius quam in viris; quia, in foeminis plura sunt vasa sanguifera per partes infimas spatio libero exposita, quam in viris; vir enim est foemina utero carens. Sanguis itaque majori quantitate infimas foeminarum quam virorum partes lustrat, &c.

19. Quia igitur foeminae plura habent vasa sanguifera spatio libero exposita, quam viri, sanguis gravitate sua vasa ea foeminarum distendet, villosque divellet, & effluet, quam primum per aetatem tantae fuerit molis, ut reliqua corporis superioris vasa satis impleta fuerint, & vertices vasorum, uterinorum, scilicet, internam uteri superficiem pervadentium, sat repetitis arietationibus & gravitationibus, fuerint ad divulsionem villorum concedendam disposita.

20. Haec autem in brutis foeminis, quae natura prona finxit, non eveniunt, (cum vasa ventris postremi, ipsiusque adeo uteri, non magis gravitati sanguinis sint obnoxia quam capitis, &c.

21. Si

21. Si exponantur duo homines fani, quorum unus menstruum sanguinis fluxum habeat, utrumque & vasa plura ad inferiores partes sita, & vacuo spatio exposita, alter iis careat; caetera autem proportionalia mobilibus sint, fluxus iste a distractione villorum per gravitatem majoris quantitatis sanguinis producta contingit. Fermentum enim secernens, vel in fervorem agens, probavi nullibi esse. Caetera autem suppone paria, sola gravitate majori excepta; quare, haec sola fluxus hujus causa est.

22. Supponi debet, vasa in foeminis non minus firma esse quam in viris: a sola enim majori versus inferiores partes gravitatione tandem fit, ut puellis quatuordecim annorum menstrua fluant, non viris. Quippe, quantumvis firma supponantur vasa hypogastrica in foeminis, cum tamen earum villi sint distractiles, & ad distractionem urgeantur plus quam in viris, tandem distrahentur: praefertim, cum aequalis sit impetus cordis in foeminis ac in viris. Et idcirco, sanguis majori quantitate fluens ad inferiores foeminarum partes quam virorum, nec tamen majorem impetum a corde recipiens, quo & extrudatur & redeat in orbem, necessario vasa inferiora foeminarum plus gravabit, & tandem effluet, scilicet, per eas partes ubi plus gravitat, &c.

Nota, Vasa uteri esse omnium infima; omnium, inquam, vasorum aeri libero non expositorum, seu vasorum partes aeri libero non expositas alluentium. Nam, crura & pedes aeri libero exponuntur; unde, eorum vasa extima indurescunt, & intestinorum partes etiam atteruntur a partibus duris & liquidis praeterlabentibus: unde eorum vasa

indurescunt. Ergo, vasa uteri evadunt necessario maxime omnium infirma.

23. Sed, notari velim, intestina & partes externas, potissimum pedes, solidis quibusdam semper atteri, *scilicet*, faecibus, vestimentis, calceis, & iis omnibus, quae resistantiam faciunt tangentibus; omnesque vivorum animalium partes attactu & attritu fieri callosas.

24. In mare aorta ascendens majorem habet proportionem ad descendentem, quam in foemina; hoc est, ascendens, respectu descendentis, major est in mare quam in foemina.

25. Hinc maribus major separatur dato tempore copia spirituum animalium, &c. Deinde, hinc sequitur, necessario majorem molem sanguinis ad inferiorem ventrem ferri in foemina quam in mare.

26. Deinde, etiam gravitatis effectum aequaliter distribui per omne corpus maris, qui in una parte foeminae colligitur, & sensibilis evadit.

27. Denique, *Martem* & chalybem fluxum illum menstruum provocare (apto tempore; hoc est, postquam ossa finem crescendi adepta sanguinis fluentis incrementum non jam intervertunt; quippe, non ante puellas invadit iste fluxus quam ipsae finem adolescendi, crescendique metam attigerunt;) gravitate sua, qua sanguinis minus gravantis impetum augent, vel effluere conanti impedimenta pondere suo dimovent: sicuti haec eadem melius praestat *Mercurius* vi ejusdem generis, sed majori.

28. *Nota*, *Mercurius* & *Mars* fluxum nimium ventris & menstruum immodicum tollunt, aequaliter tollendo impedimenta aliarum secretionum, & sic eas augendo,
cum

cum per circularem motum ad omne corpus aequaliter ferantur.

Praecipue *Nota*, minorem capacitatem, & sic ambitum thoracis, & sic minorem copiam vasorum sanguinisque ei alendo requisitam, & majorem capacitatem hypogastricae & lumbaris regionis, &c, in foeminis quam in viris, ostendere minorem diametrum aortae ascendens, & majorem descendens esse in foeminis, &c.

1. Denique, pes Hydrargyri aequiponderat 14. ped. aquae: unde, gravitas aquae est ad gravitatem *Mercurii*, ut 1 ad 14.

2. Aer aquam elevat ad pedes 32, vel 33.

3. Aer elevat Hydrargyrum, vulgo, ad digitos 29.

4. Aeris gravitas, ad gravitatem aquae, est circiter ut 1 ad 1000.

Et,

Gravitas aeris, ad gravitatem *Mercurii*, est ut 1 ad 14000.

Mercurius surgit ad digitos 27, vel 28.

Aqua ad pedes 32, vel 33.

Aquae gravitas est, ad gravitatem *Mercurii*, ut est 1 ad 14.

Quod experientiae convenit: nam,
 $28 \times 14 = 392$ digitos,

Et,

$33 \times 12 = 396$ digitos, cum pes = 12 digitos.

Quapropter, in noviluniis, &c, ubi elevatur aqua ad 14 pedes, elevabitur aer ad 14000 pedes, & subsidet *Mercurius* in barometro ad digitum unum.

Rursus, ubi quavis alia de causa aer fiat levior, ita ut subsidat *Mercurius* per digitum unum, sive aer elevetur

ad pedes 14000, ea omnia circa foeminas fient, quae in noviluniis, nisi prius in novilunio proxime praegresso ea passae fuerint.

Haec omnia ita deduci possunt.

Nullum videmus in fluxu periodico fermentum, ideoque, est accumulatio in animalibus, quae non crescunt; *id est*, ea, quae solum nutriunt se, & reparant amissam molem, accomodant interea, &c, molem aequalem, quae deperditur. Nam, post finem crescendi eadem manet per aliquot annos vis ventriculi, &c: vel potius, quod ego quidem existimo, moli (auctae *scilicet*,) reparandae duntaxat par, per aliquod tempus, evadit.

Si augeatur vis ventriculi in ratione molis, omnia sibi constabunt.

Augeri autem cordis & ventriculi vires in ratione molis (auctae,) suadet ratio augmenti totius corporis. Nam, cor & ventriculus mole augentur pro ratione aliarum partium; augmentum autem virium est proportionale augmento molis, caeteris paribus. Patet hoc in omni musculo, & sic in corde, & in ventriculo quoque, si vires tantum habeat musculi. Sed, etsi vi fermenti agat, (ut vult LISTERUS,) idem fiet; quia, e majori ventriculo plus fermenti fecernetur, aut major fracedo orietur.

i. Ostendere oportebat, cessante augmento, vi cordis & ventriculi (quae viscera augebantur, cum suis viribus, pro ratione aliarum partium; adeoque, illa tempore augmenti plus sanguinis conficiebant pellebantque, quam poscebat

cebat sola partium nutritio,) plus sanguinis confici pelli-
que, quam poscit nutritio corporis, quamdiu corpus
unicum est nutriendum.

2. Evacuari ergo partem eam sanguinis debere, & etiam
evacuationem fieri in parte, qua major est impetus sangui-
nis, eo tempore quo cessat augmentum corporis; debere,
inquam, eam evacuari in iis, quibus vasa ei ferendae non
sufficiunt.

3. Quantum sit augmentum illud sanguinis non nutrien-
tis invenire: hoc invento scire, cur evacuationes sint fere
menstruae.

DE INGRESSU MORBI,

Qui Venera Lues appellatur vulgo.

Quaevis corporis animalis pars potest inflammari,
nulla quamvis contagii opera; adeoque ulcerari,
nullo etiam alterius animalis contactu. Nam, quicquid
sanguinem semenve tardat impeditque, aut in vasis cras-
siora reddit, inflammationem inducit, quae vasorum rup-
turam & ulcus adfert.

2. In *India* utraque, *Africa*, & *Europa* Australi, ubi
homines desidiosi, & fere barbari, oblitique aut ignari
eorum, quae *Moses* praeceperat *Levit.* capite *xiv*, &
xv. libri sui, agebant, iis sordes vel partes exspiratio-
nis *Sanctorianae* spissiores atque graviores premendo vasa
genitali dicata inflammationes, illic & ulcus progignunt,

atque gonorrhaeam, aliaque moris mali symptomata, qualia saepe in canibus, at, saepius longe in cuniculis observavi, qui *Neapoli* nunquam fuissent, & ignari *Mosaicae* Legis, lascivis studiis operam dabant, frequentius etiam quam navant hodie hypocritae, sive simulatores Christiani, & vere histriones.

3. In regionibus Australibus exspiratio plerumque major est, quam est in Septentrione, resque Venerea frequentior. Quapropter, si populi Australes negligent *Mosaica* praecepta saepissime sequi, (& partes aliquae animalium non facile morem gerunt, neque se rite tractari Medicina *Mosaica* facile sinunt,) non est mirandum, eos nulla transmissa ab majoribus contagio, foedis istis ulceribus Veneris infestari, sive morbo *Neapolitano*, atque lepra, sive scorbuto, morbo illo Septentrionali, ab impedita exspiratione & aucta ingluvies profecto; nam, ingluvies & desidia vetant exspirationem.

4. Morbus *Venerens* in *Australibus* tollitur, usu ligni Guaiaci, radicis Sarsae, Oxylapathi, Bardanae, & similia, ex aqua decoctorum. Stulti sunt, qui docent, Sarsam, Guaiacum, &c, prodesse acore sanguinem exuendo; nihil enim ista mihi reddunt praeter liquorem, sive spiritum acidum. Opem dant ista sudorem excitando, sordesque exspirationis, circa vasa haerentes, abluendo.

5. At, cum sordes Boreales Australibus sint densiores graviorefque, uti est ipse noster sanguis, cibi nostri parum *Phoebo* debentis progenies, oportet eas metallis gravioribus atteri expellique; inter quae eminet hydrargyrum. Quapropter ubi lepra, fluor albus, dolores feri, scorbutus ulceribus comitatus invadunt, *Mercurius* populis Septen-

Septentrionalibus erit opus. Lepra autem ante famam morbi *Neapolitani* hydrargyro cessit, nomenque nunc amisit.

6. Si aurum atteratur (& atteri potest,) in partes adeo parvas, ut earum superficies, habita ratione molis, tantae sint quae reddant partes illas aquae levitate pares, & innatare sanguini aptas, morbi hi auro quam *Mercurio* tutius atque citius sanabuntur.

7. His adde eum, qui primus morbo, (aut) si vis, peste laboravit, non debere contagi miseriam suam ex aliis effluviis.

8. Venenum, quod viperae fundunt, petique folia intra venas ferro apertas ingesta, statim animal ad mortem adigit; idem tamen ventriculo inditum nullam noxam parit: ipseque ego saepius & feliciter arsenicum, &c, in os dedi devorandum iis, qui, dolore ventris ferocissimo cruciati, nullis aliis auxiliis liberari poterant, ipsique opio & sali succini, vel sali e cornu cervi elicitio, & magno pondere ingestis verba dederant.

9. Ex hisce sequitur, plusquam esse barbarum & indignum hominibus, morem illum, cives honestissimos, qui sacerdotes plerosque e faece plebis homines habent inimicos, levissimis de causis domi suae se continere cogendi, iisque aqua & igni interdicendi, quamvis nullo contagio infectis.

10. Quapropter, post vomitum bis aut ter iteratum, exhibeatur *Mercurius* per aliquot dies, bis die. Cum os inceperit dolere, abstineat se a *Mercurio* per tres aut quatuor dies: tum purgetur alternis diebus. Oris dolore cessante, iteretur usus *Mercurii*. Et iteretur haec methodus, donec symptomata cessarint.

Nec

Nec alia est methodus, quae leprae debetur, ut supra monui; postea vero, sequentia usurpentur remedia, utrique morbo communia. Nimirum laventur ulcera decocto, quod recipit, radicum Oxylapathi & Helenii, sulphuris, aluminis, singulorum uncias duas: coquantur omnia ex aquae calcis libris octo ad libras sex, addendo sub finem coctionis, foliorum nasturtii aquatici, trifolii aquatici, & cochleariae, singulorum unciam; admisceatur colaturae pauxillum spiritus vini camphora imbuti. Juvabit quoque ulceribus, imponere unguentum, quod habet *Mercurii* praecipitati rubri drachmas duas, *Mercurii* praecipitati albi drachmam unam, olei tartari per deliquium scrupulos duos, unguenti pomati uncias duas. Applicetur vesperi, lectum petendo. Proderit vero mane, antequam imponatur unguentum, aquam cosmeticam adhibere: recipit ea lithargyrii auri uncias duas, *Mercurii* sublimati corrosivi drachmam, aceti uncias decem. Infundantur per horas decem in vase stanneo saepius agitando. Post subsidentiam factam, effundatur liquor limpidus: ubi utendum est, instillandae sunt guttae aliquot olei tartari per deliquium, donec lactescat. Hoc liquore (ope plumae,) ulcera leviter imbuantur, superimposito unguento. Interea, pro pctu sit cerevisia Guaiacina, quae fit ex ligni Guaiaci libris duabus cocti in cerevisiae non fermentatae libris ducentis, ad tertiae partis consumptionem. Colaturae fermentum additur; & dum fermentescit, in liquore suspendantur, sacculo linteo inclusa, antimonii non pulverati libra dimidia, radicum Oxylapathi unciae quatuor: fermentatione peracta, dolio infundatur cerevisia, cui adjiciatur parum rorismarini

rini sicci, cum corticibus aliquot aurantiorum; adde insuper succum expressum ex quingentis aut sexcentis millepedis. Cum cerevisia optatam puritatem adeptam fuerit, aegro exhibeatur pro omni potu.

D E V A R I O L I S.

Variolis correptos hac Methodo sanari jubeo.

1. **F**ebriticantibus jubeo sanguinem mitti, quamdiu febricitant; & si variolae eruperint, adhuc mitti, donec febris cessaverit.

2. Cessante febre, variolisque se ostendentibus, (nam, si febris ostendentibus variolis non cedat, semper est celebranda venae sectio febrim profligatura,) bibat aeger saepius aquam aliquam, Pharmacopoeis propriam, quae nihil sapiat, cui infunde, per horas aliquot, in frigido, stercus ovillum, & postea adde syrupum papaveris albi, vel opium, si diarrhoea minatur. Pro potu sit aqua hordei, cum laudano & syrupo papaveris albi. Potus hic frequenter exhibitus in variolis confluentibus, (sic Medici loquuntur,) salivam movet, & salutem fert. Faciei nihil applies, nisi velis expirationem impeditam esse impeditissimam, atque febrim reducem; die post eruptas variolas, da aegro jusculum ex semine avenae, cortice sua rite detracta.

3. Si, die ab eruptione quinto, sexto, septimo, vel octavo, variolae evanescant, vena est secanda protinus, & cervici applicare decet pulverem cantharidum.

Si fuerint e genere confluentium, morbo exacto, alvus est pharmaco sollicitanda.

4. Sed, me morti imminentem, aetatis meae primo post sexagesimum anno, decet esse hominem: nam, ut ait PUBLIUS SYRUS, vir (uti judico,) Christianus, aut Christiani similis, *Homo est erranti comiter, qui monstrat viam*: quapropter, quaedam subjiciam epilepticis, paralyticis & podagricis utilissima.

In *Epilepsia*, vel *Paralyfi*, post vomitum repetitum & vesicantia, detur tinctura antepileptica. Junioribus, *hoc est*, non nimium proventa aetate, exhibe *Mercurium* & jusculum, cum lumbricis terrestribus. Tinctura antepileptica recipit, radicis valerianae silvestris, & dictamni albi, singulorum drachmas sex, castorei, stercoris columbarum, singulorum unciam dimidiam, visci quercini drachmas sex, cinnamomi unciam dimidiam, summitatum rorismarini tantundem, foliorum fennae uncias duas, jalappae & turpethi, singulorum unciam dimidiam: infunde omnia per decem dies, frigide, ex vini albi Gallici libris octo.

Colaturae adde pulveris cranii humani, & rasurae ungulae alcis, singulorum drachmas duas, & uncias quatuor sacchari; cui immiscueris rite olei succini scrupulos quatuor, & spiritus castorei drachmas duas: dentur unciae duae septenni, & adulto unciae quatuor.

Saepe, in paralyticis expedit, hanc tincturam exhibere purgantibus orbam declinante morbo. Expedit etiam, aegros, post membra adfecta, ad ignem liberaliter & strenue perfricta, aquis frigidis immergere.

IN ARTHRITIDE, SIVE PODAGRA.

Nil ages, urgendo pharmaca purgantia; vomitoria profunt; post illa, *Mercurius*, sensim datus. Applicabis dolenti parti balsamum Mesues, vulgo *Guidonis*.

Partibus a podagra dolentibus, applicentur perpetuo lintea liquore illo madentia, qui recipit aquae fontanae ferventis octo libras, uncias duas arsenici albi vel flavi, sex uncias calcis vivae; subdatur lentus ignis per horas viginti quatuor.

Si dolor accedat in ventriculo, utere nuce moschata condita, pulvere radice Sarfae, & corticis *Peruviana*, vulgo quina-quina dictae, oleo cinnamomi, conditura nucis moschatae & zinziberis, saepius.

Proderit etiam in podagra, libris duodecim vini albi, vel cerevisiae addidisse libras quatuor lactis ferventis: tum, ablato coagulo lacteo liquori residuo, immitte baccharum oxyacanthi libram; coque omnia per horae dimidium. Mane & vespere bibat aeger hujus decocti libram.

DE

DIVISIONE MORBORUM.

MOrbi omnes sunt, aut *Fluidorum*, aut *Canalium*, aut ex utrisque compositi, aut *extra animal* siti.

Morbi *Fluidorum* sunt, vel *Sanguinis*, aut *Liquorum* ex sanguine secretorum; nempe, augmentum aut defectus: inde, vitiata qualitas, hoc est, *Febris*.

Morbi *Canalium* sunt *Vulnus*, *Tumor*, *Ulcus*, *Inflammati*o, &c.

Quare, ad morbos excretoriorum pertinent *affectus soporosi*, qui peccant in defectu excretionis in cerebro, & *Paralysis* eadem ratione. At, *Epilepsia* ad augmentum pertinet; *Vertigo* ad defectum; *Mania* ad augmentum. *Vertigo* est tumor, vel obstructio. *Gutta Serena* proprie est tumor arteriarum retinae, vel nervi optici tumor; (nam, omnis obstructio est tumor;) adeoque, pertinet ad morbos *communes*.

Suffusio est morbus *extra animal*, estque species *abscessus*, vel saltem, tumoris, ut *Steatoma*.

Ophthalmia (cujus species est *Gutta Serena*,) est tumor cum inflammatione, pertinetque ad morbos *communes*.

Epiphora pertinet ad augmentum excretionis, nisi adsit inflammatio, & tum est morbus *compositus*.

Haemorrhagia narium est vulnus, pertinetque ad morbos *communes*.

Rana-

Ranula pertinet ad *communes*; est enim tumor sub lingua.

Angina pertinet ad *communes*; est enim tumor cum inflammatione glandularum circa fauces, & musculorum saepe.

Asthma est obstructio, & sic tumor (aliquando scirrhus,) pulmonum, & pertinet ad morbos *communes*.

Pleuritis est morbus *communis*; scilicet, tumor cum inflammatione.

Peripneumonia est *pleuritis* major.

Phthisis est morbus *communis*; scilicet, ulcus pulmonum, vel renum, &c.

Empyema est ulcus pleurae & musculorum intercostalium internorum, in cavitatem thoracis apertum.

Syncope saepius est species *Asthmatis*, & vere cardiaca est.

Palpitatio cordis est convulsio, saepe arteriae splenicae.

Morbi *ventriculi* sunt morbi *extra animal*.

Calculus renum, aut vesicae, est morbus *extra animal*. Vide *LISTERUM*, Part. 2, *De fontibus*, &c. Idem de *Podagra* veteri dic. Uterque hic morbus est species tumoris.

Affectus Intestinorum omnes

Pertinent ad augmentum vel defectum excretionis, vel ad morbos *communes*. Item, affectus *Hepatis* & *Lienis*, nisi quod affectio *Hypochondriaca* est morbus *extra animal* in intestinis.

Hydrops est vulnus lymphaticorum, estque morbus *communis*.

Eadem dic de morbis *renum* & *vesicae*.

Chlorosis est *anasarca*, sive tumor, &c, estque morbus *communis*.

Hysterica affectio eadem est cum *hypochondriaca*.

Caeteri mulierum morbi (praeter febres,) pertinent ad augmentum vel defectum excretionis, (nam, *Lochia* & *Menstrua* sunt excretiones, aut saltem vulnera, uti *haemorrhagiae*;) vel ad morbos *communes*.

DE AFFECTIONE SCORBUTICA.

Uti *febris* est vitium sanguinis, sive omnium excernendorum, intra arterias dum fluunt; ita, *scorbutus* est vitium omnium aut multorum simul excretorum, dum per excretoria fluunt sua.

Vel

Defectus aut augmentum in excretoriis canalibus.

Nota. Cum non videantur humores excernendi in suis excretoriis vitari, nisi ipse sanguis sit vitiat; igitur, *scorbutus* in tali vitio non consistit; quare, dicemus *scorbutum* esse morbum compositum ex morbis canalium excretoriorum simul conjugatis; nempe, ex horum plurium defectu in excretionem, plurium augmento, &c; & ex morbis *communibus*, & saepe morbis *extra animal*.

Ex hac Divisione Morborum patet,

I. Eundem morbum saepe ad plura genera referri posse; ut, *febris*, vel est *canalium sanguiferorum*, vel est *canalium excretoriorum*; quia saepissime conjungitur cum aucta secre-

secretione spirituum animalium, &c, & derivatione in fibras cordis aucta.

In hoc casu plures deteguntur proprietates morborum, pluresque adeo medendi methodi, indicationesque.

2, Methodum medendi facili negotio erui, five indicationes statim se ostendere. Quippe, patet, quid indicet augmentum defectusque, aut vulnus tumorque; adeoque, his paucis contineri omnia, quae apud veteres, majoresque nostros, per innumera volumina disputantur. Nam, *ulcerum*, &c, curatio est quodammodo nota. Igitur nota etiam erit morborum, qui ad ulcera referri possunt.

3. Si morbus componatur ex pluribus symptomatis diversi generis, posse illum morbum referri ad quodvis genus; sed, referri debere ad illud genus, ad quod pertinet symptoma *urgentissimum*. Nota, dolorem non esse semper urgentissimum symptoma; *verbi gratia*; in *phlegmone*. Urgentissimum dicitur id symptoma, quod minore tempore mortem solet adferre.

Ostendere nunc oportet, divisionem hic propositam congruere cum *methodo curandi*, a Medicis adhibita; praecipue, cum methodo medendi, quae morbis hodie *Chirurgicae* curae commissis adhibetur; cum hi proxime accedant ad naturam plerorumque morborum juxta nostram divisionem. Vide pag. 171 *affectus soporosi*.

Sed, prius definire oportet, qualis morbus sit *scorbutus*. Et quidem patet, *scorbutum* non esse simplicem morbum; sed, plures simul invadentes, quibus nihil est commune praeter *pulsus naturali tardiores*. Quare, proprius est gentibus Borealibus *Europae*, quibus *pulsus* est natura aliis tardior: oriturque forsan ab ea intima dimo-
tione

tione sanguinis, (vide BELLINIUM, pag. 100, & pag. 528) quae generat pulsum tardum. Quare, ei sanguinis missio non convenit; cum sanguinis missio excitet dimotionem illam intimam, quae propria est Septentrioni, quaeque nobis scorbuticam infelicitatem adfert, & pulsus tardi causa est. At, si haec lues pendeat a causis contrariis, (ut sunt causae pulsus frequentis, scilicet, clima *Gallicum*, &c.) excitabitur dimotio febrilis, &c.

Dimotio ergo *scorbutica* non exigit venae sectionem; nempe, quoties novimus ex venae sectione secuturam dimotionem intimam. At, id adeo raro fit, ut pro nunquam facto reputari debeat.

Quare, non est metuenda tantopere venae sectio in scorbuticis. Sed, metus hic introductus est a timidis & ignaris *Germanis*.

Quare, potius dicemus, *scorbutum* esse congeriem plurium morborum, natura diversorum; *excepto, quod pulsus in omnibus semper tardus sit.*

Quando igitur plures morbi simul invadunt, aut saltem occupant animal, putant *Germani* morbum aliquem peculiarem invasisse.

Non est igitur mirandum, deceptos esse *Germanos* in ejus (scorbuti) curatione; cum non una, sed plures methodi requirantur, ob plures morbos. Et quidem, si maxima pars morborum (sive symptomatum,) tolli possit per temperata, tum dicetur *scorbutus* iis tolli, & esse ejus naturae scorbutum, quem W I L L I S I U S vocat *sulphureo-salinum*; quia sulphur praevalet, seu calidum. At, si aromatis & cochlearia, &c, tolli soleant plerique morborum, scorbuti nomen nactorum, tum dicetur
 scor-

scorbutus is esse, quem W I L L I S I U S vocat *salino-sulphureum*; quia sal praevalet, seu frigidum. Generaliter autem nasturtia & antiscorbutica dicta profunt; quia plerumque pulsus hic est rarior, & talia remedia pulsui frequentiam conciliant.

Componitur ergo morbus, quem scorbutum hodie vocant *Germani*, *Lienositatem* veteres, ex schirroso asthma, ulceribus oris & crurum, doloribus arthriticis, paralyfi, convulsivis motibus, alvi fluxu, alvo astricta, atrophia, & variis exanthematis, sive ecchymosi.

Sed, quia non omnes omnia haec symptomata infestant, fit ut alii asthma illo careant, (calidus tum dicitur a cura scorbutus,) quibus idcirco calida illa, seu vera antiscorbutica, ut nasturtium, &c, non sunt necessaria aut proficua. At, si asthma adesset, aromata & piperata convenient, quae asthma conveniunt, ut & chalybs & piper conveniunt scorbuto frigido. Si dolores arthritici adsint, tum convenit venae sectio, & *Mercurius dulcis*; at, si non adsint, non convenit.

Si tumores adsint in ventriculo, aut colo, convenit *Mars*, aut si acidum ibi est. At, si non sit acidum, tumore ab acido viscidove, non solet prodesse chalybs; saltem non est opus; cum *Mars* viscidum attenuet, &c.

Propter ulcera (si adsint) convenit decoctum guaiaci cum vulnerariis.

Si adsit paralyfis, conveniunt antiscorbutica, calida dicta.

At, si convulsivae contractiones in oesophago, &c. infestent, conveniunt acria volatilia, vel acida volatilia cum laudano, hoc est, sal succini.

Et sic scorbuti cura eruitur optime, resolvendo ipsum

Y

in

in symptomata, quibus constat, & quorum remedia sunt nota.

His adde, purgantia valida non convenire scorbuto, ubi convulsiones adsunt; quia habent stimulum validum irritantem. At, conveniunt in paralyfi scorbutica.

Deinde, ubi alvi est fluxus, nulla fere conveniunt purgantia; neque etiam conveniunt antiscorbutica acria & piperata in eo casu, &c. Denique, pro maculis exhibe anti-icterica; nam, maculae scorbuticae sunt lividae, & fere nigrae, ut in ictero nigro.

Quare, curandi methodus hic non est eruenda, ut in nullo morbo, a causae genio, qui notus non est; sed, a nota symptomatis cura. Non enim ulceribus scorbuticis adhibeo decocta guaiaci, aut sarfae, &c; quia tollunt acidum, aut sal fixum; sed, quia siccant tolluntque ulcera alia, quaecunque sit eorum natura aut causa.

Curata enim fuere ulcera, antequam homines de acido ipforum cogitarent; *Non enim, ut apud C E L S U M legimus, post rationem inventa fuit Medicina; sed, post inventam Medicinam ratio est quaesita.*

Nota, Scorbutum videri veterum cachexiam. Vide CAELIUM AURELIANUM, lib. III. morb. Ochronic. cap. 6. & SYLVIIUM, pag. 704, & 705.

Et, quamvis dixerim, omnes affectus componentes scorbutum habere id commune, ut pulsus sit rarus & infrequens; hoc tamen non semper obtinet; (vide SYLVIIUM, pag. 705;) sed, tum solum, cum abest phlegmone, vel arthritidis vaga. Et saepe etiam, iis non infestantibus, febri corripiuntur scorbutici incerta & erratica, & intermittentium simili, in quas proclives sunt. Quare, nihil iis affectibus

etibus componentibus est semper commune, unde scorbutus non est morbus simplex.

Nota rursus, PECHLINUM (*observation. pag. 177,*) decernere pro causa scorbuti falsuginem, sive misturam ex acido & alcali, & prout hoc, vel illud excedit, variare Medicinam plerumque, aut laudari salino-amara & volatilia, ut sales volatiles sunt, cochlearia, trifolium fibrinum, strobilinum, &c, quae tamen non conveniunt scorbuto biliosarum complexionum, cui potius conveniunt acidiuscula amaritudine balsamica delibuta, uti spiritus salis, vitriolive per vini spiritum dulces facti, quibus si aloes, myrrhae, absynthii, centaurii, &c, amaritudo jungatur, facit alteram remedii antiscorbutici speciem.

Generalis & utrique causae conveniens cura est aquae potus, (cum aqua & acida & alcalia solvat,) & praecipue thermoposia; unde, potus Theae & decocta ex lignis in aqua profunt, lignis Guaiaci & radice oxylapathi.

Affectus soporosi curantur stimulantibus (aegros e somno excitantibus,) hoc est, spirituum secretionem promoventibus, scilicet, vomitoriis, purgantibus acrioribus, castoreo cum aceto naribus admoto, oleo succini, Sp. C. C. caprinis ustis, sternutatoriis, vesicatoriis, cauterio in occipitio & electuario e cephalicis, sive aromaticis. Denique, venae sectione tollente crassitiem, stagnationemque, quae prohibet secretionem spirituum & derivationem, &c. Idem de paralyfi dic.

Epilepsia curatur (quae plerumque provenit a repletione & irritatione,) sanguinis missione; quia is nimis nimium proventum spirituum in cerebro facit, sive aug-

mentum secretionis, sicut irritatio facit augmentum derivationis. Quare, etiam purgantia conveniunt, quia, minuunt quantitatem humorum irritantium: nam, spiritus solito acriores aequipollent pluribus, sive mole auctis, item vomitoria eadem ratione & setacea. Deinde, decocto Guaiaci valido quod evacuat plurimum. Denique, anti-epilepticis, quae vim habent omnia narcoticam; sive spirituum derivationem prohibent. Idem dic de cinnabari nativa; nam, *Mercurius* prohibet in cerebro emanationem spirituum, comprimendo nervos arteriis interjectos.

Vertigo est tumor, sive obstructio, & curatur ut epilepsia; scilicet, omnibus stagnationem tollentibus. Quare, etiam anti-epileptica & narcotica in fine conveniunt, quia rarefaciunt sanguinem crassum, & prohibent spirituum nimiam derivationem in cor, quae velocitatem sanguini adfert, & facit inflationem arteriarum in oculis, &c.

Catarrhus curatur secretionem circa caput tollentibus.

Gutta serena curatur iis, quae tollunt tumores oedematosos, purgantibus, (si ophthalmia adsit, etiam venae sectio adhibenda,) decoctis sudorificis, vesicatoriis.

Suffusio curatur ut steatoma, &c; scilicet, depressio cataractae confirmatae convenit, uti steatomati excissio.

Ophthalmia curatur ut inflammationes reliquae; scilicet, venae sectione & blandis purgantibus; deinde, repellentibus, anodynis, digerentibus, solventibus in statu, sive discutientibus. Vide RIVERIUM, pag. 54, & 55.

Epiphora curatur astringentibus, & secretionem feri in alias vias avertentibus, uti catarrhus.

Haemorrhagia curatur uti vulnera, venae sectione & vulnerariis, &c.

Angi-

Angina curatur uti tumores cum inflammatione.

Asthma (nisi sit convulsivum,) est tumor schirro proximus, & curatur (in cacochymicis,) vomitorio, quod prohibet augmentum tumoris obstruentis generandum a viscositatibus ventriculi, &c, & omnibus attenuantibus, & tumores non suppurabiles evacuantibus. Vide RIVERRIUM, pag. 100, & 101.

Pleuritis curatur ut caeteri tumores inflammati, &c.

Haemoptysis curatur ut haemorrhagia, scilicet, ut vulnus.

Phthisis curatur ut ulcus, ut & empyema.

Vomitus curatur astringentibus, & excretionem minuentibus, inter quae longissime excellit aqua illa fontis perennis, ad oppidum *Desertum*, in *Fifa*, prima illa & nobilissima *Scotiae* provincia siti, in qua ager est *Pitcarnius*.

Obstructio hepatis curatur ut quivis tumor, aut schirrus.

Icterus, ut quaevis obstructio, nempe, lentorem tolerantibus & incidentibus, uti, post vomitu factam dimotionem, chalybe, *Mercurio*, & auro pulverato, gravitate vincentibus. Quippe, icterus est obstructio glandularum, sive earum infarctus a bile plus aequo crassa & viscida, & hanc sequitur diminuta in hepate secretio, vel excretio.

Imo vero, ipsas febres ad hanc divisionem revocare possem, ubi pulsus est frequentior,

Nam, tum febris est aucta secretio spirituum animalium ad cor properantium. Quippe, cum dato tempore major moles spirituum separetur, idcirco, aequalis, sive data moles secernitur minore tempore, eodem manente canali, adeoque frequentius decidunt spiritus in cordis musculum, motusque cordis fit frequentior.

At, si sanguinis aucta sit moles, (secretione quavis imminuta, reliquis non auctis, uti saepius accidit febricitaturis,) tum dato tempore (assumo, nondum esse pulsum mutatum,) major moles expelletur ex corde, cerebrumque pervadet. Ergo aequali tempore major moles spirituum, hoc est, succi nervorum, evadet in nervos ex arteriis cerebri, secretaque immittetur in cordis fibras, quae contractionem harum & e corde expulsionem excitabit validiorem, & ad distantiora loca propagandam aequali tempore; unde frequentior pulsus & febris.

Et haec est causa mittendi sanguinis in febribus; quia, diminuta mole sanguinis imminuitur secretio spirituum.

Sed, quia missio sanguinis non statim in febribus periodice exacerbatis, vel intermittentibus occurrit, instituta more vulgi, tum exhibetur, post vomitum provocatum, pulvis ille corticis *Peruviani*, Quina-quina dicti; aut, qui praestat, pulvis florum chamaemeli: deinde, chalybs, aut limatura ferri, cum equitatione frequenti tutior & utilior.

Ex hisce patet,

I.

Methodum medendi, five artem, esse nullam; sed tantum, *Usus Medendi*, cum VIRGILIO; & casu, non consilio, medicamenta esse inventa, (excepta venae sectione post cognitam circulationem,) & posthac inventum iri.

II.

Medicinam ergo esse memoriam eorum, quae cuilibet morbo usus ostendit fuisse utilia. Nam, notas non esse corporum intra venas fluentium aut consistentium naturas;

ras; adeoque sola observatione innotescere, quid cuique morbo conveniat, postquam saepius eadem eidem morbo profuisse comperimus.

III.

Casu autem, non consilio, eum videri medicari, qui ea facit, quae rursus ab aliis fieri eadem ratione nitentibus non possunt. Eaque ideo non posse methodo, sive arti nomen praebere.

IV.

Unde, aut casu ZACUTUS LUSITANUS opem tulit, aut mendacii nimium reus fuit. Casu, quod conditionem aliquam ignoraverit; quam si scivisset & prodidisset, Medicinam fecisset posteris imitabilem.

V.

Quapropter, exemplum medicationis, proponi debere sanationem febris quartanae, per exhibitum illum corticem *Peruvianum*, qui Quina-quina dicitur, aut per flores chamaemeli eadem ratione exhibitos. In hac medicatione neque corticis aut florum, neque naturam sanguinis, aut motus ejus quartanam excitantis esse notam. Sola observatione constare, hanc febrim illo auxilio nostra aetate semper depelli. Casu ergo, non arte, aut methodo, febricitantes esse sublevatos.

VI.

Adeoque, ut aequae feliciter alii omnes morbi tollantur, oportere nos corpus ignotum in aliud ignotum mutare; quod methodi, vel artis est nullius; nec enim figura nota solum corpori ignoto est inducenda, ope figurae notae, quod Geometra docet; aut Mechanicus praestat: sed, figurae partium corporis ignotae mutari debent in alias ignotas,

tas, vel vires ignotae mutandae sunt in alias ignotas: quod casus aliquando praestat, ars ostendere non potest.

V I I.

Evidentissimum quippe & manifestissimum est, neque venae sectionem, neque purgationem, neque aliam quamlibet per cutis poros, aliasque glandulas excretionem, febres, sive intermittentes, sive continuas, tollere ea optata felicitate, quae intermittentes tollit, aut cortex ille *Americanus*, aut chamaemeli flos. Adeoque, qui febres continuas satis pro votis hominum depellere velit, oportere ei prius esse probatum par *Peruviano* febrifugo medicamentum: &, propterea, fortunae, casuique, & forti reservari illam laudem, non arti, aut hominum sagacitati consiliove.

V I I I.

Corpus ignotum esse nobis dicimus, non solum id, cuius neque pondus, neque figuram, neque molem, neque situm, neque motus quantitatem, neque partium cohaesionem, neque vires attrahendi, novimus; sed, & illud etiam ignotum dicemus, cuius pondus ad alia collati & colorem novimus; (ut aurum,) verum, cohaesionem partium & vires attractrices ignoramus, habita ratione & suarum partium, & aliorum corporum. Sic plumbum & aurum nobis ignota sunt corpora; *scilicet*, eorum intima natura nos homines fugit. Uno verbo, ignotum id est, cuius ad aliud quodvis omnes rationes non novimus. Atque idcirco, nemo unquam, nisi casu, plumbum mutabit in aurum, qui non magis perspectam habuerit utriusque naturam, quam homines nunc habent; hisce tamen (Alchymistis) similes sunt, qui curationes venditant morborum,

rum, quorum naturae a corporum eos excitantium naturis pendent, non magis, sed minus multo nobis sunt notae, quam auri vel plumbi.

*Quapropter non dubito me solvisse nobile problema, quod est,
Dato morbo invenire remedium.*

*Jamque opus exegi *.*

* OVIDIUS, *Metamorphoseon* Lib. xv, *versus finem*, in *Peroratione*.

D I S S E R T A T I O

De Legibus Historiae Naturalis.

Emisit ante duodecim annos † ROBERTUS SIBBALDUS *Prodromum* Historiae naturalis Scotiae; in quo regionis natura, incolarum ingenia & mores, morbi, iisque medendi methodus, & Medicina indigena accurate explicantur: & multiplices naturae partus in triplice ejus Regno, Vegetabili scilicet, Animali, & Minerali per hancce Borealem magnae Britanniae partem undiquaque diffusi, nunc primum in lucem eruuntur, & varii eorum usus Medici praesertim & Mechanici, cunctis perspicue exponuntur. Haec promittebat SIBBALDUS, artium licet expers, quibus *Historiae naturalis* auctorem decuisset imbui. At, visus est tandem intelligere, quae sibi Historiam illam scribenti defuissent artes. Quippe, libellum nuper emisit adversus Mathe-

Z

mati-

† Anno 1684.

maticos, eosque, qui in Physicis Medicisque tractandis Mathematicos auxilio nituntur, adscito in operis societatem Comoedo, *Scotica* dialecto conscriptum, quod danda foret fabula populo placitura. In eo scripto EUCLIDEM, ARCHIMEDEM, & NEWTONUM derident, illorumque inventa ludibrio habent, nugisque, ac deliramentis annumerant homines, Geometriae omnis ignari. Nos, cordatis & honestas artes edoctis scribentes, neminique convicium facturi, rationem *naturalis Historiae* per *axiomata* quaedam, aut, si mavis, *praecepta*, digestam breviter trademus. Quippe, manifestum est,

I.

Historiae naturalis auctorem nulli Philosophorum sectae, quae principiis Mathematicis, hoc est, certis non nitantur, debere esse illigatum; alioqui, fidem ejus esse merito suspectam.

II.

Historiae naturalis auctorem oportere ea loca peragrasse, eaque omnia vidisse atque agnovisse, quorum situs, magnitudines, figuras, atque vires descripserit. Nam, qui haec ex aliis excubuit, illos *Historiae* auctores agnoscit; se ipsum vero compilatorem: & praeterea, SIBBALDI nostri doctissimi reprehensione dignus est, qui idcirco se *Historiam Scotiae* adornasse profitetur, *quoniam quod editum fuit Scotiae theatrum nil aliud habet quam nudam BUCHANANI Descriptionem, Nuncii Scoto-Britanni. Pag. 1.*

III.

Decere, ipsum iis artibus esse instructum, quae docent enarrantque rationem, figuras, atque facultates corporum unas ab alteris secernendi: alioqui, tanquam imperito

fidem habendam esse nullam. Quis enim Anatomico fidem habebit de corde triangulari differenti? Quippe, corpus omne plures tribus habet angulos: nemoque prorsus eum formae ulli, ullive rei describendae idoneum censebit, qui corpora vocet triangularia & quadrata; hoc est, solida plana, aut qui quadrata non quadrangula, vidisse se adfirmet: talia quippe sunt quae narrant SIBBALDUS cum Comoedo suo.

IV.

Scriptorem *naturalis Historiae*, (quae teste SIBBALDO nostro, *Praef. Prodr. pag. 2* sub finem, *Ingeniis multorum virorum, etiam in plura secula, exercendis sufficit,*) non debere ante absolutum *Historiae* suae opus, ad aliud problema delabi majoris & taedii, & difficultatis, quodque solvi non potest ante absolutam *Historiam*. Exemplo res erit manifestior. Proposuit doctissimus ROBERTUS SIBBALDUS problema sibi solvendum hisce verbis, in *Praef. Prodromi*, sub finem.

Agitur libro I. Part. I. de aere, aquis, & locis Scotiae; in secundo, de morbis, methodo iis medendi, & Medicina indigena. In lib. I. secundae partis, de plantis Scotiae indigenis. In secundo, secundae, de plantis Medici usus apud nos hortensibus. In tertio, de Animalibus. In quarto, de Mineralibus, Metallis, & Marinis Scotiae.

Non absolvisse SIBBALDUM, nec exegisse *naturalis Historiae opus*, res ipsa ostendit, & ipse saepius agnoscit, dum incertum esse se ait & nescire, an animalia, mineralia, & metalla, quae describit, in *Scotia* reperiantur. Non potuit ergo astruere *αὐταρχείαν* patriae suae; multo minus, cujusvis regionis: quod tamen molitur. Nec enim pro

certo quis adfirmaverit, *Scotiam* morbis nostris profligandis idonea medicamenta proferre, qui non omnia norit per omnem *Scotiam* nascentia. Quae si quis norit, tamen ab *ἀνταρχειᾷ* demonstranda immane quantum aberit; quamdiu non perfanaverit omnis generis aegrotos, qui hic occurrunt, non dico, semel, adhibito medicamento *Scotiae* indigena; sed, saepius, multosque per annos.

Haec illa sunt *praecepta*, ad quae respicere decebat, *Historiam naturalem* patriae nostrae scripturum. Et tamen, ea prorsus neglexit contempsitque SIBBALDUS, ut patebit, opus ejus viri historicum legenti; quod ego breviter expendere non gravabor, ut civibus meis, qui posthac *Historiam* patriae scribendam susceperint, viam commonstrem, qua eundum est: & simul ostendam, illos, qui optimi sunt Mathematici, cives quoque esse optimos.

Quae doctissimus SIBBALDUS contra primum *praeceptum* peccavit, cum innumera sint, nosque brevitati studeamus, idcirco non attingemus, nisi caeteris pugnancia cum *praeceptis* occurrant. Ad alia igitur me confero. Diximus secundo loco, *naturalis Historiae* scriptorem debuisse ea omnia lustrasse, quae describit. At, quam exiguam *Scotiae* suae particulam vidit unquam SIBBALDUS! Quantulum temporis in *Scotia* peragranda insumpsit, qui aetatem in facienda *Edinburgi* Medicina transegit? Qui, cum dialecticae valedixisset, statim ad *Batavos* trajecit, *Historiae naturalis*, ut puto, imperitus; & post menses octodecim exactos, Medicinae apud *Andegavenses* Doctor renunciatus, salvus ad suos rediit, primoque postquam redierat anno (ut mihi saepius adfirmavit optimus ille, & vir, & harum rerum arbiter, ANDREAS BALFOURAEUS,) totum hoc

hoc quod videmus *Historiae naturalis* opus concinnavit; si ea excipias, quae ex aliis, post illum annum scribentibus, nuper excerptis. Sic ille ne quidem millesimam *Scotiae* partem aut vidit unquam, aut peragravit, *Historiae naturali* incumbens. Hoc civibus nostris notissimum; juvat tamen, exterorum in gratiam, ex ipsis viri scriptis patefacere.

Edidit anno 1683 *Nuncium Scoto-Britannum*, in quo haec legas. Cum publicum sit hoc opus, & non exiguum honorem genti nostrae allaturum, speramus cunctos ingenio praeditos, contributuros necessarias suas informationes, respondentes generalibus quaesitis, quae sequentibus propositis adjuncta sunt. Tum subdit ista, quae generalia quaesita appellaverat, sive, ut postea loquitur, *Quaestiones communes*.

1. Quae sit loci natura? aut quae sunt praecipua ejus producta?

2. Quae plantae, animalia, metalla, substantiae e mari ejectae, sint illi loco peculiaria, & quomodo disponantur?

3. Quae sylvae, nemora, vivaria? qui fontes, amnes, lacus, cum variis eorum proprietatibus, & an Medico usui conferant? quibus piscibus repletisint? rapidine sint, an placido cursu? amnium origines & ostia?

Haec exeunte anno 1683. quaerebat SIBBALDUS, agnoscebatque ignota tum sibi *Scotiae* producta; (ita loquitur;) nempe, metalla, mineralia, animalia, plantas, aliaque omnia ad *Historiam naturalem* pertinentia. Ostendunt eae quaestiones, nondum anno 1683 peragratam SIBBALDO *Scotiam*; quam tamen describere, cujusque *Historiam naturalem* edere, (contra praeceptum, secundo loco a me memoratum,) jam tum fuerat aggressus: nam,

ineunte anno 1684 prodiit in lucem *prodromus Historiae naturalis*. Sed, pernoscamus quid hic *prodromus* ferat.

Lib. I. part. I. cap. II. ex *Atlante Blaviano* haec narrat: *In montibus Hoiae, Orcadum quae una est, circa solstitium aestivale, consistentibus in apice horum montium hominibus, ipsissimum corpus solis, obscurius tamen paulo; quasi nebula obductum, a media nempe hora undecima noctis ad mediam primam diei subsecuturi, supra horizontem conspicitur; resumptaque statim sua luce, radios suos fulgentissimos per totum hoc hemisphaerium diffundit.* Scio, Geographiae peritis hanc observationem, qua ipsissimum corpus solis media nocte effulgere dicitur in insula Hoia, Orcadum una, (ut loquitur SIBBALDUS,) *resumptaque statim sua luce radios ubique diffundere, falsam & ridiculam censer, falsamque prorsus esse atque ridiculam.* Hic convenit solum adnotare, eam ex *Atlante Blaviano* esse excerptam, minimeque *praecepto* nostro secundo satisfacere.

Sed, audiamus SIBBALDUM, cap. X. ejusdem libri haec narrantem: *Procul omni dubio multi fontes medicati in Scotia sunt, licet nondum divulgata sit eorum virtus.*

His ego verbis semper censui omnia complexum, aut complecti potuisse SIBBALDUM, quae ad *Historiam naturalem Scotiae* pertinentia collegisset. Neque enim aliud quicquam vegrandi volumine nos docuit, quam nescire se, (Geographum Regium, & *Historiae naturalis Scotiae* auctorem,) quid ferat *Scotia*; quae educet animalia; quas plantas, quaeve metalla promittat. Ne hoc nescires, placuit historico nostro haec ex JONSTONO exscribere, cap. II. sect. II. lib. III. part. II. JONSTONUS refert, quod in *Scotia* boves sint sylvestres colore candidissimo.

Ex-

Exscribit hic ex aliorum commentariis, quod ipse visu debuerat agnoscere. Subdit statim; *haec ab historicis nostris petita sunt; sed, confirmatione egent.* Debuerat Historicus & Geographus noster de rebus hisce certiores nos facere. Sed, audiamus eodem capite docentem: *an jubati bisontes nunc extant in Scotia nescio.* At, cap. IV. BOETHIUS (BOECIUS dici debuit,) *fibrum, seu castorem dicit in Scotia reperiri. An nunc reperiatur nescio.* Et ibidem: *an taxus suillus apud nos reperiatur nescio.* Ego neutrum hic reperiri scio.

Rursus, Cap. II. Sect. III. Lib. III. Part. II. Aquilae, inquit, *ut mihi relatum est, apud nos sunt.* Dein, Cap. IV. lusciniam, sive philomelam, inter aves Scoticas enumerat, JONSTONI auctoritate fretus, *qui nostram minus suaviter ait canere;* inquit noster, nec mirum, cum nulla sit apud Scotos *philomela;* quod historicum minime debuit fugisse.

Ridiculum vero prorsus est, quod capite ultimo libri III. Part. II. Animal describat, *ex pipere in aqua macerato, ut putat, natum;* quasi piper, animalve ejus hospes Scotiae foret indigena.

Ad alia transeamus. Cap. V. Sect. II. Lib. IV. Part. II. In rupe, inquit, arcis Britannodunensis minera magnetis esse traditur, & lapis in Argathelia, qui stipulae substratus eam in cineres consumit; (carbonem ignitum describit, si sanus est.) Sed hoc, ait, ab historicis asseritur, de eo tamen nihil adhuc certi compertum est.

Rursus, Cap. VIII. Adamantes in Scotia reperiri, mihi a viris fide dignis relatum est. Ibidemque: Rubinum in Scotia reperiri ferunt. Et: Hyacinthum in Scotia reperiri relatum est. Topazium in boreali plaga Scotiae reperiri mihi relatum.

relatum est. Incerti sumus an Beryllus apud nos reperiat ur, necne.

Quis jam credat hoc illud esse opus, in quo (uti jaëtat SIBBALDUS,) *multiplices naturae partus in regno vegetabili, animali, & minerali per Scotiam diffusi, nunc primum in lucem eruuntur.*

Adnotare nunc juvat, SIBBALDUM ea *Scotiae* adscribere, quae ostendunt ipsum esse *Domi Peregrinum*. Testatur hoc *lib. III. sect. II. cap. I.* ubi asinum *Scotis* domesticum & ruri necessarium ait, quod falsum est: ovesque in insula *Rhona* caerulei coloris describit, ovesque *Hirthanas* ex *BOECIO*, quales patria nostra non fert. *Cap. VI.* falso ait, testudinem marinam vivam apud nos capi. *Cap. XI. sect. IV. lib. IV. pag 55.* *Ambragrisea*, inquit, quandoque in nostro mari reperitur. Sic aliquando in mari nostro reperiuntur naves *Batavorum*, ab *India* redeuntium, & *Orientis* spolia in patriam referentium. An haec igitur *Scotiae* indigenae erunt SIBBALDO? Male ergo succinum, aut nucem *Indicam* indigenis, aut marinis nostris annumerat.

Cap. XI. sect. III. part. II. lib. IV. pag. 53. & 54. *Antimonium*, quasi nobis foret indigena, describit, ut & *cadmiam*, *cinnabarin*, *lithargyrium*, (nota indigenam SIBBALDI,) *pompholygem*, *diphrygem*, &c. quorum nulla nobis, aliqua nullis indigenae sunt.

Haec, pauca licet, satis erit adversus legem secundam, & historici officii rationem commissa adnotasse: nam, si omnia, quae peccavit hic SIBBALDUS, adnotanda forent, integrum illud viginti annorum opus oporteret exscribere. Quapropter, transeo ad praeceptum nostrum, quo cautum est, ne quis ad *Historiam naturalem* condendam accedat

accedat non instructus necessariis disciplinis; neque enim herbas describere aptus est, qui Botanices experts; neque, qui Zoölogiae rudis, animalium diversitates digne explicabit. At, qui Geographiae Matheseosque omnis ignarus, vult tamen cenferi Geographus, sibi situm regionum, motusque siderum, & corporum figuras enarranti fidem haberi, is mihi, non solum ea, quae sui sunt officii nescire; sed, lectores suos ludificari velle, atque irridere videtur.

Videamus ergo, an hujus *praecepti* memor fuerit SIBBALDUS. Herbas in solo *Scotico* nascentes descripturum se pollicetur initio operis, non ignarus, opinor, exigi id ipsum merito ab *Historiae naturalis* auctore. Sed, cum ad descriptiones ventum est, tum vero manifestum fit, frustra illum *naturali Historiae* insudare, qui necessariis disciplinis non fuerit instructus. Quoties peccaverit hic SIBBALDUS, non vacat memorare: Peccata in Botanica ex multis pauca subjiciemus; plura etenim detegendi facilis labos cuivis relinquitur. Ediderat, duobus, antequam librum suum SIBBALDUS evulgaret, annis, *Methodum plantarum*, synoptice in *tabulis* exhibitam, JOANNES RAIUS. *Catalogum plantarum*, in *Scotia* nascentium, condiderat diu ante illud tempus JACOBUS SUTHERLANDIUS. (vide *Prodr. part. II. lib. II. pag. 104.* ubi, de Polygonato loquens, lectorem ablegat ad *catalogum* Horti SUTHERLANDII.) Ex hoc *catalogo* nomina plantarum, ex RAII *methodo* notas characteristicas, sive descriptiones mutuari volebat SIBBALDUS. Primum illud ex voto cessit; facilis enim erat *catalogi* lectio; at, posterius non aeque feliciter, ostenditque Historicus noster

Aa... diffici-

difficilem fuisse Viro doctissimo lectionem; quae adolescentulis, Medicinae studium auspicaturis, promptae esse solet.

Scribit SIBBALDUS, Part. II. Lib. I. pag. 9. *Anchusam esse inter asperifolias, seminibus ad singulos flores quaternis, Perianthio brevioribus, & ad modum floris expanso, seminibus asperis, rugosis, caput viperinum referentibus, radicibus rubris, florum laciniis acutis.*

Videamus R A I O Tabulam, quae sic se habet.

T A B U L A XVIII.

Herbae asperifoliae, &c, sunt vel seminibus ad singulos flores

Quaternis, Perianthio

{ Oblongo integro, &c.
{ Breviore, & ad modum floris expanso; seminibus.

Asperis, &c. Cynoglossa.

Rugosis,

Caput viperinum, &c. referentibus, flore in quinque lacinias, &c. diviso; radicibus.

Albis, florum laciniis

{ Obtusis &c. Buglossa.

{ Acutis, &c. Borago.

Rubris, Anchusa, &c.

Evidens est, mutuatum esse S I B B A L D U M sua ex R A I O; at, quam infeliciter, haec demonstrat Tabula, quam

quam quicumque legerit, inveniet SIBBALDO non fuisse intellectam; alioquin, haud attribuisset Anchusae ea, quae Cynoglossae, Buglossae, & Boragini conveniunt, quaeque uni Anchusae convenire non possunt. Rursus, pag. 10. ejusdem libri, Part. II. SIBBALDUS Artemisiam vulgarem describens, *Est, inquit, inter corymbiferas flore discoide nudo, caule indeterminato, floribus secundum ejus longitudinem, velut in spicas dispositis, foliis dissectis, fruticescens, folio subtus incano, superne virente.* At, nos R A I I Tabulam XI. inspiciamus, quae talis est.

T A B U L A XI.

Herbae corymbiferae flore discoide nudo, sunt vel caule determinato, &c.

vel

indeterminato, floribus eum non finientibus, verum secundum ejus longitudinem, velut in spicas dispositis, foliis

Integris, &c. Draco.

Dissectis

Fruticescens, caulibus perennibus. Abrotanum;

vel

superficie annua

Cum amarore insigni, &c. Absynthium;

vel

Sine amarore isto, ut Artemisia.

Unde patet nimis evidenter, non recte legisse hanc Tabulam SIBBALDUM; alioquin, Artemisiam non dixisset

fruticescentem, quam R A I U S superficie esse annua luculenter tradiderat.

Infinita fere hujus ignorantiae exempla apud S I B B A L D U M occurrunt. Duo liceat subjicere, erroris foeditatem ipsa brevitate reddentia manifestiorem.

S I B B A L D U S pag. ejusdem libri 14. haec tradit : *Cannabis sativa est inter herbas flore imperfecto, seu stamineo, erectis seminibus ex adverso binis, digitatis.*

Jam, R A I I Tabula IV. talis est.

Herbae flore imperfecto, &c. sunt,
vel

Sexu distinctae, &c. quae sunt, vel

Scandentes, &c. ut Lupulus;

vel

Erectae, haeque seminibus

Solitariis, &c. foliis

vel

Ex adverso binis, iisque

Integris, &c.

vel

Digitatis, ut Cannabis.

Hinc constat, quantus sit in Botanicis artifex S I B B A L D U S, qui Cannabis semina vocet erecta, ex adverso bina, & digitata; plantam enim ipsam dixit R A I U S erectam, ut a scandente Lupulo fecerneret; at non, semina: sed, folia dixerat R A I U S ex adverso bina; &, ut ab Urtica Cannabin fecerneret, digitata.

Gemi-

Geminum huic est quod habet, *Pag. 8. Part. II. Lib. I. sui Prodrumi.* Alchimilla SIBBALDO est planta subrotundis flosculis & seminibus, in summis caulibus & ramulis, marginibus foliorum eleganter denticulatis. At, RAIUS, cujus *methodum* vide, *pag. 66. & 67. sive Tab. V.* Alchimillam dixit herbam flore stamineo, sexu carentem, femine flori conjuncto, seu contiguo, eodemque rotundo, flore florisque calice summo femini, aut fructui innascente, fructu seu vasculo feminali striato, parvo, radice fibrosa, foliis circumscriptione subrotundis, flosculis & seminibus in summis caulibus & ramulis, marginibus foliorum eleganter denticulatis. Erravit hic SIBBALDUS, ut semper; quia RAII *Tabulam* legere nescivit; hoc enim est in libro SIBBALDI perpetuum, ut, cum descriptio herbae ex *Tabula* aliqua RAII longiuscula, aut *Tabulae* extremo petenda est, turpiter peccetur. Neque id mirum videri debet; nam, quae spes erat, intellectum, vel rite lectum iri *Tabulam* ab illo, qui *methodum*, ex qua *Tabulae* depromerentur, non potuit intelligere? Inspiciamus ergo *pag. 5. Part. II. Lib. I. Prodrumi*, ubi SIBBALDUS affirmat, *pro seminum & fructuum differentiis ac similitudinibus, specie & genere, aut distingui, aut convenire plantas*: & haec MORISONI RAIIQUE *methodo* convenientia protulisse se putat, quae tamen toto coelo abeunt ab illorum sententia. Testatur id ipsum RAIUS in *praefatione* & in *fine Synopseos Methodi CAESALPINI*, quam suae subnectit; testatur, ut rem exemplo declaremus, Myrrhis seminibus asperis & striatis, eaque, quae laevibus est: hic enim femina differunt, herbae ipsae congeneres sunt. Vide RAII *Tabulam XVI.*

pag. 88. Quippe, distinguuntur plantae non seminum fructuumve dissimilitudine; sed, conformatione capsularum, semina includentium, aliarumque etiam partium. At, SIBBALDUM loculamenta capsulasque pro seminibus ipsis & fructibus habuisse, arguit eadem pag. 8. *Part. II. Lib. I. Cum*, inquit, *in fructuum & seminum gratiam natura varias in plantis partes & organa effinxerit, propterea in quibuscunque plantis partes & organa illa essentialia (fructus & semen scilicet; nota bene;) simili vel dissimili modo conformata videbuntur, &c.* Haec ex Botanico quodam excerpfit, qui de capsulis feminalibus, &c. loquitur: at SIBBALDUS eum de semine ipso loqui credens, parenthesin hanc inseruit, *fructus & semen scilicet.*

Sed pudet, in re tam manifesta adeo verbosum fuisse. Botanices imperitus *Historiam naturalem* attingere non debuit. Non debuit ergo eam attingere SIBBALDUS.

Cum bona tamen lectorum venia memorare liceat, quam se vana spe jactet SIBBALDUS, dum *Rosam* describit quasi a se primum detectam, quae JOANNI BAUHINO Rosa est pumila, spinosissima, foliis Pimpinellae glabris, flore rubro, &c.

Multa hujus generis memorare possum: sed, ab Herbis ad Animalia transire lubet.

SIBBALDUS, *Cap. II. Sect. I. Part. II. Lib. III. Hominem* describit, quasi soli *Scotiae* Homines forent indigenae. Mirus fane homo SIBBALDUS! Capiteque secundo proluxa oratione deducit *Historiam vitae mortisque ALEXANDRI BODII*, consanguinei sui, ridiculam & prorsus inficetam. Subnectit *Caput Tertium* de Medicamentis ab humano corpore desumptis, ex BECHERO excer-

excerptum *Dantiscano*. An hoc est *Historiam naturalem Scotiae* nostrae condere?

Pervenimus nunc ad *Sect. II. Cap. I.* ubi recenset *Equos Succussarios, Tolutarios, Cataphractos, Sellarios, Cursorios, Veredarios, Vectarios, Admissarios & Canterios in Scotia repertos*. Tot igitur genera equorum indigenarum alit *Scotia*. Quam vellem, *SIBBALDUM* notas horum generum characteristics adjecisse. Sed, huic conatui defuit *RAIUS*. Deinde, *Cap. II.* ruminantia bisulca cornigera describit; quibus, inquit, nutrimentum, quod ad superiores dentes, quibus carent, abire debebat, in cornua abit. Haecque statim subdit; *Dividuntur in cornigera, & non cornigera*. Intelligat haec qui volet. Caeterum, *JOANNES RAIUS* ridiculam esse docet rationem *SIBBALDI*, cornuta superioribus dentibus carere scribentis.

Deinde, narrat fabulas aniles de vacca leporem pariente, leporeque vaccae tergo insidente: jam tum scilicet in fabulas pronior *SIBBALDUS*, legendas vocat sacerdotum vulgus.

Cap. IV. Walrum ex aliis describit *Scotis* nunquam visum: tanta *SIBBALDO* mentiendi pro patria libido. Erinaceum ibidem describit omnibus notum, & tamen cuniculo magnitudine parem dicit: ut Erinaceum ei nunquam visum possis suspicari: praesertim, cum dicat, *eum duum generum censi; alterum capite canino, alterum suillo*. Haec enim sunt hominis ex aliis excerptis, non autem visa, tantum cognitaque tradentis.

Cap. V. Canum species recenset multas, quae nobis paucae sunt. Nam, canis villaticus est canis pastoris fidelis: & canis venaticus, canis *Scoticus* sagax, canis *Scoticus*,
furum

furum deprehenfor, unum eundemque faciunt canem; quem SIBBALDUS in tres divisit. Unum etiam eundemque canem faciunt canis *perdicum venaticus*, & *canis sagax ad aquas SIBBALDI*. Cur autem hos, ut & canem leporarium, *Scotis* peculiare dixerit, fateor me nescire; verum, fat scio, nobis peculiare nequaquam esse. Sed, progrediamur ad *Cap. II. Sect. III.*

Ibi multa de Aquila fabulatur, & postea describit aves rapaces minores, quas dividit in Macropteras & Brachypteras. Macropteras vocat eas, *quibus alae complicatae ad extremam fere caudam pertingunt*. Ridicule, nam hae sunt Brachypterae; quod nec ipse inficias iverit: quippe statim Brachypteras vocat eas, *quae sunt alis cauda brevioribus*.

Eodem capite male cuculum adscribit generi carnivoro: sed gravius multo admisit peccatum in describenda *Cuculi saliva*, ut loquitur. Tantus Vir cum esset in Botanicis, tantisque rebus domi gestis, & omni tandem *Scotia* illustrata, nunquam tamen herbam lustrasse videtur ullam, ut dignosceret quodnam animal *salivae cuculi* hospes foret, pueris licet minime ignotum. Denique, *Spermologum* frugivorum absurde annumerat carnivoris. Verum, taedet tamdiu in Botanicis & Zoölogicis peccantem sequi. His, idcirco, valedicemus, postquam ridiculum errorem annotaverimus, *Cap. VI. Sect. III. Berniclam* anserino generi ascribentis, eandemque cum ave, *Gallis Macreusae* dicta, confundentis. Vide LISTERI, vere doctissimi, meritoque celeberrimi, epistolam in *Actis Philosophicis Anglicis*, Junio mense anni 1685. evulgatis.

Exigit praeceptum tertium, ut ad *Historiam naturalem* condendam accedat nemo disciplinis necessariis non instructus.

etus. Vidimus quam non fuerit in Botanica, utili inprimis & necessaria Historico nostro disciplina, versatus Auctor *Illustratae Scotiae*; videamus nunc quam peritum se ostenderit Geographum, ille, qui *Scotiae antiquae & modernae descriptionem* emissurum se minatus est.

Primum hujus peritiae specimen praebet *Nuncii Scoto-Britanni* pag. 4. lin. 1. 2. &c. Ut *Tabulae*, inquit, *Geographicae accuratissime conficerentur*, *Senatus Regius commissionem dedit*, & mandata JOANNI ADAIR, Mathe-
matico eximio, & mechanices peritissimo, ut is Geometrice *Regionum mappas conficeret*: quas ille quidem, *varias angulorum distantias instrumentis suis Mathematicis sumptas mensurando exacte*, *elaboratissimas & justissimas confecit*. Non opus est, ut Geographum, aut Geometriae medio-
criter doctum admoneam, quam turpe sit, ista effutire, quantoque melius famae suae consuluisse SIBBALDUS, si JOANNI ADAIR rei hujus enarrandae provinciam de-
mandasset, aut GREGORIO, tum apud nos Mathefin docenti, haec, priusquam ederentur, ostendisset. Sed, ad alia pergimus.

Vir celeberrimus, pag. 13. Part. I. Lib. I. Dum *Boreas*, inquit, *Edinburgensibus penetrantior est*, *observatum Mercurium ad summitatem fere Tabulae aeneae in Barometro ascendisse*. Non disquirimus quantum veri subsit huic observationi. Id solum fas non est praeterire, praeclarum *Historiae naturalis* conditorem non potuisse satis luculenta oratione altitudinem hydrargyri describere, quam ipse observaverit maximam. Non enim tradit quanta fuerit istius *Tabulae* altitudo. Sed, minime oportet silentio involvere *Tabulas Sibbaldinas*.

Illas quippe fabricabat *Lethae* GEORGIUS SINCLA-
RUS, homo minime malus, & hoc pacto instruebat. Ob-
servabat ille *Lethae* (quae multo humilior est *Edinburgo*;
est enim *Edinburgum* colli praealto impositum, *Letha* vix
maris defendit injuriam;) varios ascensus Mercurii, pro
varietate tempestatum; (quae tamen non easdem altitu-
dines eodem tempore generabant in urbe *Edinburgensi*;)
atque adeo, nullo locorum temporumque facto discrimi-
mine,) *Tabulam* suam insigniebat notis caloris, pluviae,
coeli fudi, nebulosi, &c. SIBBALDUS ab hoc homine
Tabulam suam aeneam emebat, ad cujus summitatem fere
Edinburgi ascendere aliquando Mercurium prodit. Ut igitur
exteri inveniant altitudinem *Edinburgensem* hydrargyri,
possintque cum *Londinensi*, vel *Parisiensi* conferre, oportet
eos *longitudinem Tabulae aeneae*, apud SIBBALDUM
asservatae, quantumque urbs haec ultra *Lethensis* oppidi
fastigia attollatur, invenire; quae omnia debuerat SIB-
BALDUS exteros docere.

Eadem pagina haec memorat: *Flantibus Borea & Euro-*
Borea hydrargyrus in Barometro attollitur; sive quod aerem
& graviolem & densiorem efficiant, sive quod in terram ex
alto demissi aerem inferiorem premant, & ejus Elaterium au-
geant. Elaterium aeri primus, ni fallor, adscripsit noster
SIBBALDUS, primusque affirmavit, ascensum aquae,
vel hydrargyri, in siphonibus, tubisque Elaterio, hoc
est, cucumeris agrestis succo, ubique per aerem disperso,
& subjecta prementi, acceptum debere referri.

Inspiciamus nunc *Cap. I. Part. I. Lib. I. pag. 2.* Illic affirmat,
Britanniam, quoniam pro situ suo inter veterem & novum
orbem, tanquam hemisphaerii centrum, inaequali terrarum
sua-

suarum superficie a mari versus mediterraneum insulae assurgente, tanquam vitri urentis gibbosa & convexa superficie, radios solis, aliorumque planetarum & astrorum colligat, ideo benignissimo & clementissimo coeli influxui subjici. Et hanc quidem causam temperatioris apud nos coeli, aliis, ut innuit, assentientibus, adducit.

At, quis unquam ante hunc Geographum somniavit, *Britanniam in hemisphaerii terreni centro esse sitam*? An igitur existimabimus, *centri* appellatione (quae viro doctissimo ignota,) medium *Europam* inter *Americamque* in eadem superficie locum hic significari? Ut adeo *Britannis* coelum mite sit, quoniam *Europam Americamque* medii aspi-
ciunt.

Eademne dici possunt de quavis portione superficiei sphaericae *Europam* inter & *Americam* interjecta? An non *Islandia* inter veterem novumque orbem attollitur? Primus fane invenit SIBBALDUS medium in superficie sphaerica, inter quaevis duo loca, locum esse temperatissimum; hoc est, coelum aliud alio non esse temperatius, superficiem sphaerae in centro, centrumque in superficie collocans, veterisque Geometriae ignarus, & novam parturiens.

Opticae dein immiscet se vir doctissimus; affirmat enim, *Britanniam superficie convexa, instar vitri urentis, radios solis colligere*. Si telluris figuram nosset, comperisset quamvis terraeve marisve portionem superficie esse convexa; *Britanniamque* tanto minus accedere ad figuram vitro urenti propriam; quanto inaequaliorem superficiem terrarum suarum ostentat. Hoc eum docere potuisset Optica, quae vel tyronibus patefacere solet, superficiem convexam

radios non colligere, hoc est, versus objecti visibilis partes imaginem non generare.

At, nemo praeter virum doctissimum, Opticaeve prorsus expertem, affirmaverit, *Britanniam vitri urentis* (*Lentem* vocant Optici,) naturam induisse; cum *Britannia* radios non transmittat: quos si transmitteret, qua *Fretum Magellanicum* nostrumque concedere fingit noster, illi ob leges Opticas locum concursus invenirent, non quidem apud nos, sed, 13730 $\frac{1}{2}$ passuum millia prolatum ultra *Freti Magellanici* accolae, quos ille nobis opponit Antipodas: quapropter, major noctu semper ingrueret nobis calor, sole nempe apud *Magellanos* versante. *Tantum* Aegometria potuit suadere errorum.

Dum haec aliquando perpenderem, mirabar, auctorem nostrum non potius *Gronlandiae* quam *Scotiae* Historiam esse aggressum. Omnia quippe, quae undique colligit de natura & usu aeris, ignis, montium, aquarum, fluminum, mariumque motu & ventis, illum ipsum in *Gronlandiae* Historia, quem nunc in *Scotia* illustrata obtinent, locum vindicassent. Omnia illa de morbis in genere, deque methodo medendi & Medicina indigena, tam operose docteque exscripta, Historiae illi *Gronlandicae* non minus quam nostrae convenissent. Neque fuisset difficile, tot Historias morborum, *Gronlandiam* infestantium, expiscari, quot noster ex praxi *Scotica* depromit; atque adeo, nihilo difficilius fuisset *Gronlandiam* illustratam exhibere, quam fuit *Scotiam*.

In illa licuisset dicere: *Relatum est mihi; & ferunt viri fide digni*, ut in *Scotia illustrata* fecit SIBBALDUS; neque quisquam falsi arguisset haec efferentem, an in *Gronlandia*

landia reperiatur nescio? aut confirmatione eget? quae toties pro *Historia patriae nostrae naturali* reponit SIBBALDUS.

Qualem deinde, quamque & viribus & animis aptam materiam reperisset in *Gronlandia*! quam opportunam philosophaturo! quam illi gratam; qui de pruinis balaenisque *Scoticis* libros componit; qui toties regerit, solem totam noctem *Orca-densibus* se ostendere! In *Gronlandia* fluctuantes insulae ex glacie conflatae, quod hic praecipuum est, & in *Alpinam* altitudinem assurgentes, (*ita enim*, ut saepe loquitur SIBBALDUS, *mibi relatum est*;) pulcherrimam subministrassent occasionem differendi *de vitris urentibus*. Prima quippe, si CARTESIO credimus, Telescopia ex glacie conflavit inventi tam nobilis Auctor. Lentas autem Telescopiorum sunt *vitra illa*, quae vocat hic, *urentia*. Jam quoque nata fuisset occasio de inventore Telescopiorum docte, & more majorum, disputandi, litemque terminandi, quam pro METIO quodam *Batavi*, *Itali* pro GALILAEO, & pro BACONO suo *Oxonenses* moverunt. Nondum enim constat, quis horum primus Telescopium exhibuerit, rem non solum Astronomis, sed & *Historiae naturalis* auctoribus utilissimam. Haec disquisitio non pauciores implevisset paginas, quam illa ex PLINIO & DIONE desumpta observatio; quae tamen locum meruisset in *Gronlandia* illustrata. Nemo quippe negarit, in ea aliquos esse aut esse potuisse, qui parvo vitam produxerint.

Verum, in alium SIBBALDUS errorem se inducit, dum *Coelum Britannis benignissimum affirmat*, propterea quod in medio mari longe a terris sita diutius radiis solis exponatur, nec aliae terrae interpositae solis influxum intercipient. Haec scribentem oportuit neque *Britanniae* situm, neque

formam telluris & Geographiam, neque solis terraeve motum diurnum cognovisse.

Sed, & annum Historico nostro ignotum esse, demonstrat. *Cap. VI. Lib. I. Part. I. Aestas*, inquit, *nobis temperatissima, a medio Junii ad medium Septembris; neque enim brevior est aestas, quod distantiam solis a nobis longior super Horizontem mora compenset.* Si haec vera forent, non a medio Junii, sed a medio Martio Scotis affulgeret aestas: nam, Martio mense producitur mora solis super horizontem. Verum, caloris incrementum aestati proprium ab alia causa deduxit Illustrissimus GALILAEUS, propositioni 47. primi EUCLIDIS respondente, quam Geographus scire debuerat. Hic autem inscitia Geographiae ita se implicuit, ut credere deceat, solem Scotis per tres menses, sive nonaginta dies, totidemque noctes lucefcere, si SIBBALDUS fidem mereretur.

Transeamus ad *Cap. XII. pag. 27. Terra*, inquit, *siccior, crassior, solidiorque mundi globus est.* Haec sunt falsissima: Luna siccior est, duriorque tellure in ratione 700. ad 387. uti demonstravit NEWTONUS; ut non opus sit loqui de Mercurio longe duriore, &c. Regulam Newtonianam in SIBBALDI gratiam placet adjungere.

Densitates (hoc est, siccitates, crassities, & soliditates,) planetarum sunt inter se, ut distantiae a sole ductae in radices diametrorum apparentium. Verum, sectae amor in hunc errorem impulit virum doctissimum, qui insigni Aegometriae adjunctus, effecit, ut verum sit illud effatum, *Nihil adeo esse absurdum, quod non aliquis Philosophorum amplectatur.* Testis sit *pag. 29. Prodromi: montium usus est, astringere terram, ne solvatur, ut dolia circinis continentur.*

At,

At, experientia NEWTONUSQUE docent, non extantes montium moles; sed, ima tellure repositas esse gravissimas & solidissimas, ut SIBBALDI more loquar. Vide Propositionem X. Lib. III. Principiorum NEWTONI. Ignoravit nempe SIBBALDUS notissimam gravitatis vim, quae sit, ut corpora universa, quae circa terram sunt, gravia sint in terram, demonstrante NEWTONO. Nisi haec gravitatis lex, pueris etiam nota, Cyphianum fugisset, non affirmasset, mineralia & metalla consistere non posse, nisi firma structura, montium scilicet compage, veluti dolia circinis continerentur.

Utinam Historicus noster loca illa regionesque monstrasset, in quibus metalla sursum in coelos evolent, terrasque relinquant. An, qui ista scribit, metallum ullum lustrasse, aut contrectasse existimandus est? Sed, pergit: Cum mare perpetuo aestu, & ventorum impetu agitur, certe sine montium repagulis terra durare non posset. Si intelligeret quae sit vis gravitatis, aut principia Philosophiae Mathematica haberet perspecta, facile vidisset, impetu maris & ventorum, compagem terrae non posse labefactari. Infinita ignorantiae pudendae exempla possem adducere, per opus viginti annorum dispersa. Unicum liceat sub-
jicere.

SIBBALDUS, Cap. IX. Lib. I. Part. I. Est, inquit, flumen rivus perennis, magna aquarum copia fluens. Rivus eidem est, ubi parva aquarum copia fluit. Quapropter, rivo si substituamus rivi descriptionem, ut mos est Analystis, erit SIBBALDI flumen, parva aquarum copia magna aquarum copia fluens. Eodem capite, lacui substituit aquae copiam, quae fluvios recipit & emittit; stagnum vero,
ei

ei lacus est parvus, qui nec recipit, nec emittit fluvios. Atque adeo, stagnum SIBBALDI erit parva aquae copia, fluvios recipiens & emittens, quae nec recipit, nec emittit fluvios.

Quoniam de fluviis sermo incidit, non abs re fuerit inquirere, quam ille originem fluviis concedat. *Flumen, inquit, pag. 20. est fontis rivus perennis, &c. Fontes autem, ut ibidem, in altissimorum montium cacuminibus vivi sunt, (fons, illi, est terrae locus, ex quo naturaliter fluit successive, id est, scaturit aqua; nam, si non emittat aquam, puteus ipsi est,) ut in Lominio, monte altissimo praefecturae Fifensis: & statim subdit: In cacumine unius ex tribus montibus Hoiae, fons est, stupendae adeo levitatis, ut si quis potando integrum dolium de illius aqua in stomachum trajicere posset, nullatenus se graviolem inde effectum sentiret. Ex iis, quae capite illo nono commentatur, facile est perspicere, virum doctissimum cum illis facere, qui aquam calore subterraneo ad cacumina montium propelli statuunt.*

Quos falli, & experimenta, & lex hydrostatica demonstrant. Hujus tamen hypotheseos gratia affinxit noster, fontes vivos cacuminibus montium, neque fontes agnoscendum, neque etiam puteos. Centies in *Lominii* montis cacumina summa me contuli: at, nullum in iis fontem, nullam scaturiginem inveni. In occidentaliori, lapidina parva, (quaeque tota se coelo ostendit,) nullas nisi putrescentes pluviae reliquias ferens, nullas etiam unquam emittit aquas: at, plerumque nullas fovet. Nuper humiliore sede effodere coeperunt lapides, fonti *Sibbaldino* alteri locum cessuros.

At,

At, in Orientali montis cacumine, ubi nulla visitur Lapidina, nullus etiam fons; quamvis cacumen hoc illo altero sit humilius, ignique aquisque subterraneis vicini.

Nunc, *Lominio* relicto, in *Hoiae* montes evadamus, aquam illam aere leviolem fundentes, si fides adhibenda testi aurito, qui oculatus esse debuerat. Atqui, aqua ista aere levior esse non potest, hoc est, in ventriculum accepta doliari mensura potantem non gravare; (aer enim gravis foret,) alioqui, non in loco isto terrae, qui *Fons SIBBALDO* audit; sed, coelo aerem ultra visendus esset.

Ad alia progrediamur: *Mare*, inquit, non obruit terram ob incumbentes mari nebulas, quae quasi fasciis illud comprimunt & coërcent. Non opus est haec refellere; neque etiam sequentia, eodem Cap. VIII. Lib. I. Part. I. Secundus, inquit, motus generalis est maris fluxus & refluxus, quo mare, intervallo duodecim horarum cum dimidia, circiter ad littora pleraque fluere, & ab iis refluere animadvertitur. Et continuo haec subdit: duplex hic motus est; unus diurnus, quo motus maris motum Lunae, ex Ortu in Occasum, usque ad eum, a quo mota fuerat locum, sequitur, fere viginti quinque horarum spatio: alter mensstruus, quo defluxus & affluxus maris sequitur motum Lunae proprium, contra Successionem Signorum (nota diligenter,) integro mense lunari.

Tot hic peccata, quot verba. Ego solum hic miror, quo artificio motum maris, quo duodecim circiter horarum intervallo ad littus fluit refluitque, dispelsuerit in duos; nempe, diurnum, qui spatio viginti quatuor fere horarum

peragitur ; aliumque menstruum , qui integro mense lunari demum perficitur.

Eodem capite Vir doctissimus docet , motu maris Oceanum concitatum , perque meatuum subterraneorum epistomia transeuntem , perpetuam aquarum per universum circulationem efficere. Si Hydrostatica vel leviter esset imbutus , haec non proferret.

Pergit : maris motus vicem supplet respirationis in Universo ; sicut enim in corporibus nostris commercia sunt spiritalia , ita quoque in profundis Oceani , nares quasi mundi constitutae , per quas , remissi anhelitus & reducti modo , efflant maria cum impetu aquas , quomodo effoetae. Universi vires restaurantur & exsuscitantur ; unde ejus accolae imprimis non parum afficiuntur.

Novam hic exhibet Anatomen , quae oculatissimos fugit hujus aevi Philosophos , si unos Mahumedanos excipias. Ex hoc invento liceat nobis inferre , effoetas & nunc esse , semperque fore , vires terrarum , mari Septentrionali & Pacifico Boreali objectarum , (quamvis hae omnium terrarum sint foecundissimae ;) quoniam , ut affirmat Auctor , *In Septentrionali mari nondum deprehensus est fluxus , sicut neque in Pacifici Boreali littore. Causa nondum satis cognita , nisi dicas illam esse , quod a Lunae via longe remota sint illa maria , & simul quod ab Occidente in Orientem & Septentrionem extendantur ; praeterea , multae insulae & procurrentes terrae impedian.* Si haec vera forent , (pudet enim talia refellere ,) nullibi aestum maris observare liceret. Quatenam vero illa sint maria , quae extenduntur ab Occidente in Orientem & Septentrionem ; non vero , ab Ortum ad Occasum Austrumque , juvabit ex Viro doctissimo didicisse.

At,

At, ille *Pag. 28. Part. I. Lib. I. Systema* dedit *Astro-*
nomiae prorsus novum. Nam, *Linea 17. Hic*, inquit,
orbis terrarum suis momentis liberatus totus immobilis haeret
aevo, ita Divinae Virtutis efficacia confirmatus, ut nullum
sit tantae potentiae robur, nulla tanta furentium ventorum
rabies, nullus maris fluctuumque tumultuantium impetus
tantus sit, qui eum vel hilum, non dicam a sede sua dimo-
vere, sed, ne quoad minimam quidem partem loco movere
queat. Ita enim, pro immensa sua sapientia & potentia,
cunctos mundi globos pondere, numero, & mensura, ad se
invicem temperavit, immobilesque stabilivit Deus Opt. Max.
ut nullo, nisi ejus ipsius, impetu deturbentur.

Si Viro doctissimo credimus, neque Tellus, neque Sol,
 neque Planetarum ullus, ullo motu agitur, falsa sunt
 omnia, quae de Lunae motibus SIBBALDUM supra com-
 mentantem audivimus, falsi Astronomi omnes omnium se-
 culorum. Et, cum tradit, *terram, ne quoad minimam qui-*
dem partem posse loco moveri, innuit, nullum etiam lapi-
 dem, aut globum ferreum murali tormento concitum motu
 cieri; ille, qui *linea ultima paginae istius 28. docet, quos-*
dam montes transversim per insulam nostram currere, ut &
colles quosdam. Sed, ad Astronomos redeo. Illi; sed, quid
ego illos adpello? Quicquid ubique est hominum, quo-
tidie vident agnoscuntque, alias aliis in locis oriri & occi-
dere Stellas, sive mundi globos, ut Virum doctissimum
loqui malle video. Errantem Lunam, Solisque labores,
quae tanta Barbaries nesciat? Et tamen Vir Humanarum
Divinarumque rerum scientissimus pronunciat, Deum Opt.
Max. cunctos mundi globos, pro immensa sua sapientia, im-
mobiles statuiffe. Pari jure posset affirmare, Deum Opt.
Max.

Max. pro immensa sua sapientia, cunctas aeris aves, cunctos canes leporarios, Scoticos etiam, atque equos cunctos, ipsosque Gallovidienses nostros (quos ipse Auctor tradit ad itinera subeunda optime comparatos,) statuisset immobiles.

Sed novum non est, neque mirandum, aliquos esse, qui suam ignorantiam, hoc est, falsas futilesque conjecturas pro Divina Sapientia vulgo imperito venditent, virosque meliora doctos & docentes fugillasse, religionem vocent. Quanto rectius aptiusque de rebus hisce sentiebat GUALTHERUS DENNISTONUS, qui *Psalmum* CIV. vertens, non dixit, *Terram stare nullo mobilem aevo*; sed, ita potius voluit philosophari:

Tu jubes Terram solita revolvi semita, &c.

favescentes nactus oculatissimos Astronomos, Geometrasque peritissimos. Verum, hisce taedet immorari. Nulli potest ignotum esse, inter disciplinas, Historico nostro necessarias utilesve, eminere peritiam usumve Medendi, qua in re gestio consentientem nancisci doctissimum illum *Scotiae Illustratorem*, qui integro libro dignatus est enarrare *morbos in Scotia maxime grassantes, methodumque iis medendi*. Videamus ergo quam pulchre hanc operis sui partem adornaverit; in qua potissimum licuit, & universis civibus consulere, & immortalem a Medicis gratiam inire.

Capite itaque *primo* agit de morbis in genere, hoc est, narrat, alios esse dispersos, alios communes, alios patrios, alios epidemios. Disci haec debuerant ab *Historiae Scotiae conditore*, exteris ignota; sed, nunc tandem, in humani generis utilitatem, evulgata.

Cap.

Cap. II. Enumerantur morbi, qui in Scotia maxime grassantur; nempe, ii ipsi, quos HIPPOCRATES in *Aphorismis*, *Sect. suae tertiae*, Tempestatibus apud Graecos alligat. Mirum hoc illi possit videri, qui Auctorem audierit, pag. 46. & 98. pronunciantem, *Borealis Europae incolis viscera esse calidiora, urique semper*; & pag. 85. haec efferentem: *Certe, dissident toto coelo morbi nostri a morbis populorum Orientalium*, &c. *Cap. III.* exhibet accuratiorem morborum, in Scotia grassantium, expositionem. Omittit tamen morbos aliquos gravissimos, (exemplo sit *lues venerea*;) Endemios nullos recenset.

Cap. IV. Agit de causis morborum in genere, magno fane rei Medicae incremento. Ait enim, morbos apud nos ortum ducere a victu pravo, nimio; vel ab impedita transpiratione; aut denique, ab aere crasso & salsuginoso. Haec, tanquam Scotis propria, verbosius in Medentium, ut puto, gratiam declarat; videtur enim existimasse, tritissima quaeque Medicis Scotis esse ignota, & scholarum figmenta vilissima, pro utilissimis hic obtrudi posse.

Vir doctissimus inter causas morborum, Scotos affligentium, recenset (*Cap. IV.*) aerem saepe crassum, quem *Cap. II.* dixerat saepius crassum, & nebulosum, pluviosumque. Igitur, ait, fieri non posse, quin multi apud nos sint morbi. His ergo non facile assentior; aut, si vera sint, oblitum sui SIBBALDUM esse fatebor, qui *Cap. XII. Lib. I. Part. I.* demonstraverat, Scotiam totam fere esse montanam, undique montibus elatam, aut collibus tumentem. Pag. 28. Quibus, inquit, non minimam felicitatis suae partem debet; ab hisce enim est, quod fortiori Solis influxu fruatur, aeri salubri & sereno gaudeat, nec ab aquis stagnantibus & putrescentibus.

(propter declivem a montibus situm,) pestilenciales corruptiones metuat. Et tamen, Cap. III. Lib. II. Febres Pestilenciales inter morbos in Scotia grassantes enumerat.

Sed, revertamur ad Cap. IV. Lib. II. ubi affirmat, in Scotia nobiles paucioribus morbis tentari, iisque felicius defungi, ipsos vino e Galliis importato multum uti; at, plebem urbanam multis morbis infestari, rusticamque. Hanc vero, mala sua acceptum referre (satis enim superque se exercet,) calcis cumulis, quibus agri conspersi fruges producant, viscera inflammantes & accendentes. Hisce similia sunt, quae Cap. XV. ejusdem libri, pag. 65. tradit: Crediderim ego, frequentissimam calculorum in nostratibus causam esse aquam ramentis marmoris, ejus scilicet speciei, quae lapis Calcarius dicitur, impraegnata. Quod eo magis adducor ut credam, quod is morbus frequentius agricolas invaserit; ex quo receptus est usus calcis pro laetamine ad agros meliorandos. Haec ille quidem audacter, at, experientia invita, pronunciat. Et sane, mirari satis haud possum, Medicum doctissimum, quique per aliquot annos extra urbem in villa illa Cyphiana artem factitavit, nescisse, Plebem minus Nobilitate morbis infestari. Nequaquam vero Medicum decebat, adversus experientiam rationes confingere. Quippe, Nobiliores paucioribus morbis tentari scribit, quoniam satis exercentur, & vino multo utuntur e Gallia importato & Hispania. Ille, qui Cap. ultimo Lib. I. pag. 46. Nos vino carere, magno nostro commodo, tradiderat: & pag. 98. Lib. II. Summa Dei providentia factum esse, ut in magis Borealibus Europae plagis vinum non producat: Potus autem habere nos (pag 46.) & commodiores & salubriores, cerevisiam & hordei spiritum, sive aquam vitae: licet pag. 97. affirmasset,

set, vinum esse utilissimum potum, & de opsoniis omnibus gratissimum. Nota sedulo, quale nobis opsonium describat. Non ausim sperare, ista Medicis cordatis placitura, qui morbum illum, morborum fere omnium lernam, *Scorbutum* hodie dictum, iis solum locis agnoscunt grassari, qui vinum indigenam faventemque *Bacchum* non colunt. Deinde, vix videtur eruditione *Sibbaldina* dignum, quod de natura calcis commentatur; evidensque prorsus, est, marmor, lapidem calcarium, crystallumque, pag. 65. memorata, calculos in nobis non generare. Calculi enim, prae istis levitas, nullumque genus marmoris saliumve, calci vitriolove convenientium, in calculis inventum, patefacere *SIBBALDO* debuit, aliena esse ista omnia a calculi natura.

Sed, ad observationes Medici doctissimi transeamus eas, quas circa febres instituit.

Ille igitur *Cap. V. pag. 54. Febres continuæ*, inquit, *rarissimas habent crises apud nos.*

Nullum unquam, sive in urbe, sive ruri, Medicum vidi, qui non plurimas nobis esse diceret, febresque continuas, ruri praesertim, critico ritu plerumque solvi: at, non semper, neque etiam saepissime, diebus imparibus definire testantur aliqui, & ego quoque fateor, alioque loco demonstravi.

Cacterum, subnectit, Historiam febris pestilentialis in *Scotia* a se curatae. Quid ex ea Historia emolumenti ad rem Medicam augendam peritiores colligere valeant, non facile divinaverim. Ego certe ex ipsa narratione confici arbitror, morbum illum non febrim pestilentialem fuisse; sed, anginam. Nimirum, ubicunque febricula se ostendit,

dit, mos est quibusdam de pestilentiali morbo, aut maligno, & purpurato, (si forte culex momorderit,) verba facere; scitque SIBBALDUS, opinor, quisnam hic eam ob causam appellari meruerit *Doctor Purpuratus*. At, *febrim apud nos scarlatinam bis vidit, novumque credit esse morbum*. Fallitur nunc SIBBALDUS, si falli potest.

In *reliquis* hujus libri *Capitibus*, nihil prorsus, quod nobis non sit cum aliis commune, omnibusque notum attulit vir celeberrimus, qui observationes rariores initio fuerat pollicitus. Vix credibile est quam ego magna spe deciderim, cum ista primum perlegi, quamque succenserem tacitus Viro tam docto, quod suas ipse observationes parca manu impertiretur, intereaque observationem THOMAE BURNETO detraheret; (*Cap. XV. Lib. II. pag. 64.*) qui, *licet rarissimi doni Vir*, ut in HIPPOCRATE suo *contracto* loquitur, non nisi duas in *Thesaurum Medicinae* contulerat.

At, *Cap. VI.* Observationes promittit, *de miris quibusdam affectibus spasmodicis*. Hic ille narrat, solum puellam sibi visam, motibus convulsivis agitatam, quam ipse sanaverit. Nec tamen curandi methodum, aut medicamenta domestica commemorat; *sed, morbum ordinariis remediis, post longum tempus fuisse depulsum*.

Cap. VII. Refert, civem diu vexatum dolore rheumatico periodico, hecticumque factum obiisse; quamvis ipse Vir doctissimus *omnia fere tentasset solamina, quae aeger admitteret, quae tamen vel levem, vel nullum effectum habuerint*. Quae illa solamina fuerint, non aperit: *sed, cum nullum habuerint effectum, hoc est, non fuerint solamina, de iis non erimus solliciti*.

Erit

Erit forsan operae pretium istius morbi aetiologiam Sibbaldinam ob oculos ponere: *Causa*, inquit, *morbi fuit acidum, cum bile lixiviosa effervescens, & recrementa acria deponens, quae inhaeserunt in dorso & lumbis, ob partium illarum figuram ad eos (nempe, recrementa acria,) recipiendos & hospitandos opportunam.* Non demonstrat quae sit illa figura partium lumbarium, eaque illi est *qualitas occulta*. Ego vero ostendi, omnium vasorum oscula (quibus recrementa illa acria debebant suscipi,) esse similia, ejusdemque in quavis parte corporis figurae.

Cap. VIII. Narrat, *Anglam* se non inconsulto mortuam in vicina *Anglia*, cum observationes de morbis in *Scotia* grassantibus esset pollicitus.

Cap. IX. Mulierem ait apud nos cornutam anno 1671. visam. *Fama erat, inquit, abscissum renasci; ipsum autem cornu abscissum in Bibliotheca Academiae Edinburgensis conservatur, ubi illud vidi.* Exhibuit hic nobis SIBBALDUS & observationis rarae, & rarae facundiae specimen.

Cap. X. Tradit, convaluisse puerum, cui se suadente, in febre variolarum vena fuisset secta. En observationem raram & utilem!

Huic similis est observatio *Capitis XI.* qua discimus, puellam sanguinem vomuisse, nec tamen occidisse. Rara quidem & mira est haec observatio; est enim de *virgine annorum viginti quatuor nupta.*

Cap. XII. Narrat, repertam in tuba Fallopiana ex hydropo extinctae magnam vim aquae atro-rubentis.

Cap. XIII. Theologum a se pristino vigori redditum, purgatione iterata, & corroborantibus intus & foris adhibitis, prodit. Quae illa fuerint corroborantia non docet.

Cap. XIV. Epilepsiam in provectae aetatis muliere a se curatam affirmat; (erat enim quadraginta quatuor annorum;) quamvis nullam habuerit spem succedendi, propter aetatem in senium devergentem, & malum corporis habitum. At malus ille habitus, fatente SIBBALDO, Lues erat *Venerea*, cujus remedia prompta & tonforibus nota. Hoc ergo si animadvertisset SIBBALDUS, non desperasset de salute aegrotae: quippe, remedium *Luis Venereae*, nullo aetatis facto discrimine, symptomata Lui adjuncta summovet. Hae illae sunt observationes.

Postquam nulla jam spes observationum utilium, & curationes indigenis peractas complectentium, ad sectionem ejus libri, quae de methodo medendi inscribitur, me contuli. Verum, hic etiam mea me spes fefellit. Quippe, in capitibus, quibus constat, septem, nihil reperi, praeterquam steriles nugae de purgatione, de diaeta, (quae nostro Doctore (pag. 67. *Lib. VI.*) est rectus sex rerum naturalium, ut ea vocant, usus: illa tamen est rerum non naturalium;) de venae sectione, &c. a SENNERTO petitas, nec ad *Scotos* potius quam *Indos* attinentes, ipsaeque vulgari dialectica viliores.

Atque haec necessitatem utilitatemque regularum, quas initio posui, satis superque demonstrant, quibus universa *Naturalis Historiae* ratio continetur.

Supereft nunc, ut ea expendam, quae de Medicina Indigena prolixè deducit, Problema aggressus, ipso opere *Naturalis Historiae* difficilius, quod quarto nostro praecepto vetitum fuit.

Nos paucis luculenter ostendemus, Virum doctissimum frustra contendere pro *cujusvis regionis ἀναρχεία* *Cap. III. Lib. II.* Nam,

Nam , nulla est *Scoticae* ditionis Provincia, quae non omnes agnoscat morbos reliquis Provinciis graves ; nullusque ager ullius est Provinciae, in quo non aegrotent mortales per omnia genera morborum. Nemo in Botanicis versatus nescit, multo plures herbas inveniri potuisse in *Italia* , *Romanis* post bellum *Punicum* parente, quam reperiuntur in *Latio*. Nullus tamen *Italo* ulli morbus est, quem quis *Romae* non perpetiatur. Merito rideretur, qui *Luem Veneream*, quod ab *Indis* ad *Hispanos* proserpserit, non *Indicis* remediis felicius, quam *Hispanicis* averruncari contenderet, dysenteriamque facilius sedari, radice *Tormentillae* exhibita, quae in *Lusitania* nascitur, quam *Brasilensi* illa *Ipecacoanna*, quae in *Lusitanicae* ditionis *India* reperitur.

Debuerat Vir doctissimus, qui sedulo docuit, quid appellatione fontis, lacus, &c. contineri vellet, ostendere, quantum telluris mereatur illam regionis appellationem. Mathematicus id ante omnia monuisset ; nam, ditionem *Gallicam Scoticae* componere, quod facit *SIBBALDUS*, dum de utriusque *αὐταρχεία* loquitur, *TITYRO* dignum est.

Affirmat equidem Vir doctissimus, convenire *Divinae Sapientiae Clementiaeque*, quamvis regionem omnibus remediis instruxisse, quae morbis ipsam infestantibus sint paria. Existimat, ut video, doctissimus hic Theologus, convenire *Sapientiae Divinae*, ut quae Dominus *ROBERTUS SIBBALDUS* vera esse dixerit, continuo vera evadant. Ego me fateor alia omnia sentire, inprimisque quid verum sit exquiro, & tum demum Deo Adjutori gratias ago, Ejusque Sapientiam veneror ; neque enim non possum venerari, quoties vim illam cum clarissimo *DAVIDE GREGORIO*

contemplor, quae Planetas iis orbitis adscripsit, ad quas nulla ope Mechanices reduci possent semel inde vel tantillum dimoti: sed, haec Sapientiae Divinae illustrissima monumenta, solisque Mathematicis detecta, methodum suadent, a *Sibbaldina* longe alienam.

Animadvertimus alias alia ferre terras. Accepimus Medicinam ferius apud nos quam apud *AEgyptios*, *Graecos*ve fuisse excultam. Hos multa domi nata morbis depellendis adhibuisse auxilia, quaedam a vicinis *Asiae Lybiaeque* populis, non pauca ab ultimis *Indis*, petiisse. Medicinam ergo in *Scotia* factururus ad externa auxilia confugiet, donec alia domi invenerit externis paria: nisi maluerit cives certae morti addicere. At, nondum apud nos detecta esse, quae *Italicis*, *Asiaticis*, *Lybicis*, *Indicis*que remediis paria praestent, nemo inficias iverit. *Opiumne* *Scotis* provenit? *An Cortex*, *Peruviano* illi, tot febrium victori, aequiparandus, nobis obtigit? *An Hydrargyrus*, tot domitor malorum? *Antimoniumve*? Nam, *Elaterium* non deest, *si aer elaterio sit foetus*, ut scribit Vir doctissimus. *Ferrum* forte *Scotia* fovet; sed, nondum coelo ostendit. Non licebit igitur ferro, ferrive limatura, aut fale, morbos aggredi, quos *Anglia Sueciaque* Marte indigena expugnant? *Stanno* caret *Scotia* *Succinoque*, quae adversus feros morbos validissima praebent auxilia. *Opobalsamum* nobis est nullum, quamvis utilissimum: nullum quoque balsamum cum *Peruviano* conferendum cuius ope destituti, neque cito, neque etiam tuto, aut jucunde, vulnerum curatione defungerentur. Sed, plura non opus est enumerare.

Ego miseros mortales sublevasse remediis undecunque conquisitis, hominis esse censeo. Si domi est remedium,
non

non puto foras prodeundum esse, ut aliud nihilo nobilius referatur. At, cum domi nullum occurrit, contempsisse, quod alius aliave tellus miserit usu commendatum, amen-
tis esse judico.

Hanc medendi legem servarunt Veteres: Nemoque est illorum, qui non plura exotica curandis morbis adhibuerit uberrima regione, quam adhibent nostri, maligno quamvis & sterili solo; ut, si qua hic sit culpa, ei affines potius sint, qui Medicamento indigenae multum tribuunt, *in magis Borealibus Europae Plagis*, ut loquitur SIBBALDUS.

HIPPOCRATES enim, vetustissimus Medicinæ auctor, exotica plurima in subsidium aegrotantium advocavit: Thura, Myrrham, Silphii *Cyrenæici* succum, Cinnamonum, *Indicum* Piper, Spinae *Ægyptiæ* fructum, terram *Ægyptiam*, crocum *Ægyptium*, alumen, nitrumque rubrum *Ægyptium*, oleum *Ægyptium* album, aliaque multa, neque *Cois* suis, neque etiam *Graecis* agnita. Multoque saepius exoticum quam indigenam medicamentum adhibet HIPPOCRATES: ut videri possit, SIBBALDUS noster nullum HIPPOCRATIS scriptum legisse, praeterquam *Epistolam* illam ad CRATEVAM.

At, DIOSCORIDES non alia fere, quam quae indigena fuere regionum, per quas peregrinatus est, describit, ut ait SIBBALDUS. Fatuum esse oportet, qui talia nugatur. DIOSCORIDES quaecunque *Italia*, *Graecia*, *Asia*, *India*, & *Africa* ferunt, commentariis suis explicuit; ergo, exotica contempsit.

Hic jam SCRIBONIUM LARGUM, Medicum *Ita-*
lum, appello? (quem doctissimus SIBBALDUS, tanquam

Medicinae Indigenae fautorem, adduxit;) quoniam & GALENO superior est aetate, & Pharmacopoeae Romanae primus auctor.

SCRIBONIUS ergo *Ital*is suis commendat Piper album, Crocodili testiculum, Lycium *Indicum*, Aloën *Indicam*, Opium, Myrrham, Styracem, Sagapenum, Galbanum, Gummi Ammoniacum, &c. Cretam *Samiam*, Gummi *Alexandrinum*, Thus, Crocum *Siculum*, Passum *Creticum*, Opobalsamum, Xylobalsamum, Alumen *AEgyptium*, Mastichen *Chiam*, Laser *Syriacum* & *Cyrenaicum*, Nardum *Syriacum*, Cochleam veram *Africanam*, & ex *Africa* allatam, semen Balsami Arboris, spongiam *Rhodium* vel *Africanam*, Gingiber, Macerem, Castoreum *Ponticum*, aliaque exotica plurima; multoque saepius in auxilium advocat exoticum SCRIBONIUS quam indigenam. Quanto magis nos aequum est, exotica, & fertilior solo nascentia, morbis nostris opponere. At, fere oblitus sum, SCRIBONIUM, Cap. II. Epilepsiae mel *Atticum* & ebur opposuisse curandi genere exotico utentem; ut mirari subeat, qua fronte medicamenta ista indigenis *Italiae* potuerit ascribere SIBBALDUS, aut qua fide mel dixerit non etiam *Atticum*, ut dixerat SCRIBONIUS.

Eadem fere omnia adhibet CELSUS; nempe, Palmulas, sive Dactylos, Scammoneam, Myrrham, Cinnamomum, Galbanum, Laser, Opium, Piper utrumque, lapidem *Asium* & *Phrygium*, Thus, Aloën, Tragacantham, Gummi Ammoniacum, Styracem, Opobalsamum, Xylobalsamum, Zingiber, Opopanacem, Ceram *Creticam*, Crocum *Cilicium* & *Siculum*, Sagapenum, terram *Samiam*, Stibium, Calamum *Alexandrinum*, Nardum *Syriacum*, Lycium, &c. Haec

Haec manifestum facere poterunt Viro doctissimo, Medicos Romanos, GALENO superiores, exoticis saepissime usos! Credo quod *Italia* non ferret medicamenta, exoticis illis paria, ut neque nunc fert. Cur ergo nobis interdici conatur medicamentis adeo utilibus, quibusque patria nostra nil fert simile, aut secundum?

At, GALENUS, inquit, *indigenis est usus*. Imo vero, etiam exoticis, aromatisque saepissime. Multa equidem suppeditabat *Asia* GALENO; an propterea illorum pleraque non erant ipsi exotica? An homini *Pergameno* universam *Asiam* pro civitate concedere licet, nobis extra *Scotiam* vitae sanitatisque praesidia quaerere nefas?

Ille ipse tamen *Pergamenus* utitur aniso ex *Creta*, thymo & melle ex *Attica*, pipere vero, quod ex *Barbaris* affertur, calaminthe & pulegio ex *Creta* allatis, oleo *Sabino* quod *Italia* fundit; adipe *Crocodili* stercoreque, *Aegypti* donis; *Lycio Indico*; quoniam aliis est valentius; sale *Hispanico* ex *Iberia* importato, oleoque *Hispanico*, vino *Falerno*, *Lesbio* & *Ariusio*, ex *Chio*, succo *Cyreniaco*, *Myrrha Arabica*, *Troglodytica*, rubrica *Lemnia*, *Cadmia*, *Misy* & *Pompholyge*, &c. ex *Cypro*, & *Chalcantho* ex ea ipsa, *Malabathri Alexandrini* foliis, *Xylobalsamo*, *Opo balsamo*, fructu *Balsami Arboris*, nucibus *Syriacis*, *hyoscyamo* ex *Creta*, & ex eadem succo *Mandragorae*, *Thure*, *Opio*, *Aloë Indica*, *Thymyamate Ammoniaco*, *Cinnamomo*, ipsa etiam *Theriaca*, ne quidem AUGUSTI ditione contenta, aliisque plurimis, neque *Asiae*, neque *Europae* indigenis.

Qui haec leget, is iudicet velim quid sentiendum sit de SIBBALDO, haec pag. *Prodromi* 71. pronunciante: Qui
volue-

*voluerit Medicinae fontes in HIPPOCRATIS, CELSI, GALENI, &c. Monumentis scaturientes adire, is certe non aliam reperibit (sic enim scripsit SIBBALDUS,) Medicinam, quam quae ut plurimum ab indigenis desumeretur. Ego certus adfirmo, Veteres, non paucioribus usos exoticis, quam nostri utuntur. Neque enim magis exoticam apud nos Medicinam reperiet quisquam. Ante exortum SIBBALDUM nemo mentis compos medicamento exotico efficaci, priusquam domi par reperisset, honorem non servabat. At nunc, ut placeamus huic homini, domestica inefficacia exoticis efficacibus oportet praeferre, nempe, vino cerevisiam, Sarfae-Parillae sal Absynthii, Castoreo Cotylam foetidam, aut pennas anseris, Opobalsamo oleum Juniperi Chymicum, Opio extractum nostri Papaveris & Semen, Myrrhae Scordium, aut Chamaedryn, Cinnamomo Violam, Boraginem & Buglossum, Gummi Ammoniaco Centaurium minus, aut Rubiam Tinctorum, Cortici Peruviano Allium, Carduum Benedictum, Vincetoxicum, Carduum Mariae, Succisam, Veronicam, Chamaemorum, Millefolium, Rubum *Idaeum*. Haec quippe illis substituit antefertque SIBBALDUS *Cap. VIII. Sect. III. Lib. II. Part. I.**

At, *Cap. IX.* cum ad Cathartica ventum est, Sennae anteponit Coluteam, quae nulla nobis est, furculos Sambuci, semen Polygonati, Genistae, Radicem Bryoniae, Epithymum; & Jalappae Syrupum de Rhamno; quasi Rhamnus nobis foret indigena; cujus succus ex *Anglia* importatur omnis; Centauriumque minus pro Aloë adhibendum confidenter adfirmat; nescius, Centaurium, quod Veteres inter Cathartica valida habuere, non esse, quod hodie

die Centaurium minus adpellamus ; sed , Gratiolam. Verum, inquires, haec omnia experimentis deprehendit exoticis utiliora noster. Haudquaquam ; neque enim ille aut Catapotia , (pilulas hodie vocant,) absque Scammonea, vel Resina Jalappae, aut potiones catharticas absque Senna, vel Manna, unquam exhibuit. Non ille jusculum Eboris, aut macis expers laudaverit, qui nullo morborum, aetatum, corporumve facto discrimine, juscula jusculis superingerit Ebore & Maci, Citrique Cortice & Aurantii conditi, imbuta. Solum ergo ad fallendam plebem Medica nescientium exhibuit SIBBALDUS *capite illo octavo tabulam*, in qua exoticis substituit *medicamenta indigena* ; sic amat loqui.

Nescio nunc an facturum sim operae-pretium, si ea diluam, quae Vir doctissimus de *Temperamento* Scotorum *vario & inaequali* congeffit regessitque centies.

Quoties enim vociferatur, medicamenta ab *Indis* petita nobis esse cavenda, quod nimium calefaciant ? Nobis quippe, & Borealis *Europae* civibus affirmat *interiora uri, exteriora rigescere*, pag. *Prodromi* 46. Quapropter, iudice SIBBALDO, conveniet nobis Opium, cum scribat *Papaver refrigerare* ; conveniet Cortex *Pervianae* arboris, Quina-quina dictae, qui, fatente Orbe terrarum, calores febrium depellit. Licebit nobis Cinnamomo stomachum languentem refocillare. Quippe, discat hic monitus SIBBALDUS, ventriculi superficiem (cui alimenta allabuntur,) partibus exterioribus merito adscribi, aëri nempe expositam ; adeoque, teste SIBBALDO ipso, rigentem nobis obtigisse. Quare, exotica, quantumvis calore turgida, nobis proderunt, *si tota morborum cura-*

tio sic perficitur, ut contrariorum contraria sint remedia, ut differit Vir doctissimus, Cap. I. Sect. II. Lib. II. Prodrumi.

Sed, perpendamus tandem quo jure pronunciet, *Britannis interiora uri, visceraque esse hic quam in Italia calidiora*, uti habet pag. 98. Rem autem conficiemus Geometrica ratione, quantumvis reclamet SIBBALDUS.

Notum est nunc, viscera calorem suum omnem sanguini acceptum ferre, sanguinemque penetralia cordis proluentem paucorum momentorum (immo vero, partium momenti paucarum,) lapsu ad extimas corporis partes deduci. Quapropter, calor partium exteriorum in *Indo* se habet ad calorem cordis viscerumve in ipso, ut se habet calor partium exteriorum in *Britanno* ad calorem viscerum ejusdem. Atque idcirco, aut utrisque, *Indis* scilicet, & *Britannis*, aut neutris exteriora rigent, interiora uruntur. Neque calidum illud, aut potius, calefaciens, & *Indis* indigena, Cinnamomum *Indis* conveniet, magis quam nobis, quibus exoticum advehitur. Ridiculaque sunt omnia illa, quae de *Medicina Indigena* tam operose declamavit Historicus noster.

Jamque opus exegisse videor, quod *Historiae Naturalis Scotiae* conditorem efficiet posthac cautiorem: non enim nunc vacat, aut juvat respondere de rerum parente querenti, pag. 76. *Prodrumi*.

Cur, inquit ille, voluerit optima rerum parens populo *Orientis* esse tam pia mater, ut etiam superflua largiatur; nobis vero tam dura mater, aut injusta noverca, quibus ne necessaria quidem ad salutem concederet, eaque nos cogeret petere velut ex alieno orbe? Terra APOLLONIO, apud
PHI-

PHILOSTRATUM, dicitur, communis omnium mater, propterea quod iusta est. At, iusti est, unicuique suum tribuere. Quomodo igitur iuste nostra potuere tribui Indis?

Ego sane Deum Opt. Max. nunquam ausus sum incusare, quod agrum *Italico* conferendum *Scotis* non attribuerit, aut attributum *Scotis Italico* non aequaverit. Eam ego telluri formam, eosque motus a Deo praescriptos dudum agnovi, ut *Britannos* brevi aestate, & vere hyberni-formi fati circuitusque magni legibus oportuerit esse contentos. Quapropter, nunquam sum miratus, plures, plurimumve virium herbas laetiore, & *Phoebo* gratiores solo provenire; rosamque pumilam *Agello Cyphiano* esse indigenam.

Atqui, cum publicum sit hoc opus, (*SIBBALDI*, ut auguratur ipse, pag. 14. *Nuncii Scoto-Britanni*,) & non exiguum honorem genti *Scoticae* allaturum, Reipublicae idcirco interest, ne scripta Historici sui obscuritate nimia laborent. Quapropter, rogandus est Vir doctissimus, ut quae initio *Cap. I. Sect. I. Lib. II. Prodromi*, pag. 49. & 50. commentatus est, uberius explicare dignetur. Ea quidem sic se habent.

Anima a corpore, sive maximo cruciatus, sejungi non potest; quod amet iis in partibus stabulari, quarum opera diutius usus est. Hinc perfecta, aeterna, & immaculata apud Deum & Angelos permansit sanitas; homini vero naturalis, vitreaque.

Sanitas vero, sive bona valetudo *SIBBALDI* (eodem capite) oritur a sanguine, & partibus rite constitutis.

Ista ut illustrare dignetur, rogandus est *SIBBALDUS*; videntur enim novum quoddam mysterii genus, nova Philosophiae, & quidem Sacrae, principia complecti; posset-

que aliquis esse metui locus, ne immodica Viri auctoritas rectum Philosophiae tramitem ingressuris officiat.

Possent haec iis incredibilia videri, qui librum illum SIBBALDI, viginti annorum opus, non perlustrarint. Sed, vicit admirationem, cum *Comoedi* nostri libellum adversus Mathematicos conscriptum, per omnes coetus, & in omnibus viis, nuper laudaret. Qualem, putas, laudabat libellum? aut potius, qualem concinnaverat, castigatumque emiserat? Ut paucis absolvam, istius libelli scriptores scurrili & *scenica* dicacitate derident eos, qui Mathematicorum in observationibus instituendis industriam magnificiunt, Medicisve auctores sunt, ut in Physicis tractandis Geometriam, cum id fieri potest, in subsidium advocent. Hoc isti homines lepide appellant *Methodum Geometricam morbos omnes curandi*. Magnum NEWTONUM derident, quod inter *Postulata* habeat, *Corpus omne in alterius cujuscunque generis corpus posse transmutari*. ARCHIMEDI illudunt, quod crediderit, in spatiis liberis vacuisque corpus, quamlibet magnum, exigua vi posse loco deturbari. Denique, EUCLIDIS demonstrationes, illamque praesertim *propositionis* 32. primi libri *Elementorum*, vacillare pronunciant. Opticos scriptores conviciis onerant, quod crediderint, a quovis puncto rei visibilis ad quodvis retinae punctum radios lucis reflecti. Opprobria ingerunt in eos, qui scribunt, circulo includi posse quamvis figuram recti-lineam, cujus diametrus maxima minor sit circuli diametro. Dixi, *includi*, ut intelligas, istos homines credere, circulum ejus figurae, licet ex omni parte circulo minoris, ne quidem esse capacem.

At,

At, quibus haec argumentis suffulciunt? Miris profecto. Ex NEWTONO rogant, *An putaverit, astra mutari posse in Ostrea*; Egregieque sibi plaudunt, cum librum aureum summi illius Viri, *de Principiis Mathematicis Philosophiae Naturalis*, *Idolum* adpellassent, *deformemque cerebri partum*. Hic ille Libellus est, quem SIBBALDUS ante duos annos * Mathematicis nostris promittebat, quem gloriatur a se, priusquam ederetur, castigatum emendatumque, in omnibus compitis aedibusque, & apud aegrotantes, multa praedicans de scripto tam arguto, atque lepidio. Sed, pudet me hominum istorum, & miseret. Unicum addo, conatum me hac *Dissertatione* methodum recte scribendi *Historiam Naturalem* tradere, ut possit doctissimus SIBBALDUS volumen illud alterum *Historiae Naturalis* (quod emissurum se minatur,) ab iis vitiis repurgare, quae *Scotiae illustratae tenebras offuderunt*.

Mirere nunc aliquis, ingentem adeo conscriptam esse Historiam ab illo, qui conscribendae fuerit exlors. At, ego *Historiam Naturalem* a SIBBALDO conscriptam esse, aut conscribi posse non concedo; Librum crassum ex aliorum commentariis ab eo confutum non possum inficiari. Constat SIBBALDI *Prodromus* (quo ille omnia complexus est, quae aut sciret, aut legisset,) paginis 272. Atqui, pag. 114. implet *Res Botanica*, eaque omnis ex SUTHERLANDII *catalogo*, & *methodo tabulisque* RAII deprompta, si *catalogum*, quem vocat *Plantarum in Septo Regio Edinburgensi nascentium*, excipias; quem suppeditavit JACOBUS MUIRHEAD, Chirurgus in urbe notissimus, & *Botanices* imprimis peritus, a SIBBALDO foede corrupendum.

* Anno 1674.

Quippe, *catalogum omnium in Scotia nascentium, & in hortum Medicum delatarum*, olim condiderat JACOBUS SUTHERLANDIUS, qui solus meretur *Scotiae* illustrator appellari. Hoc ipse SIBBALDUS non ausus est negare: nam, *Cap. II. Lib. II. Part. II. Prodromi*, Hortum illum SUTHERLANDII describit, & in fine ejus *capitis* ait, SUTHERLANDIUM plantarum bis mille *catalogum in horto suo nascentium brevi editurum*. Catalogum illum SIBBALDO jam tum visum, aut potius exscriptum, testatur *Part. II. Prodromi*, pag. 46. *Lin. 32*. Item, *Pag. 104. Lin. 20*. Rursusque, *Pag. 106. Lin. 35*. Quibus locis lectorem ablegat ad *catalogum horti Medici*.

Quae supersunt, Paginis 158. omnia corrasit ex HIPPOCRATE, SENECA, MINUCIO, KIRCHERO, BOECIO, BUCHANANO, JOHNSTONO, SENNERTO, *Atlante Blaviano*; & quod jure miramur, ex aliis innumeris, qui de *Scotia* rebusve *Scoticis* nihil unquam scripsere.

Ego istos expilatores in perniciem reipublicae literarum natos esse jamdudum agnovi, literaeque ipsae prope interneccione deletae, & tantum non oblitteratae testantur.

Sed, furta ista fere in Hercynia silva, facta quasi *depeculatorum* conjuratione, committebantur. Nunc, quia illis impune fuerunt, nostrorum quidam eodem facinore famam aucupari, primusque SIBBALDUS experiri quid ipse posset ac auderet, aliive ferrent; vel, ut ejus more loquamur, *primus glaciem frangere*, Praefat. *Prodromi*. Ejus vestigia premens GULIELMUS COCKBURNE, *corporis animalis oeconomiam* edidit, anno 1695. nihil prorsus feren-

ferentem, quod non LAURENTIO BELLINIO, aut mihi, sit ereptum: Nomen tamen BELLINII, meumve, in isto libello frustra quaesiveris. Omnia illa, quae ad usque paginam 17. *de chylicatione* commentatur, mea sunt; nisi quod immiscuerit trita ista de dentium actione salivaeque opera, non perspiciens ea esse a me consulto praetermissa, disputationem instituyente solum *de motu, quo cibi rediguntur in ventriculo ad formam liquidam*, sive de *actione ventriculi*, ut ejus disputationis paragrapho 2. loquor*.

At, COCKBURNI paginae 36. & 40. nil aliud quam *Belliniana* continent, decerpta ex pagina 66. operis *Belliniani, de urinis, pulsibus, &c.* editionis *Frankofurtensis*, pagina 41. decerpta ex iis, quae operi illi praemisit BELLINIUS. Paginae 42. 43. & 44. exscriptae sunt ex pagina 112. ejusdem operis. Pagina 45. ex 67. Et pagina COCKBURNI 46. refert Paginas. 72. & 69. BELLINII. Rursus, Pagina 47. ex 73. at, pagina 48. ex 74. & 73. *Belliniani* manavit: rursusque, pagina 49. fere ex pagina 75. Nam, mirifice implicat intexitque. Quod superest paginae 49. ab iis est mutuatus, quae discipulis dictaveram; ita, ut ne voculam quidem mutaverit. Pagina 50. tota deprompta est ex pagina 74. *Belliniani* operis. Quae narrat de *Temperamentis*, pagina 51. mea sunt; Dictata quippe illa fideliter exscripsit. Paginae 55. & 56. ex 1. 2. & 3. libri illius *de urinis*, adeo quidem fideliter, ut etiam notas ex *Margine Belliniano* in suum transtulerit COCKBURNUS. Pagina 57. accurate detracta est paginae 7. BELLINII, *de urinis* agentis. Pagina 58. omnis ex 7. & 8. ejusdem. Ex 8
fluit

* Vide supra, pag. 65.

fuit etiam 59. COCKBURNI; necnon, 60. At, Pagina BELLINII 12. dedit expilatori paginas 61. & 62. Potuisset eadem licentia paginas 63. 64. 65. 66. & 67. ex eodem BELLINII opere haurire COCKBURNUS: verum, maluit meis verbis *Belliniana* discipulis aperientis rem efferre, nescio quam ob causam, nisi forte putarit furi saepius mutandam esse sedem.

Nunc tandem paginis 68. 69. & 70. problema suo Marte solvere aggreditur. Longe illi tunc BELLINIUS erat; nihil enim ea de re tradiderat BELLINIUS. Itaque, turpiter erravit COCKBURNUS, quamvis problema ipsum facillimae sit solutionis.

Pagina COCKBURNI 73. corrasa est ex *Dissertatione mea de circuitu sanguinis in animalibus genitis & non genitis**, Leydae anno 1693. emissa. At, Pagina 82. ubi lienis usum magnifice explicat, nil aliud exhibet, quam *Corollarium secundum*, dissertationi illi nostrae annexum. Id ipsum *Corollarium*, cum sequente *tertio*, suppeditarunt COCKBURNUS paginam 84.

Quae sequuntur de secretionibus, omnia suffuratur ex opere illo magni BELLINII; omnia de respiratione vel ex BELLINIO, vel mea *dissertatione*†, quam ad explicanda *Belliniana* condidi, annoque 1693. Leydae emisi.

Et, ut omnia *Belliniana* depecularetur, edidit libellum *de morbis nauticis*, in quo *Belliniana* illa de febribus pro suis venditat. Jamque adeo totum fere BELLINIUM exscripsit, quem tamen haud intelligat.

Sed,

* Vide supra, pag. 105.

† Nempe, de Circulatione Sanguinis in Animalibus genitis & non genitis. Vide supra, pag. 118. & 116.

Sed, juvat potius huic *Disertationi* finem imponere, postquam de *Temperamentis*, toties SIBBALDO memoratis, pauca subjecero.

Ait SIBBALDUS, *Cap. V. Lib. II. Part. I. pag. 83.* Cum indicationes Medicatoriae sumantur a morbo ipso, a corporis temperamento, (secundum GALENUM,) & ambiente nos aëre, (siquidem corporis temperies, quae illo tempore fuit, quo aegrotare id coepit, quaeque ad invenienda remedia est utilis, ex natura, aetate, consuetudine, & ambiente nos aëre ortum habet: ambiens vero ipse ejusmodi est redditus propter tum regionem ipsam, tum anni tempus, tum coeli statum, qui proinde necesse est in variis regionibus valde differat) hanc certe ob rationem dicendum est cum CELSO, (Praefat. Librorum de Medicina,) differre quoque pro natura locorum genera Medicinae, & aliud opus esse Romae, aliud in AEGYPTO, aliud in Gallia. Quod si morbos hae causae facerent, quae ubique eadem essent, remedia quoque ubique eadem esse debuisse.

Pergit SIBBALDUS: Et quidem, cum de Medicina agimus, rationalem intelligimus, quae semper praescribit aegrorum temperaturae maxime accommodata. At, peregrina fortiora sunt calore nostro, neque commode subigi & concoqui a calore nativo possunt, fortique & exotica sua qualitate molestiam creant, & naturae opus impediunt.

Videtur mihi SIBBALDUS praefationem CELSI eadem legisse felicitate, qua RAII Tabulas legentem invenimus. Apud CELSUM, Empirici Medicos rationales redarguunt, qui ad experimenta aditum fieri non potuisse, nisi ab aliqua ratione, (hoc est, sectae alicujus Philosophia,) contendebant. At, SIBBALDUS haec a CELSO

in Empiricos jaci arbitratus, admonet, *intelligi Medicinam rationalem, non empiricam.*

Verum, ad rem ipsam excutiendam accedamus.

Demonstravit in opusculis Medicis, Anno 1695. *Pistorii* editis, & hoc anno* *Lugduni-Batarorum* recusis, Medicorum summus Antistes, LAURENTIUS BELLINIUS, hanc propositionem:

Sanguine ita vitiato, ut vires laedantur, perinde est, ac si sanguis qualitate quidem naturaliter se haberet; sed, ea imminuta quantitate foret, quae requiritur ad datam illam lacionem producendam.

Atqui, morbi incidunt a vitio sanguinis, uti creditur, ortum ducentes, in quibus vires augentur. Exempla suppetunt maniae, febres aliquot, affectus spasmodici, quibus haec propositio convenit:

PROPOSITIO.

Sanguine ita vitiato, ut vires augeantur, perinde est, ac si sanguis qualitate quidem naturaliter se haberet; sed, ea aucta quantitate foret, quae requiritur ad datum illud augmentum producendum.

Insint in homine viginti librae sanguinis, viresque naturaliter ex ea mole provenientes aequent momentum ponderis centum librarum; ita, ut momentum virium cujufvis librae sanguinis aequet momentum ponderis quinque librarum.

Augean-

* Anno 1696.

Augeantur jam vires in morbo ; adeo , ut momentum contractionum aequet momentum ponderis centum & quadraginta librarum. Educentur e quavis libra sanguinis vires momenti aequalis momento ponderis septem librarum. Quapropter , eadem omnia efficientur , ratione habita virium ; sive quis ferat viginti libras sanguinis , quarum unaquaeque sit instructa momento virium aequali momento ponderis septem librarum ; sive ferat sanguinis libras viginti & octo , quarum unaquaeque sit instructa momento virium aequali momento ponderis quinque librarum : nam , utrovis modo elicitur momentum contractionum aequale momento ponderis centum & quadraginta librarum. At , in priori casu , virium augmentum provenit a sanguine qualitate mutato ; in posteriori , a sola quantitate aucta. Ergo , *sanguine ita vitiato , ut vires augeantur , perinde est , &c.*

Ex hisce deducitur veritas *Corollarii* annexi *Dissertationi* nostrae *de Circuitu Sanguinis* Anno 1693. die sexto Junii , *Lugduni-Batavorum* editae.

Corollarium ipsum hic exhibemus.

Nullus est effectus mutatae sanguinis texturae , cui producendo non sufficiat mutata ejus quantitas ; atque adeo , mutata quantitas est mensura vitii sanguinis.

Qui Geometriae non sunt ignari , facile perspicient , horum Theorematum ope Theoriam Medicam e densissimis tenebris in clarissimam lucem emergere. Deinde , manifestum est , cum sanguis ab *optima temperie* deflectit , atque in unam aliquam , prae alia , *qualitatem* plusaequo propendet , oriri istos *qualitatum implexus excessusque* , quos Medici *Temperamenta ad Justitiam* , vel simpliciter , *Temperamenta* adpellant.

Quippe, apud Medicos *Temperamentum* ea est sanguinis (sanguinis verbum mihi complectitur, & ex sanguine genita,) conditio, sive qualitatum ratio, ob quam hic uni actioni edendae, ille alteri est aptior; hic uni, ille alteri morbo opportunior: singulisque *Temperamentis* respondet peculiaris & propria virium mutatio. Sunt ergo, fatente quoque SENNERTO, *Temperamenta* ipsi morbi nascentes, & virium mutationes ab *optima constitutione* deflectentium.

Atqui, ex antedictis patet, *Temperamenta* omnia oritura a sanguinis quantitate alia atque alia; quoniam, cum sanguis qualitatem induit a *sanitate perfectissima* & *Temperamento illo, quod ad pondus dicimus*, alienam, eadem efficiuntur omnia, quae, si qualitate illa non adscita, quantitas sanguinis augeretur, aut minueretur. Ac proinde, sequens emergit Theorema:

Temperamenta sunt proportionalia quantitatibus sanguinis generantibus, sive qualitates genitrices metientibus, aut repraesentantibus; nam, effectus sunt causis suis proportionales.

Ex eodem fonte fluit hoc etiam Theorema:

Medicamentum, quo qualitas morbum inducens deletur, eadem efficit omnia, quae efficeret, si quantitatem sanguini induceret (minuendo vel augendo,) qualitati illi respondentem, ipsamve repraesentantem.

Jam, ex hisce deduco Theorema *Sibbaldinas* nugas profligaturum: Medi-

Medicamentum, quod in India morbum depellit, eundem in Scotia depellet; modo quantitates molesve (caeteris paribus,) medicamenti in India & Scotia exhibiti proportionales sint quantitatibus sanguinis, temperamenta Indicum Scoticumque generantibus, sive qualitates Temperamentorum genitrices metientibus, aut repraesentantibus.

Assumimus hic, Geometrarum more, paria esse alia omnia; nam, quod eodem recidit, ea omnia per observationes facile possunt ad datam rationem perducī.

Denique, ut rem in pauca contraham, hoc videor consecutus, ut intelligere possit SIBBALDUS,

Medicamenta omnia, quae morbo in India depellendo sufficiunt, ea eidem in Scotia depellendo fore paria, modo quantitas apta exhibeatur.

Atque haec ostendere poterunt, quid sentiendum sit de *Temperamentis istis*, tantopere celebratis, totiesque à SIBBALDO nostro in aciem adversus Medicos omnium seculorum productis. Quantumque eruditissimo LAURENTIO BELLINIO debeat Medicina, cujus excellentissimae virtuti & peritiae acceptum referre decet (praeter alia innumera,) Theorema, primo loco hic positum, omnium in Medicina, post *Harveianum*, nobilissimum atque utilissimum Inventum.

Monitum hic volo lectorem, me GRONLANDIAE appellatione complecti ultimam AMERICAЕ versus Arcticum habitatae vel habitabilis regionem.

E P I S T O L A

A D

ARCHIBALDUM PITCARNIUM,
SCOTUM, MEDICINAE DOCTOREM,

*qua respondetur Libello ASTRUCII, Franci,
Medici, & Academiae Regiae Scientiarum
Franciae Socii.*

R Edditae mihi sunt tuae literae: & quidem tantos a te in nova tuarum *Dissertationum* editione progressus factos vehementer gaudeo. Grato animo accepi schedas, a te missas, magnoque teneor desiderio reliquas videndi. Verum, ante omnia aveo scire, an novas illas, quas a te toties efflagitabam, *Dissertationes* in publicam lucem sis emissurus. Quamobrem te, si eas nondum absolveris, obnixè iterum rogatum velim, ne ab utilissimo illo opere perficiendo quidpiam te dimovere patiaris. Ne autem nuper emissus ab ASTRUCIO tractatus *Francico* sermone conscriptus, adversus methodum, qua tu alimentorum digestionem exsequeris; te vel minimum interpellet, eum in me totum recepi, atque sequentem ad eum responsionem adornavi; prolixam quidem illam; at, quam justa sit, & rationi consentanea, limatiori tuo ingenio dijudicandum prorsus relinquo.

Ali-

Alimentorum in ventriculo digestionis tu causam statuis, ventriculi ipsius, diaphragmatis, muscutorumque abdominis vim muscularem, ciborum partes commolentem & triturantem, donec ad idoneam subtilitatem comminuantur. Opponit autem primo loco ASTRUCIUS:

” Etsi, *inquit*, concedatur triturationis vis, quantumvis
 ” magna, eam tamen in partes tantum, quas integrantes
 ” vocant, alimenta comminuturam, quae scilicet, quamlibet
 ” parvae, eandem semper cum toto naturam retineant. Actionem enim
 ” rudem, quaeque nihil aliud sit quam mera attritio, nunquam
 ” posse prima principia, simpliciave, ex quibus corpora omnia mixta
 ” constant, elementa (qualia sunt terra & aqua, sal & sulphur
 ” Chymicorum,) a se mutuo segregare & divellere. Absque
 ” ejusmodi dissolutione impossibile esse, ut alimentum purae
 ” triturationis opera tantam indueret formae suae metamorphosin,
 ” qua scilicet primo in chylum, ac deinde in corporis animalis
 ” substantiam converteretur. Quippe, si sola trituratione perficeretur
 ” haec res, chylum & sanguinem, e pane nascentem, nihil aliud
 ” futurum, praeterquam fluidum immenso pene minutissimorum
 ” panis frustulorum numero impraegnatum; quae, quamvis adeo
 ” sint tenuia, ut a sensibus nostris percipi nequeant, semper
 ” tamen verum esse ac permanere panem; eademque frustula in
 ” unum rursus coeuntia sub forma panis, non vero carnis, aliarumve,
 ” ex quibus corpora nostra constant substantiarum, conspicua fieri,
 ” & sensibus obvia oportere. „

Quod si ASTRUCIUS rite cognitam & perspectam habuisset succinctam illam, quam tu in *Dissertatione* tua, De
 Circu-

Circulatione Sanguinis per Vasa minima *, oeconomiae animalis exhibuisti delineationem : ac porro animadvertisset nexum, qui inter istius *Dissertationis* doctrinam intercedit, & Digestionis theoriam in alia *Dissertatione*, *De Motu, quo Cibi in Ventriculo rediguntur ad formam Sanguini reficiendo idoneam* †, quod genuinum quidem est, & facile deductum, ex priore confectarium, nullum (uti mihi persuadeo,) huic objectioni invenisset locum. Illius igitur gratia, & aliorum etiam, qui iisdem forte difficultatibus laborabunt, tum vero praecipue quod rei ipsius dignitas mereatur, a cogitatis tuis nusquam oculos deflectens, ea fusius explicabo, atque ex iis totum nutritionis processum ab origine usque, & sigillatim, ita deducam, ut doctis satisfactum videatur, & omnes id genus objectiones in posterum de medio sublatas liceat sperare.

Ut igitur de animali nutritione rectius possimus dijudicare, in primis necesse est, ut quid sit animal cognoverimus. Non id intelligo, ut Philosophicam teneamus rationem, ex quibus elementis, seu primis principiis, quo modo, quaque proportionem partes suas habeat compositas: si necessaria esset ejusmodi cognitio, res foret plane deplorata, quamque nunquam assequi posset humanum ingenium. Neque enim eo modo (quod ego quidem existimo,) ullius corporis habemus, aut habere possumus, quamdiu hic vivitur, perspectam naturam. De mechanica duntaxat animalis fabrica & structura loquor, quatenus tanquam Mathematica quaedam machina spectatur.

De

* Vide supra, pag. 15.

† Illa exhibetur supra, pag. 64.

De intima ferri, chalybis, & aeris natura nihil certi nobis constat: automati tamen ex metallis istis fabricati structuram plane cognitam habemus; atque ex mechanica ista cognitione, si quid ei vitii alicunde acciderit, aptare illud rursus & reconcinnare, si quid fractum luxatumve fuerit, refarcire possumus, & in integrum restituere: & id quidem absque ulla de terrae & aquae, salis & sulphuris particulis, illud constituentibus, anxia cura & disquisitione. Atque istiusmodi, inquam, oportet nos habere corporis animalis cognitionem, non perfectam quidem illam, qualemque habemus parvarum istarum, quas ipsimet confecimus, machinarum, utpote quae paucis constant partibus organicis, a nobis fabricatis, & in motum a primo aliquo, quem ipsi excogitavimus, motore impulsis. Quamvis autem non perinde accuratam atque particularem de animali machina, atque de aliis machinis, nancisci valeamus notitiam; id tamen non impedit, quo minus in genere multa de animali fabrica scire possimus, atque inde ad aliquam modi, quo illa nutriatur, cognitionem simili fere ratione perducamur.

Corpus animale, etsi longe quidem sublimioris artificii sit opus, machinam tamen non minus esse novimus quam quas ipsi fabricamus; novimus, inquam, & tu in *Dissertatione* tua *de Circulatione Sanguinis per vasa minima* *, venas cum arteriis perpetua serie continuari demonstrasti; atque adeo, corpus universum, carnem scilicet, membranas, ossa, &c. nihil aliud esse quam organicam fabricam unius tubi, in ramulos se diffundentis, & in infinitos ramusculos divisi ac subdivisi, variis in locis, ad

G g varios

varios usus, varioque artificio formati & complicati in varia viscera, aliaque instrumenta animalia; quae omnia unam devehant fluidorum massam, per se vi cordis & peculiari totius tubi constructione propulsam. Hoc ni esset, tot ante seculis ignota, & a Physicis tam avide postea arrepta sanguinis circulatio iterum esset rejicienda, tanquam res prorsus absurda, inutilis verborum farrago, ad nullum alium usum comparata, quam explosa dudum antiquorum de *humido radicali*, & *calido innato* figmentata: quippe, cum qua neutiquam consistere potest recepta nimis & vulgo credita hypothesis fermentorum, seu liquorum peculiarium, nullas communis massae partes constituentium, qui tamen in peculiaribus corporis partibus siti existimantur: quos, eam ipsam ob causam, in illa *Dissertatione* tu refellisti, & tanquam rem, cum doctrina unius massae fluidorum unum tubum perpetuo fluxu permeantium, prorsus pugnantem, ablegasti. Comperitum habemus, ipsas tubi hujus tunicas nihil aliud quam texturam esse innumerabilium minorum ejus ramulorum, a lateribus majorum undique emissorum. Nec minus habemus compertum, infinitos ipsius ramusculos in exteriorem superficiem hiantibus osculis se terminare, quibus varios a communi massa derivatos liquores penitus extra corpus excernunt, dum interea alii retrogrado cursu ab extimo corpore delati, quod massae exhaustae reliquum est, in cor refundunt; inde rursus nova circulatione emittendum, postquam recenti chylo, ei admisto, auctum fuerit.

Quo altius inquirimus in hocce stupendi artificii opus, quo longius sinuosos tubi animalis maeandros animo confecta-

sectamur, quo accuratius excutimus tunicarum ejus structuram, ac ramorum divisiones subdivisionesque indagare nitimur, densis magis magisque ignorantiae tenebris nos cernimus coöpertos, atque illigatos labyrintho inextricabili, quo dum nosmet irritò voto expedire laboramus, vulgatis quidem, sed ineluctabilibus, quaeque finitum nostrum intellectum, infinita speculantem, ad incertitas redigunt, difficultatibus nos profundius immerfos deprehendimus. Unde sumamus exordium, ubi exitum inveniamus, in nostris de rebus istiusmodi, quae neque principium, neque finem agnoscunt ullum, disquisitionibus, plane ignoramus. Sed, neque in promptu nobis est, vocabula reperire, quibus exilem istam, quam de iis sumus nacti, cognitionem enunciare valeamus. In hisce igitur, ut in aliis de rebus infinitis quaestionibus, assumendi nobis sunt ex memoratis hisce ramis, quos mente effingere possumus subtilissimi ac minutissimi, tanquam *Data* aliqua, quibus quasi fundamentis ratiocinia nostra innitantur. Nemo autem nos affirmare existimaverit, ullos re ipsa adeo parvos ramos esse, ut non alii minores, & hisce rursus minores in infinitum reperiantur: ob summam tantummodo eorum parvitatem omnes, hisce quos assumpsimus minores, hic negligimus. Possumus igitur *ramulorum* horum, *quasi minimorum* tunicas, concipere, tanquam tenues membranas, ab exquisita textura longitudinalium & lateralium fibrarum, parvarum admodum & tenuissimarum, formatas, quarum fibrarum peculiare artificium acutissimi nostrorum sensuum nequeunt investigare: id solum in genere novimus, eas, uti summopere parvas & tenues, ita molles, flexiles elasticasque esse, quaeque prout

extendi, & vi admota exporrigi, sic eadem vi intensiva sublata, contrahi rursus valeant & coarctari. Unde, haud injuria liceat colligere, fibras eas texturam quasi quandam esse, ex fibrillis tenuibus elasticisque, aut id genus materia aliqua, compositam, cujus spirales convolutiones, inter extendendum, a figuris circularibus longius recedunt, atque ad intervalla ampliora aliae ab aliis extrahuntur: adeo ut, manente illa vi intensiva, totius fibrae longitudo augeatur, minuaturque magnitudo & crassities; ea autem sublata, insita sibi vi elastica ad se rursus redeat, atque in majorem magnitudinem, & perinde, brevior longitudinem ipsa se contrahat, coarctatis magis spiris, & ad circularem formam propius accedentibus.

Sunt autem istae fibrae similis ubique naturae; quippe, quarum partes, minimae juxta ac maximae, iisdem mollietiei, flexibilitatis, elasticitatisque qualitatibus gaudeant. Neque prorsus solidae eae sunt; verum, innumeris abundant porulis per totam sui substantiam diffusis. Sed, neque cavae sunt, instar tuborum, ast tunicis tuborum componendis inserviunt, & per totam, qua patet, earum longitudinem multas a lateribus suis in proximarum fibrarum substantiam tenues emittunt transversas fibrillas, quae, in fibrarum inter se textura, omnibus arctius connectendis subserviunt. Fibrarum autem figurae respondent figuris tuborum, quorum tunicas constituunt, quae etiam in ramis tenuissimis, quorum tunicas, tanquam ex tenuissimis, seu primi ordinis, fibris constantes, ac vaforum expertes, spectavimus, conicae sunt; dilatantibus se semper tubis, fibrisque eas ambientium tunica-

rum

rum ab extremo usque vertice crassescantibus; donec duo pluresve primi ordinis tubi concurrentes, secundi ordinis tubos componant; ubi primi ordinis fibrae, inter diversos ejusdem ordinis tubos antea dispertitae, in unum colliguntur, atque transversarum fibrillarum ope intertextae, fibras majores secundi ordinis constituunt; quae intertextae innumeris primi ordinis tubulis, ex lateribus tubulorum secundi ordinis undique emissis, robustiores secundi ordinis tuborum tunicas componunt, qui eodem modo magis ac magis dilatantur, quorumque tunicarum fibrae pariter ac vasa continuo augescunt, donec eorum duo pluresve in unum coeuntes tertii ordinis tubos efforment, ubi secundi ordinis fibrae, antea inter varios ejusdem ordinis tubos divisae, ad fibras tertii ordinis conflandas adunantur, quae intertextae innumeris secundi ordinis tubulis, e lateribus suis minores primi ordinis tubulos quaquaversum emittentibus, quemadmodum ipsae e lateribus tertii emittebantur, robustiores adhuc tuborum tertii ordinis tunicas constituunt: & eodem deinceps pacto per infinitam ordinum mediorum seriem, ad magnos usque tubi truncos; ita ut tunicae, majorum ordinum ramos tegentes, ex amplioribus semper fibris ac majoribus vasis effingantur, quae in se includant, aut a suis lateribus emittant fibras tenuiores, vasaque minora omnium ordinum inferiorum: & forte etiam ex variis constant membranarum, hoc pacto compositarum, stratis, aliis alia quasi intra totidem vaginas & conceptacula involventibus, aliisque fibras & vasa in aliorum substantiam mutuo emittentibus; haec quidem ut servetur succorum aliorum cum aliis com-

munio; illas vero, ut firmitus omnia arctiusque coagmententur. Saltem, experientia comperimus, rem ita se habere in tubi trunco ramisque ejus majoribus, ubi membranae haud ita tenues sunt, quin eas ab invicem fecerere, fibrasque crassiores, & vasa grandiora, ex quibus conflantur, non oculis modo intueri; sed &, digitis contrectare valeamus. Et ratio postulat, ut credamus, idem ubique per omnem tubum, omnesque ejus, quantumvis minimos ramusculos, servari artificium; etsi, summa eorum tenuitas omnium nostrorum sensuum aciem protinus exsuperet.

Daedalam hanc tubi animalis, ejusque ramulorum compagem, omnes finiti opificii vires longe supergredientem, non in embryo modo; sed, in ipso etiam animalculo seminali actu, & a primordio, exstitisse oportet. Atque, variae ejus structurae & formae in primis adscribenda est omnis ea, quam inter alia atque alia animalia invenimus, differentia. Idem quippe succi, idemque alimentum, quae unius animalis vitae & nutritioni inserviunt, si modo aptis portionibus distribuerentur, omnibus aliis animalibus alendis aliquo modo sufficere possent, quanquam non ita commode atque nutrimenta illa, quae pro varia eorum praestantia, generumque diversitate, benignius numen cuique suggessit & destinavit. Jam vero, cum magna ex parte notum sit nobis, quid sit animal, haud magno negotio, quaenam debeat ejus esse nutritio, possumus investigare. Dum arctis seminalis suae originis claustris manet involutum, pari proportionem exigua est fluidorum ejus massa, vis cordis debilis, parvae circulationi conservandae vix idonea, nedum vasorum fibris

bris distendendis sufficiens, quas eam ob causam summo-
 pere in se contractas esse necesse est. Postquam vero ad
ovum uterumque transfertur, ipsius succi, novis succis
 a matre derivatis, perque peculiaria utriusque organa ad
 id mira arte fabricata deductis, augescunt; vasa majori
 copia repleri, muscularis cordis vis largiore succi ner-
 vorum influxu roborari; atque, ob utramque rationem,
 tam laterales quam longitudinales tuborum fibrae exten-
 di incipiunt: primi ordinis rami, quorum tunicas, ut
 dictum est, ex tenuissimis tantum fibris, sine vasis con-
 stitutas supposuimus, exinde latiores longioresque fiunt,
 & cum dilatantur, ramorum secundi ordinis, quas com-
 ponunt, tunicas distendunt, quae pari modo distendunt
 tunicas tertii ordinis; atque ita deinceps per cunctos in-
 termedios ramorum ordines, ad magnos usque tubi
 truncos, qui omnes, id est, solidae corporis partes uni-
 versae omnibus suis dimensionibus una dilatantur atque
 extenduntur.

Atque huic vasorum repletioni & distentioni corporis
 animalis accretionem & nutritionem omnem acceptam
 unice referunt recentiores quidam auctores, qui solidas
 adulti hominis partes easdem esse, nec majores conten-
 dunt, quam quae in staminibus suis feminalibus primitus
 fuere. Nutrimentum maxime idoneum distendere quidem
 posse aiunt solidarum partium substantiam, eam tamen
 augere, quicquamve ei addere non posse: & proinde, nul-
 lam unius animalis partem alterius partem posse fieri. Et
 hinc imbelli nostrae rationi submittere satagunt rem sola
 fide percipiendam, sacrum dico Religionis nostrae myste-
 rium, quo eadem fato functa corpora divina potentia
 redi-

rediviva olim credimus fore excitanda: quum, juxta hos auctores, fluidae tantum corporis partes perpetuo fluxui sint obnoxiae, solidis interim partibus a primo ad ultimum vitae momentum iisdem semper permanentibus. Verum, si ita se haec res haberet, quodvis absque discrimine fluidum vasis replendis, fibrisque distendendis sufficeret; quum tamen omne fluidum corpori nutriendo neutiquam sit aptum. Neque illi animadvertunt, fibras, dum in longum extenduntur, pari proportionem exiliores fieri, superficialia interstitia laterales inter & longitudinales membranarum tunicarumque vasorum fibras exinde utraque sua dimensione latiora evadere; ac demum, tuborum tunicas ad rariorem laxioremque tenuiorum magisque distentiarum fibrarum texturam ita reductas, debiliores multo futuras; eo praesertim tempore, quo vis cordis fortior, & fluidorum massa major evasura supponatur.

Si dederimus, (quae magna satis, imo & nimia est concessio, solidas seminalis animalculi partes unum granum pondere exaequare, in quam immensam fibrarum tenuitatem, texturaeque raritatem tantillam materiae portionem distendi oportet, ut hominis magnitudini respondeat? Aut, quomodo tantillum tenerorum vasculorum pondus sustinere se potest adversus centum & sexaginta libras fluidorum, per se violenter propulsum? Tantum enim est adulti & justae staturae hominis pondus: id tamen omne, dempto unico illo grano, quod pro solidarum partium pondere assumptum est, fluidis est accensendum. A crescente autem indies cordis vi, & tam copiosa fluidorum accumulatione quid aliud expectandum est, quam loco nutritionis, totius fabricae interitus? Aut enim

enim disruptis tunicis non poterit amplius sustineri invalescens fluidorum impetus; aut fluida per dilatata, semperque crescentia fibrarum interstitia, nimia licentia permearent. Et certe, horum alterum, aut utrumque sequi necesse est, nisi illud fluidae massae viriumque cordis incrementum sensim & gradatim perficeretur, & nisi ipsum fluidum ubique abundaret aptae congruaeque naturae particulis, quas laterali sua in vasorum tunicas compressione in fibrarum poros continenter emittit, alios replendo, alios novae substantiae additione coarctando. Et, quemadmodum hac partium interpositione longius adhuc porriguntur fibrae, quam alias sola extensione, nullaque tali additione facta, porrigerentur; ita, tantum abest ut extendendo exiliores fiant, ut majores semper, firmiores, fortioresque evadant; prout nova partium accessione aut numerus, aut mensura pororum imminuitur. Et, sicuti majores evadunt fibrae, ita minora & angustiora reddunt superficialia interstitia inter membranas & fibras vasorum, quae, quo cavitate fiunt ampliora, eam ob causam, simul arctioris, crassioris, & fortioris texturae fieri necesse est; secus quam evenisset, si partes illae fibrarum poris non interponerentur.

Atque ita, dum succis a matre, ut diximus, derivatis, expanditur universa vasorum, quae in foetu sunt, compages; eodem tempore earum tunicae fibraeque continua partium a circulante fluido appositione crassescunt, dilatantur, novaeque indies vires acquirunt: hoc est, tota foetus substantia, non in fluidis modo, sed & solidis ipsius partibus, extenditur & dilatatur; &, ut verbo complectar, omnibus suis dimensionibus nutritur, ad ea usque vasa,

H h

quibus

quibus mediantibus cum matre communicat, quae ut paul-
latim augeſcunt, paul-
latim itidem uberiori alimentorum
influxui locum aperiunt, unde paul-
latim majores accedunt
cordi vires, vasa diſtenduntur, & tunicae fibraeque,
tum ampliores, tum firmiores, evadunt, donec juncta creſ-
centium ſuarum virium & ponderis opera una cum vi
uteri muſculari, foetus tandem clauſtra perrumpat, atque
in luminis oras enitatur, cum ſcilicet fortiori alimento
maturus jam eſt & idoneus; unde & fluidorum maeſſae ube-
rior adhuc copia ſuppeditatur, cordis majorem in modum
vires augentur, vegetiorque vaſorum tunicis & fibris
tonus inducitur, atque ita ad corpus magis magisque
ampliandum roborandumque omnia conſpirant, donec ad
juſtam magnitudinem plenamque maturitatem ſit perdu-
ctum; cum nempe vaſorum tunicae fibraeque ad plenum
ſuum tonum exporrectae intenſaeque fuerint, atque ad
aequilibrium quoddam reductae cum potentia cordis: cui
jam nullum, quocunque ſumto alimento, incrementum
accedit: cum, autem fibrae vaſaque ad ſummam, quam
pati poſſunt, extensionem exporrecta ſunt, materia redun-
dans per ſecretionis vias dilabitur, nullo amplius virium
cordis, aut ponderis corporis facto augmento. Tota
vero, quae poſthac fit nutritio, damnis fibrarum reſar-
ciendis impenditur, aut novis particulis, earum loco, quae
partium inter ſe collifione, aut fluidorum impetu, a fi-
bris lateribusque vaſorum abraſae fuerant & divulſae, ſub-
miniſtrandis occupatur. Fatendum quidem eſt, corpori
humano, dum embryo eſſet, & antea etiam, hanc par-
tium abraſionem fuiſſe patiendam: atqui, tum majori co-
piae patebat locus, quam quae iſti damno reſarciendo foret
neceſſa-

necessaria, propterea quod majores essent pori, latioraque inter fibras interstitia, quae adolescente paullatim corpore novarum particularum appositione sensim repleta erant, aut angustiora reddita; ita, ut parum, aut nihil recipere amplius possent, praeterquam illud, quod infumitur partibus abrasione labefactatis, supplendis reficiendisque, cum adultum jam est corpus, & ad plenam maturitatem perductum; quo in statu, ejus magnitudo, pondus, viresque, diu fere eodem tenore persistunt; donec fibrae sensim densatae, & vi sua elastica defectae, rigescere incipiunt & indurari, majorum vasorum tunicae cartilaginosaе & osseae evadunt, & ob summam fibrarum rigiditatem ita debilitatur musculorum vis, ut munia sua, quo antea solebant vigore, nequeant exequi, ventriculus praesertim & abdominis muscoli chylum alimentumve tanta non valeant copia suppeditare, quanta opus est partibus, abrasione, aut perspiratione detritis, reficiendis. Atque, hic est cadentis, & ad interitum vergentis corporis status, quo tam solidae, quam fluidae ipsius partes indies magis magisque depereunt, fibraeque illae, quibus aliqua adhuc restat elasticitas, in se restrictae, totam fabricam incurvant; donec fatiscentibus viribus cordis, nec fluidis per vasa propellendis sufficientibus, animal tandem fato succumbat.

Jam vero, postquam monstraverimus, universas corporis partes solidas (quo nomine tunicae tantum & fibrae vasorum sunt censendae,) nutrimentum suum omne ex appositione particularum a massa fluida propulsarum, inque fibrarum poris commorantium, traxisse, haud magni negotii res erit, ex perspecta fibrarum natura particu-

larum etiam, fluidique eas devehentis, indolem investigare. Cum enim fibrae ipsae solidae sint, palam est, particulas quoque solidas esse debere. Particulae fluidae substantiam solidam humectare quidem possunt; at, nullo prorsus pacto cum ea consolidescere. Sed, neque circulationis impetus particulas fluidas in solidarum fibrarum poris haerere, aut moram facere pateretur. Et, quamvis solidae particulae, quibus magnitudo sit & mensura idonea, quantumlibet physicae earum qualitates discreparent (si modo fluido animali re ipsa inessent particulae qualitatibus tam diversis praeditae,) fibrarum poris absque ullo discrimine impingi ac infigi possent, non tamen indiscriminatim eorum nutritioni inservirent. Quibuscunque demum imbutae fuerint qualitatibus hae particulae, augebunt, fateor, dilatabuntque fibras; si vero ejusdem non essent substantiae, aut similis cum solidis fibrarum primigenarum partibus naturae, aut saltem, ut magis speciales differentias omittam, si in genere iisdem cum illis mollitiei, flexibilitatis, elasticitatisque qualitatibus non gauderent, nec poris per totam suam substantiam diffusis abundarent, id est, ut verbo absolvam, nisi revera fibrillae ipsae essent, aut parvulae verarum fibrarum particulae, naturam prorsus diruerent fibrae animalis, quod instrumentum mechanicum est, eo quo descripsimus modo fabrefactum, cujus partes omnes, elateris automatici instar, similes sunt & homogeneae. Ac, veluti lapillorum, aut ejusmodi materiae rigidae particulae ruptis istius elateris partibus refarciendis, vel foraminulis obstruendis, neutiquam sunt idoneae; ita non minus inepte animalis fibrae poris replendis, aut particularum abrasarum loco occupando adhiberi possunt.

possunt. Quippe, quod utrisque duris rigidisque eo pacto effectis, irritus prorsus redderetur organicus eorum usus. Neque magis ad hanc rem facient Chymicorum terra, sal, & sulphur, aut aliud sane quidquam, praeter tenues particulas fibrarum ejusdem generis, quae fluidorum impetu in poros adiguntur, atque in unam cum fibris substantiam consolidantur & coalescunt; haud aliter quam ferri massa crebris mallei ictibus alteri impingitur, ac in unum corpus redigitur. Atque, hae quidem particulae homogeneae cum fibra ita concorporatae, aequae ac reliqua fibra extensionis aut contractionis sunt capaces, nec minus commode in suos poros novam ejusmodi materiam recipere, ac omnia denique munia & officia animalia obire possunt. Et, quemadmodum attritu, sive vi fluidi, animalis vasa violenter permeantis, tunicae fibraeque in principia sua Chymica non resolvuntur; sed, parvae dumtaxat earum partes, quas integrantes vocant, a caeteris divelluntur: ita non principiorum Chymicorum; sed, minutarum partium integrantium appositione haec accepta detrimenta refici oportet; porusque quilibet, & quicquid uni fibrae vitii acciderit, fibrillae ab altera paullo ante abraesae intromissione, aut adjunctione oppleri potest & redintegrari. Et, ut verbo expediam, prout fibra vere animalis quaedam machina est; ita, principia elementaria non illico mechanicae structurae formam induunt; sed, eam tantummodo constituunt materiae massam, cujus ex partibus affabre elaboratis, & rite contextis, machina postea exstruitur. Neque usu & attritione machina protinus in prima sua principia dissolvitur; verum, in eas tantum massae partes, ex quibus primum composita ac for-

mata fuerat, confringitur ac dilaceratur. Neque ex ipsis statim principiis elementariis; sed, ex integrantibus istius, quam constituunt, materiae homogeneae partibus sibi met coagmentatis, ac earum, quae deperierant, locum obtinentibus, haec damna resarcienda sunt.

Ex hoc igitur consequitur, fluidum animale innumeris foetum esse debere veris fibrarum particulis, primigenarum partes aemulantibus, quaeque variae mensurae & magnitudinis existant, ut *scilicet* latioribus majorum, arctioribusque minorum fibrarum poris respondeant, tanquam unica nutritionis materia, quae solidis corporis partibus alendis sit idonea. Quodcunque autem fluidum uberi satis harum partium copia est refertum, id animali conservando nutriendoque suffecerit, ratione semper habita particularum magis minusve exquisitarum, pro conditione magis minusve exquisitae structurae animalis iis nutriendi. Et; nisi me fallit memoria, (quanquam pro certo affirmare non ausim, quod in praesentia librorum illorum copia destituor,) quodam in loco *Ephemeridum Academiae Scientiarum* memoratur, minutas, quales modo descripsimus, fibrarum particulas in grandiorum quorundam animalium chylo posse conspici, quae in animalibus minusculis, ob insignem earum tenuitatem, visum nostrum effugiant.

Fluidum animale in feminali animalculo primigenium est, & ipsi primoque ejus speciei masculo coevum, & ipsius particulae, sive secretionem exhaustae, sive corpore alendo consumtae, ab illo usque tempore ex fluidis ab intermediis parentibus, ignotis occultisve viis derivatis, renovatae sunt & restitutae, donec ad matrem immediatam
fit

sit perventum, quando demum modum, quo partes illae animalculo deciduae redintegrantur, liceat nobis indagare. Post partum quidem damna ejus a chylo reparari palam est: quo autem pacto chylus infinitis pene parvulis fibrillis animalibus sit impraegnatus, proxime nobis excutiendum est. Atque, hac in re haud levem nobis praestat operam tua *dissertatio* *, *De motu, quo cibi in ventriculo rediguntur ad formam sanguini reficiendo idoneam*, qua observaveris, animalia omnia aliorum animalium partibus vesci, adjunctis eorum numero etiam vegetabilibus: illorum enim, aequae ac sensu praeditorum animantium corpora, nihil aliud sunt quam tuborum omnigenorum, fluida per se propulsa ad suam nutritionem vehentium, compages; etsi mechanica eorum forma ab ea quam in moventibus perfectioribusque animalibus cernere est, non nihil dissideat. Et, quamvis in partium crassiorum structura & conformatione magnopere discrepant, in hisce tamen, aequae ac illis, tuborum tunicae ex fibris, pororum plenis, mollibus, flexilibus, ac elasticis, sunt compositae; neque ulla inter horum & illorum fibrillas, modo ejusdem sint tenuitatis, intercedit differentia. Quae fibrilla jam in meo corpore fibrae pars est, fibrae ovillae antea pars fuit, & antea fibrae etiam gramineae, & variis porro temporibus in variis animalibus fibrae partem potuit constituere. Perspicuum igitur est, quod ad alimentum spectat, non deesse fibrillarum quaesitarum copiam, siquidem arte aliqua aliae ab aliis separari, atque ad eam possint tenuitatem reduci, ut per exiguas tuborum cavitates transire, & fibrarum animalis ab eis nutriendi poros ingredi

*Vide supra, pag. 64.

ingredi queant. Solutione autem Chymica non alimenti modo, sed & ipsius ventriculi fibras, in prima sua elementa resolvi oporteret, eatenus saltem donec fibrarum naturam prorsus exuerent. Fingamus tamen, ventriculum ipsum intactum fore, neque meminerimus, quod tu in *dissertatione* *, *de circulatione sanguinis per vasa minima*, probatum dedisti, nullum corpori animali inesse fermentum; superius monstravimus, elementaria fibrarum alimenti principia, si dissolverentur, nutritioni penitus inepta futura, nisi uniantur rursus, rediganturque ad formam parvarum fibrillarum, quae majorum fibrarum poris subeundis sint idonea. Et irrita certe foret illa solutio, quae nullam aliam ob causam esset facta, quam ut infecta rursus fieret. Superest igitur, ut totum hoc negotium actione ventriculi, diaphragmatis, musculorumque abdominis, alimenti fibras ad congruam partium tenuitatem permolentium ac tritulantium, perficiatur.

Atque, haec quidem magna sunt digestionis instrumenta, & praecipua, si non unica, ejus principia activa, quatenus tu ea investigare voluisti. Ipse *Dissertationis* tuae titulus eos sibi statuit limites, ut ea solum, quae cibo in ventriculo patienda sunt, definiat. Rudis illa alimenti attritio, quae dentium ope, aut instrumentorum, dentium vice, in quibusdam animalibus fungentium perficitur, haud quamquam tua erat digna animadversione. Nec poterat te latere, quem in hac re usum praestent saliva liquoresve, ore excepti, ciborum a dentibus confectorum partes emollientes ac humectantes. Neque te praeteribat, bile succoque pancreatico ad eas diluendas & liquefaciendas, &
ad

* *Vide supra, pag. 15.*

ad faeces crassiores a puriore chylo secernendas opus esse. Nec denique abnueris vetus illud *Calidum innatum*, si pro nativo tantum corporis calore accipiatur: quae utique omnia, exiguum quamvis, nonnullum tamen hac in re adferre possunt adjumentum, per se autem nihil valerent, nisi a vividis aliarum facultatum motibus actionibusque, quibus praecipue id negotium incumbit, eorum motus actionesque initium caperent & promoverentur.

Id tantum contendit ASTRUCIUS, I., „ Nulla triturationis vi posse alterum substantiae genus in alterum „ converti., „ Non tamen diffitetur, „ Si satis valida sit, „ posse eam fibras alimenti ad idoneam partium homogenearum tenuitatem conterere., „ Non mea jam interest, de triturationis potentia cum ASTRUCIO certare; quamvis non visus est ille satis advertisse, quid efficere possit valida triturationis. Nonne enim quotidie videmus, corpora vehementi attritione ignem concipere, eademque sic accensa faciem prorsus novam nec minus ab ea, quam antea habebant, distantem, quam caro a pane discrepat, induere? Sed, hoc misso, satis mihi est, quod posterius largiatur; ciborum nempe partes valida attritione ad insignem particularum similium tenuitatem posse comminui. Monstravi enim, parvis illis fibrillis, nec re quapiam alia, totum perfici posse nutritionis negotium, in quo neuti-quam requiritur, ut corpora alia in alia convertantur, seu transformentur; sed, ut apponantur solum, sive in fibras animales se insinuent fibrillae illae parvulae, eandem quam ipsae habentes naturam.

Arguet forte ASTRUCIUS, „ Non eam, quam prae „ me feram, posse esse necessitatem fibrillas istiusmodi in

„ animale fluidum introducendi; ex eo, quod vegetabilia
„ vegetabilibus aliisve animalibus non vescantur; sed,
„ aqua pluvia, succisque e terrae superficie emananti-
„ bus. „ Plantas equidem alias ab aliis comestas nemo sane
mentis unquam affirmaverit; nihilo tamen secius verum
est, eas suo modo ali fibrillis, a vegetabilibus, aliisque
animalibus perspiratis & excretis, aut aliquo casu ab
eorum exuviis, aut cadaveribus exsolutis & auctis, qui-
busque aqua pluvia succique isti uberrime sunt referti.
Atque hinc est, quod qui ex istis succis situ gaudent ma-
jori harum exuviarum copiae excipiendae maxime oppor-
tuno, vegetius uberiusque praebeant alimentum, quaeque
iis vescuntur plantae robustae sint, & ad luxuriam usque
opimae: at, quibus succi contigerint aliorum animalium
spoliis excipiendis minus expositi, famelicae eae sint, gra-
ciles, & male habitae. Aqua autem pura & elementaria
nec plantae cuiquam, nec animali alimentum potest sup-
peditare: verum, eo, quod dixi, modo impraegnata, tot,
& tam variis, quae stupentes conspiciamus, vegetantium
generibus absque discrimine nutriendis inservit: quippe,
quae non succis minimisque fibrillis, ex quibus constant,
undeque aluntur eorum fibrae; sed, tuborum structura,
& ramorum crassiorumque partium conformatione, alia
ab aliis distinguantur: quod & manifestius adhuc apparet
ex illis succis, qui per unum truncum ascendentes, mini-
strant alimenta variis generibus communi stipiti insitis,
quorum unumquodque suo generi proprium fructum pro-
fert. Eodem plane modo, quamvis panis, & granum,
feu planta, quae eum genuerat, in sua compage, structu-
raque majorum partium, a carne nostra immani distet in-
terval-

tervallo; nulla tamen in re fibrillae minimae hujus a minimis illius fibrillis differunt; sed, corporum nostrorum, aequae ac plantarum, unde provenerant, fibris adcorporari sunt idoneae, & non minus veram in corporibus nostris carnem constituunt, quam antea panis plantaeve formam constituerant. Omnium itaque, non solum vegetabilium; sed &, perfectiorum animalium fluida, nihil aliud sunt quam succus communis, varias fibrillas, variis dimensionibus variisque elasticitatis tonis praeditas, diversimode perforatas, & complicatas, aut aliquo alio casu discriminatas, secum devehens.

Jam vero, aut me poenitet operae male collocatae, aut ASTRUCIO ipsi perspicuum me reddidisse arbitror, Chymicam alimenti solutionem, etsi cum nullo ventriculi damno haberi posset, neutiquam tamen nutritionis negotio parem esse; &, ipso quidem judice, monstratum reor, nudam sufficere ciborum attritionem, modo tantae sint triturationi vires, quantis opus est ad fibrillas, ex quibus alimentum componitur, ad eam subtilitatem tenuitatemque redigendas, quae necessario requiritur, ut tuborum cava permeare, fibrarumque poros ingredi possint.

II. Atque hoc nos ultro deducit ad *secundum* argumentum, quo sententiam tuam ASTRUCIUS labefactare conatur. Illud autem ita fere se habet: „ Quamvis, in-

„ quit, forte daretur, validae triturationis ope perfici

„ posse digestionis negotium; imparem tamen omnino

„ esse, quam tu huic rei adhibes, potentiam: ventriculi

„ enim, diaphragmatis, musculorumque abdominis con-

„ tractiones omnes simul sumtas, si rite earum calculus

„ ineatur, non posse tantam triturationem efficere, quanta
 „ ad nutritionem necessario requiritur. Te attendisse tan-
 „ tum absolutam horum musculorum potentiam, quae in-
 „ gens fane esse possit; at, minimam ejus partem hic exferi.
 „ Ex 12951. libris, quae assignantur tanquam aequales ven-
 „ triculi viribus, se reperisse tres tantum uncias actu in
 „ alimentis comprimendis semet exferere, & non amplius
 „ quam quatuor libras revera adhibitas ex 248235. qua-
 „ rum efficaciam junctae diaphragmatis, musculorumque
 „ abdominis vires exaequare supponuntur. „

Sed, nae, ille numeros tuos haud satis ad examen revo-
 casse videtur, quum concedat absolutam solius ventriculi
 potentiam majorem non esse, ratione rite inita, quam
 12951. librarum, junctasque simul aliorum musculorum
 vires 248235. libras duntaxat exaequare. In priore enim
Dissertationum tuarum editione irrepsit error in notis
 Arithmeticis; pro numero enim 12951. libras indicante
 ventriculi viribus respondentes, excudi oportuit nume-
 rus 117088. qui juxta proportionis regulam ex tribus
 numeris 122. 3720. & 3840. quartus elicitur Praeterea,
 nescio qua incuria, nonnulli abdominis muscoli calcu-
 lo exciderunt, quibus jam restitutis, conjuncta eorum
 & diaphragmatis potentia 461219. libris aequipollet,
 prout numerum in hac nova editione supputatum in-
 venio.

Verum profecto est, nec mihi mirum videtur, quod
 cum in digestionis materia tot tantisque rationum alia-
 rum ex aliis nascentium momentis, quibus aliter te expe-
 dire nequiveras, te ad triturationem quasi ductum persen-
 tires, satis tibi factum existimaveris, si absolutam mu-
 sculo-

sculorum, quorum opera ea perficitur, potentiam in genere perspectam haberes, utpote gnarus minime opinioni tuae obfuturum quodcunque de tam immensa potentia propter obliquas contrariasque eorum actiones detractum fuerit, etsi propter *Datorum* inopiam, accuratum earum calculum inire non posses. Quamvis enim eorum musculorum quidam oblique agant, quidam contrario quasi motu ferantur, alii tamen agunt directius, & universi magis minusve ad alimenta comprimenda, permolendaque conspiciant. Duae enim pluresve potentiae, in uno effectu sibi repugnantes, ad alium facile concurrere possunt. Sic duo pondera lancibus imposita impediunt, quo minus alterutrum descendat; junctis tamen viribus, unum, a quo lances dependent, deprimere, eamque ad se attrahere nituntur. Ita duo corpora in tertium opposito motu impulsa, sibi quidem mutuo obstant quo minus corpus interjectum loco dimoveatur, ad illud tamen comprimendum utrumque conspiciant. Eodem prorsus modo, quamvis diaphragma & abdominis muscoli alii sursum, alii deorsum, alii denique transversim agant, omnes tamen ad ventris cavitatem coarctandam minuendamque, *id est*, ad ventriculum, & quicquid illo continetur, comprimendum confoctantur. Et, quamvis totis suis viribus in id directe non incumbant, nullus tamen relinquitur dubitandi locus, quin illi ventriculo suppetias ferant, junctaque cum eo opera ingentem in alimentum vim exferant. Eorum enim actioni pressionique unice referendum est, quod cibi concocti e ventriculo elidantur, atque in intestina postea detrudantur. Ecquid vero causae est, quo minus eadem illa vis, quae cibo concocto egerendo par sit, eidem quoque

concoquendo opem conferat? Praesertim, si advertamus, manso semel cibo, ac saliva, & liquoribus, quos bibimus, humectato, facile se fluida insinuare in poros solidarum alimenti molecularum, ac eas deinde eo usque extendere & tumefacere, donec cedentes partium cohaesiones tandem dissiliant & confringantur. Tum vero moleculas illas, quae ventriculi, aliorumque muscutorum impetum sustinere amplius nequeunt, in tenuissimas & minutissimas partes perpetua eorum ac indefessa actione paullatim comminui ac triturrari necesse est. Atque hoc illud est, in quo consistit universum digestionis negotium: quem enim chylum nominamus, nihil est aliud praeter trituratas solidi alimenti partes, fluido innatantes & commistas.

Hae, inquam, atque hujusmodi rationes summatim tantum spectatae, satis tibi visae sunt ad sententiae tuae fidem faciendam; satisque, opinor, omnibus videbuntur, quibus, quemadmodum tibi, serio persuasum est, Chymicam solutionem hanc rem nunquam perficere posse. Praeter enim solutionem illam Chymicam, & quam diximus triturationem, (ut recte tecum ASTRUCIUS sentit) nulla alia, quae quidem aliquam prae se ferat veri imaginem, excogitari potest digestionis causa. Ad triturationem vero, (dempta praevia dentium actione,) nulla alia praeterquam a te assignata in corpore reperiri possunt instrumenta. Unde necessitate impulsus eorum vires a posteriori agnoscere cogimur. Quippe, cum alimentum trituretur, nec aliud utique occurrat quidquam, praeter ventriculum, diaphragma, & abdominis musculos, unde ea trituratio perficiatur, necessario consequi-


sequitur, eos idoneis ad eam rem viribus esse praeditos, licet eas ad calculum Geometricum revocare nequiverimus.

Verum enimvero, cum ASTRUCIO visum est ad Geometriam provocare, cujus ope autumat se demonstrasse, vires, quas muscoli isti in alimenta exserunt, (quamcunque demum in se habeant potentiam,) exiguas admodum esse, & effectibus istis penitus impares, non abs re me facturum existimavi, si quam ille in medium attulit demonstrationem, propius & figillatim excuterem. Namque, si ejus demonstratio triturationi tuae tantum adversetur, quantum tua Chymicae ejus solutioni adversari mihi visa est, irrito labore indagamus digestionis phaenomena, nec est quod in re inexplicabili, & rationi prorsus inaccessiblei, nosmet ulterius torqueamus.

Primum igitur distinguit ASTRUCIUS inter vim attrahentem, qua muscoli recti, seu rectilinei corpora a se sustentata directe attrahunt; & vim comprimentem, qua muscoli circulares corpora, quae circumdant & complectuntur, a lateribus premunt: & hic a te admissum paralogismum arguit; quod, inquit ille, comprimendi attrahendique actiones inter se confundas; cum tamen tanto intervallo a se invicem distent hae actiones, ut nihil ex hac de illa, aut vice versa, colligere possis. Absolutam quidem vim in circularibus etiam musculis contrahendis exseri fatetur; at, demonstrasse se praedicat lateralem compressionem inde orientem, sive vim compressivam, non majorem habere ad vim contractricem proportionem, quam habet arcus infinite parvi chorda ad circuli diametrum. Sed, demonstrationem ipsam videamus.

„ Fin-

„ Fingamus, *inquit*, circulum $C D G$ ventriculi fi-
 „ bram repraesentare: palam est, fibra illa se contrahente,
 „ circumferentiae ejus puncta ad centrum aequaliter acces-
 „ sura. Possumus igitur fibram tanquam polygonum spe-
 „ ctare, cui infinita sint latera, quorum puncta omnia an-
 „ gularia, lateribus contractis, ad centrum aequaliter
 „ convergunt. Ex hisce punctis unum sit C . Res dudum
 „ perspecta est & demonstrata,
 „ vim, qua aequalia latera
 „ $C D$ & $C F$, inter contra-
 „ hendum, punctum illud at-
 „ trahunt, ad vim, qua idem
 „ punctum ad centrum defer-
 „ tur, premitque corpus sibi
 „ resistens, eam rationem ha-
 „ bituram, quam habet latus
 „ $C D$ ad $C E$, sinum ver-
 „ sum anguli polygoni. Om-
 „ nium igitur ejus laterum
 „ vis, sive summa virium fibrae
 „ contractae, eam habebunt rationem ad universas vires pres-
 „ sionis, quantamcunque se contrahendo exserere possit,
 „ quam habet $C D$ ad $C E$. Et proinde, vis omnium fi-
 „ brarum ventriculi contractiva eam habebit rationem ad uni-
 „ versas istius visceris vires compressivas, quam habet $C D$
 „ ad $C E$. Est autem eadem ratio $C D$ ad $C E$, quae est
 „ diametri $C G$ ad latus $C D$. Ergo totae ventriculi vires
 „ contractivae eandem habebunt rationem ad totas ejus vi-
 „ res compressivas, quam habet diameter ad chordam in-
 „ finite parvam. Atque idcirco, vires ventriculi compres-
 „ sivas



” sivas infinite parvas esse oportet, prae quam sint vires
” ejus contractivae. Atque adeo etiam, si fingamus cum
” docto PITCARNIO, cujus hac in re satis justus est
” calculus, vim ventriculi contractricem libris 12951.
” aequipollere, vis tamen ejus compressiva ad summum
” tres uncias aequabit, ac minor etiam esse poterit: tan-
” tum abest, ut 12951. libris aequiponderet; quod ille,
” omni inter vim contractivam & compressivam discrimi-
” ne de industria sublato, credi voluerat.

Sed, hic libenter ab ASTRUCIO percontarer, an suae ipse demonstrationi fidem habeat? Id si facit, unde ergo est quod concedat, aut quo pacto reperit, tres uncias universis ventriculi viribus comprimentibus pares esse, cum totae ipsius vires contractrices, juxta ejus supputationem, 12951. libras non exsuperent? Anne autem credit, 3 uncias proportionem infinite parvam ad 12951. libras habere? nec majorem habere 4. libras ad libras 248235.? Ex propinqua enim proportionem inter numeros 3 uncias, sive $\frac{3}{4}$ librae, & 12951. libras, compressionem diaphragmatis, musculorumque abdominis in eadem proportionem accepisse videtur ad eorundem contractionem, quam (nescio quomodo,) inter ventriculi compressionem contractionemque ipse deprehenderat: quamvis nullo prorsus fundamento innitatur ista proportionum aequalitas: quum fibrae ventriculi proxime accedant ad figuras circulares, alimentum ambientes & circumplectentes, a quibus aliorum musculorum fibrae longissime absunt. Haec male inter se cohaerere, atque ab animo aliud agente profecta videntur.

Quod autem te paralogismi insimulet, quod contractionis compressionisque vires nullo discrimine habueris, pro-

spectum ipsi prius oportebat, ne potiori ego jure ejusdem
eum criminis redarguam, qui subtiliter nimis ea distinxe-
rit. Qui enim, amabo, magis differt compressio a tra-
ctione, seu coactione introrsus in arctius spatium, & ad
majorem vicinitatem partium materiae comprimendae;
quam extensio, seu expansio, differt ab earundem tra-
ctione extrorsus, & ad laxiores ab invicem distantias? Et,
quemadmodum in allatis exemplis dictum est, quid si po-
lygoni latera, *id est*, chordae arcuum infinite parvorum
fibrae istius circularis, contrario quamvis aliae aliis motu
in variis suis directionibus ferantur, nihilo tamen fecius
totis suis viribus ad pressionem introrsum concurrant? Alia
enim & indubitatae fidei in corpore animali nobis suppe-
runt exempla, quibus id a fibris circularibus, & ingenti
quidem impetu discimus fieri: &, ut alia praeteream,
ASTRUCIUM tantum monitum velim, ut animum ad
circulares arteriarum fibras, praesertim ad cordis vires
attendat, quae immensae adeo sunt, ut, juxta BORELLII
supputationem, 180000. libras exaequent. Et sane, tam
ingenti potentia erat opus, ut tantum fluidorum pondus,
tanta velocitate, & adversus tot & tam valida obstacula,
per corpus propelleretur. Id autem omne non aliter quam
compressione peragitur. Fibrae musculares ad minorem
longitudinem contrahi nequeunt, quin continuo cavitates
inclusas minui etiam & arctari, ac proinde intus clau-
sam materiam una comprimi, & per vasa protrudi oporteat.
Sin vero nihil aliud ASTRUCIUM movere potest,
fili digito suo circumvoluti extrema prehendat trahatque,
statimque dolore victus fateri cogetur, eam quam patitur
ipsius digitus compressionem, majorem longe ad vim,
qua

qua filum adducitur habere proportionem, quam habet chorda arcus infinite parvi ad circuli diametrum.

Sed, ut ASTRUCIUM errore exsolvam, ipsique etiam planum faciam, ad se proprie spectare, cujus te incusabat, sophisticationis vitium, aequo animo patiatur oportet a me moneri, neque schema ejus, nec argumentum huic rei accommodari posse, ubi de circulo majore in minorem contracto agitur. Libens fane concesserim, eodem semper manente circulo, chordam infinite parvam CD repraesentare posse vim, qua attrahi fingitur punctum C in directione arcus CD , eamque vim in duas alias posse resolvi; alteram scilicet trahentem punctum C versus centrum, in directione & cum proportione sinus versi CE ; alteram vero in directione tangentis CH , & cum proportione sinus recti ED : atque, hoc in casu, non CD solum; sed &, ED infinite majorem quam EC futurum; *hoc est*, arcum CD infinite majorem habiturum propensionem versus tangentis, quam sinus versi, sive diametri directionem: quod quidem nihil aliud est quam rei olim cognitae novam faciem inducere; quippe, quae eadem fere est cum EUCLIDIS Propositione XVI. Lib. III. Aut, si ASTRUCIO potius visum fuerit, duarum potentiarum compositio; alterius quidem trahentis punctum C , in directione & cum proportione sinus versi CE ; alterius vero in directione tangentis CH , & cum proportione sinus recti ED , coget determinabitque illud punctum movere in arcu incontracto CD ejusdem semper manentis circuli: cum autem nihil quidquam conferat, quo ad centrum propius adducatur, vel ab ea longius illud recedat, peripheriam neque con-

trahere potis est, nec dilatare. Duo enimvero sunt modi, quibus punctum C ad punctum D, servata figura circulari, appropinquare potest; quos dum inter se ASTRUCIUS confundit, in eam, quam pro demonstratione venditat, incidit hallucinationem: aut enim punctum C versus D attrahi potest in eadem non immutata circumferentia, eamque vim rite exhibet aestimatque arcus ipse, vel in *minimis* ejus chorda C D: sed, tum ea vis non magis fibram contrahere valet, quam materiam inclusam comprimere; aut C & D (& idem de aliis circumferentiae punctis dicendum,) mutuo alterum alteri possunt appropinquare, si cum ea, quam varii habent eorum radii, directione ad centrum aequabiliter ferantur. Quaecunque autem vis circumferentiae puncta coget hoc modo sibi invicem propius accedere, tam ea intus clausam comprimet materiam, quam diametrum simul & circumferentiam coarctabit. Divelli ab hac contractione non potest illa compressio, aut, ut verius loquar, una est atque eadem res utraque, ex vario respectu diverso nomine insignita. Cum circumferentia & diameter breviores fiunt, contractionem dicimus; cum vero area minuitur, seu inclusa materia in angustius spatium coarctatur, compressionem appellamus. Perperam autem per chordam arcus non contracti ejusdem circuli repraesentatur haec contractio: prorsusque fidei absonum est, in tali contractione, vim, qua latus C D, inter contrahendum, sibi adducit punctum C, eam, ad vim, qua idem punctum ad centrum defertur, habere rationem, quam habet latus C D ad C E. Contra ea, dum C D in sui dimidium contrahitur, una etiam contrahitur radius; *hoc est*, punctum C dimi-

dimidia radii parte propius centrum accedit. Ut ad pauca redeam, in tali contractione, circumferentiae puncta dupliciter, directe nimirum ad centrum, & transversim ad se invicem, appropinquant. Atque, utraque haec appropinquatio ad materiam intus conclusam, comprimendam, contundendam, fricandam, & permolendam conspirat; eaque compressio, contusio, sive fricatio, quanta quanta est, ab ista contractione tota proficiscitur. Eam enim suppono fibrae flexibilitatem, eaque est inter directiones infinite parvorum arcuum fibrae circularis, aut chordarum, eos referentium, uniformis contrarietas, ut neque potentiae contrahentis vis aliter quam uno & aequabili tenore per omnia sui puncta & partes diffundi queat, (nulla etenim existit causa, cur ad unam ejus partem punctumve major quam ad aliam proportio derive-
tur;) neque, cum ita diffusa est & impressa, aliter quam uno & aequabili tenore materiam inclusam ad idem centrum comprimere possit: cumque parvi illi arculi in circulari sua forma se mutuo suffulciant, universa potentiae contractricis vis in materiam inclusam integra derivatur, quam usque & usque comprimere magis pergit, donec adeo valida sit ejus repugnantia adversus ulteriorem compressionis gradum, ut potentiae contractricis viribus aequipolleat. Ad hunc modum, si librae unius pondus filo penitus flexili appenderis, quod cylindro sphaeraeve materia cedente, ad sex in circumferentia pedes refertae, est circumvolutum; si ad tres pedes illud descenderit, circumferentia dimidio sui contrahetur, & materia intus clausa ad quartam, quam antea occupabat, loci partem comprimetur. Atque, haec quidem compressio id mo-

menti faciet, quod unius librae ponderi aequipollet. Et, si fibra rectilinea vi sua musculari contrahere se valeat in $\frac{2}{3}$ suae longitudinis partes, adversus datum impedimentum, eadem quoque fibra in figuram circularem disposita, & aequali potentia impulsam, in $\frac{2}{3}$ circumferentiae suae partes se contrahere valebit, adversus sibi renitentem intus clausam materiam, modo non requiratur vis major ad materiam illam in $\frac{4}{9}$ pristini sui spatii partes comprimendam, quam quae ad dictum impedimentum per $\frac{1}{3}$ longitudinis fibrae rectilineae relaxatae partem amovendum requiratur. Fibra prorsus flexilis aequae se contrahit in figura circulari, nisi obstat materia inclusa, ac in linea recta, si nullo impedimento amovendum sit. Quicumque igitur ex fibra rectilinea in directum trahente oriatur effectus, idem quoque, nec minoris momenti effectus ex fibra circulari, aequali vi materiam inclusam comprimente, oriatur oportet. Atque adeo, tota illa, quam tanta mole, & Geometria, & Dialectica invitis, instruxit ASTRUCIUS, funditus corrumpit ratiocinatio; adversus quam fixum semper immotumque manebit illud, quod superius fore dicebam *; ASTRUCIUM *videlicet*, si filum suo digito circumligatum attrahere voluerit, totas ejus vires ad digitum comprimendum actu exsertas sensu ipso comperturum. Junctae itaque vires compressivae fibrae circularis, & proinde totius ventriculi, si tanquam sphaericus spectetur, non minores erunt quam junctae vires potentiae contractivae; *id est*, non utique minores quam 117088. librarum. Adeoque, etiamsi quatuor ciborum libras,

* Confer supra, pag. 258, 259.

libras, quod fatis amplum demensum reor, ventriculo simul ingestas finxerimus, tanta tamen ventriculi est potentia, ut quinque amplius librae, quarum singulae duodecim uncias valere censentur, cum unoquoque alimenti grano committantur: valida autem illarum actione necesse est hocce granum in immensam fere tenuitatem trituri.

Nec est, quod negotium nobis faceffant, quae ab ASTRUCIO praeterea congeruntur in illustrationibus suis, margini appositis, ut hac quasi subsidiaria ope major suae causae firmitas accedat; ratiunculis nimirum exinde petitis, " Quod ossa a canibus concoquantur; quod diaphragma, ventrisque muscoli in avibus etiam rapacissimis sint debiles; quod diaphragmate penitus destituantur pisces, exiguumque admodum habeant musculorum ventris usum, licet eorum aliqui adeo sint voraces, ut alios pisces totos ac integros deglutiant, quos tamen facile digerunt: quin & ipsae conchae a quibusdam digestae memorantur. " Haec enim, & id genus alia, quae sententiae tuae prima fronte adversari videntur, non aliunde quam ex eo sunt profectae, quod de ventriculo, viribusque ipsi propriis, abjecte nimis & tenuiter sentiat, & nulla ratione nixam inter vim ejus compressivam & contractivam distinctionem comminiscatur. Postquam vero futilem illam distinctionem profligaverim, probaverimque, vim contractricem ad cibos comprimendos solidam integramque adhibitam esse & exsertam, hae difficultates sponte sua in auras evanescunt. Quod si absolutam in hisce animantibus ventriculi potentiam eodem modo expendere ASTRUCIUS voluerit, quo tu ventriculorum humanorum potentiam expendisti, confirmare illi ausim, non defu-

defuturas in solis variarum, quas nominavit, animantium ventriculis vires, hisce omnibus, quae iis tribuuntur, efficiendis, aequales; nulla licet ratio habeatur diaphragmatis & musculorum ventris, quae in avibus quidem debiles sunt; at, huic incommodo facile subvenit stomachus, in iis validior. Quod ad pisces attinet, falsus est in re ipsa ASTRUCIUS; major enim eorum pars & diaphragmate, & musculis abdominis gaudent. De conchis vero, quae a quibusdam piscibus, ossibusque, quae a canibus concocta memorantur, animadvertendum est, pisces hosce, canesque praevalidis mandibulis & molaribus esse instructos, quorum opera hae conchae & ossa probe prius mansa sunt & comminuta, quam stomachum ingrediantur: in quo non abhorret a verisimili, eorum duntaxat succos elidi & extrahi; duriores vero partes e corpore indigestas excerni; id quod in stercore canino fieri experimur.

Haecenus duas priores ASTRUCII objectiones pluribus & particulatim sumus prosecuti, quod eae majoris momenti esse, totumque fere illud, quod in controversia est positum, gremio suo complecti viderentur: quibus, nisi me animus fallit, e medio sublatis, non necesse arbitror, ut reliquis, quae levioris sunt operae, prolixius immoremur.

III. Tertia enim ejus objectio, quam arcessivit ab humani ventriculi structura, (quae unica tantum instructa est, eaque gracili tunica musculari, tenui membrana nervosa interius obiecta,) collata cum ventriculi avium structura, qui duplici constat musculo, carnosissimo admodum & robusto, crassa & cartilaginosa membrana intus munito; osten-

ostendit quidem stomachi potentiam, ex comparatione, ventriculo avium debiliorem esse; nihil tamen inde colligi potest adversus potentiam stomachi simpliciter spectatam; ea enim tanta esse potest, quantam tu eam perhibueris, & tamen comparate minor quam est ventriculus avium, si stomachi pondus minorem habeat ad ventriculi avium pondus proportionem, quam habet stomachi magnitudo ad ventriculi avium magnitudinem. Ita enim, etsi pondera, ac proinde vires musculares utrinque pares essent, quia tamen in ventriculis avium arctioribus limitibus hae vires cohibentur, & in minorem alimenti molem se exferunt quam in ventriculis humanis, intensiores propterea in illis ventriculis quam in humanis eas esse oportet. Tanta autem structurae firmitas, quaeque inde profluit virium intensio avium ventriculis est necessaria; quippe, quibus granis, duroque id genus cibo vescendum sit: at, ea vel prorsus destituti, vel inferiore gradu praediti sunt animalium carnivororum ventriculi, quibus scilicet concoquendum obtigerit alimentum minus rigidum, cujus partes molliusculae sunt, & laxioris texturae. Nec est quod ASTRUCIUS extimescat, ne nervosam ventriculi tunicam interiorem vellicent, aut ullum doloris sensum proritent ejusmodi molles & flexiles substantiae, quales sunt carnis particulae, quae facile ventriculi ictibus cedunt & obsequuntur; atque idcirco, vel leves, vel nullas in interiorum membranarum nervos impressiones facere queunt, quaeque ad gratam potius titillationem, quam acris doloris sensum excitandum sunt comparatae. Non enim dolor generatur, nisi ex vi quadam, nervis illata; cum durior aliqua, minusque tractabilis substantia, eos vellicat & dilacerat: quod a demortuae carnis frustulis neuti-

L I

quam

quam est metuendum, quorum lenem imbellemque impressionem obnitentes, vivi animalis nervi fortiori suo impetu facile retundunt. Neque, ex eo, quod alimenta carnea tenacioris magisque coriaceae (ut ASTRUCIUS loquitur,) sint naturae, quam grana & legumina, colligere possis, maiorem structurae firmitatem in animalium carne vescentium ventriculis postulari, quam in eorum, quibus semina & grana victum suppeditant: satis enim facit ad nostrum *Propositum*, si illius tenacitas facilius quam horum durities partium a se invicem divulsione patiatur: quod & experientia ipsa confirmat. Caeterum, muneribus suis exsequendis utrisque suppetunt vires idoneae: at, provida parens natura intensiorem potentiae gradum ventriculis avium concessit, quo alimenti duriusculi nexus validius dirumpere queant; eosdemque tunicis magis densis & robustis interius firmavit, ut hoc quasi munimento nervi instructi, injurias a se & damna propulsent, quibus ex assidua sua in rigidius alimentum frictione alioquin obnoxii redderentur.

I V. Opponit autem ASTRUCIUS quarto: „ Si, *in-*
 „ *quit*, digestio sola trituratione perficeretur, quamvis
 „ forte, cum ventriculus sit plenus, ipsiusque lateribus
 „ ad inclusam escam pateat aditus, aliqua possit istius
 „ triturationis reddi ratio: cum tamen ventriculi ad
 „ summum usque contracti cavitas, spatii istius, quod
 „ in naturali suo situ, & ab omni contractione liber tenue-
 „ rat, quartam ad minimum partem retinet, si qua fue-
 „ rit in medio ventriculi alimenti quantitas; praesertim,
 „ si multo minor illa exstiterit, quam quarta ventriculi
 „ expansi pars, ea prorsus effugiet actionem ejus late-
 „ rum, quibus ne eam quidem contingere licet; atque
 „ adeo,

„ adeo , omnis triturationis & digestionis exfors in per-
„ petuum jacebit. „ Verum, si quid huic **ASTRUCII**
argumento roboris inest, id non minus ciborum e ven-
triculo expulsionem, quam ipsorum triturationi adversatur.
Ad quatuor, seu solidi, seu fluidi alimenti libras, ex
ipsius sententia, ventriculus simul capere potest: singu-
lus tamen, unicam ei tantum unciam inesse, quae quarta
istius ponderis parte longe est minor. Et, quoniam tan-
tillam quantitatem ventriculi latera nequeunt attingere,
nedum eam triturare possunt, Chymica solutione, quando
ASTRUCIUS ita animum induxit, ejus concoctio pera-
gatur. At, quid deinde chylo futurum est? An is in
ventriculi medio illibatus aeternum fluitabit? Aut quo,
quaeso, pacto inde expelletur? Expelli autem necesse est:
at, qua demum arte, & salvo suo argumento, id fiat,
ASTRUCIUS ipse viderit. Ego quidem iisdem illis in-
strumentis eum expello, quorum adjutrice prius opera
triturbatur, actione nimirum diaphragmatis musculo-
rumque ventris (non excluso tamen, ob rationes modo
subjiciendas, una conspirante ventriculi ipsius conamine,) qui,
inter exspirandum, longe ultra quam sua ipse se ope
contrahere valebat, ventriculi cavitatem coarctant: quin
& in validis expirationibus ventriculi latera coire, sibi-
que prorsus conjungi cogunt. At, sustinere nequit **ASTRU-
CIUS**, a musculis hisce humanis quidquam huc auxilii
subministrari, causatus scilicet eos in avibus piscibusque
vel nullos, vel imbelles admodum esse. Sed, quod ejus
pace dixerim, annon iniquum est, manifestum instrumenti
alicujus usum illic abnuere, ubi tam evidenter reperitur,
propterea quod quae illo instrumento in corpore humano
praestantur, officiis in piscium aviumque corporibus

aliunde forsan sit prospectum? Ut enim praeteream quae de piscibus & avibus supra sunt dicta *, quid si insuper contenderem, ingentem in iis alimenti quantitatem aliquamdiu cocturae immunem jacere, neque chylum e ventriculo expelli, donec utraque haec opera nova recentis alimenti copia, ventriculo ingesta, promoveantur? Aut, si aliquid ejusmodi humanae etiam concoctioni accidere dicerem, dubito fane an quidquam a ratione oppido alienum inde oriri sit monstraturus: id certum habeo, nihil adeo absurdum in ista suppositione posse reperiri, ac ea, quae ex Chymica ejus solutione facile & perspicue deducere possim. Sed, haudquaquam in istis angustiis versamur, ut istam nobis gratiam fieri postulemus: ipse enim ventriculus haud parvam in hoc opere partem sibi vindicat, etiam in minoribus hisce, quae tantum laboris **A S T R U C I O** peperere, quantitibus, aequae ac vicini musculi ventris & diaphragmatis: isque etiam, ubicunque hi vel debiles sunt, vel deficiunt, rem omnem absque eorum auxilio praestare potest. Sit enim quantumlibet parva alimenti portiuncula, absurdum tamen plane est, eam in cavitate centrali, aërea tantum tunica ipsam inter & ventriculi latera undique interjecta circumvallatam, pendulam haesuram existimare. Quum enim ea, qua alimur, materia gravior sit, quam ut in aere fluitans possit sustineri, superante suo pondere ad ventriculi fundum devehatur oportet, quo in loco cum ventriculum immediate contingat, continuis ejus ictibus patere necesse est. Neque alimento trititando, chyloque expellendo inservit tantum ventriculi se contrahentis motus; sed, motus etiam se relaxantis, & subsidentium ejus laterum pondus suam

* Confer supra, pag. 264.

suam quoque huc operam impertiunt. Denique, ut paucis expediam, omnes ventriculi motus, vel potius motuum actionumque ipsius reciprocationes, vicinorum, si qui essent, & vi aliqua praediti, musculorum ictibus ac pulsationibus adjunctae, vel minimam alimenti quantitatem sursum deorsum, ultro citroque agitant jactantque, donec sensim ea pedetentimque comminuta, triturrata, & concocta fuerit: & quicquid adeo nondum triturratum est & concoctum, ideo quod graviore suo pondere ad ima semper deferatur, fortiusque adhuc actionibus hisce reluctatur, id semper ultimum in ventriculo subsistit, tantisper *scilicet*, dum levior in summo fluitans chylus ab impetu eum tangentium laterum per centrales, aliasque civitates (alias enim esse, sequens paragraphus ostendet,) in intestina devehatur, & id quidem vel non omnino, vel leviter tactis harum cavitatum lateribus. Atque ita vegrandi illa, a centrali ventriculi cavitate desumta, difficultate nullo fere labore nosmet expediimus.

V. Quinta ASTRUCII objectio petita est a fame vulgari, fame canina dicta, fastidio, pravaque in ventriculo ciborum coctura: quorum omnium, si ASTRUCIUM audiamus, nulla per modum triturationis ratio constare potest: „Famis enim sensum non posse excitari. „nisi ab impressione aliqua in stomachum facta, sive illa „oriatur ab humore quodam acido, interioris suae tunicae nervos praestringente ac stimulante: id vero nihil „aliud esse quam in scenam rursus producere illa ipsa fermenta, a te pridem rejecta, „; (& quidem non sine gravi causa rejecta, quod ea fermenta non minus facile stomachum ipsum corroderent ac dilaniarent, quam alimentum resolverent;), „sive a mutua laterum stomachi frica-

., tione & attritu: at, se superius ostendisse, idnu nquam
., posse fieri, & te quidem ipsum id rarissime usu venire
., non denegasse. ., Verissime quidem, nec praeter ratio-
nem a te pronunciatum est, rarissime contingere, ut ven-
triculi latera ad se mutuo fricanda coëant: id enim acci-
dere nunquam potest, nisi cum ventriculus omni prorsus
cibo est vacuus: si quid enim ei alimenti inesset, id ejus
latera a se invicem sejuncta distineret. Quas autem pro-
tulit ASTRUCIUS rationes, quibus probare nititur, im-
possibile omnino esse, ut aliquando ventriculi latera ad
se mutuo pertingant, partesque aliae alias atterant, frivolae
sunt & inanes, quaeque ludibrium potius debere quam
responsionem mereri videantur. Nam, quod attinet ad
centralem illam, quam ASTRUCIUS jactitat, ventriculi
cavitatem, ea protinus in fumum evanescet, si attenda-
mus, non omnes ventriculi fibras absolute circulares esse;
(quas enim eo nomine ASTRUCIUS appellat, spirales
verius sunt, & nonnullae longitudinales duntaxat;) quod
tamen necessum fuerat, ut figura contracta ad formam
redigatur perfecte sphaericam, quaeque sphaericam cavita-
tem circa centrum complectatur. Sed, neque (quamvis
id ei largiremur,) laxa & flaccida ventriculi natura,
regularem ullam & permanentem figuram, qualemque in
corporibus duris rigidisque videmus, illam induere, aut
indutam servare pateretur: quin, e contra, ab alternantibus
contractionis & relaxationis motibus, accedente etiam
finitimorum muscutorum crebro appulsu, undatim quasi
crispatur ac corrugatur; fluctuumque instar variis in locis
leviter subsidit, aut intumescit ejus superficies. Caeterum,
ad famis sensum excitandum minime opus est, ut ventri-
culi latera (tanquam duo plana marmorea,) omni ex
parte

parte se mutuo contingant & perfricent. Satis est, si oppositorum laterum partes convexae ad mutuuum contactum frictionemque admittantur, medio inter oppositas cavitates relicto spatio. Quod si ventriculus omni cibo sit vacuus, aut pauxillum tantum in eo supersit, fieri non potest, quin oppositae intimae ejus superficiei partes convexae in nonnullis sui partibus se contingant, frictionemque mutuam persentiscant: idque a vicinorum muscutorum impetu, aequae ac ventriculi ipsius lateribus naturae sponte inter relaxandum subsidentibus, provenire oportet. Atque, ex hoc contactu frictioneque ea oritur in nervos impressio, quae illum in nobis sensum concitat, quem famis nomine indigitamus. Perspicuum vero est, eum nunquam posse generari, ex hac nostra sententia, nisi cum ventriculus vel penitus exhaustus, vel parum in eo cibi jam relictum est. Absurde autem opponit ASTRUCIUS, alimenti in latera ventriculi, aequae ac eorundem in se mutuo frictionem sensum illum provocaturam; & proinde, non minus cum plenus quam cum inanis est ventriculus, perpetuae nos fami fore obnoxios. Nam, quemadmodum in nostro ad tertiam ejus objectionem responso superius est animadversum, materia, qua alimur, mollioris est magisque obsequentis quam nervi ipsi naturae, eamque ob causam nullam molestam, & cum dolore conjunctam in eos facere potest impressionem. Quod ad *famem caninam* spectat, cum ea nihil aliud sit quam intensior gradus famis vulgaris, nulla amplius restare potest in ea difficultas; quin facile tolli queat fortiore laterum ventriculi frictione, a validiore in fibris ventriculi, musculisque auxiliantibus potentiae intensione exorta. Superest, ut de *fastidio, pravaque ciborum concoctione* agamus. Ea autem ex
casu

casu aliquo, aut inveterato usu sunt profecta. Si ex casu sint, ventriculo *scilicet*, musculisque vicinis pristinum suum vigorem obtinentibus, nulli rei alii id acceptum referendum est, quam (quod vulgo solet appellari,) *stomachi immunditiae*: ea autem non aliunde nascitur quam a massa gravium, crassorum, ac viscosorum humorum, qui inter ventriculum & alimentum interpositi alterius in alterum actionem plurimum frustrantur. Nequicquam vero objicit ASTRUCIUS, „ chylum prius digestum „ impedimento fore, quo minus quod alimenti est reli- „ quum ulterius concoquatur. „ Non enim est eadem, quod ille prae se fert, utriusque ratio. Nam, chylus concoctus, utpote cujus particulae ex trituratione majorem superficiem sint nactae, levior evadit: indeque est, quod in summo is fluitet, facileque e ventriculo expellatur, cum gravius interim & indigestum alimentum in ventriculo adhuc persistens ulteriorem cocturam praestolatur: crassi autem isti viscosique humores, quum alimento inconcocto praeponderent, etiam infra ipsum subsidunt; occupataque maxima inferioris ventriculi cavitatis parte, in qua digestio praecipue peragitur, ventriculi in alimentum impetum frangunt & intercipiunt, gravedinem & fastidium pariunt, ciborumque vel penitus tollunt, vel plurimum impediunt concoctionem. Quod si fastidium illud & prava concoctio inveteraverit, & diuturnitate temporis se quasi obfirmarit, altius penetravit malum, atque in ventriculo ipso, musculisque aliis, digestionis operantibus, insedit; quorum nempe vires vel senio, vel morbo, eo usque debilitantur, ut solito suo vigore contrahere se ac relaxare nequeant.

VI. Pergit porro ASTRUCIUS sexto: „ Et quid opus „ est,

„ est, *inquit*, tot undique conquisitis argumentis ferment-
 „ torum in digestionem usum ulterius comprobare? Nonne
 „ manifesta se nobis offerunt istiusmodi dissolventium indi-
 „ cia? An non omnes consentiunt, corpori humano inesse
 „ salivam, bilem, succumque pancreaticum? An autem
 „ ignoramus, succis hisce penetrandi dissolvendique vim
 „ esse? Maculas enim smegmate vulgari purius eluunt,
 „ farinae massam tumefaciunt ac fermentant, ciboque
 „ permistae eum cito colliquefaciunt & dissolvunt. „ Re-
 spondeo, aut haec in se falsa esse, aut ad rem, cujus pro-
 bandae gratia adhibentur, neutiquam facere. Omnes enim
 hi succi alcalici sunt; adeoque, nulla aciditate, aut potentia
 dissolutiva praediti. Si vero ASTRUCII mens sit, succos
 hocce alimento in corpore commistos fermentationem
 excitare, eaque fermentatione alimentum in chylum
 convertere, haec nimirum est res, de qua lis movetur.
 Si extra stomachum corpusque, verum non est; ejusmodi
 enim commistio extra corpus cibum corrumpere qui-
 dem potest ac putrefacere; nunquam vero in chylum con-
 vertere. „ At, succi isti sordes auferunt, farinamque
 „ fermentant. „ Quid inde colligit ASTRUCIUS? An
 ideo arbitratur, smegma, aut cerevisiae florem, stomacho
 receptum, digestionem promovere. Si quando periculum
 fecerit, contra eventurum comperiet. „ Cui ergo usui,
 „ *inquit*, destinantur hi Succi? An existimandum est, na-
 „ turam, quae nihil facit frustra, tanta solertia comparasse,
 „ tantaque industria congeisse, atque alimento chylo-
 „ que admiscuisse succos, nulli tandem usui inservituros? „
 succos istos nullum animantibus usum praebere, aut meri
 excrementi instar, corpore excerni, haudquaquam affir-
 mo. Neque prae me fero, singulos, quibus a natura de-

stinati sunt, mihi cognitos esse eorum usus. Unus est, isque satis apertus, quemque in dubium vocare nequimus, quod concoctis alimenti partibus magis liquefaciendis diluendisque, adeoque puriori chylo ab excrementis crassioribus segregando inserviant. Forte etiam bilis duodeni, ac ventriculi, (si ventriculum ingrediatur,) fibras acrimonia sua ad vividiores motus exstimulat. Atque hinc forte provenit, quod amara & acida stomacho salubria, & concoctioni utilia experiamur. Si qui alii sunt horum succorum usus, nondum ii nobis innotuerunt: nullum certe alimentum modo Chymico dissolvendi habere queunt: cum enim omnes, uti dictum est, succi sint vere alcalici, potentia ejusmodi dissolutiva nullo prorsus pacto imbui possunt.

VII. Instat autem ASTRUCIUS septimo, contenditque, "concoctionem (experientia ipsa docente,) horum succorum naturae & quantitati respondere: quippe, si saliva viscosa & glutinosa existat, si bilis in canalibus suis constricta haereat & interclusa, continuo immutari digestionis naturam, indeque fastidia, stomachi gravedinem, pravamque ciborum concoctionem necessario exoriri. Contra vero, succis hisce, pristino more fluentibus, ac naturali suae indoli restitutis, tolli haec omnia, concoctionemque priorem rursus statum obtinere. Ex tam arcto hoc illorum succorum cum concoctione nexu omnino patere, hanc ab illis, tanquam praecipua sua causa, proficisci." At, cohibe te paullum, o bone! An non hic quicumque est nexus, alias locum habere, atque ex alio fonte quam ex fermentatione & solutione Chymica potest provenire? Nonne superius monstravi, salva etiam atque illibata manente triturationis methodo, digestionem, quae alioquin iis sublati facile peraga-

peragatur, ab humoribus gravibus, crassis viscosisque (qualis est ea ipsa, quam tu memoras, saliva vitiata,) in stomachi fundo nimia copia congregatis & haerentibus, posse obstrui, fastidia quoque aliaque id genus mala progigni? Et, si minor bilis copia derivetur, an non chylum perinde minus dilutum fieri; duodeni, & forte ipsius stomachi fibras minus exstimulari; actenuiores adeo purioresque chyli partes a crassiore faece, seu excrementis, difficilius extricari oportet? Et quid ASTRUCIUS amplius postulat?

VIII. Octavo demum observat ASTRUCIUS, " bilis
" canales, qui in aliis duodeno inferuntur, in rapaciori-
" bus animantibus ad stomachi cavitatem recta tendere:
" atque, largo ejusce dissolventis influxui ingentem in iis
" digestionis potentiam refert acceptam. " Quo autem
jure, aut ratione id fecerit, paullo attentius expendat ve-
lim, postquam illi in mentem revocavero, bilem non aci-
dum, sed alcalicum succum esse. Atque inde est, quod
in ventriculo struthiocameli, cujus inter alia meminit
ASTRUCIUS, & id genus rapacibus animalibus, quae
nummos deglutiunt, nullum corrodentis aut dissolventis
succu inveniamus vestigium, in quibus tamen fricationis
attritionisque perspicua se prodant indicia. Iis enim
nummis, quibus alterum latus convexum, alterum vero
concavum habere contingit, quae lateri convexo impri-
muntur notas figurasque detritas cernimus & abrasas,
quum alterius lateris cavitas ab omni fricationis injuria
immunem se intactamque tueatur. At, ASTRUCIUS forte
hanc figurarum abrasionem nummorum potius inter se,
quam adversus ventriculi latera collisioni adscribet.
Quod si hoc illi largiremur, nobis utique satis esset, ex
tanta illa bilis in eorum animalium ventriculos devectae

copia nullum exstare Chymicae corrosionis indicium: liquoris enim corrodentis vis non minus in concavum quam in convexum se latus exfereret. Interea continere me nequeo, quin ASTRUCIUM moneam, etiam in ventriculo humano ejusmodi deprehensam fuisse in unius nummi latere convexo abrasionem, quum lateri concavo nihil detritum appareret. Potiorene igitur jure, digestionis in rapacibus istis animantibus vis major adscribi debet validiori musculorum ventriculi, aliorumque triturationi operantium efficaciae; sive ea a fortiore fibrarum muscularium tono, sive ab uberiore succi nervorum in hisce quam in aliis animalibus derivatione oriatur? Potiusne etiam quae eorum inest ventriculis bilis chylo velocius penitusque diluendo inservierit, quam in aliis animalibus, in quibus ea chylo in duodeno duntaxat commiscetur? vis enim duodeni contractiva, aut (si ita ASTRUCIUS voluerit,) vis digestiva, vi ventriculi, eique auxiliantibus musculis, longe inferior est. Aut, ad summum, potestne ea, sua amaritudine & acrimonia, ventriculi fibras ad se fortius contrahendas relaxandasve ciere? „ At, inquit „ ASTRUCIUS, tanta bilis in ventriculo congregatae „ copia, juxta tuam sententiam, ventriculi aliorumque „ digestionis inservientium musculorum impetum interci- „ perent potius ac eluderent, quam chylo alimentove „ diluendo operam conferrent. „ Minime, inquam: recens quippe bilis a sano sani animalis sanguine continuo derivata, a noxiis istis, quae concoctioni obsunt, qualitatibus est immunis: illud certe malum ab ea duntaxat bile profiscitur, quae vitio sanguinis morbidis animalis corrupta, & in imo stomacho collecta & densata, gravisque ac viscosa reddita haerescit; unde & inepta efficitur, quae facile
aequa-

aequaliterque alimento chylove commisceatur, hoc est, iis diluendis inserviat.

IX. Caeterum, post paginas aliquot, eo consilio infumtas, ut ostenderet, praeter salivam, bilem, succumque pancreaticum, nullam esse causam, cur admittatur *quartus* quidam *liquor*, quem, tanquam praecipuum alimenti fermentum, e fictitiis in interiore ventriculi superficie glandulis secretum, atque eum in usum in ejus cavitatem refusum comminiscuntur quidam auctores; (in quo figmento explodendo ego quidem ac lubens ei adsentior;) tandem pag. 19. ad id examinandum ASTRUCIUS progreditur, in quo praecipua hujus negotii cardo versatur: unde, *scilicet*, eveniat, & quo pacto quaque ratione fiat, ut eadem res, quaecunque demum illa sit, quae alimentum in ventriculo dissolvit aut concoquit, non aeque ac eodem quidem tempore ventriculum ipsum labefactet ac corrumpat. ASTRUCIUS autem contendit, hanc rem Chymica facilius solutione, quam trituratione posse explicari. In prioribus tuarum *Dissertationum* editionibus, duae sunt a te assignatae rationes, cur attritio, quae alimentum dissolvat, non etiam ventriculum ipsum demoliat. Prima est, quod raro ita arcte coeant ventriculi latera, ut se mutuo confricent, quodque ventriculi partes aliae post alias, & alternis quasi vicibus, in alimentum agant; quum eadem partes alimenti unius semper aut alterius ventriculi partis ictibus pateant, donec concoquantur omnes ac expellantur. Atque, haec ratio firma atque inconcussa persistit, quicquid contra ASTRUCIUS obloquatur. Quamvis enim, cum ventriculus cibo penitus est refertus, ita forte distendantur ac expandantur interioris ejus superficiei undulationes, ut omnibus sui punctis

intus clausum alimentum contingat; interim tamen aegrius ac languidius concoctio progreditur, nec ventriculus nimium exporrectus in tantum alimenti pondus ac copiam eo, quo postmodo, vigore agit; cum *scilicet* concoctione ex parte peracta, liberiore jam ac pleniore impetu in minorem, minusque adeo obnitentem alimenti portionem se exserit: & tum quidem, non totus ventriculus; sed, convexae tantum interioris ejus superficiei partes in partes alimenti agunt, earumque actiones sustinent, saltem cum vi aliqua notabili. Partes enim cavae non nisi leniter, & a liquidiore solum chylo, versus latera rejecto, contingi possunt; quando *scilicet* convexae partes propius appulsaе, quod alimenti superest nondum concoctum, arctius stringunt & comminuunt. Neque eadem permanent hae partes convexae; sed, per totam ventriculi superficiem, fluctuum instar, aliae post alias propagantur. Secunda, quam tu protulisti, ratio petita erat a crassitie & firmitate tunicarum ventriculi, quae tantae sunt, ut lateribus suis per se fere ipsas defendere queant, adversus minus crebras, easque tantum alternatim ad alias atque alias ventriculi partes continuatas, laxioris, mollioris, magisque quam ipsae sunt obsequentis substantiae, fricationes; in iis praesertim animalibus, quae alimentum prius dentibus comminuunt, quam actioni ventriculi objectetur. At, in corrodente liquore, seu fermento, longe secus evenire oportet: a perpetuo cujus impetu non firmus partium nexus, non materiae crassitudo incolumem praestare ventriculum potest: fermentum enim non minus facile in crassis robustisque quam in tenuibus & imbecillis corporibus suum semper fortitur effectum. An quicquam hic temere, aut praeter rationem prolatum, quicquamve re-

prehen-

prehensione dignum. ASTRUCIUS offendit? Nempe, *inquit*, " si tanta esset, quantam tu eam praedicas, vis illa, qua ventriculus alimenta comprimit, eam ventriculi tunicas laniaturam esse ac disrupturam; neque ingentem illam, qua tu eas donaveris, firmitatem ac crassitiem eum a certa pernicië tueri posse." Non equidem negaverim, ita eventurum, si ventriculi latera in duram aliquam rigidamque materiam, qua *scilicet* ipsius ictus non minus valide ac obnixe repelleret, tanta vi adigerentur. A molli autem ac cedente alimenti ingenio nihil ejusmodi est metuendum. " Saltem, *subjicit* ASTRUCIUS, quamvis nullum hoc pacto adesset periculum, ne ventriculi tunicas tanta vis laceraret ac diffringeret, fieri tamen non posse, quin perenni illa alimenti etiam mollissimi fricatione leniter ac frustillatim attererentur tandem ac commolerentur." Et id quoque non invitus ei condono: atque ex novae hujus *Dissertationum* tuarum editionis, quas benigne mecum communicasti, schedis, & prius quidem quam in ASTRUCII libellum incidisses, tertiam a te video adjectam rationem, quae huic facile incommodo obviam eatur. Ea autem a nutritione est desumpta, cujus materia novarum indies particularum, seu fibrillarum, earum, quae ex ventriculi laterum, sive in se ipsa, sive in alimentum fricatione deperierant, locum continuo occupantium, uberem fatis copiam suppeditat. Atque hae tres rationes simul junctae, meo quidem judicio, abunde commonstrant, quomodo, servata atque illibata manente triturationis methodo, alimenti concoctio absque ulla ventriculi jactura celebretur.

Neque tamen dubitavit ipse ASTRUCIUS harum postremam (inter alias,) solutioni suae Chymicae suffulciendae

ciendae adhibere: eam saltem ex aequo alterutri opinioni favere contendit. Ego vero, quod ejus pace fiat, longe aliter sentio. In trituratione enim totus ac integer ventriculus in totum ac integrum alimentum, & hoc e contra in illum agit. Quum autem vivi ventriculi unica sit ac firma compages, ex partibus inter se arcte unitis & contextis coagmentata, molles & laxae, nec aliae aliis haerentes alimenti partes nihil aliud quam frustilla parvula ac tenuissima extimis interioris ejus membranae fibris sensim ac minutatim abradere possunt. Caeterum, nemo rerum adeo est imperitus, ut nesciat levia haec damna ab ipsa nutritionis materia facile ac sponte naturae refici ac redintegrari. At, longe dispar est menstruorum Chymicorum ratio: ea enim non totam ac integram corporis alicujus molem afficiunt, neque illud loco pellere aut comprimere conantur, quemadmodum ventriculus alimentum; sed, *particulas tantum minimas, sive ultimae compositionis*, recta invadunt, quas a se mutuo segregare ac dirimere pergunt, donec in prima sua principia corpus resolvatur. Atque huic illorum (uti dicebam,) actioni solidissima quaeque ac firmissima corpora non minus quam tenuissima & maxime debilia sunt obnoxia. Menstruum enim utrislibet circumfusum in utrorumque partes extimas pari facilitate impetum facere, easque ex aequo dissolvere possunt. Ex hac igitur sententia non frustilla tenuissima a ventriculi fibris abradi; sed, fibras ipsas in primigena, ex quibus conflantur, elementa diffuere oportet. Ventriculi quidem fibrae, ob rationes superius allatas, abrasioni minus sunt expositae, eique fortius obnituntur, quam fibrae alimenti: at, vivae ventriculi, non minus quam demortuae alimenti fibrae, solutionem Chymicam subire queunt, prop-

propterea quod harum, juxta ac illarum, particulis minimis eadem sit substantia, inter se nexus. Quod si semel fibrae dissolutae fuerint, vasorum pariter tunicas discindi, quique iis continentur succos erumpere, & proinde totam animalis compagem subverti funditus ac corruere necesse est. Neque nutritionis materia, aut aliud sane quidquam has tristes ruinas amoliri aut reparare potest.

Praeter autem nutritionis materiam, quam ASTRUCIUS, juxta tecum, ad ventriculi damna refarcienda in medium protulit, (quamvis inde Triturationi multum subsidii, nihil vero fermentis posse hauriri, supra me arbitror ostendisse,) tres alias adducit rationes, conjuncta quarum momenta tuis longe praeponderare contendit. At, quam justa eas trutina pensaverit, liceat nobis paullo accuratius examinare.

1. Et primo quidem, " Cum ventriculus est plenus, " dissolventes hos succos a laxa & bibula alimenti substantia ita vult absorberi, ut nullam in ventriculum facere queant impressionem. " Verum, succos hosce alimento, quantum licet, ASTRUCIUS commisceat, fieri tamen nequit, quin hinc inde variisque in locis ventriculum contingant, & non minus quidem arcte quam alimentum ipsum, cujus eum contingunt partes; adeoque pari modo utrumque dissolutioni objiciatur. Atque perpetuum famis sensum (quem in ventriculo etiam pleno, praeter rationem, ut supra monstravi, Triturationi opponit,) a corrode hoc, & ventriculum perpetuo afficiente liquore excitatum, hic profecto locum habere oportet.

2. Quod si vacuus sit ventriculus, gravius adhuc urget hoc incommodum. Sed, neque hic deest aliud ASTRUCIO effugium; *viscida* ei nimirum in promptu est *lym-*

N n

pha,

pha, quam ille corrodentium horumce succorum aciei retundendae aptam comminiscitur; quae scilicet ventriculum non dissolvere, sed, nervos tantum ejus vellicare, famisque adeo sensum ciere queat. At, unde ASTRUCIO haec lympa? An suum ipsi eam cerebrum progenit, rebus postea suis utilem futuram? *Pag.* quidem 18. se, *inquit*, „ in ventriculo canino, cujus utrinque ob-
„ strictum erat orificium; permodicam ejus reperisse co-
„ piam, 15. 18. aut 20. horarum spatio collectam. „
At, quid, obsecro, hoc aliud est, praeter pusillam, tanto licet spatio aggregatam, communis ejus, quae exspiratur, materiae quantitatem, cui obstructis undique viis nullus exitus patebat? Haec sane, si horum succorum aciem retundere, suaeque dissolvendi potentia orbare valeat, magnopere vereor, ne adeo imbecilla sint ASTRUCII fermenta, ut non majus ab illis ipsi alimento quam ventriculo periculum adsit.

3. Tertio autem fatetur ASTRUCIUS, post longa jejunia, penetrantem salivae vim, diutina sua in ventriculo mora in tantum posse augeri, ut *viscidam* hanc *lympham* pertransire tandem, ipsiusque adeo ventriculi tunicis vim inferre queat. Sed, adversus hoc quoque incommodum, tertium sibi comparavit subsidium vir providus, remediumque ab ea ipsa arcessivit causa, unde malum timebatur. „ Violentum *scilicet* famis sensum, quem cient
„ acria illa & molesta ventriculi irritamenta, uberem *ait*
„ novae recentisque salivae secretionem creare, quae vete-
„ ris salivae acrimoniam ac vim corrosivam obtundat
„ prius ac adtemperet, quam quicquam inde damni subo-
„ riatur. „ Sed, quam futes, ASTRUCI, sunt hae, nulloque prorsus fundamento innixae argutationes?

Gerrae

M Gerraе germanae, atque aedepol lirae lirae*.

Nonne hoc pacto quidlibet e quolibet effingere possis? Nova semper in promptu habes effugia, quae non minus dicto sunt audientia, quam recentium quorundam Philosophorum *occultae qualitates & materia subtilis*. Ipse tibi, quibus opus est, succos ad nutum creas, eosque, quantae ex usu sint, viribus imbuis. Ad *viscidam* enim tuam *lympham* quod spectat, eam novimus nihil aliud esse quam communem, quam perspiramus, materiam, quae pro lymphā te fefellit. Nullam autem salivae inesse vim penetrantem, vel ex eo constat, quod illi, ut & aliis omnibus corporis succis, vere alcalica sit natura, quaeque adeo ventriculum neque exstimulare, neque dissolvere possit. Nonne satius, tibi magisque commodum fuisset, ad antiquorum illud *Calidum innatum* confugisse, cuius opera & viribus alimentum concoqueres, quam tanto labore, nihilo plus veri sensus, aut usus in se continentia, tibi vocabula procudisse?

Atque haec ad te scripsi, PITCARNI, ut ostenderem, spernendas esse tibi frivolas ASTRUCII demonstrationes. Sed, me plura scribere parantem deterruit fama, qua moneor, illustrem & principem Medicum *Parisiensem* illum HECQUETUM refellisse nugas ASTRUCII. Non ea mihi contigit adhuc felicitas, HECQUETI librum videre. Sed, non dubito tibi perplaciturum, quod a tanto viro sit profectum.

* PLAUTUS, in Poenulo, *Act. I. Sc. I. Vers. 9.*

F I N I S.

ELEN.

E L E N C H U S O P U S C U L O R U M.

- I. **A**RCHIBALDI PITCARNII Oratio; qua ostenditur,
Medicinam ab omni Philosophorum secta esse liberam; habita
Lugduni Batavorum, Die 26 Aprilis, Anno 1692. Pag. 1
- II. Theoria morborum oculi. 12
- III. *Dissertatio* de circulatione sanguinis per vasa minima, edita
Lugduni Batavorum, Anno 1693. 15
- IV. *Dissertatio* de causis diversae molis, qua fluit sanguis per
pulmonem, natis & non natis, edita 1693. 37
- V. *Dissertatio* de motu, quo cibi in ventriculo rediguntur ad
formam sanguini reficiendo idoneam, edita 1693. 64
- VI. *Solutio problematis* de inventoribus, edita Edinburgi, 1688;
rursus, & auctior, Lugduni Batavorum, 1693. 86
- VII. *Dissertatio* de circulatione sanguinis in animalibus genitis
& non genitis, edita 1693. 105
- VIII. *Dissertatio* de curatione febrium, quae per evacuationes
instituitur, edita Edinburgi, 1695. 121
- IX. *Dissertatio brevis* de opera, quam praestant corpora acida,
vel alcalica, in curatione morborum. 136
- X. *Observationes quaedam* de fluxu menstruo. 145
- XI. De Ingressu morbi, qui *Venerea Lues* vulgo appel-
latur. 157
- XII. De variolis. 161
- XIII. De divisione morborum. 164
- XIV. De Affectione Scorbutica. 166
- XV. *Dissertatio* de Legibus Historiae Naturalis, edita Edin-
burgi, 1696. 177
- XVI. Epistola ad ARCHIBALDUM PITCARNIUM, Sco-
tum, Medicinae Doctorem; qua respondetur libello ASTRUCII,
Franci, Medici, & Academiae Regiae Scientiarum Franciae
Socii. 230

F I N I S.



